

821.512.122.0  
2 55  
к

АРХИВТІК  
ҚОР



М.ƏЛІПХАН

# АБАЙТАНУДЫҢ ӨЗЕКТІ МӘСЕЛЕЛЕРІ

821.5R.122.0

255 к



Мақсат ӘЛІПХАН

# АБАЙТАНУДЫҢ ӨЗЕКТІ МӘСЕЛЕЛЕРІ

Оқулық



Баспасы

Алматы  
2022

ӘОЖ 821.512.122.0

КБЖ 83.3 (5Қаз)

Ә55

*Баспаға Қ.А.Ясауи атындағы  
Халықаралық қазақ-түрік университеті  
Сенат мәжілісінің шешімімен ұсынылған  
(№10 хаттама, 25 мамыр 2022 жыл)*

**Пікір жазғандар:**

ҚР Мемлекеттік сыйлығының иегері, филология ғылымдарының  
докторы, профессор **М. Мырзахметұлы**  
филология ғылымдарының кандидаты **Ж. Шойынбет**

**Әліпхан Мақсат**

Абайтанудың өзекті мәселелері: оқулық / М. Әліпхан. –  
Алматы: Дарын, 2022. – 285 б.

**ISBN 978-601-80925-7-2**

М.Әуезов Абай шығармаларындағы адамгершілік танымына айрықша қызығушылықпен қараған және ақын шығармашылығына қатысты өзінің «Ол адамгершілікті, моральдық философияны барлық жайдан жоғары қояды» деген аса тапқыр түйінін ұсынған. Кейінгі қырық елу жылда М.Мырзахметұлы Абайдағы Толық адам ілімін ғылым мен таным табысына айналдырып, ақындағы адамгершілік ілімнің жүйесі мен желісін жасады, мән-мазмұнын ашып берді. Қолдарыңыздағы оқулықта осы адамдық, адамшылық, адамгершілік – Абай дүниетанымының өзегі мен мәні екені одан әрі айқындала түскен.

Кітап мектеп оқушылары мен жоғары оқу орны студенттеріне, барша ғылым адамдары мен жалпы көзіқарақты қауымға Абайды тану жолында жәрдемші, көмекші бола алады.

ӘОЖ 821.512.122.0

КБЖ 83.3 (5Қаз)

ISBN 978-601-80925-7-2

© Әліпхан М., 2022

© «Дарын баспасы» ЖШС, 2022

---

## КІРІСПЕ

Абайтану пәні Қазақ Мемлекеттік университеті қазақ филологиясы мамандығының студенттеріне ең алғаш 1942 жылы М.Әуезов тарапынан арнайы курс ретінде өтіле бастаған болатын. Сол игі дәстүр жиырма бірінші ғасырда жаңаша түрде жалғасып, өрісін кеңейте түсті. 2008 жылы Абай атындағы ҚазҰПУ-де ректоры С.Прәлиевтің бастамасымен «Абайтану» ғылыми-зерттеу орталығы ашылып, университеттегі барлық факультеттің бірінші курс студенттеріне «Абайтану» пәнін өту қолға алынды және ол бүгінге дейін үзілмей өтіліп келеді. Осы бастама руханиятқа басымдық берген жаңашыл ректор Д.Қожамжарованың шешімімен ОҚМУ қабырғасында да жалғасып, 2018 жылдың қыркүйек айынан бастап университеттегі барлық факультеттің студенттері «Абайтану» сабағы арқылы ақын Абайдың ойшылдық, хакімдік болмысымен танысып, ақиқат пен адамгершіліктің өнегесін меңгере бастаған жайы бар. Абай дүниетанымы мен оның өзіндік Толық адам ілімін танып білу, сөйтіп оны ел игілігіне айналдыру – қазақ руханияты мен ғылымының кезек күттірмейтін зор міндеті. Осы міндеттің орындалуымен қоғамдағы адамгершілік келбеті көркейе түсіп, мемлекеттің де мәртебесі биіктей бермек.

Егемен ел, Тәуелсіз Қазақстанның барлық орта, жоғары оқу орындарында «Абайтану» атты адамгершілік пәні – толық адам, жәуанмәртлік (түркілік адамгершілік ілімі) сабағы жүргізілер болса, бүгінгі шәкірттер мен болашақ мамандардың Абай айтқандай, көкірек көзі ашыла түсіп, адамдық қасиеттері де арта бермек. Шәкәрім ақын жазғандай, «осы дүниеде көзге ілінбейтін кішкентай жандылардан бастап адамдарға шейін бәрі өзі һәм нәсілдерінің жақсылықта болып өсіп-өнуіне қам қылады. Мұны – «барлық таласы» дейді. Бұл жаратылыстың берік жолы... Ақыл

қарауындағы адам толығы барша адамға бақ іздеген болады». Ендеше «тіршілік» пен «барлық таласы» жолындағы даналық пен қайырымдылық әрекетімізді Абай насихаттаған толық адам биігіне ұмтыла жүріп жасағанымыз жөн.

Толық адам ілімі – Абайдың өзіне дейінгі адамгершілік іліміне сүйеніп тапқан, өзі жырлап, өзі негіздеп жасаған төл танымы. Абай ілімінде адам болмысына қатысты ең іргелі, абсолютті ақиқаттар айтылған. Өмір мен ғылымның әр-әр саласында ақиқатқа жетпеген, ақиқатқа айнала қоймаған шикі пайымдаулар мен шала шындықтар жетерлік. Абай ілімінде дін мен сопылық, философия мен ғылымның мәлімет, қағидалары кешенді түрде түгел қамтылып көрініс тапқан. Яғни бәрінің де «илегені бір терінің пұшпағы» екені айқындалған. Абайдағы Толық адам ілімі ең әуелі Қайратты көмекші, жәрдемші етумен Ақыл арқылы жетіле беруді танытады. Адамгершілік жайы Абайда Толық адам ілімі арқылы құбылыс сипатында көрініп, арадағы жәуанмәрттікті өткел етіп, ең түпкі мәні – махаббат пен әділет, ізгілік пен сүюге, яғни жүректің басты қасиеті үш сүю, имани гүлге дейін дамып ұштала береді. Абайда толық адамның мәні мен негізіне бет алған, үңіле түскен белгілі бір осындай жүйе бар. Сол жүйенің жетіле келіп жеткен биігі мен шыңы – сүю, яғни имани гүл. Өмірде адам-пенденің сүйетін қызық, қуаныштартары өте көп болса да, Абай өзі түйіндеп жырлаған, қалыптап жасаған имани гүл, үш сүюі танымы арқылы оқырмандарын Алла мен адамзатты және әділетті сүюге шақырған. Бұл – Абайдағы адамгершілік ілімнің ең биік шыңы. Абайдағы толық адам – тәнімен де, жанымен де жетілудің шыңына жетіп, кемеліне келген адам. Қоғам көркеюінің кепілі мен алғышарты – ондағы әрбір жеке адамның ақылды, арлы, әділетті, ынсапты болуымен айқындалады. Сонда ғана өзара көмек көрсету мақсатымен қауымдасқан осындай абзал адамдардан сапалы да сара, дана, кәсіби де мықты мамандар дайындалып, олар өз кезегінде қоғам мен мемлекет ісін қайырымды да қасиетті қалыпта жүргізетін болады. Нәтижесінде амал мен айла бастаған алдау мен арбау, ашкөздік пен жемқорлық, жауыздық пен қиянаттың жолы пышақ кескендей тыйылады. Міне осындай игілікті мақсат пен міндеттерді көздеген Толық адам ілімі – ұлттық қоғамымыз бен ондағы барша оқушы, тыңдаушы, студент шәкірттерге, сондай-ақ

өмірін мәнді, болмысын асыл етуді қалаған күллі қауымға адамгершілік оқулығындай пайдалы, шипалы, игілікті болмақ.

Абай жұмыр Жердегі қазаққа тиесілі Шыңғыстау өңірінен шығып, адамзаттық ақиқатты айта алған ғажайып тұлға. Абайдағы желілі де жүйелі адамгершілік ілімі – толық адам, жәуанмәртлік, үш сүю ұғым, танымдары арқылы айқындала түсіп, «Абайтанудың өзекті мәселелері» атты осы оқулықтың өн бойында баяндалатын болады.

---

# **I тарау. М.ӘУЕЗОВТІҢ ТОЛЫҚ АДАМ ТАНЫМЫНА БАСТАУ БОЛҒАН ІЗДЕНІСІ**

## **Ақын «Өмірбаянында» баяндалған адамгершілік ой, қалыптар**

Абай жайлы сөз еткенде ойымызға ең әуелі М.Әуезов оралады. Себебі қазақ әдебиеті мен руханиятында Абайды М.Әуезовтен артық білетін адам жоқ. М.Әуезовтің өмірі мен көркемдік және ғылыми шығармашылығы Абаймен тікелей әрі өте тығыз байланысты болып келеді. М.Әуезов – Абай ауылына жақын мандағы Бөрлі елдімекенінде дүниеге келіп, балалық шағы да ақын өмір сүрген табиғат кеңістігі мен әлеуметтік ортада өткен [1, 6-23-б.]. Атасы Әуез Абаймен замандас, сұхбаттас, дастархандас болған адам. Тіпті Мұхтардай немересін атасы Әуез Абайдың үйіне алып барып, ақын әңгімесін Мұхтардай сүйікті немересіне тыңдатқан да болар. Абай дүниеден өтерге дейін бала Мұхтар алты-жеті жаста болатын. Балалықтан бозбалалыққа өтіп, одан да есейе түсіп азамат бола бастағаннан-ақ Мұхтар Әуезов Абай тақырыбына айрықша ден қоя бастаған. Болашақ жазушы әрі ғалым М.Әуезовтің ең алғашқы туындысы – «Адамдық негізі – әйел» [2, 22-24-б.] (1917) деген толғанысы болса, кейінгі мақаласы – Ж.Аймауытовпен бірге жазған «Абайдың өнері һәм қызметі» [3, 94-102-б.] атты еңбегі еді. Кейінгі қырық жылдан асатын ғылыми және көркемдік қызметінің барысында М.Әуезов Абай өмірі мен мұрасын танып білуге орасан зор үлес қосты. Абайдың төрт нұсқадан тұратын ғылыми өмірбаянын [4] жазды. Қазақ Мемлекеттік университеті Қазақ филологиясы мамандығында оқитын студенттерге 1942

жылдан бастап «Абайтану» атты арнайы курстан дәріс оқыды, нәтижесінде дәрістері жинала, толыға келіп, «Абай Құнанбаев» атты ғылыми-зерттеу монографиясына [5] айналды. Төрт кітаптан тұратын «Абай жолы» роман-эпопеясы дүниеге келді. М.Әуезов Абайтану ғылымының негізін қалады. Ақын өмірі мен мұрасын игеруге осылайша орасан мол еңбек еткен М.Әуезовтің ғылыми-шығармашылық ізденістері бүгінде Абайды танымын деген әрбір талапкерге бағыт-бағдар беріп, болашақта олар жасар жаңа танымның бастауы бола алады. М.Мырзахметұлы зерттеп ғылыми айналымға енгізген Абайдағы Толық адам танымын – адамгершілік жайлы өзіндік ілім деп білсек, ақындағы осы адамгершілік тақырыбының айрықша өзекті екенін о баста ғылыми негіздеп танытқан – М.Әуезов. Ол «Абай Құнанбаев» атты зерттеу еңбегінде былай деп жазады: «Ол адамгершілікті, моральдық философияны барлық жайдан жоғары қояды» [5, 179-б.]. Ақын өлеңдері мен қарасөздерін талдап, пайымдап саралау барысында М.Әуезов Абайдағы адамгершілік мәселесіне жиі-жиі соғып отырады. Абай шығармаларында адамгершілік тақырыбының айрықша орын алатынын М.Әуезов әркез әртүрлі ой-пікір, пайымдауларымен жүйелі танытып келген. Осы орайда ғалымның мына ойы Абайдағы адамгершілік тақырыбының өзектілігін әсіресе айқындап аша түседі: «...ұстаздық, әлеуметтік талабының түп мақсаты – жеке адамдарды жаманшылықтарынан арылтып, сол арқылы заманындағы қауым-қоғамын және бар халқын түзетіп өзгертпек болады. Қысқасы, нравственная личность мәселесін бар тартысының, талап-арманының тетігі етеді» [5, 182-б.]. Толық адам танымына негіз болған адамгершілік мәселесі Абай мұрасының өзегі мен дінгегі болғанын байқаймыз. М.Әуезов қолданған «Нравственная личность» ұғым, атауын кейінгі жылдары М.Мырзахметұлы ғылыми айналымға енгізген «Толық адам» тұлғасымен байланыстыруды әбден қисынды көреміз. Яғни М.Мырзахметұлының ыждахатты де меһнатты ізденісі арқылы ғылыми қауым игілігіне айналған Толық адам танымының бастауы – ақын дүниетанымына қатысты М.Әуезов қолданған осы «Нравственная личность» ұғымында жатыр.

Ақын жайлы еңбектерінің бәрінде де М.Әуезов Абайдың адамгершілікке қатысты ой-танымын айрықша атаумен болады.



Өзі жазған сексен-тоқсан беттен тұратын, тіпті алғашқы нұсқаларында жүз беттен асатын «Абай өмірбаянынан» бастап-ақ М.Әуезов болашақ ақынның балалық, жастық кезінен-ақ адамгершілік ұғым, таным мен әрекетке бейімдеу болғанын әртүрлі өзіндік бақылау, пайымдауларымен білдіріп отырады. М.Әуезов жазған өмірбаян бойынша, ақын бала кезінен пайымды, зерек, жақсы адам болып өсуге бейім болған екен. Мысалы, М.Әуезов Абайдың бала кезін былайша суреттейді: «Кішкене кезінде сырт мінез жағынан аңқау, нанғыш және тентек бала болса керек. Бірақ сол кішкене күнінде өзге балалардан ерекше жері – үйге қонған қонақтардың әлдеқалай айтқан ертегі сияқты әңгімелерін құлай тыңдайды» [5, 34-б.]. Байқағанымыздай, кейін келе адамгершілік жайлы жүйелі жырлай бастаған Абай бала кезінде-ақ зерек, білуге құмар, жақсы болмыстың көрінісі іспетті аңқау, нанғыш болыпты. Өсе келе кейін де ақын адамгершілік жайлы ұғым-білім, қасиет-қалыпқа ерекше ой, көңіл көзімен қарағыш, назары ауғыш болып жүреді. Айналасынан адамгершілік қарым-қатынастарды көргіш келеді, әрнәрсені де адамгершілік тұрғысынан бағалай бастайды: «Басында балалығының арқасында сөзге қорғана кіріскен Абай, аз жылдың ішінде үлкен табыс тапқандай болып, адымын ұлғайта береді. Бірнеше жол көріп, көзі қанған соң «пәлен жақсы, түген жақсы» дегендерінің айламенен, қанауменен қиянат болмаса, өзге жалпы білімге, ақыл шалымға, адамгершілікке татымсыз екенін сезеді» [5, 39-б.]. М.Әуезов жазғандай, Абайдың адамгершілікті бәрінен де жоғары қоятыны сол кезде-ақ байқала бастаған. Адамгершілік қасиет – ақынның өмір бойы дәріптеп, насихаттап қана қоймай, өзі де өмірінше ұстанған айнымас қағидасы болғанын көреміз. Өскен ортасы, жүрген айналасы кулау, сұмдау, қиянатшылдау болса да, ақынның өзі бала кезінен-ақ жақсылық пен адалдыққа жақын болып өскен. Абай үшін адамның қасиеті – қара күш пен соған негізделген қиянат, зорлықта емес, мейірім, рақым, әділетте еді. Ақын әркезде де әлсіздің жағында болды, зорлықшыға қашанда қарсы шықты. Өзі бай, бар ортадан шықса да, сол бай адамдардың байлығына сеніп дарақы болған қалпын аямай сынаған, олардың кедейлерге жасаған зорлық пен қиянатына көне алмаған. Көнбек түгілі, қиянат пен қараулық атаулыға бар болмысымен қарсы келіп,

оларды аяусыз әшкерелеумен болған: «Абай сол күндегі «жақсы» дегенде ескі бектік, пандық, қара күш болмаса, нағыз адамгершілік, шын талант қасиет аз екенін әшкерелей бастайды» [5, 41-б.]. Абайдың өзі қарасөзінде жазғандай, әкесінің баласы – адамның дұшпаны болмай, адамның баласы – бауыры болады [6, 135-б.]. Мұның бәрі де Абайдың балалық, жастық шағынан-ақ адамгершіліккесүйеніп өмір сүрген танытады. Абай көрген-білгенінің бәрін де адамгершілік қасиеттің қалыбымен таразылайды. Осындай адамдық болмысыменоның әкесіне де қарсы келіп қалатын кезі болады. Жәнеоның мұндай әрекеті ақылға жетіп болмаған балалық, шалалықтан ғана туып қоймай, адамгершілік қасиетті бәрінен де жоғары қойып пір тұтқан саналы болмысынан болатын. Абай адамгершілік қалып пен қасиетті барша өмірінің мақсат-мұратына балаған, жақсы адам болуға берік бекініп қадам басқан: «Өзі туралы «елге пайдалы, адамгершілігі бар, әділ басшы болсам ғана жақсы адам боламын» деп есептейді» [5, 43-б.]. Ақын осы бір абзал арман-мұратынан өмірінше айнымай өтеді. М.Әуезовтің өзі де Абайдың осы адамгершілік жолдыберік ұстанғанын үнемі атап отырады: «Абай елдің ішіндегі әділдікті, тура жолды бағатын кісі болады. Шын ел қамқоры болған адамгершілік, кісілік тұтқасы Абай болады» [5, 50-б.]. Ақынөмірбаянын әңгімелегенде М.Әуезов үнемі Абайдың адамгершілік қасиеттері мен ұстанымына ерекше мән беріп отырады. Шығармаларында адамгершілікті жүйелі насихатаған Абайдың өз өмірімен де адамгершілікті болғанын көреміз. Болмысында болмағанды, тегінде жоқты ақынның өзі де өмірінде ұстанып, шығармаларында айтып, жаза алмас та еді. Бүгінге дейін ұрпағына ақылшы болғанАбай көзі тірісінде-ақ қауымы мен айналасына ұстаздық ойларын аянбай ұсынумен келген. Абайды ұстаз тұтқан Ахмет Байтұрсынов өзін «адамдық диханшысы»деп білсе, ал Абайды адамдықтың бағбанындай, мүсіншісіндей көреміз. Ақын заманындағы көзіқарақты қауым оның сөзі мен өсиетіне иек арту арқылы өздеріне өмірлік бағыт-бағдар тапқан, адамшылық болмыстарын түзеп, жетілдірумен болған. М.Әуезов Абайдың елі үшін жасаған осындай игілікті ықпалын да назардан тыс қалдырмаған: «Абайдың ауылы үлкен білгіштің медресесі сияқты болады. Абай ұстаз да, мұның алдына келген сөз ұғатын талапты жастарының бәрі де – шәкірт. Абай іні,

бала, ағайындарына дос, жастарға мағыналы тәрбиеші бола бастайды. Енді осы ұғатын жастарды жаңа жолмен, өзі хиял қылған өнер-білімге, жаңа сапалы адамгершілікке қарай жетектеп, баулығысы келеді» [5, 64-б.]. Міне ақын арманы осындай өрелі де асқақ болғанын байқаймыз. М.Әуезовтің осындағы «жаңа сапалы адамгершілік» деген ой, түйіні кейінгі заманда М.Мырзахметұлы зерттеп ғылыми айналымға енгізген Толық адам танымына ұласқан. Жалпы адамгершілік тақырыбы мен танымына қатысты ой, түйіннің бәрі де Толық адам ұғымынан ұзап кетпейді. Абайдың да, оның төрт нұсқадан тұратын ғылыми өмірбаянын жазған М.Әуезовтің де назары осы асыл адамгершілік жайына жиі ауып отырады. Содан-ақ адамгершілік мәселесі ақын өмірі мен өнерінің өзегі болғанын болжауға болады. Ақын өмірбаянын оның бала кезінен өмірден өткен шағына шейін жүйелі әңгімелеп жеткізген М.Әуезов Абай өмірінің қайғылы соңғы сәтін сөз еткенде де, Мағауияның мезгілсіз қазасымен байланыстырып, сүйікті баласы ұстанған адамгершілік қалыпты былайша танытады: «Мағауия әке ұғымынша да және өз ортасының бағалауынша да Абайдың барлық баласының ең жақсысы, ең ірісі деп саналған... Елде отырып Европа тәрбиесін алған адамдардай ақыл, мінез, адамшылығы түгелімен мәдениетті кісінің халінде болған» [5, 82-б.]. Байқағанымыздай, Абайдың өмір жолы мен ойлаған ойында адамгершілік әркезде де негізгі өлшем мен басты дінгек болып отырған. Қашанда өз өмірі арқылы адамгершілікті биік қойған Абай өлең, қарасөздерімен де адамгершілікті өз насихатының негізгі арнасы мен мазмұны еткен және адамгершілікті өмірінше ықыласпен жүйелі жырлап өткен.

### **Өлеңдері арқылы түйінделген адамгершілік ойлар**

М.Әуезов Абайды жан-жақты танытқан монографиялық еңбегінде ақын өлеңдерін жазылған жылдары бойынша талдайды. Яғни ақын өлеңдерін ең алғаш жазылған «Иузи – раушаннан» (1858) бастап 1902-1903 жылдардың туындысы

«Алланың өзі де рас, сөзі де рас» өлеңіне дейін хронологиялық әдіспен саралап береді. М.Әуезов мұнда да Толық адам танымына бастау болар адамгершілік жайлы ойларға көбірек көңіл бөлген. Ақынның 20-25 жасында жазған өлеңі – «Сап-сап, көңілім, сап, көңілім». Бұл өлең – лирикалық кейіпкердің өзі мен өзі қатарлас құрбыларын баянсыз, бағасыз жігітшілік жеңіл жортуылдарынан тыйып, оларға адамшылықты дәріптеген ойларын айтуымен құнды. Жастық, жігіттік шақтағы сүю мен махаббат әрекеттері сүйіскен жастардың жекелік жеңіл сезімдерімен ғана шектелмей, адамдық, азаматтық қасиетпен де қабысып жатса, қадір-қасиеті арта түспек. Абай бұл өлеңінде сол шақтағы өзіндей құрбыларын саликалы да есті тірлікке шақырады. Өлеңдегі сөйлеуші, өнеге айтушы жастың (ақынның) әрекетінен М.Әуезов жоғары саналы ой-ниетті таниды: «Опасыз жас болмау керек, тандап сүйген біреуі ғана бар тең сезімге табынған жақсы жастың адамгершілік пен махаббатты қабыстырамын деген ниеті көрінеді» [5, 100-б.]. Өлеңдегі лирикалық кейіпкер өз рахатын ғана көздеп сүюші, тек қызыққуған жас емес, ол – жас та болса өз әрекетін ақылмен, адамгершілікпен қабыстыра алатын адам. Жастық шақ пен махаббат сезімінің көбіне өзіндік бір рахат, қызық, қуанышпен байланысты болатыны бар. Ал ақын өлеңіндегі жас жігіттің жағдайы мен сезімі басқашалау, биіктеу көрінеді, яғни жеке қызығынан адамшылықты артық санаған қалпымен ізгілеу. Мұны М.Әуезов өзіне тән байқағыштықпен дәл таныған: «Ендігі түсінігі бойынша, махаббат, жастықты сөз қылатын ақын құр құмарлық қызығын шала-шалағай күйде жырламай, адамгершілік тәрбиесін өсіріп, асырғандай, моральдық жоғары дәрежеде түсініп жырласын» [5, 100-б.] дейді. Абай «Йузи – рәушан», «Фзули, Шәмси», «Әлифби» өлеңдерінен кейін таза, анық қазақ тілінде жазылған осы алғашқы өлеңімен-ақ өзінің адамгершілік ұстанымын таныта бастаған. Отау құрып үй болуды ойлаған боз бала, жас жігітке ақын ең әуелі қыздың қалың малын беріп, болашақ жарын көркі мен тегіне қарай дұрыс тандап, оны толық танып барып табысуын кеңес етеді. М.Әуезовтің ақын өлеңіне берген бұл бағасы мен пікірі өте тапқыр айтылған. «Сап-сап, көңілім, сап, көңілім» өлеңінде айтылғаноқиға, әрекеттер мен

ақыл-кеңестер жастарды өз махаббаттарын мәнді де адамгершілікті етуге үйретеді.

М.Әуезов әр қилы тақырыпта жазылған ақын өлеңдерін ой-пікір, идея, көркемдігі жағынан талдай келіп, «Жасымда ғылым бар деп ескермедім» өлеңін саралаған тұста елеулі пікір ұсынған: «Бұл шығарма енді халықтың адамгершілік, ағартушылық жөнінде үлкен қияға қарай жол тартқан жаңа ақынның ашық бейнесін көрсете бастайды» [5, 110-б.]. Абай бұған дейін ғашықтық, сұлулық, аңшылық тақырыбындағы өлеңдерін жазып келген еді. Ал аталған бұл өлеңінде ғылым жайлы жаңа ойын айтуға көшкен. Сауатсыздық жайлап, оқу-білімнен сырт қалған ел ішінде ғылым табуды сөз ете насихаттау үлкен жетістік болатын. Жәнебілім-ғылымды жалаң сөз етпей, ұрпақ қамы мен ел болашағы, халық пайдасы тұрғысынан жырлап, адамгершілікті өсіре танытар ойларын айтады. Әлеумет пен ел, келер ұрпақтың қамы, адамдық белгісі мен ғылым жайы – бәрі де адамгершілікті жасаушы және адамгершілікке ұласар ұғымдар. Ғылымның өзі де – адамдықпен сабақтас ұғым, ал оның қадір-қасиетін шынайы танып-білу мен сезіну – адамдықтың жетіліп өсуіне бастайды. Кісінің өзіне қалағанды өзгеге де болсын деп тілей алуы – зор қайырымдылық. Осы орайда Абай өз өлеңінде ізгілікті әрі өте дұрыс мақсат қояды:

Баламды медресеге біл деп бердім,  
Қызмет қылсын, шен алсын деп бермедім [7, 22-б.].

Мұнда ақын қарасөзінде кейіндеу таратылып сөз болатын ғылымнан келер жанама пайданы көздеуден тыс оның өзін ғана сүю әрекеті бар, жалғыз ғана «білсем» деген айқын мақсат бар, бағасыз, баянсыз бос қызықтан бас тарту бар, өзінің адамдық, азаматтық болмыс жағынан толысып өскендігін сезіну мен онысын орынды мойындап білу бар.

М.Әуезов ендігі кезекте ақынның адамгершілікке жанасатын ойларын оның «Ғылым таппай мақтанба» өлеңін талдаған тұсында тұжырымдап береді. Атап айтарлық бір жай – М.Әуезов ақынның бұл өлеңін айрықша жоғары бағалап, ол жайлы «ел ішіндегі жас желеңге Абайдың әсіресе көп ой қорытып айтқан мағыналы және програмдық бір өлеңі осы деуге болады» [5, 121-

б.] деп салиқалы пікір білдіреді. Ақын бұл өлеңінде негізінен ғылымды насихаттайды, анығырақ айтар болсақ, ғылымды насихаттағандай болып көрінеді. Шындығы да солай. Тек бүгінгі оқырманға бөлектеу көрінетін ғылым мен адамдық жайы – Абай ұғымында бір нәрсе. 38-қарасөзінде ғылым жайлы ақынның былай деп жазатыны бар: «Ғылым – алланың бір сипаты, ол хақиқат, оған ғашықтық өзі де хақлық һәм адамдық дүр» [6, 137-б.]. Яғни ғылымды насихаттау – түптеп келгенде адамдық пен адамгершілікті насихаттау болып шығады. Оның үстіне бұл өлең абайтанушы М.Мырзахметұлының жазғанындай, ғылым жайын айта отырып «адам болам десеңіз», яғни адам болудың шарттарын сөз етеді. Жақсыны көре біліп, оған ықыласпен ұмтылу, жаманнан қашып, одан жирене тартыну – тамыры терең тәрбие саласының қашанғы қалыпты, үйреншікті жолы. Мұндай екі түрлі әрекеттің адамгершілік жағынан жетілуде айрықша міндетті болар белестер екенін білген жөн. Абайдың өзі де кейінгі ой қорытуларында жақсыға жету жолында әуелі жаманның залалын жоюды үнемі айқындап айтумен болады. Мысалы «Алланың өзі де рас, сөзі де рас» өлеңінде иманның асылы – Алланы, адамзатты және әділетті сүюді үлгі-өнеге етумен бірге, бұларға бағытталған дұрыс беталысты бұзатын пайда, мақтан, әуесқойдан сақтандыруды да ұмытпайды. Сондай-ақ 38-қарасөзінде Алла, әлем, адам, иман жайынан кең толғап келіп, осылардан шығарып түйіндеген жауанмәртлік ілімі – ақыл, әділет, рақым қасиеттері арқылы адам тұлғасы абзал, асыл болмысқа айналатынын түйіндейді де, артынша осындай асыл жолда зияны мен кесірі тиер надандық, еріншектік, залымдық атты үш кеселді де айтып өтеді. Және Абай әр-әр тұста «көкіректі тазалау керек» деген қағидалы кеңесін айтып отыруды ұмытпайды. Мұның бәрі де екі жақты (рухани, тәни) қоспа саналатын адам болмысындағының баршасы сәйкесінше қос сипатты болып келетінін ескергендік, білгендік болып табылады. Яғни «Ғылым таппай мақтанба» өлеңінде айтылғандай, өсек, өтірік, мақтаншақ, еріншек, бекер мал шашпақ секілді бес дұшпаннан құтылмай, арылмай тұрып, талап, еңбек, терең ой, қанағат, рақым атты бес асыл қасиетті ділге дарытып баянды ету қиын болады әрі жарым-жартылай жартыкеш жүзеге асады.

Бұдан өзге де адам болу шарттары бұл өлеңде «адам болам десеңіз» деген арнайы мақсатпен жүйелі жырланған.

«Ғылым таппай мақтанба» өлеңінде ғалым болу мен адам болумақсаты бір-бірімен тығыз қабысып, терең сабақтаса жырланған. «Хауаси хамса заһири» – сыртқы бес сезім мүшесін, естіген нәрсені ұмытпау, есті болу, ғылым-білім үйренудің шарттарын, жан құмары, жан қуаттарын ақын болудың үстіне ғылым адамы ретінде де тереңдеп танытатын Абай ғылым мен адамдықты төркіні бір туыс, ортақ ұғымдар деп қарайды. Мысалы, «махаббат – әуел адамның адамдығы, ғақыл, ғылым деген нәрселербірлән» [6, 136-б.], «Қашан бір бала ғылым, білімді махаббатпенен көксерлік болса, сонда ғана оның аты адам болады» [6, 136-б.], «Ғылым – алланың бір сипаты, ол хақиқат, оған ғашықтық өзі де хақлық һәм адамдық дүр» [6, 137-б.], «Бұл ғаделет, махаббат сезім кімде көбірек болса, ол кісі ғалым, сол – ғақыл» [6, 164-б.] деген секілді ой-пікірлерімен Абай ғылым мен адамдықтың өзара тығыз табысып, бекем байланған байланысын байқатып отырады. М.Әуезов те Абай ойының үстінен түскендей-ақ жас адамның ғылымды меңгеруін оның адам болуымен сабақтастыра танытады: «...ғылым тапқан жас болса, ірі адамгершілікке ие болсын, азамат деп айтарлық ар иесі болсын. Ол – шын мағынадағы қасиетке жетуге талпыну керек. Сондықтан ойы жетіп, адамдығы өскен жас өзінің досы деп бес асылды тандасын дейді... арлы адамгершіліктің сипаттарын санайды» [5, 122-б.]. Абай өз өлеңін «Ғылым таппай мақтанба» деп бастай отырып, негізінде «адам болам десеңіз» деген мақсатты көздегенін М.Әуезов өте орынды аңғарған, әрі осы орайдағы ойларын да адамгершілік тұрғысынан танытқан. Шындап келгенде бұл өлеңдегі ақынның басты мақсаты – ғылым жайын айтумен бастағанымен, негізі, жастарға адам болу мен адамгершілік сырын танытып, оларды сол жолға салып жіберу болған:

Бес нәрседен қашық бол,  
Бес нәрсеге асық бол –  
Адам болам десеңіз [7, 41-б.].

Өлеңдегі өзге ақыл-кеңестің бәрі де осы түбірлі ойды жүзеге асырудың амал, тәсілдері түрінде келеді. Ақынның Ғұламаһи Дауаниден оқып тапқан әрі қазақ жастарына жеткізбек болған басты ой қазынасы да – өсер-өнер ұрпағын «бес дұшпаннан» қашық етіп, «бес асыл іске» асық ету, іңкәр ету болған. Бұл – адамгершілік жағынан жетілу мен кемелдену ілімінде орындалуы шарт саналатын екі міндетті белес пен зор талап болып табылады.

Осы өлеңіндеақынның адам болу жолында әсіресе ғылым мен ақыл жайын жиі қайталап, бекіте беруідеорынды әрі қисынды. Абай мұны кейінгі өлеңдері мен қарасөздеріндегі хауас ілімі, таным сыры жайлы айтқан ойларымен нақтылап, шегелей түседі. Дүниеге келген баланың ең әуелі тән саулығы мен хауас салым, хауаси хамса заһири, одан әріжақсыата-ана, жақсы құрбы, жақсы ұстаз арқылы арналы айқын жолға түсіп, түрлі ғылым салалары арқылы хақиқатқа – адамдыққа бет алу әрекетін Абай барша шығармашылығымен ізерлеп танытқан. Асыл мұрат, зор мақсат – хақ жолы – адамдыққа бет алу әрекеті ең әуелі сырттан келер «жан тамағы» адамның ішкі әлеміне бастап апарар «бес есік» – бес сезім мүшесі арқылы түйсік түрінде қабылданып, көкірек, көңіл, ішкі әлемге енеді, одан әрі ес, болжау, қиялдау, ойлау арқылы ақылға айналып, одан дәрі адамдық, хақиқат, хаққа қарай биіктеп кемелдене береді. Байқасақ, адамдыққа жетуде білім-ғылым мен ақылдың алар орны орасан зор екен. «Алла деген сөз жеңіл» өлеңінде Абай «жүректің ақыл суаты» дегенде, хақ пен хақиқат саналар Аллаға, яғни ақиқат пен адамдыққа бастайтын жүрекке – ақыл ақиқатты танытар суат ретінде қызмет етеді деген ойды аңғартады. Ақылсыз тану жоқ, танусыз сүю де болмайды: «...бәлки сұңғатынан себебін білмекке құмарлықтан саниғна ғашықтық шығар. Құдай тағаланың затына пендесінің ақылы жетпесе, дәл сондай ғашықпын демек те орынсыз» [6, 197-б.]. Абайдың өз өлеңін ғылым жайынан бастап, ақыл мен «ақыл – мизан өлшеу қыл» туралы көп айтуының осындай терең сыры бар. Абай «зерек ақылды»- «әуелде бір суық мұз» деп, әрі жаманның да іздегенін тауып беретін ақылдың айнығыш әрекетіне көңілі толмай қарауының астарында ақылдың осындай теңдесі жоқ тану, мизан, таразы болу сипатын мойындау да бар. Өлең мазмұнынан осындай терең ой астарлары танылып тұрады. Абайдың осы өлеңі жайлы М.Әуезовтің «ой жағынан көрнекті



біреуі», «әсіресе көп ой қорытып айтқан мағыналы және програмдық бір өлеңі» деп түйін жасауы тегін емес екен. Әрі өлеңде айтылған түпкі ойды адамгершілікпен қабыстыра таныту – М.Әуезов ойының көрегендігін көрсетеді. Ғалымның жол-жөнекей айтыла салғандай көрінетін ағымдағы ойлары да қорғасындай салмақты болып келеді. Мысалы, ақынның «Интернатта оқып жүр» өлеңінің жас жеткіншек оқушылар тобына, ал «Ғылым таппай мақтанба» шығармасының өзі үміт еткен өскелең ойлы жасқа арналатынын айтуы да М.Әуезовтің білгірлігін аңғартады.

М.Әуезовтің Абай өлеңдерін жазылған жылдары бойынша рет-ретімен талдайтыны жоғарыда айтылды, енді сол талдауының барысында ғалым Абайдың әр өлеңі арқылы тақырып пен ой, идея мен ақындық шеберлік, көркемдік қырлары жағынан қаншалық өсе түсіп еңбек ете алғанын да ізерлей танытады. Сонда М.Әуезов Абай өлеңдерінде қоғамдық мін мен кемшіліктерді сынаған сарынның соншалық мол ұшырайтынын жиі айтады. Абайдың жаңашыл, реалист ақын болумен бірге, ауыз толтырыпайтарлықтай сыншыл ақын атануы тегін емес. Абай – мәселе мен құбылысты көріп-білуі мен тануы және мақсат-мұраты мен ойы жөнінен мейлінше биіктеп кеткен аса ойшыл тұлға. Ойы мен танымы тереңдеп, ортасынан да озыңқырап кеткен тұлғаның адам мен заман, күллі қоғам бойынан көп кемшіліктер тауып, танып отыруы – қалыпты жағдай. Содан да Абай шығармаларында осы қоғамдық кемшілік пен мінездегі мол мінді әшкерелеген, сынаған туындылар басым болып келеді. Осы орайда М.Әуезов шегініс жасап, біраз келелі түйіндеулерін айтады. Абай ақындығының ерекшелігі мен шығармаларындағы адамгершілік ілімді тануда бұл түйіндеулерінің берер танымдық, тағылымдық мәні аса зор. Абай «Өлең сөздің патшасы, сөз сарасы» өлеңінде «сөз түзелді, тыңдаушы, сен де түзел» дегенінде, өзінің бұрынғы ақын, айтушылардай шектеулі емес, ақыл-ой, танымы мен мақсат-мұраты жағынан бөлекше биіктеп кеткен ақын екенін сезініп білу бар. Әрі ақынның басты мақсат-мұраты – айналасындағы тыңдаушы қауым мен жалпы қазақ қоғамын білім-ғылым, ақыл-ой, әсіресе адамгершілік биігіне тарту болды. Осы жолда ақын «әрбір көркем терең ойлы шығармасын әлеуметтік тартыстың үлкен бір құралы» [5, 111-б.]

есебінде жұмсаған. Ақындағы сол құралдың (өлең, қарасөзінің) қызметін М.Әуезов былайша терең толғанып танытыпты: «Өзінің ендігі сөзі қоғамды, халықты түзейтін үлкен күш деп түсінді. Өсиет өлең халық дертінің, тарих қайшылықтарының бәрін емдеп, тазартатын өзгеше құрал деп біледі. Ал Абайдың үгіттейтіні зор адамгершілік пен халықшыл тазалық жолдар болғандықтан, өз заманындағы барлық мінді, сорақылықты сол тура жолдағы жақсы өлең-өсиетпен түгел жойып, жоғалтуға болады деп иланады» [5, 131-б.]. Ғалымның осы пікірінен Абайдың басты мақсаты аңғарылады, ол – «зор адамгершілік пен халықшыл тазалық жолдар». Байыптап байқасақ, Абай тамыры тереңде жатқан дәстүрлі адамгершілік ілімінің қағидалы жолын ұстанушы, насихаттаушы ойшыл ақын екен. Ол бұрынырақта (1886) жазған «Ғылым таппай мақтанба» өлеңінде-ақ «адам болудың шарты – «бес нәрседен қашық бол, бес нәрсеге асық бол» екенін түйіндеп айтқан болатын. Осы ойдың өрісін кеңейтетүсіп таныр болсақ, қашық болатын бес нәрсе – өсек, өтірік, мақтаншақ, еріншек, бекер мал шашпақпен біргесол «заманындағы барлық мін мен сорақылықтар» да, асыл болатын бес нәрсе – талап, енбек, терең ой, қанағат, рақыммен бірге – «зор адамгершілік пен барша халықшыл тазалық жолдар». Ақынның мұраты – қазақ қауымын, жалпы адамзатты жаманшылықтан арылтып, жақсылыққа жақындату, яғни адамгершілікке тәрбиелеу болған. М.Әуезов жазғандай, Абай «адамгершілік, ар, ақтық деген сияқты қасиеттерді тәрбиемен көпке жайса, өмір де, қоғам да, халық тағдыры да өзгеріп, түзеліп кететіндей көреді» [5, 131-б.]. М.Әуезов адамзат қоғамының болмысы мен даму заңдылығын, өзіндік ерекшелігін сұңғылалықпен тани алған ғұлама ойшыл. Жоғарыда айтылғандай, Абай ойлаған ой М.Әуезовтің пікірінше, бүкіл дүние ақындары мен ойшылдарының және бұрынғы орыс классиктерінің, әлеумет қайраткерлерінің де, бәрінің басынан кешкен ортақ жәй [5, 131-б.]. Демек қоғамды адамгершілікті насихаттау арқылы жөндемек болған Абай ниеті мен әрекеті философ Қ.Бейсембиев жазып кеткендей [8, 89-с.], ақынға қатысты зор кемшілік емес екен, әрі Абай түйген пайым – барша озық ойлы саңлақтардың ежелден ұстанған қалыпты жолы екен. М.Әуезов түйіндеп жазғандай, «адам баласындағы ұждан, орысша айтқанда, нравственность мәселесі

орнына келіп, толып жетсе, сонымен қауым, қоғам тірлігі, тарихы өзгеріп, жақсы боп кетеді деген ойды бұрынғы идеалистік жолдағы ойшылдар мен қайраткерлердің бәрі де ойлаған. Адамгершілік түзелумен тарих түзеледі деген көзқарас Маркске шейінгі дүние жүзілік ұлы адамдардың бәрі де ден қойған шешім болатын [5, 131-б.]. Абай да осы ойшылдардың қатарынан табылып, өз қауымын адамгершілікті жүйелі де желілі жырлап насихаттау арқылы жөндемек болған. М.Әуезов түйіндеген осы пікір Абайды тек бірыңғай адамгершілікті ғана жырлаумен болып, қоғамдық прогрестің нақты жолын ұсына алмады деп кінәлаушыларға қарсы айтылған дәлелді жауап, орынды уәж болуға жарайды. Абайдың өмір сүрген ортасы мен заманы өз қауымын нақты әрекет пен қарулы көтеріліске бастайтындай жағдайда емес еді. Абайға өзі өмір сүрген нақты тарихи-әлеуметтік, саяси-экономикалық жағдайында мүмкін болмаған талапты қою – зорлық әрі білместік дер едік. Мұнымыз – кенесшіл әрі саясатшыл Қ.Бейсембиев [8] секілді ғалымдардың пікіріне қатысты айтылған ойымыз. Абай ұстанған бағыт, яғни адамгершілікті дәріптей жырлау жолы бұрынғы-соңғы ой-таным тарихында ең берісі К.Маркс ашқан экономикалық жаңалыққа дейін өзекті де орынды болғаны байқалады. Яғни К.Маркс қана экономикалық болмысының негізі, қалыбы өзгермей, қоғамдық салт-саналық күйлердің өзгеріп, толмайтынын ашып берген [5, 131-б.]. Экономика ғылымның танытуы бойынша, қандай дабір өнім – өндіріс құралдары мен өндіріс күштерінің қатынасы арқылы пайда болады. Яғни еңбек етуші күш – өндіріс заттары мен өндіріс құралдарын пайдалану арқылы өнім жасап шығарады. Ақын қисыны бойынша, еңбек етуші адам өзі әркез тікелей әрі табиғи жағдайда байланыста болып, қарым-қатынас жасайтын еңбек заттары мен еңбек құралдарына қожалық етуі тиіс әрі өзі мен өндіріс құралдары арқылы жасалған игілікке де өзінің иелігі басым болуға лайық. Алайда шынайы өмірде бұл басқаша болып келді, яғни өнім жасауға негіз болатын жер мен өндіріс заттары, завод, фабрикалар еңбек етуші шаруа мен жұмысшының иелігінде болмай, құл иеленуші, помещик пен капиталистің меншігінде болды. Ақын ойы мен қисыны бойынша айқындалған әділет шын өмірде осылайша бұрмаланды. Өндіріс заттары мен құралдарына осылайша еңбексіз түрде иелік жасап

меншікті ету жағдайы талай әлеуметтік теңсіздік пен қиянаттың бастауына айналды. Л.Толстой «Так что же нам делать?» деп аталатын көлемді трактатында былай деп жазыпты: *«Прежде пользовались трудом других прямо насилем, рабством; в наше время и в нашем мире это делается посредством собственности. Собственность в наше время есть и источник страданий людей, имеющих или лишенных ее, и укоров совести людей, злоупотребляющих ею, и опасности за столкновение между имеющими избыток ее и лишенными ее. И собственность есть в наше время то самое, на что направлена почти вся деятельность нашего современного общества, то, что руководит почти всей деятельностью нашего мира. Государства – правительства интригуют и воюют из-за собственности: берегов Рейна, земли в Африке, в Китае, земли на Балканском полуострове. Банкиры, торговцы, фабриканты, землевладельцы трудятся, хитрят, мучаются и мучают из-за собственности; чиновники, ремесленники, землевладельцы бьются, обманывают, угнетают, страдают из-за собственности; суды, полиция охраняют собственность. Собственность есть корень всего зла; распределением, обеспечением собственности занят почти весь мир. ...собственность есть только средство пользования трудом других [9, 312-313-б.].* Л.Толстой залалы мен кеселін осылайша тарата айтқан жеке меншік құбылысы – әсіресе шаруашылық пен экономикаға қатысты көрінетін ұғым мен тетік. Материалдық заттар мен тұрмысқа тәуелді болып, соларға бекем байланған өмір, сана мен мінез-құлық – қанау мен қиянатқа бастау болатын экономика болмысының жеке меншік негізіне сүйенген жүйесімен жалғаса жүріп бұзыла береді. Өндіріс заттары мен құралдарының, сондай-ақ өнімнің шын иесі болуға лайық әрі тиісті еңбектенуші адам жеке меншікке сүйенген экономикалық жүйенің кемшілігі мен кесірінен анық, айқын әділетсіздік пен теңсіздікке ұшырап сыртта қала береді де, адал еңбегінің жемісін көре алмайды. Және мұндай жүйе мен жағдайда түрлі арамтамақтар мен өзгенің еңбегін жейтін паразиттер (қанаушылар) пайда бола кетіп, олар өз кезегінде қоғамдағы қиянатты еселеп көбейте түседі. Ал қиянаттың зияны мен залалын Абай қанын ағыза отырып әбден әшкерелеп берген: *«Бұл қиянатшылар – жарым адам, жарым молла, жарым мұсылман. Олардың адамшылығының кәмәлат*

таппағы – қиынның қиыны. Себебі алла тағала өзі – хақиқат жолы. Хақиқат бірлән растық – қиянаттың дұшпаны...» [6, 137-б.]. Қиянатшылдықтың кеселді залалын «Қайырымды қала» жайлы трактатында Әл-Фараби бабамыз да ашына ызаланып жазғаны бар [10, 280-281-б.]. Қоғам мен ондағы саяси-экономикалық жүйе және биліктегі қиянат пен әділетсіздікті жақтаушы барша қалып пен тәртіп бірігіп алып тастүйін болып тұрғанда, Абай мұндай зор қоғамдық құрылымды өзінің бар болғаны рухани жеке тұлға, ақын ғана болған мүмкіндігі шектеулі болған қалпында қалай жөндей алсын. Содан да бұрынғы-соңғы барша ойшылдар жүрген жолменен Абай да «адамгершілік түзелумен тарих та түзеледі деген көзқараста» болған. Және ақынның бұл ұстанымы мен әрекеті – қалыптасқан жағдайдағы өте өнімді де жауынгер жол болған. Саяси-экономикалық салаға тікелей қатысы жоқ рухани тұлға саналатын ақында өз ақыл-ойы арқылы жеткен игілікті арманын шындыққа айналдырып өмірлі етіп аларлықтай күш-қуат пен мүмкіндік болмаған, «әркімді заман сүйремек, заманды қай жан билемек» деп өзі түйген қағидаға Абай да амалсыз көнген. Жоғарыда келтірілген ой-толғау, түйіндеуімен М.Әуезов Абайды әсіре қызыл, асыра сілтегіш кейбір ғалымдардың әділетсіз сынынан арашалап алғандай көрінеді. Адамгершілік қалыпты жетілдіру жолы арқылы қоғамды өркендетіп өзгертуді ойлағандар тарихта аз болмаған, Абай да сол қатар, сол топ ішінен табылыпәлеуметтік күреске түскен, өзіне лайық ақындық, ұстаздық қызметін атқарған. Ал қоғамды нақты әрекет пен қарулы көтеріліс арқылы өзгертпек болғандар өте сирек және олар үнемі жеңіске де жете бермеген. Оның үстіне адамгершілікті насихаттаған ойшылдар қиянатпен астасып кететін қарулы көтерілісті ақылға қонымды көрмеген. Міне осындай жағдайда Абай ұстанған жол – нағыз тура, әбден оңды жол демеске лаж жоқ. М.Әуезов жазғандай, Абай «өзінің барлық шыншыл, әділетшіл қажырлы еңбегімен, өлең ұстаздығымен заманын түзеп алады екенмін деп түсінеді» [5, 132-б.]. М.Әуезов – ақын ұстанған жолды терістемейді, қайта қолдаған кейіп танытады. Ол Абайды «өз еңбегін сондайлық ұлы жолдағы үлкен адам мүддесі бар, ерекше еңбек деп түсінген» [5, 132-б.] адам деп біледі. Абай «Өлең – сөздің патшасы, сөз сарасы» өлеңінде айтылғандай,

«байшыл, әкімшіл, жағымпаз, сұрамсақ, тілемсек ақын болмады, қайта қара қылды қақ бөлетін әрі әділі мен ақиқатын айтатын шыншыл да ойшыл ақын болған.

М.Әуезов – шын мәнінде ғұлама ғалым. Ол тұжырымдап, түйіндеп берген ой-пікірлер мейлінше шынайы әрі мәселенің мәні мен байыбын барынша терең танытады. Сөйте тұра М.Әуезовтің де кейде Абайға қатысты қатал пікірбілдіріп қоятыны бар. Мысалы, 1889 жылы жазылған «Қараша, желтоқсанмен сол бір екі ай» өлеңін ой-пікір, идея, салт-саналық жағынан соншалық тапқыр талдай келіп, ғалымның Абайға кінә тағып өтетін тұсы бар. Абайдың өлең соңындағы «...Бір қыс сақта, тас болма сен де о құрлы» деген бейбіт бітім сөзіне М.Әуезов «кедейге сол ауыртпалық халден шығар жолын атай алмайды» [5, 152-б.] дейді. Біздіңше, бұл – ақынның өмір сүрген жағдайы мен ортасын, заманы мен жүйесін ескермей, Абайға қатысты айтылған артық талаптай көрінеді. Дәл Абай өлеңінде айтылғандай «көңін әрең сүйреп жүрген кедей байғұс» жағдайын жөндеу жолында не жасай алар еді? Абай түгілі, М.Әуезовтің өзі де заманы мен жағдайы, сол кезеңдегі жүйеге байланысты тілін тістеумен жүріп, ішкі шын ойын ашып айта алмаған болар, содан да ішіндегісін түрлі амал, тәсілмен жеткізбек болғаны әрекеті шығар. «Тас түскен жеріне ауыр» деген сөздің мәні өте терең, сырттан бақылағандар түскен тастың ауырлығы мен зардабын өз басынан кешкендей анық ақиқат қалпында тани алмаса керек. Біздіңше, Абай – өзінің азаматтық, адамдық, ақындық, ойшылдық міндетін асыра орындап өткен тұлға. Мүмкін М.Әуезов Абайға қатысты ащылау, артықтау сынды заманының жағдайына бейімделіп, кезең идеологиясына икемделіп амалсыз айтқан да болар. Онысын артынша Абайды түсіне қараған ойынан байқауға болады: «...Абай өзінің заманында еңбекші елдің тартысы қалай болу керек екенін атап бере алмады. Оның тарихтық, таптық тұрғыдан қарағанда, тар көлемді болған болмыс шындыққа байланысты екендігі түсінікті... Әрине, Абай ол заманда жаңағы оның озғындап жеткен жерінен артықты талап ету мүмкін де емес» [5, 152-б.]. М.Әуезовтің осы бір түйінді пікірін Абайды танудағы өте озық ой деп білеміз. Әйтпесе философ ғалым Қ.Бейсембиевтің Абайды талай тұста жазықсыз кінәлап, ақын жеткен биіктікті лайығынша бағаламай қомсынғаны да болған [8,

45-с., 47-с., 48-49-с., 52-53-с., 58-59-с., 78-с., 81-с., 139-с.]. Ондай ғалымдар заманы мен жүйесінің жаршысы болса, М.Әуезов қай заманда да ақиқатын айта алатын айқын ойлы, сергек саналы ғалым еді.

М.Әуезов Абайға арналған монографиясын талай жылдар толғанып, ойланып келіп, әбден негіздеп, ой-пікірлерін шындық шыңына жеткізіп барып айтқаны көрінеді. Ғалымның Абай жайлы монографиясын оның желілі де жүйелі ойынан ажырап қалмай оқи келе, кейбір келелі ойлары тұсында өзіміз де ортаға ой салысып өтсек артық болмас. Мысалы, ғалым Абайдың «Бай сейілді» өлеңін салт-саналық тұрғыдан пайымдай келіп, ақынның «бейілі дұрыс, момын байларға» бүйрегі бұра сөйлейтініне көңілі толмайды, тіпті оны «айқын тұрған қайшылық» [5, 150-б.] деп бағалайды. Абай заманы мен біз өмір сүріп отырған кезеңнің арасында әжептәуір ұқсастық бар. Біздердің соңғы кездерде Абайға көбірек көңіл бөлігіш болып кетуіміздің орайлы жөні бар. Себебі Абай мінеп-сынап, әшкерелей жырлаған өмір шындығы мен заман жайы, ондағы адам болмысы мен мінезінің кемшілігі біздің заманға да ортақ. Өйткені өмір сүрген ортамыз бен жағдай, жүйеміз ұқсас, тіпті бірдей. Абай заманындағыдай біздер де тұрмыс-тірлік пен өмір шындығына капиталистік қарым-қатынастар ене бастаған кезеңде өмір сүрудеміз. Екі кезеңнің мазмұны ортақ болса да, айырмашылығы – Абай заманының жүйелі де табиғи, тарихи эволюциялық жолмен келіп, ал біздікі бір кезде еріксіз тастап, аттап кетіп, жетпіс жылдық социалистік жүйеден кейін қайта құрудың жетегімен, әрі биліктің де ықпалымен кері қайтып, Абай заманындағыдай капитализммен қайта қауышуымызда болып тұр. Ақша мен товар, пайда мен бәсеке, амал-айла мен затшылдық үстемдік еткен заманда Абай айтқан мына сөз бізге де біршама қатысты көрінеді:

Ақылды деп, арлы деп, ақ пейіл деп,  
Мақтамайды ешкімді бұл күнде көп [7, 198-б.]

Әлеумет пен бұқара халықтың қамын жеуді өзінің атауымен-ақ танытып тұратын социалистік жүйеде жүрсек, ақын ойын түсіне алмай, «мұнысы несі екен» деп қалар едік. Әрі Абайдың: «...бір қыс сақта, тас болма сен де о құрлы» деп, байды

қайырымға шақырып, бай мен кедейдің екі арасына бітімші болуын да мүмкін еместей көрер едік. Енді өзіміз де капиталистік қарым-қатынастың ішіне етене еніп кетіп, кітаптағы емес, шын, тірі байларды көріп ойымызда өзгеріс пайда болғандай. Бұлайша ой өрбітуімізге М.Әуезовтің байлар жайлы мына түйіндеуі түрткі болғандай: «халыққа оларды қас етіп отырған жеке бастарының мінездері ғана емес, байлыққа сүйенген үстемдік пен қанаушылық емеспе?» [5, 154-б.]. Өте орынды айтылған тапқыр түйін! Дүние-байлық біткен адамдардың болмысы соншалық нашар, жексұрын болмауы әбден мүмкін. Бірақ бірте-бірте біте бастаған сол байлық немесе аз күнде «құдай бере салған» дүние-байлық адам болмысы мен мінезін тасты тескен тамшыдай біртіндеп бұза бастайды. Абай мұны былайша танытады: «ол мал көбейсе малшыларға бақтырмақ, өздері етке, қымызға тойып, сұлуды жайлап, жүйрікті байлап отырмақ. Қыстауы тарлық қылса, арызы жеткендік, сыйы өткендік, барлық қызметімен біреудің қыстауын сатып алмақ, ептепалмақ, тартып алмақ» [6, 97-98-б.]. Міне, дүние-байлық біткен адамның негізі мен тіні шала, тегі төмен, ақылы мен қасиеті кем болса, осылайша байлыққа кенелген болмысымен өзгелерге «үстемдік пен қанаушылық» жасауға біртіндеп бой алдыра бастайды. Бұл Абай айтқандай, әрі бұрынғы-соңғы ойшылдар да түйіндегендей, адам жаратылысының екі жақты қоспа болмысы мен тән құмарын артық көріп, өзімшіл болған пиғылына байланысты пайда болатын кемшілік. Күллі көпшілік, әсіресе тән мен жанның жайлы күйі мен рахатын сезініп, соған бауыр басып қалған байлар өздері жеткен байлығы арқылы «шыққан шыңынан» түскісі келмей, әділет пен ақылдың талабын орындай бермейді. Жағдайы мен мүмкіндігінің үнемі бар, бай болып, сол байлығы таусылмай, үздіксіз көбейе беруін қалайды. Адамзаттық өре мен халықтық мүдде санаулы саңлақтарда ғана ұшырайды. Будда, Конфуций, Иса, Мұхаммед пайғамбар, Толстой секілді санаулы ғана саңлақтар – өзімшіл, пенде, ақылсыз, әділетсіз адамзатқа қалайша жаппай жол бола алсын. Оған үстем топ пен қанаушылар қауымы жол да бермес. Шоқан, Абай, Мағжан, М.Әуезов секілді бар, бай ортадан шығып, әрі өздері бар, бай бола жүріп жәбір көрген мұқтаж кедейдің, еңбекші елдің мүддесін жеке басынан биік, жоғары қоятындар өмірде кемде-кем. М.Әуезов Абайды



«Бай сейілді» өлеңі арқылы сынап отырып, өзі де барларды, байларды Абайша «түсінген», «мойындаған» кейіп танытады. Яғни М.Әуезов жазғандай, байларды халыққа жағымсыз, қас етіп көрсететін олардың жеке бастарының мінездері ғана емес, байлыққа сүйенген үстемдік, қанаушылық [5, 154-б.] қалпы. Адамдарды, оның ішінде әсіресе байларды осылайша «ақтап алуға» болар. Әйтсе де Л.Толстой, Абай, Шәкәрімдер тірек еткен әділет пен ақылға сүйеніп өмір сүрер болса, жалпы адам баласы да, оның ішінде байлар да жексұрын, жеккөрінішті болмас еді. Өз басымыз Абайды қолдап, «малға дос» надан байлардың арасында да «бейілі дұрыс, момын байлар», қиянаты кем, қайырымы бар байлар да ұшырайтынын мойындаймыз. Барлық пен байлық – жақсылық, егер олар ізгілік пен игілікке қызмет етер болса, бай болудың еш айыбы жоқ демекпіз. Әр нәрсенің де жәй көз бен үстірт өреге байқала бермейтін осындай нәзік, шетін шындық, асыл ақиқатын М.Әуезовше тани білгенге не жетсін.

М.Әуезов ақын өлеңдерін жазылған жылдары бойынша әрі эволюциялық ілгерілеуімен санасып сөз еткенде, ыңғайы келіп қалған сәттерде Толық адам танымына сабақтасар я жол сілтер адамгершілік жайлы ойларын үнемі айтып отырады. Мысалы, 1891 жылы туған өлеңдер жайын айтып келіп, «Жастықтың оты жалындап» өлеңіне ауысар алдында осындағы ақын арманын ғалым былайша жеткізеді: «Ақынның мораль философиясы ретінде айтқан көп сөздері адамшылықты сипаттайды. Сол адамшылықтың ақын өзі ұғынған айнымас шындық қасиеттерін айтады. Сондай ойларының көбі – жастарға өсиет, афоризм сияқты боп мол тараған» [5, 156-б.]. Ғалым осы ойы арқылы Абайда мораль философиясы өзекті болғанын танытып отыр. Әрі М.Әуезов кейіннен М.Мырзахметұлы зерттеуінің нәтижесі арқылы игілігімізге айналған Абайдағы Толық адам атты адамгершілік ілімін өз кезінде-ақ көрегендікпен болжай алғанын байқатады. Мұны ғалымның «сол адамшылықтың ақын өзі ұғынған айнымас шындық қасиеттерін айтады» [5, 156-б.] деген түйіндеуінен аңғаруға болады. Негізі, М.Әуезов – К.Ысқақұлынан басталатын Абайдағы адамгершілік тақырыбының өзектілігін өз тарапынан бекіте түсіп, оны қалыпты қағидаға айналдырған ғалым болды. К.Ысқақұлы 1909 жылы шыққан Абай жинағындағы мақаласында былай деп жазған болатын:

«Абай... өзінің білгенін, сезгенін айтып, адамның адамшылығы қандай мінезбенен түзеледі, қандай қылықпен бұзылады... әйтеуір не түрлі насихатпенен болсын жастарға ғибрат болып, адамшылығы түзелер деген сөзді айтып отырудан қанша уақыт болса да еш жалықпай, ынталы көңілмен бек рахаттанып айтып, ұқтырып отырушы еді... Абайдың өміріндегі ең жақсы көретіні таза көңіл мен достық еді» [11, 48-49-бб.]. М.Әуезовтің өзі де 1918 жылы Ж.Аймауытовпен бірігіп жазған мақаласында Абай өмірі мен шығармаларында адамгершіліктің елеулі орын алатынын ерте аңғарған: «Абайдың ақындық өнері тар жолды, бір беткей емес, һәр тараулы, сегіз қырлы, – дей келіп, ең әуелі ақынның адамгершілікті жырлаған қырын алғаш атап танытады – ол тараулар мынау: мінез түзететіндік (ахлақи)...» [3, 96-б.].

М.Әуезов Абай шығармашылығына қатысты адамгершілік жайлы ойларын әр-әр тұста жүйелі түрде айтып отырады. Соның бірі – Абайдың інісі Оспан өліміне қатысты өлеңдерін бағалаған тұсынан көрінеді. Абай інісіне арнаған өлеңдерінде М.Әуезов түйіндегендей, Оспанды «бай едің», «бағлан едің» демей, қайта «адам едің», «адамдық қадірің басқадан бөлек еді» деп, інісінің адамдық қасиетін жоқтаған ойларын көп айтады» [5, 159-б.]. Адам әдетте өз ақыл-ойы, жан-жүрегі, бар болмысымен жақын тұтқан аңсаулы нәрсесін ерекше ықыласпен алғаш атайды және оны әркез ойға алып отырады. Яғни Абай адамды оның өзіндік мәні мен шын өзегі саналатын адамшылық қасиеті үшін айрықша ардақтаған. М.Әуезов – сұңғыла ойшыл, Абайға қатысты мәселеде ол өте байқампаз болған. Мысалы, М.Әуезовтің ақын өлеңдеріне қатысты «моральдық мәні бар өсиет» [5, 159-б.] ұғымын ауызға алуы да үлкен білгірлік. Бір жағы, шын, нағыз ақылды адам айтқан өсиет сөздердің мораль, адамгершілікпен жанаспай айтылуы сирек нәрсе. Ойлы адам әр нәрсенің де түбін, ақырын айқын аңғарып, әрі бар нәрсенің бәрінен де кемшілігін тани алуға бейім келеді. Әрі онысы белгілі бір нәрсе мен құбылыстан, адам баласынан әйтеуір бір кемшілік тауып көру де емес, өмірдегі адамға қатысты мінез бен тірлікте кемеліне келмей, тіпті кері кетіп жататын кемшіліктің өте мол болатын жағдайынан. Сондайда ақынның жаманшылық, кемшілік атаулыға көңілі толмай, ащы ызаға берілетіні де жиі ұшырайды. Сондағы ақын ызасын М.Әуезов былайша сипаттаған: «Сол ыза

– өмірге сырт қараудың ызасы емес, қайта өмірді түзеп алып жаңғырту, жайнату жолындағы алысушының ызасы» [5, 160-б.]. Мұның да ар жағында ақынның адамгершілікті жетілдірмек болған ойы мен әрекеті аңғарылады. Осылайша Абайдың түпкі арман-мұраты да көзіқарақты оқырманға мәлім болып қалады. Өмір мен дүние, әлемдегінің бәрі де адам болмысы мен өмірінен бастау алып, онымен байланысып барып, белгілі бір мән-мағынаға ие болады. Ал адам үшін Алланың қалауы, Абайша айтқанда Құдай жолы – адамдығы мен адамгершілігінен артық, асыл киелі қасиет жоқ.

«Әсемпаз болма, әрнеге» өлеңі кейінірек абайтанушы ғалым М.Мырзахметұлы оның жаңалықты мән-мазмұнын айқындап танытқанындай, адамгершілік ілімі Толық адамға қатысы бар мәнді өлең. Оны М.Әуезов «қазақтың әр буын жастарына нақыл, афоризм болып тараған шебер өлең» [5, 161-б.]. деп атапты. М.Мырзахметұлы бұл өлеңді толық адам жайлы жырлаған туынды ретінде санаса, М.Әуезов кейіндеу қолданысқа енген бұл толық адамды өз кезінде «қоғамдық тілекке қадірлі, қасиетті адам» деп айқындапты. Әрі бұл өлеңде адамгершілік қағидалары аталатынын түйіндеген. Осы өлеңді талдау тұсында М.Әуезов ақында адамгершілікті жырлауда арналы, мақсатты арман-мұраты болғанын атап өтеді. М.Әуезов толық адам жайлы танымды өз зерттеуінде арнайы категория немесе мәнді мәселе етіп ауызға алмаса да, Абайдың аталған өлеңінде өнегелі адам тәрбиелеудің насихаты мол болғанын өте орынды байқаған. Әрі осы тектес ақынның өзге туындыларындағы мақсатты мұратын да танытады: «Әрбір ұстаздық сөздің үлкен адамгершілік негіз, қасиеттерін терең түрдегі мораль философиясымен байланыстыра айтады. Жалғыз ғана өлендері емес, Абайдың қарасөздерінде, «Масғұт» сияқты дидактикалық өсиет поэмасында да біз осы жолды ақынның өзіне ең бір айнымас арна етіп алғанын байқаймыз» [5, 161-162-бб.]. Сірә, М.Әуезовтің «осы жолды» дегенінен кейіннен ғалым М.Мырзахметұлы айқындай танытып ғылыми айналысқа енгізген Абайдағы «Толық адам» атты арналы адамгершілік ілімді, төркіні терең танымды ұғамыз. Әрі осы адамгершілік ілімі ақынның барша шығармаларына ортақ айрықша арна болғаны да көрінеді. М.Әуезов өзінен кейіндеу жалғасып, М.Мырзахметұлының зерттеуі арқылы мәлім болатын

ақындағы өзіндік адамгершілік танымның алғашқы қарасын, бастау болар негізін танытып, оны тезистік түрде бекітіп кеткендей көрінеді. Біз Абайға қатысты ой-пікір айтуда ерікті-еріксіз түрде М.Әуезовті қайталауға жиі баратынымызды үнемі айтамыз. Себебі уақыт өте келе кейіндеу айтылатын жаңалықты деген пікірлердің, зерттеулердің бастауы мен негізі үнемі М.Әуезовтен табылып отырады. Мысалы, ғалым М.Мырзахметұлының Әбдірахманды ақын өлеңдеріндегі толық адамның өмірдегі өкілі, көрінісі санаған жаңалықты жақсы пікірі М.Әуезовтің мына ойынан бастау алатындай көрінеді: «Өлеңіндегі жәй хаттан, жәй бір үй ішілік бас уайымынан өзгеше тұратын бір сарын сол – қайғырушы әкенің адамгершілік сипатын танытуында» [5, 162-б.]. Абайдың Әбдірахман науқасы мен өліміне байланысты біршама өлеңдерінде адамгершілік болмыс пен адамгершілік қасиеттердің толыққанды жиыны көрініс тапқан. М.Әуезов сірә, осыны мезгеп отырғандай. М.Әуезовтің пікірінше, Әбдірахман жайлы өлеңдерден сүйікті баланың адамгершілік қасиетімен бірге қайғырушы гуманист әкенің де адамгершілік асыл болмысы танылады. Әбдірахман – Абайдың сүйікті ұлы болумен бірге, әке тарапынан жасалған мақсатты тәрбиенің де жемісі болатын. Абай өзінің өмірдегі әрі өнердегі адамгершілік өнегесін түгелдей Әбдірахман бойына көшіріп бере салғандай көрінеді. Әбдірахман – шын мәнінде «білім мен талап және ірі мағынадағы адамгершілік қасиеттердің» [5, 162-б.] иесі болған жан.

М.Әуезов Абайдың Әбдірахманға қатысты өлеңдері тұсында дінге көбірек беріліп, дін адамы ретінде танылатынын жазады. Негізі, шынайы нағыз діннің – адамгершілік пен хақиқат екенін бұрынғы-соңғы ойшылдардың ізімен Абай да, Шәкәрім де жақсы танытқан. М.Әуезов дінге қатысты кейбір пікірінде Абай заманындағы исламшыл дін басылардың, апологеттердің ұғымындағы ресми дінді ойға алып сөйлесе керек. Оның үстіне дін мен өнер, оның ішінде өлең – қоғамдық сананың әр түрлі салалары. Ақиқатты айтуда олардың әдіс-тәсіл, сырт стилі әртүрлі көрінгенімен, «илегені бір терінің пұшпағы» дегендей, түпкі мақсаттары ортақ. Әйтсе де М.Әуезов осы орайдағы пікірін нәзік иірімдерін таныта терең жеткізеді: «Кейде оның діні шартты түрдегі, тек адамгершілік мақсатына ғана арналған дін

болатыны бар. Бірақ осылардың бәрімен қатар Абай кейде алланы, пайғамбарды аузына жиі алып отырады» [5, 163-б.]. Абай дінді мешітте жүріп кәсіп етпей, оны өзінің ішкі шынайы нанымына, жүрек сүюіне айналдырған саналы да иманды тұлға. М.Әуезов түйіндегендей, Абай өлеңді кәсіп етіп, сол өлеңін «әлеуметтік тартыстың үлкен бір құралы» [5, 111-б.], адамгершілік тәрбиесінің насихатшысы есебінде көрген ойшыл ақын. Яғни Абай өзінің адамгершілік танымын бірыңғай дін жолы, дін қағидаларымен емес, өзі шын мәніндегі өнер дәрежесіне көтерген өлеңі, қарасөзі арқылы насихаттады. Осы тұрғыдан келгенде, Абайдың діни мазмұндағы ойлары оның адамгершілік насихатына жәрдемші ретінде жұмсалатыны рас. Ақиқатында діннің әуелгі хақиқат пен асыл адамгершілік екені де талассыз. Тек Абайдың молда, имам емес, зайырлы қалыптағы ойшыл ақын екенін ескеріп барып, жоғарыдағы М.Әуезов пікірін дұрыс қабылдай аламыз. Әрі Абай ақыл-ойды көбірек тұтынып, діннің қағидалы, қалыпты шек, шекарасынан шығыңқырап кетеді. Абайдың бұл әрекеті Алланы тануда, иман жайлы ой толғауында анық байқалады. Бірақ бәрібір Абай Алланы шын мойындап, дінді ұстануда өзгелерден көп ілгері кетіп, озып, биіктеп кеткен.

Біз Абайдың «Лай суға май бітпес қой өткенге» өлеңін өте мәнді туынды санаймыз. Оның адамгершілік тақырыбымен тікелей сабақтасатынын да болжаймыз. Абай бұл өлеңінде Алланы ақылмен тануға көп күш салады. Өлеңдегі ақынның бұл әрекеті ұзақ жолды жүріп өтумен қалыптасқан мол мазмұнымен, кенжелік-кемелділік түйіндеулерімен толығып берілген. М.Әуезов ислам үгітшілерінің иландырған өсиеттері бойынша, «алланы оның жаратқан пендесі ақылмен түсінем десе, адасады» деген қағидасына Абайды қарсы келген адам ретінде танытады: «Өзі сыншыл, өзі шын ақылы жеткенге ғана тоқтайтын ақын жаңағы дін ұстаздарының «тоқта» деген жеріне тоқтамайды» [5, 165-б.]. М.Әуезов Абайдың дініне қатысты өзінің атақты тезисін осы арада түйіндейді. Абай дін ісінде, Алланы танып мойындауда иланушы, сенуші, қабыл алушы ғана емес, яғни наным, сенім иесі ғана емес, ақыл мен ойдың да белсенді иесі болып көрінеді. Абай өзінің ақыл-ой, танымы жөнінен көптің бірі емес, таңдаулы топтың өкілі, сирек ұшырайтын якини иман жолындағы

мұсылман. Абай бұл өлеңінде ақыл мен ойына ерік беріп, әрлі-бері шарқ ұрып ізденуімен, кейінгі «Алла деген сөз жеңіл» өлеңі емес, осы өлеңінің тұсында-ақ өзінің тұғырлы ой табысын танытады. Барша игілік атаулының бастауы мен өсіп-өнер мекені – өмір десек, Абай сол өмірдің басталуы да, аяқталуы да Алланың еркінде деп біледі. Осыны мойындаған жан тірлікте Алладан тыс титтей де нәрсе бар деп ойламайды. Абайдың Алла жайлы танымсыз, тоқтаусыз ойларының түпкі нәтижесі осындай ойға, анығы, ішкі нанымға алып келсе, демек Абай тура жолда болғаны. М.Әуезов те «Абайдың діні – ақылдың, сыншыл ойдың діні болуға бет алады» [5, 165-б.] дегенде, Абайдың діндегі басты ұстанымы таным емес, наным-сенім екенін, алайда оған ақыл, ойын тұтынып жұмсаумен жеткенін ескерген. Яғни Абайдың иманы – өзі 13-қарасөзінде танытатын тақлиди иман емес, ақыл-оймен жететін якини иман. Қалың көпшілік пен ислам схоластикасы жолындағылар ғылымы кемдігі себепті тақлиди иманды ұстанса, Абай секілді таңдаулылар дін, Алла хақиқатына Иесі берген ақыл-ойын жұмсап барып жеткен. Яғни Абай «Лай суға май бітпес қой өткенге» өлеңі арқылы якини иманның иесі болуға бет алған. Өйткені Абай көптің қатарынан ойы да, ақылы да асып, озып кетуі себепті олардан тым биіктей түсіп, бөлектене бастаған. Өзі 18-қарасөзінде жазғандай, адам адамнан ақылы, ғылымы, мінезі, ары арқылы озбақ [6, 114-б.].

Біз М.Әуезов «Лай суға май бітпес қой өткенге» өлеңін тағы бір зер сала оқып көрер ме еді деп ойлап қоямыз. М.Әуезов Алла, дін ұғымдарымен тығыз байланысты бұл өлеңді өз кезеңінің түсінік, танымы тұрғысынан талдап таныған деп ойлаймыз. Ақыл-ой өрісін қасақана шектеп қойған заман өтіп, ойға еркіндік туған бүгінгі таңда толғанар болса, М.Әуезов бұл өлең жайлы бірталай тың да тосын ойлар айтар еді-ау деп шамалаймыз. Біразымыз осы өлеңді сан рет оқыдық, түсінуге, тануға тырыстық. Өлеңді бұған дейін айтылған өзге пікірлерге алаңдамай өзімізше оқып танымақ болсақ, «адасамыз-ау» деп қауіптенетініміз де болады. Абайтанудағы биік шындырымыз М.Әуезов пен М.Мырзахметұлының мысы басып, тартыншақтай беретініміз де бар. Ардақты екі ғалым ата, ағаларымыздың ой-пікірлерін қадірлей отырып, өлең жайлы өзімізше ой түйіп көрейік. Алғашқы шумақ ақылды, ойлы адамның тынымсыз ойлауы мен

тапқан, жеткен ойына қанағаттанбауын, ең қалаулы, арманды ой нәтижесіне әлі де жете алмай қиналуын тұрмыстық теңеулермен қарапайым да шебер танытқан. Ақынның халі тоғытқан қойлары әлдеқашан қайтып кеткен тоған басынан қойдың майы мен етін дәметіп, бірақ оны таба алмай әуреге түскен қасқыр әрекетіне теңеледі. Көңілі мен ақыл-ойыөзі күткен қалаулы нәтижеге жетіп тиянақ таба алмайды. Өз-өзін осыншалық әуреге салып қойғанына «берген бе тәңірім саған өзге туыс», елде жоқ әрекетке ұмтылған өз жаратылысын Жаратушы өзіндей өзге қауымнан бөлек етіп жаратқан ба деп, кең әлемнен ойы мен көңіліне лайықты азық пенжұбаныш, тірек пен тұрақ, алданыш етерлік нысана таппай қиналады. Себебі өлең иесі Абайдың өзі әрі өлеңіндегі лирикалық кейіпкері де ақыл танырлық барша нәрсе мен құбылыстарды танып біткендей болып, я танып білгеніне қанағаттанбай келіп, маңдайы тасқа тигендей күй кешеді. Сөйтіп келіп тумысынан саналы, о бастан пайымды ақын айрықша ақылды, өзгеше ойлы түйінін өз-өзіне келіп алып негізгі мәселеге көшкен үшінші шумағы тұсында айтып салады:

Күні-түні ойымда бір-ақ тәңірі,  
Өзіне құмар қылған оның әмірі.  
Халлақам мақлұқ ақылы жете алмайды,  
Оймен білген нәрсенің бәрі – дәһрі [7, 176-б.].

Алғашқы екі тармақ жайлы М.Әуезов «солай деумен алласына бас иген пендесін танытады» [5, 165-б.] деп жазады. Біздіңше, Абай «алласына бас иген» болмысын танытқанда да, Аллаға деген нанымын, сенімін ғана байқатып қоймай, өресі жеткенше оқып, ой танытумен де Алланың әлем мен адамды жаратудағы хикметі, ғылымы, шеберлігі, құдіретіне таң қалып мойындауын да көрсетеді. Осы өлеңін жазған 1895 жылдары Абай қарасөздерін де жазып жүрген. 38-қарасөзінде Абай Алланың әмірін танытар ғылым, құдіреті жайлы былай деп жазады: «Ол ғылым құдіретте ешбір ниһаятсыз (шексіз), ғылымында ғафлят (қапы қалу), құдіретінде епсіздік және нашарлық жоқ. Саниғын сұнатына қарап білесіз. Бұл көзге көрінген, көңілге сезілген ғаламды қандай хикмет бірлән жарастырып, қандай құдіретбірлән орналастырған, еш адам

ұғлының ақылы жетпейді» [6, 140-б.]. Міне, осылайша ойлау мен тану және сезіну шыңына жеткен Абай Алланы мойындауда ең биікте тұр дей аламыз. Осындай биік дәреже, деңгейге жеткен жанға «ислам үгітшілері иландырған өсиеттер» әсте өлшеу бола алмайды. Оның үстіне Абай Алланы ақылмен түсінем деп адаспайды. Абай жоғарыдағы шумағында осы орайдағы нанымын анық танытқан: «Халлақкам (Жаратушыны) мақлұқ ақылы жете алмайды, оймен білген нәрсенің бәрі де – дәһрі» [7, 176-б], дінсіз, адасу деп, Алланы ақылмен тануды терістейді. Ақын сөзінен байқайтынымыз, Аллаға қатысты ақиқатты оймен, ақылмен білмек болу – дінсіздік болумен бірге оңбай адасу, зор күпірлік. Себебі Алла серігі, ұқсасы жоқ, болмысы беймәлім, тәнсіз, рухи болмыс, адам ақылы тани алмастай беймәлім құбылыс. Адам ақылы хауаси хамса заһири (бес сезім мүшесі) арқылы нақты заттық, дүниелік нәрселерді танудан бастап, Алланың өзін емес, тек жасағандарын ғана хал-қадерінше танып-білумен шектеледі. Абайдың «Саниғын сұнатына қарап білесіз», яғни жасаушыны жасағанына қарап білесіз дегенінің мәнісі – осы. Оның үстіне Абайдың «Алла тағала өлшеусіз, біздің ақылымыз – өлшеулі, Өлшеулі бірлән өлшеусізді білуге болмайды» [6, 139-б] деген байыпты түйіндеуі тағы бар. Міне осылайша ойлап, танып пайымдаған, нанып сенген Абайды кейбіреулер жете, терең тани алмай жүргеніндей, дін талабының шегінен шығыңқырап кеткен деуге келмейді. М.Әуезовтің «исләмнің үгітшілері иландырған өсиеттер», «дін атынан айтылатын зорлыққа көне алмай шығады», «исләм схоластикасы көзімен қарағанда» деген қолданыстарындағы мазмұннан анық дін ақиқаты емес, ресми дін үгітшілері мен қызметшілерінің шала, үстірт, қасаң діні танылады. Абай сол қасаң, шала дін иелері тұрғысынан күпірлік жасағандай болып көрінсе де, таза, анық діннің ақиқатымен ақын терең әрі тығыз қабысады. М.Әуезов жазғандай, өзі сыншыл, өзі шын ақылы жеткенге ғана тоқтайтын Абай дін ұстаздарының «тоқта» деген жеріне тоқтамай» [5, 165-б.], соңына дейін шідер үзіп кетпейді. Жоғарыдағы үшінші шумақта-ақ Абай Алланы тануда өзінің және ақыл-ойының да қауқарсыз, қабілетсіз екенін анық, айқын мойындаған. Бірақ ақын Алланың берген зор қасиеті – ақылы мен ойын ең мәнді, ең маңызды, киелі де қасиетті Алланы тануға



катысты тұтынбай, пайдаланбай, жұмсамай тағы да тұра алмайды. Бірақ Абайдың бұл әрекеті оның адам, пенде ретіндегі болмысына әбден сыйымды нәрсе, қайта ұйқы, тамақ, ойын-сауық, той-қызық, дүние-байлық, мақтан, қызмет-мансап – адам абыройы мен өмір мәні жолында құндылығы соншалық төмен я шамалы ғана неше түрлі нәрселер жайлы ойлап келіп, және олардың соңдарына шырақ ала түсіп жүріп, біздерге мекен берген, адам етіп жаратқан, қадірлі еткен, артық еткен, асыл еткен, ал өзі мекенсіз қалған Түп Иені танымақ болып ойламау нағыз күпірлік емес пе?! Бастауымыз, төркіміз – Алла және барар, қайтар, оралар жеріміз де – Өзі болған Алланы ойламай, бағасы көп төмен өзге нәрселермен жұбанып, алданып жүріп қалу көңілге де, ақылға да қона ма екен?! Сондықтан Абайдың дәл осы өлеңінен кемшілік іздеу – бекершілік, қиянат сияқты көрінеді. М.Әуезов анық дін ақиқаты емес, ресми, схоластикалық дін үгітшілерінің талабынан шығып, солардың өлшемімен Абайды әрлі-берлі «сілкілеп» көреді де, артынан бұл әрекетін ақтаудың нәтижесі ретінде өзінің өте өрелі де түйінді тезисін ұсынады: «Абайдың діні – ақылдың, сыншыл ойдың діні болуға бет алады» [5, 165-6.]. Мұның мәнісі таным мен наным-сенімнің ара-жігін ажыратып білуден көрінеді. Таным – «дүниенің көрінген һәм көрінбеген сырын түгелдеп, ең болмаса денелей білуден» туатын ақыл-ойдың табысы мен нәтижесі. Яғни таным – оқу-білім, ғылым жолындағы ізденістің нәтижесі, дүниелік танудың ғана жемісі. Таным басында Абай айтқандай, бес сезім мүшесі, яғни хауаси хамса заһири беретін мәлімет пен деректер тұрады. Бес сезім мүшесінің көмегі мен жәрдеминсіз біліп, таныпбілімді, ғылымды болу, одан да биіктеп адам болу былай тұрсын, тірі болып жүрудің өзі екі талай болады. Хауаси хамса заһири – бес сезім мүшесі – адамның өзінен өзге барша әлеммен байланыс жасайтын бес түрлі «қақпасы», «есігі» іспетті. «Тарыдай болып кіреміз, таудай болып шығамыз» дегендей, осы бес «есіктен» енетін, «кіретін» мәлімет, дерек, біліммен ғана біздер білімді, білікті, ғалым, адам бола аламыз. Сөйтіп біздің бұ дүниелік тірліктегі басты нәтижеміз – бес сезім мүшесі арқылы басталып, әрі қарай ақыл-ойымызбен жалғаса табылатын білім-ғылым, танымымыз. Ал құлшылық, ғибадат, діни әрекетімізде біздің ұстанарымыз да, ұмтыларымыз да – таным емес, наным-

сенім мен имандылық. Осыны анық, айқын айырып, терең танып білмек керек. Абайдың жетінші қарасөзінде: «көкіректе сәуле жоқ, көңілде сенім жоқ» [6, 104-б.] деп күңіренуінде екі нәрсені арнайы бөліп айтуы тегін емес. Мұндағы ақынның «сәуле» деп отырғаны – таным да, «сенімі» – наным. Ақын өз замандастарының дүниенің де, ахиреттің де қамын жасамай, я оқып, ізденумен таным таппай, я құлшылығын жасап иманын өсірмей сенделіп құр жүргендеріне күйінеді. Алла, дін ақиқатына тек таным құралы – ақыл-ойды ғана жәрдемші, көмекші етіп жетуге әсте болмайды. Себебі Алла мен дін, ақирет ақиқатын тауысып тану мүмкін емес, әрі оларды тануда ақыл-ойымыз қауқарсыз әрі қабілетсіз. Неміс философы И. Кант Жаратушы, жан және әлем – осы үшеуін тануда таза ақылымыз қауқарсыз, қабілетсіз екенін әбден бекіте түйіндеген [12, 288-с.]. Мұндай ақиқат түйін Абайда да бар:

Алла деген сөз жеңіл,  
Аллаға ауыз жол емес.  
Ынталы жүрек, шын көңіл,  
Өзгесі хаққа қол емес...

Ақылға сыймас ол алла,  
Тағрипқа тілім қысқа аһ!..

Ақылмен хауас барлығын  
Білмейдүр, жүрек сезедүр [7, 215-б.].

Діннің өзегі мен мәні – иман, әсіресе осы иманның бірінші шарты Аллаға иман келтіру болса, Алланы бетке алып жасаған құлшылық әрекетімізде бізге ауызбен айтқан «сөзіміз» де, «тіліміз» де, «ақылымыз» да «қол емес» екен, яғни құрал емес, әрі бұлар бізге Аллаға жақындауда жәрдемші, көмекші, «жол» бола алмайды. Ақын айтқандай, Аллаға тек «ынталы жүрек, шын көңіліміз» арқылы ғана жақындай аламыз. Яғни адам мен Алла арасына ақыл емес, ой емес, көңіл мен жүрегіміз ғана дәнекер, көпір бола алады. Яғни Алла, дін ісінде пендесіне таным емес, наным-сенім ғана көмекші бола алады. М.Әуезов айқындағандай, «Лай суға май бітпес қой өткенге» өлеңінде Алла, дін ісінде Абай ақыл мен сыншыл ойын біршама құрал етіп көреді. Бірақ

абайтанушы М.Мырзахметұлы айқындағандай, ақын кейіндеу жазған «Алла деген сөз жеңіл» өлеңінде Алла, дін ісінде көңіл мен жүрек, наным-сенімді ғана тірек етуге анық табан тіреп тоқтайды, қашанғы асыл ақиқатқа қайта оралады. Алайда бұған дейін де Абай Алла мен дін құбылысында ақыл мен ойын жұмсаумен жүріп те «үлкен күнә» жасай қойған жоқ деп білеміз. Қайта жоғарыдағы өлеңінде Алла жайлы ақылмен ойлай келіп, мынадай ақиқат түйінге жетеді:

Өмір жолы – тар соқпақ, бір иген жақ,  
Йілтіп екі басын ұстаған хақ.  
Имек жолда тиянақ, тегістік жоқ,  
Құлап кетпе, тура шық, көзіңе бақ [7, 177-б.].

Мұнда анық асыл, нағыз іргелі ақиқат айтылған. Адам өмірі өткіңші, басы мен аяғы бар өлшеулі «тар соқпақ», тірліктегі басты игілігіміз – осы өміріміз болса, оның пендесіне берілуі де, қайта алынуы да Алланың қолында – себебі Абай жазғандай, «ийлтіп екі басын ұстаған хақ». Алланың құдіретін мойындаудың нағыз үлгісі осы болар! Басы мен ақыры, соңына Алланың Өзі иелік еткен осы өлшеулі өмірде Абай тиянақ пен тегістік жоқ екенін айта келіп, сол өлшеулі өмірде «құлап кетпе, тура шық, көзіңе бақ» деп кеңес береді. Мұның мәнісі – жаратылыс болмысы да қоспа, ұстанар, жол етер бағыты да екеу, яғни хақ жолы мен нәпсі қалауының аралығында өмір кешетін адамдарға тура жол – хақ жолы – адамдығыңнан айнып, көз жазып қалма дегені. Абай бұл өлеңін ақыл-ойын тұтына отырып, Алла жайлы тынымсыз терең ойлаумен бастайды да, түпкі нәтижесінде өлеңін сол Алла жолы – адамгершілікті насихаттап өсиет етумен бітіреді. М.Әуезов өз монографиясында «Лай суға май бітпес қой өткенге» өлеңін адамгершілік таныммен сабақтастыра арнайы аялдап сөз етпесе де, сәті келіп қалғанда осы бір ойсырап тұрған тұстанбұл біздің ой өрбітіп жалғай түскен жайымыз еді. М.Әуезовтің осы өлеңге қатысты жетістігі – Абайдың Алла, дін мәселесінде наным-сенімді құрал етуден асыңқырап, Алланы танымақ болған жолында ақыл мен сыншыл ойға иек артып батыл әрекет етуін танытуында. М.Әуезов жазғандай, «шариғат ойланбай илан» десе, ал Абай «илану үшін ойланам» десе, бұдан

ақынның «әуелі не нәрсеге иман келтірсе де, соның хақтығына ақылы бірлән дәлел жүргізерлік болып, ақылы дәлел испат (дәлелдеу) қыларға жараған якини (шынайы) иман жолындағы» [6, 109-б.] ойшыл екенін көрсетсе керек. Ақын 38-қарасөзінде өзіне де қатысы бар мынадай ойын айтады: «әрбір ғалым – хахим емес, әрбір хахим – ғалым. Ғалымдарының нақлиясыбірлән мұсылман иман тақлиди (біреуге еріп келтірілген) кесіп қылады. Хахимдердің ғақлиятыбірлән жетсе, иман якини (шын иман) болады» [6, 148-б.].

Біз әркез айтар ойымыздың бастауы мен түп негізі М.Әуезов түйіндеген пікірлерде жататынын жиі жазамыз. Шынында да Абайға қатысты ақиқаттың бәрі дерлік М.Әуезов түйіндеулерінде қамтылған. Сөйтсе де ғалымның мына бір пікірін Абайға қатысты айтылған біршама асығыс баға деп шамалаймыз: «Біз Абайдың аузында алла менен оның арабша айтылған сипаттары қанша болса да, ақынның мұсылманшылығы шартты түрдегі мұсылманшылдық деп білеміз» [6, 165-б.]. Абайды дінге ұйыған имам, дін қызметіндегі молда, діни ұстаз болмады демесек те, ол Алла, дін, ақирет ақиқатын тануда қомсынатын кісіміз емес. Әсіресе, 38-қарасөзіндегі Алла, иман жайлы таным-білім, болжауларымен Абай ешбір дін ұстазынан кем түспейді деп ойлаймыз. Абайдың бар «кінәсі» Алланы тану әрекетінде ақыл-ойын асыра жұмсап жіберуінде болып тұр. Ал ақыл-ой – Алланың өзі берген артықша қасиеті, әрі Абай ақыл-ойын ақиқат пен ізгілік, жақсылық жолына жұмсаушы тұлға. Біз қайта осы қалыптағы, осы болмыстағы Абайды артық санаймыз, қадірлі көреміз. Адам ақыл-ойы жетер жеріне дейін тынымсыз, үздіксіз ойлай берсе, тани берсе, бұл – тамаша, ғажап, өте жақсы қасиет, ал өресі жете алмаса, ақыл шамасы келмесе, онда амал жоқ. Бұған да таң қалуға болмайды. Алла мен Ол жаратқан он сегіз мың ғаламның қыр-сырын түгел тауысып тану мүмкін емес. Абай Алла жайлы тынымсыз ойлаған өзінің ой әрекетінде ақылы жетпегенін кемшілік көріп өкінбейді, тек жалғыз адамзат баласында ғана бар болатын жан құмарымен білмекке құмар болып ойламай, «құмарсыз» құр мүлгіп жүруге көне алмайды. Ол осы ойын қарасөзінде де жалғай түсіп дамытады: «әрбір ақылы бар кісіге иман парыз, әрбір иманы бар кісіге ғибадат қарыз екен. Және де әрбір рас іс ақылдан қорықпаса керек... Дініміздің бір

жасырын тұрған жалғаны жоқ болса, ақылды, оны ойлама дегенімізге пенде бола ма? Ақыл тоқтамаған соң, діннің өзі неден болады?» [6, 126-б.]. М.Әуезовтің «Абайдың діні – ақылдың, сыншыл ойдың діні болуға бет алады... Шариғат ойланбай илан десе, Абай илану үшін ойланам – дейді» дегені өте дұрыс, асыл ақиқат. Әйтсе де М.Әуезов тарапынан айтылған ақын мұсылманшылығын «шартты түрдегі мұсылманшылық» дегенге келісе алмайтынымыз ғана бар.

М.Әуезов келесі кезекте осы «Лай суға май бітпес қой өткенге» өлеңімен қатар шыққан, әрі алдыңғы өлеңдегі ойы да жалғаса дамиды «Өлсе өлер табиғат, адам өлмес» өлеңі жайлы ой қозғау болатын біраз жаңа, тың идеялар айтады. Мұнда да ғалымның басты назары ақын қатты сүйеніп тірек еткен «ойда» болады да, дін талап ететін бірінші кезектегі «илану, сену» ақында кем түсе беретініне қайта оралып соғады. «Ақын діні сыншыл ақылдың шартты діні» болып шығатынын бекіте түседі. Біз бұл өлеңді өте мәнді, талай-талай терең ойлар айтқан туынды деп білеміз. Ғалым осы өлеңді талдағанда, алдыңғы өлеңді талдау кезіндегі ой ауаны, ыңғайымен пайымдап, ақындағы өткір, батыл «ойға» баса көңіл бөлумен болып кеткен. Әйтпесе бұл өлеңде өзге де айтар ойлар жеткілікті еді, бірақ ғалым назары оларға аумаған сыңайлы. М.Әуезов адам жаратылысы туралы танымда Абайдың дуализм жолында болғанын жазады. Абай адам жаратылысы туралы күрделі мәселені соншалық күрделі болмысымен қамтып танытады.

Өлсе өлер табиғат, адам өлмес,  
Ол бірақ қайтып келіп, ойнап-күлмес.  
«Мені» мен «менікінің» айрылғанын  
«Өлді» деп ат қойыпты өңкей білмес [7, 178-б.].

Абай алғашқы екі тармақтың өзінде-ақ бір-біріне кереғар пікірді айтады, біресе «адам өлмес» деп, артынша «ол бірақ қайтып келіп, ойнап-күлмес» дейді. Ақын осы тұста бір нәрсе жайлы екі түрлі ой айтса, солай болатын жөні де бар. «Адам өлмес» дегенде – «өлмейтұғын сөзімен», өнері, жақсы атымен өлмейді дегені. Ал «қайтып келіп, ойнап-күлмес» дегені тағы да рас. Ақыл мен жан және тән үшеуінің бұл дүниелік тірліктегі

бірлігі бұзылып, тән қалып, жан кеткенде, адам «қайтып келіп, ойнап-күлместей» анық өледі, өлшеулі өмірде ақылы мен жаны арқылы жасаған сөзі өлмесе де, ақыл, жан, тән үшеуінің бірлігіндегі тірлік пен өмірі қайта оралып келмейді. Ақыл мен жанның дүнияуи тәнмен бірге болған тірлігі түбі бір таусылмай, бітпей қалмайды. Адамдардың көп бөлігі осы өлімімен мәңгі өліп, ұмыт болса, ақыл мен жан арқылы жасаған сөзі, өнерімен өмірін ұзартып жалғайтындар да болады, бірақ мұндай тағдыр көпшілікке бұйыра бермейді, тек «мені» (ақыл мен жан) жолында жақсылық пен өнер, ғылым, ақыл-ой мұрасын жасағандар ғана ондай «өлмес өмірді» нәсіп етеді. Абайдың өлеңіндегі ой жүйесін жоғарыдағыдай екі жолмен бастауының да жөні бар. Абай адамдарды «меннің», яғни «ақыл мен жанның» қамын жасауға шақырады, осы Абай айтқан «мен» адамды жаны барда абыройлы, ал жаны кетіп өлгенде иманды болуға жеткізеді. Адам-пенде күйбең тірлікте дүнияуи арзан өмір кешіп, өлімнен қорқып, өмірдің шын мәні мен өз абыройын жете білмей жүреді. Өз қауымын дұрыс, тура жолға саламын ба деп үміттенген ақын адам мен әлем жаратылысынан бастап, пенделік кемшілік, өмір мәні, иман сырын қамти терең толғап сөз еткен. Ақын адамдарға «өлетінің анық, бірақ өлмеудің де амалын жасауға мүмкіндігің бар, оның сыры мынандай, «менікінің» кесірі көп, соңына түссең, ақырың мынау, ал ақылым мынау, өзің сарала» дегендей өрелі өсиет сөздерін айтады.

Абайдың бұл өлеңіндегі мән-мазмұнға қатысты М.Әуезовтің дуализм ұғымын ауызға алуы тегін емес. Бұрынғы-соңғы ойшылдардың танытуында адам ғана екі жақты қоспа болмыс. Дуализм ұғымын тек адам жаратылысына қатысты қолдағанда ғана аса қисынды болады. Себебі адамнан өзге жаратылыстың бәрі де екі түрлі нәрседен жаралып, дәл адамдағыдай қайшылықты, күрделі болмыста болмаған. Ең биік, жоғары, бекзат болмыс – Алла – тәнсіз, Құдіретті, Ғылымды рухи болмыс. Періштелер нұрдан, ал шайтандар оттан жаралған делінеді, олардағы осындай бір жақты, бір текті жаратылыс олардың болмысын да бір жақты етеді. Жан-жануар, жәндік, өсімдік атаулының бәрі де бір ғана тәнінің қамын жасайтын, яғни қоректенетін, өсетін, көбейетін болмыстар, олар тән құмарымен ғана тіршілік етеді. Тек адам ғана өзінен төменгі тіршілік иелері

секілді «ішсем, жесем, ұйықтасам» деген тән құмарымен қоса, «көрсем, білсем, үйренсем» деген жан құмарын да иеленген қоспа, екі жақты болмыс. Адамнан өзге тіршілік иелерінде екі нәрсенің бірін таңдау еркі жоқ. Тек адам ғана «мені» (ақыл мен жан) мен «менікінің» (тән) қалауын таңдап, жасаумен өмір сүреді. Осындай жағдайда Абай тыңдаушыларына «дүние», «тіршілік», «фәни», «мін» ұғымдарымен байланысты келетін «менікінің» кемшілігі мен кесірін айқындап сөз етеді. Түпкі мақсат-мұрат – адам болу, иманын кәміл ету болса, сол жолда үлкен көмекші болар – терең ой мен ақыл. Адам «менікінің», әрі оны өрістететін тіршілік, дүниенің мін, кемшілігін білуі үшін осы жолда тірек етер сыншыл ақылы мен терең ойы зор болмаққа керек. М.Әуезовтің Абайдағы ой мен ақылға айрықша назар аударуы тегін емес екен. Жаксы мен жақсылыққа, имандылық пен тура жолға сенген, иланған өте орынды, дұрыс, сөйтсе де сыншыл ақыл, терең оймен таразылап, саралап, айқындап сенбесе, иланбаса, дүнияуи іс пен діни ғибадаттың нәтижелі де шынайы, таза болуы қиын. Осы орайда М.Әуезовтің «Абай да: «терең ойдың телміріп соңына ермей» деуменен адамдық қасиеттің ең зоры – ой деп біледі» [5, 166-б.] деген пікірін ақын идеясының төркіні мен мәнін дәл танудан туған түйін деп білеміз. Тек ғалымның «соңғы шумақтың ең соңғы екі жолында Абай ислам діні үгіттеген «иманға» да күдік айтады» [5, 166-б.] дегені көңілге қоныңқырамайды. Дұрысы, Абай «дүниеге бой алдырған, сөйтіп аяғын көп шалдырған», «дүниеге дос», «дүниеге ынтық» көп пенденің көбіне «менікінің» жолында жүріп, махшар, ахирет қамын жол-жөнекей жүріп амалсыздан ғана еске алатын рия, екіжүзді халіне қынжылады, сондайлардың «иманын түгел деуге аузым бармас» [7, 178-б.] дейді. Яғни Абай «ислам діні үгіттеген «иманға» емес, «дүниеге бой алдырған» көп пенденің иманына күдік келтіреді. Мүмкін М.Әуезов заманы талап еткен салт-санаға амалсыз бейімделген болар, соған орай «діннің бес парызы шарт еткен жолдарды Абай өзінің сыншыл ақылымен діндік соқыр наным – предрассудок деп түсінеді» деп жазып жіберген секілді [5, 166-б.]. Абай мұсылмандықтың кейінгі төрт шартына қатысты сынай сөйлегенімен, иман келтіру шартын әркез дәріптеп, үгіттеп отырған.

...Мүмин болсаң, әуелі иманды бол,  
Бендеге иман өзі ашады жол [7, 248-б.].

Сөйтіп М.Әуезов «Өлсе өлер табиғат, адам өлмес» өлеңі жайлы түйінді сөзінде тағы да «ақын діні – сыншыл ақылдың шартты діні болып шығады» [5, 167-б.] деген ойын бекіте түседі. Мұнысы – Абай өзінің діни сенім, нанымында иланушылықтан гөрі сыншыл ақыл, терең ойға көбірек сүйенді дегендік. Бұл – Абайдың «ақылды мизан, таразы» еткен ойшыл, хакім болмысын айғақтай түсетін түйін. Алайда бұдан Абайдың дін мен Алланы ұстанып, мойындауына титтей де нұқсан келмейді.

Абайдың «Малға достың мұңы жоқ, малдан басқа» өлеңінің басым бөлігі, негізгі мазмұнымен малға, дүниеге дос, надан, нас байдың бейнесін суреттегенімен, соңғы екі тармағы арқылы адамгершілік танымына қатысты тың ой айтады:

Үш-ақ нәрсе адамның қасиеті:  
Ыстық қайрат, нұрлы ақыл, жылы жүрек [7, 198-б.].

Алайда М.Әуезов осы жолдар турасындағы ойын «еңбек елінен адамгершілік күтеді» деумен түйінді ойын қысқа ғана қайырып білдіреді [5, 168-б.]. Негізі, М.Әуезов Абайдағы ақыл, қайрат, жүрек – үшеуінің бірлікте келетін көрініс, ерекшелігінен өзінше жинақтап тың ой түймеген. Осы орайда бұл үшеуінің бірлігінен ақындағы Толық адам танымын негіздеген М.Мырзахметұлының ғылыми жаңалығы айқындалып бағалы бола түседі.

Абай өлеңдеріндегі адамгершілік жайлы ой-пікірлерді сөз ету ендігі кезекте ақынның өмір соңына таман жазған «Алланың өзі де рас, сөзі де рас» өлеңіне қатысты айтылады. М.Әуезов ақынның бұл өлеңінің мән-мазмұнына айрықша ден қояды. М.Әуезовтің түйінді пікірінше, Абайдың бұл шығармасы оның дінге арналған ойларын қозғайды [5, 177-б.]. Ал дін адам болу мен адамгершілік жайынан алыстап кетпейді. Мұнда да М.Әуезов «мұсылманның имам-ишандарының көзімен қарағанда... Абайдың исламияттың өрісінен, арнасынан мүлде алыстап кететінін» [5, 178-б.] қадай түсіп айтады. Ғалым ақынның осы өлеңінде иманигүл-үш сүю танымын түйіндеп, бекіте баяндаған төрт шумағын үзінді ретінде келтіре отырып,



мұнда ақынның бір ислам емес, барлық дінге байланысты танымы, адамгершілік турасындағы үгіті және мораль философиясы да байқалатынын атап өтеді [5, 178-б.]. Осыншама мәселені бір басына сыйғызған бұл өлең өте мәнді, терең мазмұнды туынды екені даусыз. Абай дүниетанымына қатысты қайшылық- біраз ғалымның асығыс әрі ойсыз түйіндеп қадалып қалғанындай, оның дінге байланысты нанымынан туындап жатса, М.Әуезовтің де Абайға байланысты ақиқаттан алыстаңқырап кететін ойлары оның осы діни пайымына қатысты айтылады. Абайды діни нанымына байланысты сынап, оны жөнсіз «төпелей беруді» біз керексіз көреміз, тіпті мұндай сынды ақынға қатысты жасалған қиянат деуге де келеді. Әлем мен адамзатты жаратқан және құдірет пен ғылым, хикмет иесі болған Жаратушыны М.Әуезов «жаратылушы пендесінің сүюі қарыз екені – исләм ғұламаларынан бөлек Сократ, Платоннан бері басталып келе жатқан идеалистік философияның бәрінің арқа тірегі» [5, 178-б.] деп біледі. Шыны да, ақиқаты да солай. Дәл осылай тұжырымдап түйіндеу – абсолюттік ақиқат. Бір Әуезов емес, ақыл-есі кемел, ойы жетік, бағыты оң, ниеті дұрыс адамзат ойшылдарының бәрі де осылай ойлап түйіндеуге тиіс. Мысалы, Күнді алғаш көріп сипаттаған кісі оны шеңбер тәрізді домалақ, сары, жарық беріп, нұр шашушы, жылу жеткізуші десе, кейінгілер де дәл осы ойдыөзгеріссіз қайталап айтады, себебі басқаша айтылар болса, Күн ақиқаты айқындалмай қалады. Бұрынғы өткен ойшылдардың ізімен Абай да өзінің зор ақылымен Алланы «жаннан тәтті» көріп сүюді түйіндеген. Өзіне дейінгі ақылдылар айтқан түпкі ақиқатты Абайдың да өзінше тануға жетіп, әрі оны өзіндік ойымен бекіте түскен түйіндеуін сынай бергеннен гөрі ақын жеткен асыл ойды мақтан ету орынды болады.

Бір ескеретін жағдай, М.Әуезов Абайдың діни нанымын сөз еткенде, оны үнемі ислам дінінің ұстанымы мен қағидасы бойынша саралайды. Онда да онысы анық ислам дінінің түп ақиқатынан емес, молда, имам, ишандардың қолданыстағы діни қағидаларынан шығарып барып айтатын түйінге көбірек ұқсайды. Сөйтіп жүріп екі арада Абайдың «күйіп қалатыны» бар. М.Әуезов айтатын мына пікір Абайға байланыстырылып беруге лайық еместей көрінеді: «Содан ары Абай «Адамзаттың бәрін сүй

бауырым деп» дейді. Бұндағы мұсылманшылықтың өзі ауызға алып келген «алласы», «пайғамбары», «кәләмшәрифі», «иманы» нұсқаған жолдың бәрінен Абай бөлініп, шет жайылып кетеді» [5, 178-б.]. Әділет пен ақыл-ойдың таразысына салар болсақ, Абай «адамзаттың бәрін сүй бауырым деп» дегенде қателесе ме, әрине, жоқ. Оның үстіне ислам үгіті бойынша, кәпір делінгендер, яғни мұсылман емес, дін қарындас еместер – Алла сөзі, Алла ақиқаты, Алла үгіті – Құрандағы шындықты мойындамай бұра тартқан ақымақ, надандар болса керек. Абай жырлап айқындаған жақсы, жетілген толық адамның – қандай асыл болмыс екенін де білеміз. Шәкәрім ақын жазғандай, адамзаттық ақиқат пен анық шын – Бір Алла мен оның сөзі Құран деп білсек, М.Әуезов жазғандай, Абай айтқан әділет «исләмнің түсінігінен баскаша» [5, 178-б.] болмаса керек. Өзіне дейінгі қасиетті кітаптар мен олардағы шындықты растап әрі оларда ұшырасар кем-кетікті жөндеп, түзеп дамытушы Құранның – соңғы, сөйте тұра алғашқы ақиқатекенін білеміз. Ал Абайдың Алла, Құран, иман жайлы наным, білім-танымы қаншалық терең екені оның өлеңдері мен қарасөздерінен анық көрінеді. Абайдың хадис, аяттардан үзінділер алып, «Жұртқа жақсылық істе және өзің де қайырымды бол, өйткені Алла жақсылық істеушіні жақсы көреді», «Сондай адамдар құдайға иман келтіреді, жақсы істер істейді, ондайлардың орны мәңгі жұмақта» деген аяттар Құранның іші толған ғамалус-салих (ізгі іс) не екенін білмейміз» [6, 144-б.] деп жазатыны белгілі. Абай түйіндеп берген иманигүл-үш сүюге ислам дінінің иманы қарсы келеді я бөлек кетеді деуге болмас. Қайта ақын түйіндеген иманигүл – иман жолындағы ақылды, ойлы, таза ниетті мұсылман адамының иман аясынан шығып кетпей әрі Абай ойлап тапқан адамшылық асыл жолы. М.Әуезов осы жайды анық байқап, «...жаңағы өзі айтқан жолды құлшылықтың да, діннің де жолы дейді» [5, 179-б.] деп жазады. Абай айтқан үш сүю – иманигүл жолы мұсылманшылық иманына қарсы келмейді. М.Әуезов жазғандай, Абай «исләм діні – «мұсылманға бес парыз» деп: ораза, намаз, зекет, хаж дегенді айтса, Абай оларға көп көңіл бөліп, місе тұтпайды» [5, 179-б.] емес-ау, қайта ақын әр кезде де иманның әуелгі парыз екенін баса айтып, ал өзгелерінің ең алдымен иманды мақсат етумен орындалып атқарылуын әркез қадай айтып отырады:

Істің басы – ретін танымақтық,  
Иман білмес тағатты қабыл демен...

Иманның тазалығын жақсы ұқтырмай,  
Сыртын қанша жуса да, іші оңбаған...

Мү мин болсаң, әуелі иманды бол,  
Бендеге иман өзі ашады жол.  
Шын илан да, таза ойла бір иманды,  
Мұнафиқ намаз қылмап па, мағлұм ғой ол [7, 248-б.].

Абай бұл ойын қарасөзінде де дамытып бекіте түседі: «Сіздің батиныңыз таза болмағы ол иман болып, бұл заһир ғибадатыңыз иманды болған соң ғана парыз болған, сіздің заһирыңыздағы ғибадат – батиныңыздағы иманның көлеңкесі, һәм сол иманның нұрланып тұрмағына көрік үшін бұйырылған» [6, 153-б.].

### **Абайдың адамгершілік жайлы ойларын қарасөздері арқылы пайымдау**

Абайдағы адамгершілік тақырыбының өзектілігі мен оның ақын шығармаларынан алар айрықша орны жайлы келелі ой айтқан ғалымның бірегейі – М.Әуезов. Ол мұндай келелі ойларын Абай қарасөздерін талдап таныту барысында да өнімді етіп мол айтқан. Ғалым ойларынан тарамдалып шығар ойлар көп. Әйтсе де мұнда М.Әуезовтің Абайдағы Толық адам танымын тануымызға бастау болар адамгершілік жайлы ойлары ғана баяндалады.

Ең әуелі М.Әуезов ақын қарасөздерін көлем, мазмұн, тақырып, өзге де сипаттары жөнімен жіктей келіп, 38-қарасөзді «дін, мораль мәселелеріндегі Абайдың бір үлкен ой-толғауы болады» деп сипаттаған. Мораль жайын былай қойғанда, дін де айналып келгенде Алла жолы – адамгершілікті насихаттаушы сана мен сенім. Адамның рухын Алладан келген сый, аманат деп ұғар болсақ, адами болмысымыздағы ақыл-ой, қайырымды қасиет, ізгі сезімдерімізді сол рухпен ғана байланысты көріп сабақтастыра аламыз. Шәкәрім ақын айтқандай, айуаннан айырмасы аз-ақ болмысымызды адамдыққа жеткізетін де – осы

ақыл-ой мен қайырымды қасиеттеріміз. Сөйтіп біздер Алладан жеткен рухпен байланысты болатын болмысымызбен ғана абзал, адами жаратылыс екенбіз. Ал дін осы Алла жолын күзетуші қасиетті де киелі сана мен наным-сенім. Демек 38-қарасөздің мазмұны түгелдей адамгершілік жайын сөз ететіні көрінеді. М.Әуезов мұны өз тарапынан дәл байқап таныған.

Әр түрлі сипатына орай он бір қарасөзді бөліп алып, қалған отыз бес қарасөзін тақырып, мазмұндарына қарай жіктегенде, М.Әуезов тағы да ә дегенде Абайдағы адамгершілік, мораль мәселелерінің өзектілігін айтып өтеді. Мұны М.Әуезов қашанғы әдетімен «терең ойдың телміріп соңына ерген» ақиқатын іздеген ой-әрекетімен айтып отыр: «Стиль, мазмұн жағынан алғанда, осы шығармалар Абайдың өзі тапқан, бір алуан көркем сөздің түрі. Кейде бұлар сыншылдық, ойшылдық және көбінше адамгершілік, мораль мәселелеріне арналған өсиет, толғау тәрізді» [6, 219-б.]. М.Әуезов айтқан «сыншылдық, ойшылдық мәселелері» де адамгершілік, мораль мазмұнынан алыс кетпейді. Абай сыншылдығы мен ойшылдығы оның өзі жеткен озық та биік ақыл-ой талабынан туған. Ақылды, ойлы адамның сыны әр нәрсенің де жаратылыстағы қалыбынан шығып кетпей, Алла жаратқан төркіні мен табиғатына сай болуын қалаудан туады. Абай сынаса, Алладан кейінгі бәрінің де бастауы болып табылатын адам мінезі мен қасиетінің қалаулы қалыптан шығып кеткен келеңсіз, кеселді жақтарын сынаған. Ойшылдығы ретінде танылған ақыл-ойын да осы адамгершілік насихаты мен ізденісіне жұмсаған. Бұлай дейтініміз, сыншылдық пен ойшылдыққадейінгі жетер жолында Абай ойланып-толғанып, күйіп-пісіп, сынап, әшкерелей әрекет етуіне кең өріс болған заман мен қоғам және ондағы түрлі шаруашылық, әлеуметтік, саяси қарым-қатынастарды адам мен оның адами қасиет, қатынастарынсыз елестету мүмкін емес. Яғни М.Әуезов түйіндеп айтып отырған «сыншылдық, ойшылдық мәселелері» де айналып келіп адамгершілік, мораль мәселелерімен бірбүтін болып қабыса кетеді. Сонда байқайтынымыз, Абайдың қарасөздері түгелдей, толығымен «адамгершілік, мораль мәселелеріне арналған өсиет, толғау тәрізді» болып шығатындай.

М.Әуезов Абай шығармаларын әр саласынан сөз еткенде, әрі жеке біреуі жайлы ой өрбіткенде ерікті-еріксіз түрде ақындағы

адамгершілік тақырыбына тап бола береді. Олай болатын жөні де бар, М.Әуезовтің өзі жазғандай, Абай адамгершілікті, моральдық философияны барлық жайдан жоғары қояды [5, 179-б.]. Біз бұл оқулықта Абайдың адамгершілік танымына қатысты М.Әуезовтің бір сөзін де назардан тыс қалдырмауға тырысамыз. Сонда ғана Абайдың адамгершілік танымы жайлы М.Әуезов тұжырымы тиянақты танылмақ әрі ғалым ойының бастауы да, өсуі мен өрістеуі де, шын мәні мен өзектілігі де түгел айқындалмақ. Ой соңындағы қай білгір болса да, өзі толғанып тапқан ойларының тыңдаушысына түгел жеткенін қаласа керек. Ендеше біз де Абайдың адамгершілік ілімін танып-білуде М.Әуезовтің елеулі еңбегін ыждағаттылықпен танып білуге тиіспіз.

М.Әуезов жазғандай, Абай қарасөздерінде өзінің оқушыларымен әңгімелесіп, жүзбе-жүз кездесудегі мәслихат, кеңес құрып отырған ойшыл ұстаз тәрізденеді [6, 219-б.]. Шыны солай, М.Әуезов не жайынан жазса да жете біліп, байыбына барып, түбін, тегін танып жазады. Ақынның оқушы, тыңдаушыларымен әңгімелесу түрінде жазған қарасөздеріндегі тақырып жайын ойлағанда, М.Әуезов сөзі тағы да адамгершілік мәселесімен байланысты түйінделеді: «Және сол әңгіменің үстінде адамгершілік мәселелерінен: әділет, ақтық, турашылдық, шындықты сүйгіштік, ғылымға құмарлық, еңбекті бағалағыштық сияқты жайларды айтады. Немесе осылардай, адамдық сипаттың жауы болатын, аярлық, жалғаншылық, бәлекұмарлық, мақтаншақтық, мансапқұмарлық, өсекші-өтірікшілік, еріншектік, әралуан арамтамақтық сияқты мінездердің барлығын айтқанда, Абай сол жайларды тыңдаушының көңіліне, көкейіне қонымды ету жағын алдымен ойлайды» [5, 219-б.]. Міне байқағанымыздай, М.Әуезов ойына алдымен ақын қарасөздеріндегі осы жайлар оралады. Ғұлама ғалым қарасөздердегі мол мазмұнның түп-тегін, өзекті мәнін көрегендікпен танып отыр. Абайдың өзі «һәммасы адам баласының пайдасына жасалып, ешбірінде бұл менікі дерлік бір нәрсе жоқ, бәрі – адам баласына таусылмас азық» [6, 142-б.] деп жазғанындай, адамзат ойы мен әрекетіне келіп жанаспайтын, солармен тоғыспайтын тіршілік пен қоғам, заман және олардағы ешбір қарым-қатынас өзінше оқшау, өзінше бөлек бола алмайды. Бәрінің де басын қосып, біріктіруші адам мен оның адамгершілігі болып қала береді. М.Әуезовтің адамгершілікті бәрінен де

жоғары қоятын Абай шығармашылығына қатысты әңгімеде айналып келіп адамгершілікке соға беретіні осыдан. Абайдың да М.Әуезов жазғандай, «әсіресе көп ой қорытып айтқан мағыналы және програмдық бір өлеңі» «Ғылым таппай мақтанба» туындысында «бес асыл іс» пен «бес дұшпан» қасиеттерді қосарлап, қосақтап айтуы тегін емес. Себебі бұрынғы-соңғы ойшылдар түйіндегендей, адамгершілік жолында жетілуде ең әуелі «адамдық сипаттың жауы болатын» кеселді қасиеттерден арылып алу қажет болады. Әуелі жүректің, ділдің, ішкі рухани әлемнің кір, қоқыс, мін, кемшіліктен тазаруы тиіс. Абай 38-қарасөзінде «мақтаншақтық, пайдакүнемдік, жеңілдік, салғырттық секілді төрт нәрсемен жүректі кірлетіп алсақ, жүректің айнасы бұзылатынын, я қисық, я күңгірт көрсететінін» [6, 162-б.] жазады. «Адамның кейбір кездері» өлеңінде ақынның жақсылық жаршысы, «тәңірінің берген өнері» – өлеңін шығарар шабытты тұста «кірлеген жүрек өз ішін Тұра алмас әсте жуынбай» [7, 205-б.] деп айтатыны бар. «Ойға түстім, толғандым» өлеңінде де лирикалық кейіпкер өз бойындағы түрлі мін, кеселді қасиеттердің барын мойындап өкінеді:

Бойдағы мінді санасам,  
Тау тасынан аз емес.  
Жүрегімді байқасам,  
Инедейін таза емес [7, 252-б.].

«Қайғы шығар ілімнен» өлеңінде де «қайрылып қарап байқасам, Ат шаба алмас мінімнен» деп күйінеді [7, 146-б.]. Міне осы міндерді, түрлі сорақы, кеселді қасиеттерді жоймай тұрып, адами асыл қасиеттерді бойға дарыту қиын болмақ. Адамзаттың рухани жағынан кемелденуінің кешеуілдей беретіні де осылайша бойындағы мінін біліп, байқап, мойындауының оңай болмауынан:

Міні қайда екенін біле алмассың,  
Терең ойдың телміріп соңына ермей [7, 178-б.].

Осындай пенделік, келтелік болмысынан да адамзат баласы көңіл қалағандай кемелділікке жете алмай келеді. Адам, заман, қоғам бойындағы кемшілік пен мінді бақилықпен байланысы бар түпкі ақиқатты тани алатын даналар ғана айқындап айта алады.

Адамның ойы мен ділі, бар болмысы кеселді, кемшілікті қасиеттерден арылып тазарар болса, Абай жазғандай, адамның кеудесі, ділі мен рухани әлемі – хикмет. Ал «хикмет» ұғымына адамгершілікті құрайтын ақыл-ой мен барша қайырымды қасиеттер түгел сыйып кетеді:

Жүректің көзі ашылса,  
Хақтықтың түсер сәулесі.  
Іштегі кірді қашырса,  
Адамның хикмет кеудесі [7, 130-б.].

Алла рухының сәулесі мен үлесі адам жаратылысының тәнінде емес, жүрегі мен ділі, кеудесінде орнығады. «Хикмет» – адамгершілік, ал «іштегі кір» – кеселді, кемшілікті қасиеттер.

М.Әуезов бөліп-жармай қосақтап айтқан адамгершілік жайы мен оның жауы болатын кеселді қасиеттердің ақын шығармаларындағы көрінісіне ой жүгіртіп өттік. М.Әуезов жоғарыдағы ойын Абайдағы негізгі мән мен мазмұнды назарға алып барып айтса керек. Өйткені қай заманда да ойшылдар адамгершілік жағынан жетілудің екі түрлі кезең, белесі болатынын айтып өткен, олар – әуелі кеселді қасиеттерден арылу мен келесі кезекте адамгершілік асыл қасиеттерді бойға дарыту. Шындап келгенде, Абай шығармашылығы кеселді қасиеттерді қанын ағыза әшкерелеу мен асыл қасиеттерді дәріптеп әспеттеуден тұрады. М.Әуезовтің жоғарыдағы түйіндеуінен осы жайды танимыз.

М.Әуезов өзі терең танып насихаттаған ақын Абай секілді әр сөзін нысанаға дәл тигізіп әрі әр сөзіне салиқалы да салмақты ой артып айтады. Ол ақын қарасөздеріндегі айтылған ойлардың «адамгершілік, әлеуметтік, ағартушылық» мән-мазмұнда болатынын жазады. Осында ғалым аузымен ең әуелі адамгершілік ойлардың айтылуы тегін болмаса керек. Оның үстіне ақындағы әлеуметтік, ағартушылық ойлардың да түп мақсаты – адамгершілікті насихаттау екені талассыз. Міне, М.Әуезов осылайша өзінің жүйелі ойын таратып, тарқатып айтуда ерікті, еріксіз түрде ақын шығармаларындағы адамгершілікті атап өтуге оралып келіп соға береді. Содан-ақ Абай шығармашылығында адамгершілік мәселесінің өзекті екені айқындала береді.

Дін тақырыбы Абайдың өлеңдерімен бірге, қарасөздерінде де біршама мол сөз етіледі. Осы орайда М.Әуезов Абайдың «өлеңіндегі сияқты қарасөздерінде де дінді адамгершілік моральдің, тәрбиенің әралуан қараңғылыққа қарсы, шартты түрдегі өткелі есебінде бағалайтынын» атап өтеді [5, 220-б.]. М.Әуезов өз заманындағы идеологияның әсерінен болса керек, дін жайына онша іш тарта бермесе де, оның адамгершілік қызметіндегі үлесін үнемі мән бере айтып отырады. Ал Абайдың өзіне келсек, ол дін мен адамгершілікті бөлек нәрсе екен деп білмеген, қайта діндегі иман – адамгершіліктің өзегі, мәні екенін әр қырынан танытып отырады. М.Әуезов те Абайдың бұл ерекшелігін «...Құдайдың, пайғамбардың, иман, парыздардың жайларын көбірек айтады... өз ойына соларды көбірек серік етеді» [5, 220-б.] деп танытып өтеді. Бірақ мұны өкінішке орай, М.Әуезов Абайдың артықшылығы мен жетістігі ретінде атамайды, керісінше кемшілігі көреді. Бұл енді адамгершілік пен ахирет қамынан гөрі дүниелік, заттық игіліктерді көбірек көруге бейім болған заманның салған таңбасы болса керек.

Абай қарасөздерін тақырып, мазмұн жағынан талдай келіп, М.Әуезов бір-бір сөзбен ғана жеке тақырыптарды қозғаған қарасөздер мен 10-15 сөз көлемінде тілге тиек етілетін ел мінезі жайлы қарасөздерден тыс 7-8 сөз арқылы мазмұндалатын дін мен мораль, тәрбие жайындағы бір топ сөзді де бөліп көрсетеді. Біріншіден, мораль дегеніміз де – арнайы категорияға айналған адамгершілік жайын сөз етуші сана. Діннің мазмұны да, мақсат-мұраты да адамгершілікті жоқтап, сақтау екенін жоғарыда айттық. Тәрбие де түптеп келгенде, адам, азамат, маманды қалыптастыруды көздейтін ұстаздық тағылым мен әрекет. Сөйтіп М.Әуезов арнайы бөліп көрсететін дін мен мораль, тәрбие жайлы қарасөздер де түптеп келгенде адамгершілікті насихаттаумен тікелей байланысатыны белгілі. Мұны М.Әуезов атап өткен 12, 13, 27, 35, 36, 38 және 45-қарасөз мазмұндарынан байқауымызға болады. Абайдың дін тақырыбындағы сөздерінің мазмұны адамгершілікпен тығыз қабысатынын М.Әуезов терең білгірлікпен танытқан: «Бірақ сол мұсылманшылдықтың анық діндік үгітін айта отырып, Абайдың өз оқушысына жеткізбегі – адамгершілік өсиеттер болады. Сол адамгершілік қасиетті адам өзінің жара-тылыс сырымен қоса бағалап, түсінсін деп ойлайды. Сондай



түсінік адамды адамгершілік биік сатыға көтереді дейді» [5, 224-б.]. М.Әуезов ойлары өте ықшамдалып, түйінделіп айтылған ғой. Негізі, М.Әуезов атаған жоғарыдағы жеті қарасөздің мазмұнын тереңдей талдап таныр болсақ, ғалымның қысқа қайырып әрі түйіндеп қана айтқан пікірінің мәнді мазмұны кеңірек ашыла түсер еді. Жалпы, осы нәрсе есте жүргені жөн. Мысалы, Абай 38-қарасөзінде былай деп жазады: «Не түрлі болса да, я дүниенен, я ақылынан, я малыңнан ғадалат, шапағат секілді біреулерге жақсылық тигізбек мақсатың болса, ол жол – құданың жолы» [6, 151-б.]. Сонда Абайдың Алланың сегіз сипаты мен көркем есімдері, иман жайлы ойларының түйіні – Алла жолы – адамгершілік екенін жеткізу, таныту болған.

Негізі, М.Әуезов Абайды сыншыл ақылын көп жұмсауы себепті оның дінге қатысты танымына қалыптан шығыңқыраған деп қарайды. Абай ойы жеткен жеріне шейін ақылын тұтынып тыным таппайды. Мұны орынды әрекет деп санаймыз. Ақыл-ой – материалистік танымға сыймайтын, түсіндіруге келмейтін рухани нәрсе, яғни Алланың рухымен шектесіп астасатын адамдағы артықша рухи қабілет. Ақыл-ой – Алланың адамға тарту етіп берген артықша сыйы. Енді осы Алла берген зор қабілетті бар мүмкіндігімен пайдалана білмеу – пенденің кемшілігі болар еді. Абай «Лай суға май бітпес қой өткенге» өлеңінде Түп Ие –Алласын ойлау арқылы Алла жолы – адамгершілікті насихаттауға жетеді.

Өмір жолы – тар соқпақ, бір иген жақ,  
Иіліп екі басын ұстаған хақ.  
Имек жолда тиянақ, тегістік жоқ,  
Құлап кетпе, тура шық, көзіңе бақ [7, 177-б.].

Ақыл-ой біздерді дүниелік ісімізде ғана ақиқатқа жеткізіп қоймай, бізге хақиқат, хақты танытуда да біршама үлес қоса алады. 38-қарасөзінде Абай «Алла тағала өзі – хақиқат жолы» деп жазады [6, 137-б.]. Бұл таратып айта беретін өрелі де өрісті тақырып. Біз мұны қысқа қайырып, Абайдың Алла берген ақылды тұтынудың шегін білгенін, сөйтіп М.Әуезов ақында жетіспейтіндей көріп қанағаттанбай жүрген «ойланбай илануға» да ақынның бет алғанын айтумен шектелеміз.

Алла деген сөз жеңіл,  
Аллаға ауыз жол емес.  
Ынтылы жүрек, шын көңіл,  
Өзгесі хаққа қол емес...

Ақылға сыймас ол алла,  
Тағрипқа тілім қысқа аһ!..

Ақылмен хауас барлығын  
Білмейдүр, жүрек сезедүр[7, 215-б.].

Міне, Абай ақылына сыймас, ақылы жетпес Жаратушы Алла жайын ойлағанда, нану-сену, илану бастауы – жүрегіне жүгінеді. Осы орайда М.Әуезовтің «Лай суға май бітпес қой өткенге» өлеңіне қатысты Абай жайлы: «Өзі сыншыл, өзі шын ақылы жеткенге ғана тоқтайтын ақын жаңағы дін ұстаздарының «тоқта» деген жеріне тоқтамайды... Шариғат ойланбай илан десе, Абай илану үшін ойланам», – дейді» [5, 165-б] дегені нақты аталған өлеңге қатысты орындылау көрінсе де, ақынның жалпы дүниетанымына қатысты айтылғанда дұрыс болмай шығады. Яғни Абай да шариғат талабымен ақылды орнымен ғана жұмсап, Алла, жанға қатысты мәселеге келгенде, шегініс жасап жүрегіне жүгінеді, «ойланбай иланады». Қандай болғанда да М.Әуезов – Абай дүниетанымын тануда ақиқатшыл, білгір ғалым.

М.Әуезов Абайдың 38-қарасөзі туралы біршама кеңірек тоқталып ой өрбітеді. Ғалым пікірінше, осы қарасөзінде ақын тұтынған дін «түп наным жағынан да, моральдық қасиеттер турасынан да және адамгершілік тәрбие мақсатымен де анықтап таныла түседі» [5, 224-б.]. Абай бұл қарасөзінде Алла, оның сипаттары, иман жайлы айта отырып, негізгі мақсаты адамгершілікті дәріптеу болады. 38-қарасөздің басты мақсат-мұраты осы. М.Әуезов ақын сөзіндегі осы ерекшелікті баса айтады: «Ол ислам дінінің құдайына иланады. Енді соның көп сипаттарын өз оқушысына баяндап береді. Сол баяндауында үнемі адамдық жақсы сипаттар жағын айрықша екшеп терумен болады. Ендеше, бұл сөздің де түп мазмұн-мақсаты адамды жақсы етіп шығаратын қасиет, сипаттарды жеткізе түсу» [5, 225-б]. Шынында да өз сөзін «адам ұғылының мінездері тұғралы біраз сөз жазып ядқар қалдыруды» көздеумен бастаған ақын айтқан сөзінің үдесінен

шығып адамгершілік, мораль философиясы жайын толғаған. М.Әуезов тоқетерін ғана айтып қысқа қайырған 38-қарасөз жайлы жарияланым көрген өз еңбегімізде [13, 305-329] біз біршама таратып ой өрбіткенбіз. Ой-пікіріміз ақын мұрасын ақиқат түрде таныған М.Әуезов түйіндерінен бастау алғаны анық. М.Әуезов жазғандай, Абай дінмен байланысты діншіл ойларын айтып келіп, сөзінің мәні мен негізін адамгершілікке тірейді. «Барлық өсиет ой-толғау еңбектерінің қорытындысы тағы да адамгершілік тәрбие екенін танытады» [5, 226-б.]. М.Әуезов мұндай терең танымды түйінін ақынның өлеңдеріне қатысты да айтқан болатын. Сөйтіп Абай өлең сөзімен де, қарасөзімен де адамгершілік тақырыбын тереңдей танытып айнымас ой серігі еткен.

М.Әуезов ақындағы адамгершілік танымды бұған дейін сөз еткен өзге тақырыптар тұсында да жол-жөнекей саралай келіп, он шақты қарасөзді «адамның адамдық қасиеттерін терген» сөз ретінде арнайы бөліп атайды. Олар – 15, 17, 18, 21, 22, 28, 30, 32, 34, 44-қарасөздері. Бұларда ғалым түйіндегендей, үлкен адамгершілік, ақтық, тазалық, азаматтық жөніндегі тәрбиелік ойлар айтылады [5, 226-б.]. М.Әуезов 17-қарасөздің көтерген мәселесі – толық сапалы адам болудың шарты, гармоническая личность жайындағы ойлар екенін түйіндеп, мұның төркіні өте әріде, тереңде жатқанын арнайы атап өтеді. Ғалым пікірінің маңызы Абай ойының адамзат ойшылдары дамытып келген төркіні терең дәстүрлі танымға сабақтасатын қатысын танытуда. Дәстүрлі тақырыпты сөз ету – өзгесін былай қойғанда өткенге ой жүгіртіп ізденіс жасау, аталы ақиқаттың күре тамырын дөп басып тану. М.Әуезов «толық сапалы адам, гармоническая личность» деп атаған Абайдағы өзіндік адамгершілік ілімінің М.Мырзахметұлының ізденісі арқылы даңғыл жолға түсіп, жаңа сапа, үлкен мазмұнға ие болғанын білеміз. Бүгінде М.Мырзахметұлы ізденісінің нәтижесінде көзіқарақты жандарға мән-мазмұны мәлім болып қалған Толық адам танымының бастауында М.Әуезов айтып кеткен қысқа ғана түйінді атаулардың тұрғаны қуанарлық жағдай әрі бұл арқылы М.Әуезовтің абайтанудағы көшбасшылық қызметі айқындала түседі. Әрине М.Әуезов өмірі жетіп, ізденіс әрекетін жалғай түскенде, ақындағы «жан-жақты асыл қасиетті адамның» (М.Мырзахметұлының «толық адамның») танымдық,

тағылымдық мән-мазмұны ғалымның ғұламалық, ойшылдық болмысына сай тереңірек ашыла түсер ме еді. Бар ғылыми зерттеуінің өзінде-ақ М.Әуезов бүгінгі ғылыми нәтиженің төбесін көрсетіп, белгісін танытар ойларын айтып кеткен.

Он бесінші қарасөздің адамдыққа, адамгершілікке қатысы жайлы М.Әуезов былай дейді: «Мораль мәселесін мінез белгілеріне байланыстыра отырып, әрбір жақсы адам боламын деген кісіге өз-өзіне есеп беру, самоанализ, самоотчет жасау қажет екенін айтады» [5, 226-227-66]. Абай қарасөзінің мәндік өзегі М.Әуезов танымы бойынша осылай анықталған. Біз әркез М.Әуезовтің өз ойларын уақыт, саясат, идеология, өзге де жағдайлар жағынан өз-өзіне шек қоймай, қалауынша көсіліп айта алмағанына қынжыламыз, өкінеміз. Әйтпесе оның қысқа ғана пікір білдірген ақын шығармаларында әлі де айта түссе болар еді-ау деген өзекті ойлар мол ұшырайды. Міне сол өзекті ойларды М.Әуезовтің өз қалауы, өз таным-түйсігімен дамыта жеткізгені жақсы-ақ болар еді. Біз енді ақынның он бесінші қарасөзін М.Әуезов қысқа қайырып берген пікірі бойынша дамытып танытуға тырысамыз. Бұл қарасөзде ақылды кісі мен ақылсыз кісінің Абай танымындағы белгілі бір парқы, айырмашылығы жайлы айтылады. Абай өз ойын әріден, терең төркіннен бастайды, адам жаратылысы жайлы ой өрбітеді. Біздің білуімізше, Алла мен адам арасында байланыс бар. Қалай болғанда да шын сыры беймәлім рухани жағымызды, ақыл-ой, жан-жүрек, түйсік-сезімімізді Алланың құдіретімен байланыстырамыз. Ал Абай айтқан тән құмарымен ғана тіршілік етіп жүрген жанды тән иелері – жан-жануар, жәндік атаулыда аталған рухани қасиеттер жоқ. Осы орайда ойымызға Алла мен адам арасындағы мынадай үш айырмашылық оралады: Біріншіден, Алла мәңгілік бар баки болмыс, ал адам мен өзгенің бәрі де бастауы мен аяқталуы бар өтпелі, фәни жаратылыс. Екіншіден, Алла ғана кемшіліксіз, серігі, ұқсасы, ортағы жоқ кемел болмыс, ал адам жүре келе өсіп өзгеретін, өзгергенде де тән жағынан өсуінен бөлек ақыл-ой, білім, мінез, қасиет жағынан жетілетін жаратылыс. Үшіншіден, Аллада бәрі бар, Алла ешнәрсеге мұқтаж емес, ал адам баласы – өмірінше мұқтаж болып жүретін қауқарсыз пенде. Дүниеге жаңа келген сәби шаранасынан шыға салысымен тынысы ашылып ауаны жұта бастайды. Адам баласының дүние есігін ашқанда

мұқтаж болатын ең әуелгі әрі ең алғашқы қажеттілігі – осы ауа. Кейін келе осы алғашқы мұқтаждығы – тамақ, ойын, күлкі, мақтан, атақ-даңқ, мансап, дүние-байлық, оқу-білім, ақыл-ой, адамгершілік болып жалғаса береді. Адамзат ойының алыбы Аристотель «Этика» атты трактатында осындай адам мұқтаж болып тұтылатын игіліктерді, Абайша айтқанда, қызықтарды тізе келіп, оларды үш-ақ топқа жинақтайды. Олардың жанға қатыстыларын, ал Абайша айтқанда, жан құмарына азық болатындарын ең асыл әрі биік игіліктер қатарында атайды, олар – ақыл-ой мен адамгершілік қасиеттер. Жақсы, ойлы, парасатты адам тамақты, ұйқыны керек ететіні секілді білім-ғылым, ақыл-ой, түрлі қайырымдылықтарды да әрекет жасап, арман етіп іздейді, яғни ақыл-ой мен адамгершілікке кәдімгі киім, тамақты керек еткеніндей мұқтаж болады. Абайдың он бесінші қарасөзінде «пенде адам болып жаратылған соң, дүниеде еш нәрсені қызық көрмей жүре алмайды» [6, 111-б.] дегені – адам баласының мұқтаж болар әр түрлі игіліктері мен қызықтары. Ойлап қарасақ, өмірдің өзі сол түрлі игіліктерді қызықтап, ойлап, іздеумен өтеді екен. Көрер күні аз қалған қария алдағы аз күнінің абыройы мен бала-шаға, үрім-бұтағының жақсы, қалаулы қалпын армандаса, ол да адам баласы аңсап, іздейтін игілік пен қызық. Демек өмір әр нәрсеге мұқтаж адамзаттың игілік пен түрлі қызықтарды қажетсініп тұтынуынсыз өтпейді екен: «сол қызықты нәрсесін іздеген кезі өмірінің ең қызықты уақыты болып ойында қалып...» [6, 111-б.] дегендей. Арман, үмітсіз адам болмайды, арман мен үміт жолындағы өмірдің қызық әрі жарқын болатыны да рас. Аристотель де адамдардың ой-өре, таным-түйсігіне орай әртүрлі игілікті қызықтап жүріп қуатынын жазған. Мысалы, оның айтуынша, кейбіреу пирамиданың ұшар басы, қадірлі төрі, биік шыңына дүние-байлықты қойып, соны ғана арман етіп, қызық көріп өмір сүрсе, ақыл-ойлы, обал-сауапты білетін адам өмірінің мақсаты етіп күнделікті әрекетімен ақыл-ой, адамгершілік абыройын іздеуі мүмкін. Абайдың он бесінші сөзіндегі негізгі ой да осы бағытта жалғасады: «Сонда есті адам орынды іске қызығып, құмарланып, іздейді екен-дағы... есер кісі орнын таппай, не болса сол бір баянсыз, бағасыз нәрсеге қызығып, құмар болып, өмірінің қызықты, қымбатты шағын итқорлықпен өткізіп алады екен-дағы» [6, 111-б.]. Есті кісінің әрекеті сүйсінерлік болса, есер

кісінің әрекеті өкінерлік әрі қасіретті! Ең қиыны – адамзат өмірі өлшеулі, өтпелі болуы себепті өткені қайта оралмайды. Міне осындай жағдайды М.Әуезов қысқа қайырып түйіндегендей, әрбір жақсы боламын деген кісіге өз-өзіне есеп беру, самоанализ, самоотчет жасау өте қажет болады. Байқасақ, М.Әуезов – Абай қарасөзінің өзегі мен мәнін дәл тауып бағалаған.

Абайда адам мінезінің мәнін, өсіп-өзгеретін даму динамикасын, көз-көңілге байқала бермейтін нәзік, шетін қыр-сырларын қолға ұстатқандай деректі етіп танытып берушілік жиі ұшырайды. Мысалы, үшінші қарасөзінде Абай адам мінезі мен қасиетінің мынадай желілі тізбегін ұсынады: Әрбір жалқау адам – қорқақ, қайратсыз келеді. Әрбір қайратсыз қорқақ – мақтанғыш келеді, әрбір мақтаншақ – ақылсыз, надан келеді, әрбір ақылсыз, надан – арыс келеді. Сонда жалқауды жалқау деп қоя салу аз екен, одан неше түрлі кеселді қасиет тарамдалып шыға береді. Енді осы әрбір арыс жалқаудан Абай жазғандай, сұрамсақ, өзі тойымсыз, тыйымсыз, өнерсіз, ешкімге достығы жоқ жандар шығады екен. Міне, бір кеселден осылайша сан кесел туады. Абай осы сөзінің басында қазаққа мынадай мінездеме беруші еді: «бірінің біріне қаскүнем болатыны, бірінің тілеуін бірі тілеспейтұғыны, рас сөзі аз болатұғыны, қызметке таласқыш болатұғыны, өздерінің жалқау болатұғыны» [6, 97-б.]. Абай осы бес кеселдің ішінен жалқау адамның ғана тарамдалып кететін қасиетсіз, парықсыз болмысын таратып сөз еткен. Егер Абай қарасөздерін ерекше мән беріп үңіле оқыр болсақ, мұндай моральдық мәселелер тізбегінің талайын табамыз. Өзіміз сөз етіп отырған он бесінші сөзде де осындай мінез белгілерін көзге көрсете таныту бар. Мысалы, Абай таратып танытпақ болған «әрбір нәрсеге қызықпақтықты» алайық. Қызығу барысында адам бойында құмарлық пайда болады екен. Керісінше болуы да мүмкін шығар, себебі ақын жазғандай, әр нәрсеге де әуелі тән құмары, жан құмары бастау болады ғой. Ал құмарлық өз кезегінде дерт екен. Егер кісінің құмарланғаны – жақсы нәрсе болса, қуанар, қадірі де артар. Абай сірә, «не болса сол, бір баянсыз, бағасыз нәрсеге қызығып, құмар болуды» айтып отыр. Міне осындай құмар болған нәрсеге жеткенде, я эне-міне, жетер-жетпес болып жүргенде, бір түрлі мастық пайда болады екен [6, 111-б.]. Абай алыстан тартпай, төтелеп бірден «мастық» жайлы

айтып кетсе де болар еді, бірақ ақын қашанғы әдетімен мәселенің төркінінен тартып сатылай өрлеп ой өрбітеді. Сөйтіп мастыққа жеткенше адам мінезі былайша дамиды екен, соны байқайық: қызығу – құмарлық – дерт – одан әрі өзіне ерік бермей кеткен осы дерт, ауру, әдеттің ықпалында жүріп мастыққа тап болады екенсің. Міне осындай-осындай ойлар М.Әуезов түйіп жазғандай, «мораль мәселесін мінез белгілеріне байланыстыра» сөз ету болып шығады. Төркін-тегі терең, мән-мазмұны ауқымды қарасөзге бірер сөйлеммен-ақ мәнін танырлық дәл баға беру – М.Әуезовтің ғана өресі жетер ой-таным тапқырлығы.

Абай адам мінезіндегі мастықтың мән-мазмұнын былайша танытады: «Әрбір мастық бойдан оғатты көп шығарып, ақылдың көзін байлап, төңіректегі қараушылардың көзін ашып, «ананы, мынаны» дегізіп, бойды сынататұғын нәрсе екен» [6, 111-б.]. Дәл қазір атын атап, түсін түстеп айтпасақ та, бұрынғы ойшылдар, оның ішінде Абай, Шәкәрім де бар, адам көзінің екі түрін ажыратып айтады: бірі – тән көзі, екіншісі – ақыл, ой, көңіл, көкірек көзі. Тән көзі өзінен тыс тұрған өзгені ғана көріп, соны ғана танып-біліп бағалауға бейім екен де, ақыл көзі өзгемен ісі жоқ, өзін-өзі «түртіп, оятып» аша алған кісінің ғана жаны, ділі, жүрегі, ақыл-ойын өңдеп, жөндеп жетілдіруімен қадірлі әрі құнды екен. Абайдың алтыншы сөзінде «осы жан кеудеден шықпағандық» пен «көкірегі, көңілі тірі болушылықты» [6, 103-б] салыстыра айтатынындай, ой көзі мен тән көзі де екі түрлі мән-мағынаға ие. Тән көзі әрбір дені сау адамда бар болса, ой, ақыл көзі тек ақыл-ойлы, есті кісілерде ғана болады. Осындай есті адамдарды ақынның жиырма бірінші қарасөзінде жазғанындай, «надан атанбастығын, әдепсіз, арсыз, байлаусыз, пайдасыз, сұрамсақ, өсекші, өтірікші, алдамшы, кеселді – осындай жарамсыз қылықтардан сақтанып, сол мінездерді бойына қорлық біліп, өзін ондайлардан зор есептейтін ақылды, арлы, артықтардың» [6, 116-б.] қатарына қоссақ болады. М.Әуезовтің он бесінші қарасөзге баға беруде ойын шегелей, бекіте, дамыта келіп, бірнеше сөзбен ғана «өз-өзіне есеп беру, самоанализ, самоотчет жасау» деп түйін жасауы тегін емес екен. Бұл – ақын қарасөздерін байыппен танып, ондағы ақынның «...ең болмаса, айында бір өзіңнен өзің есеп ал» [6, 112-б.], «үлкендік – адам ішінен өзін-өзі бағалы есеп қылмақ» [6, 116-б.] деген ойларын ескеруден туса

керек. Абай айтқандай, «аз ба, көп пе, адам баласы бір түрлі мақтаннан аман болмағы – қиын іс» [6, 115-б.]. Соның бірі – есерлер мінез етіп алатын мақтаншақтық та, екіншісі – есті кісілер ұстанатын «үлкендік». Осы екі топтағы кісінің мастық билеп мақтанға ерген сәтіндегі халін Абай былайша бейнелейді: «Сол уақытта есті кісілер үлкен есі шықпай, ақылды қолдан жібермей, бойын сынатпай жүріп ізденеді екен. Есер кісі ертоқымын тастап, бөркі түсіп қалып, етегі атының көтін жауып кетіп, екі көзі аспанда, жынды кісіше шаба беруді біледі екен, соны көрдім» [6, 111-б.]. Әрбір нәрсеге қызықпақтық барша адамға тән болса да, соның соңында жүріп нәтижеге жеткен есті, есер кісінің халі де екі түрлі боларынбайқаймыз. Адам өмірі о бастағы жаратылысында бар екі жақты қоспа болмысынан бастау алып, үнемі екі түрлі хал-жағдайдың ортасында жүрумен өтеді. Кісінің адамшылық пен кісілікке қарсы беттегі кесірлі, кеселді, жағымсыз болмысқа көшіп кетуі бір сәтте-ақ. М.Әуезов жазғандай, әрбір жақсы адам боламын деген кісі өз-өзіне есеп беруі, самоанализ, самоотчет жасауы қажет. Абайша айтқанда «егерде есті кісілердің қатарында болғың келсе, күнінде бір мәртебе, болмаса жұмасында бір, ең болмаса, айында бір өзіңнен өзің есеп алуың керек» [6, 112-б.]. Адам болу мен адамгершілікті сақтау оңай емес. Жан-жануар, жәндіктермен бірге, жаратылыстың өзге де туындылары болу оңай, ал адам болу аса қиын, аса жауапты, соншалық мехнатты әрекет. Алла тағала осы бір қиын әрі ардақты әрекетті адам үшін мүмкін етіп әрі сол адам болуды жеңіл ету үшін оларға ақыл-ес берген, ал жан-жануар, барша тіршілік, қозғалыс иелеріне ақыл-ес бермесе де, олардың жауапкершілігін жеңілдетіп, анығы тіпті жоқ етіп, оларға бір ғана тән құмарын беріп, оларды адаспайтын даңғыл жолға салып жіберген.

М.Әуезовтің Абай қарасөздерін тақырып-тақырып бойынша топтағанда, 15, 17, 18, 21, 22, 28, 30, 32, 34, 44-сөздерді арнайы бөліп алып, бұларда «үлкен адамгершілік, ақтық, тазалық, азаматтық жөніндегі тәрбиелік ойлар айтылатынын» жазған болатын. Солардың бірі біз талдап, өзімізше саралаған – 15-қарасөз еді. Бұл қарасөз жайлы М.Әуезовтің түйінді сөзі біреер сөйлеммен ғана берілген болатын. Біз оны М.Әуезовтің өзі



қалағандай қалып пен бағыт, мақсат пен мазмұнда біршама таратып танытуға тырыстық.

Ғалымның 17-қарасөз жайлы ойлары да оншалық көп емес, сөйтсе де М.Әуезов түбінде айтылуға тиіс түбірлі, төркінді пікірлердің, ақиқат ойлардың төбесін мұнда да танытып қояды. М.Әуезов жазғандай, Абай он жетінші қарасөзде өз тұсындағы және бұрынғы үлкен моралист, педагог ойшылдардың, ұстаздардың көп айтқан пікіріне жанасатын ой-толғау жасаған. Абайдағы төркінді ойлар жайлы ізденіс танытқан адам М.Әуезов айтқан қысқа да нұсқа сөйлемде өзегін тауып, мәнін таныта айтылған терең пікірлерден мәселенің ең мәнді өзегін көп қиналмай тани қояды. Шынында да Абайдың 17-қарасөзіндегі ой-толғамдар адамзат ақылы айналысар ең алғашқы, ең мәнді мәселе болған. Мұны өзгесін былай қойғанда, Аристотельдің «Этика» атты еңбегінде [14; 15] айтылған тұжырымдардан тануға болады. Аристотель бұл еңбегінің басында игілік, оның мән-мағынасы мен түрлері жайлы біршама кең көсіліп сөз етеді. Ә дегенде оқырман адамгершілік жайлы еңбекте игілік жайында мұншама мол сөз етудің не қажеті бар екен деп ойлап қалары бар. Сөйтсек оның игілік жайлы таратып сөз етуі тегін емес екен. Игілік адамзат үшін ең елеулі нәрсе екен. Себебі адамзат өмірі мен тіршілігі бір нәрсені керек етпей, ешнәрсеге мұқтаж болмай өтпейді екен. Алла ғана ешнәрсені керек етпейді, адамзат туа салысымен ауа мен ана сүтін қорек етіп керек етуден бастап, өмірінше киім, үй-жай, жақын-туыс, дос, ойын-сауық, оқу-білім, ақыл-ой, той-думан, дүние-байлық, мансап-қызмет, атақ-даңқ, түрлі мақтан секілді игіліктерді қалап, қажет етіп, тұтынумен күнін өткізеді. Өмірде ешнәрсені керек етпейтін адамды тірі деуге де келмейді. Абай айтқандай, дүниеге келген бала тән мен жаннан шығатын екі түрлі құмарымен жүріп тірлік етеді. Аристотель адамзат қажет етіп тұтынатын игіліктердің бәрін де қалыпты, орынды көреді. Оның адамзат үшін ең алғашқы игілік – тән мен денсаулық деп жазатыны бар. Мұны «бірінші байлық – денсаулық» деп қазақ та мақалдап айтқан. Аристотель тән құмары мен сезім рахатын қалау барша адам баласына тән құбылыс екенін жазады [14, 35-б.]. Шынында да тамаққа тәбеті болмай, ұйқысы келмей, қарсы жыныстағы кісіні қалап құмартпайтын адамды сау деп айтуға болмайды. Сөйтсе де бұрынғы-

соңғы ойшылдармен бірге Абай да шегелеп, бекітіп айтқан шеті, шегінен аспайтын «өлшеуін білмектің» қажеті айрықша зор. Аристотель барлық игіліктерді қалыпты, қажетті көре отырып, оларды қадір-қасиетіне қарай үш топқа бөледі [14, 7-8-с.]. Сонда ол ең қадірлі, ең абзал игіліктер ретінде ақыл-ой мен адамгершілікті атайды. Ғұлама ғалым өзге игіліктерді әсте керексіз демейді, олар жанағы ақыл-ой мен адамгершілік атты ең асыл, ең басты игіліктер жолында жәрдемші, көмекші болуымен ғана пайдалы әрі орынды игіліктер саналады. Аристотельдің пікірінше, адамзат өз өмірінің биік мұраты ретінде ақыл-ой мен адамгершілікті ұстанғанда ғана өз болмысына сай абыройлы да абзал болмақ. Әйтпесе өмірде атақ-даңқ, дүние-байлық, ойын-сауық, мансап-мактан үшін өмір сүретіндер де аз емес. Бірақ олардың өмірі ақыл қалап, көңіл сүйсінгендей мән-мағыналы, абыройлы, адами асыл болмайды. Байқап қарасақ, адамзат тарихы қиянаты кем я тіпті жоқ қайырымды қоғамға жету жолындағы қасиетті де киелі әрекетпен жалғасып келеді. М.Әуезов айтқандай, адамзаттың үлкен моралист, педагог ойшыл, ұстаздары кісілер қауымы мен келешек ұрпағын адамгершілік биігіне жетелеп тартумен келген. Олар айналысқан іргелі мәселені М.Әуезов «толық сапалы адам болудың шарты, гармоническая личность жайындағы ойлар» деп атаған. М.Әуезов түйіндеген «толық сапалы адам, гармоничная личность» тұлғасын М.Мырзахметұлы Абайдың өз сөзімен «толық адам» деп атап, ақындағы адамгершілік ілімін танып-білуді тың мазмұндағы даңғыл жолға салып жіберді. М.Әуезов мән-мазмұнын танып, бірақ таратып айта алмай кеткен іргелі мәселені М.Мырзахметұлы адам болу шарттары, хауас, жауанмәрттік, иманигүл, толық адам ұғымдары арқылы жүйелі де жан-жақты танытып берді.

17-қарасөздегі ақын мақсатын М.Әуезов «адам жан-жақты, асыл қасиетті болу үшін оның бойындағы қайрат, ақыл, жүрек (сезім – М.Ә.) үшеуі бірдей болып, тез табыссын деген талап қою» деп айқындаған. Міне осылайша М.Әуезовтің 17-қарасөз жайлы ойы түйінделіп бітеді. Мұнда да ғалым өз ойын көп таратып, кең танытып айтпаса да, өрелі жан түйсініп түсінетін деңгейге жеткізіп барып тоқтаған. Сонымен 17-қарасөз М.Әуезовтің пікірінше, жақсы, жетілген, кемел адам жайлы өрелі

ойларға орын берген. Яғни 17-қарасөзінде Абай өзі жүйелі түрде насихаттаған толық адам жайлы ой өрбітеді.

Енді алдыңғы айтылған танымды ойымызға сіңіріп, өзіміздің де тапқан, түйгендерімізді назарға алып Абай қарасөзін қайта оқып танып көрейік. Ең әуелі ақын айтқан қайрат, ақыл, жүрек – үшеуі жайлы не айтуға болады. М.Әуезов, әсіресе М.Мырзахметұлының пайымдауынша, осы үшеуінің бірлігінен жақсы адам, толық адам пайда болады. Яғни толық адам гуманистік, адамгершілік ілімі тұрғысынан танылады. Біздіңше, Абай «ақыл, қайрат, жүректі бірдей ұста, сонда толық боласың елден ерек» дегенде, толық адам ұғымына адамгершілікті болудан бөлек, адами жетілгендіктен өзге адам жаратылысының түгел, толықтығын да сыйғызған секілді. Әйтпесе Абай жалғыз ғана адамгершілік жағынан жетілгендік пен кемелділікті айтқысы келсе, адамгершілікті адамды ол неше түрлі «қасиетті», «жүректі», «жаны аяулы жақсы», «ер», «сүйікті ер», «арлы үлкен», «шыншыл ер», «жүрегі жұмсақ білген құл», «единица» секілді сөздерінің бірімен атар еді-ау. Соған қарағанда Абай қолданған «толық адам» ұғымында адамгершілік жағынан жетілгендікпен қоса, адам жаратылысының түгел, толықтығын танытатын мағына да болу керек. Сонда ақын қолданған «толық адамның» төркіні мен мәні бұрынғыдан да ауқымданып тереңдей береді. Бұрынғы-соңғы ойшылдар адамның тән, жан, ақылдан тұратынын талай жылдар бойы айтып, жазып келген. Осы үшеуінің жиыны мен бірлігі ғана адам жаратылысы мен болмысын жасайды. Мысалы, тәні, жаны ғана болып, ақылы болмаса, онда ол адам емес, жануар аталады. Қарапайым болмыс тек қана материя, тәннен құралып, тау-тас, топырақ, су ғана бола алады. Алладан келер рухпенбайланысы барақыл-ойы болғанда ғанажандытән, яғни жануарлар болмысы саналатын жаны бар тән – адам болмысына айналады. Абайда тән – қайрат, жан – жүрек, ақыл-ой, сана – ақыл күйінде қолданыс тапқан. Адам болмысы осы үшеуінің бар болып бірігуімен қоса, олардың адамгершілікті болуға да қосатын үлесімен жан мен тән және ақыл-ойға ие жаратылыс, яғни адамгершілігі жетілген толық адамға айналады. М.Әуезовтің үш қасиетке қатысты «үшеуі бірдей болып, тең табыссын» дегені адам жаратылысы мен болмысын түгел етуге байланысты айтылғанға ұқсайды. Әйтпесе адамгершілікті болуда

үшеуінің қызмет, үлесі әр түрлі. Тән мен дене және олардағы қайратсыз ешнәрсе де бітпейтіні, тіпті затты дүние де болмайтыны мәлім болса да, үшеуінің адамдыққа қосар үлес, салмағы «бірдей» болмайды: тән, қайраттан – ақыл артық, ақылдан – жүрек асыл, ол (жүрек) бәрінен биік, жоғары тұрады, ақын қарасөзінде айтылғандай, жүрек өзге екеуіне (ақыл, қайрат) жетекші, басшы болуға лайық. Абай айтып отырған «ғылым» адам болмысын тәндік әрі рухани жағынан танытатын таным саласы болса керек. Қайрат Абайдың айтуында дене, тән, қозғалыс, күш-қуат, еңбек ұғымдарын танытумен ерекшеленеді. Бір ерекшелігі, Абай осы сөзінде қайрат сипатын танытарда оның ақыл жетегімен әрекет етерін ескере бермейтін секілді, содан да кейде «қайраттың» «ақылға» ұқсап кететіні бар. Мысалы, «...үйрену керек, ол менің ісім, құдайға лайықты ғибадат қылып, ерінбей, жалықпай орнына келтірмек те – менің ісім» деп айтып отырған «кейіпкер» қайраттан гөрі ақыл мен жүрекке ұқсап кетеді. Адам мен дүние егіз десек, сол дүние де, адам да дене, тән, қозғалыссыз болмайды. Затты, тәнді дене болуы себепті адам мен дүние – періште мен рухи әлемнен ерекшеленіп бөлектенеді. Тіпті рухани әрекеттің бастауы – білу мен танудың өзі дене мен тәндегі бес сезім мүшесінің (хауасы хамса заһири) көмегімен жүзеге асады. Яғни материя, тәжірибе, сезімдік танымсыз адам болмысы мен тірлігі түгел, толық болмайды. Ал материя саналатын дене, тән және оның әрекетінен туындайтын нәрсенің бәрі де Абайда қайратпен байланыстырылады. 17-қарасөздегі қайрат айтқан ой-танымнан оның мынадай сипат, белгілері көрінеді: даму, жетілу, кемелденуге қолғабыс етіп, оған жеткізетін қозғалыс, күш, ізденіс әрекеті; оқу-білім, ғылым жолындағы ізденіске үлес қосатын қайрат-жігер, ыждақатты, қажырлы талаптылық, қайратты, қалыпты ізденіс әрекеті, табандылық, ғибадат жолындағы қажырлылық, шыдамдылық, беріктік секілді тәни әрекеттер, заттық, тәндік дүние ісіндегі өнер, мал, мансаппен абұйырға жеткізетін еңбек, жаманнан сақтап, жақсыға ұмтылдыратын шыдамдылық пен талапты қайраттылық. Сөйтіп Абай қолданған қайрат ұғымына адамдағы дене, тән мен оларға қатысты әрекеттер кіреді екен. Ақылсыз, ойсыз дене мен тән және одан шығар қайратсыз адам таным мен тіршілігі мүмкін болмай қалады. Содан да 17-қарасөздегі қайраттың: «осы екеуі маған

қалай таласады» дейтіндей жөні бар. Қайрат – адам жаратылысы мен болмысын жасайтын елеулі құрамдас бөліктің бірі, яғни тән мен денеге қатысты ақын қолданған категория мен ұғым. Біз тіршілік ететін дүниенің өзі – затты, тәнді әлем. Адамзат сол затты әлемде тәнін пайдалана жүріп өмір кешеді. Кемелденудің өзін жолы мен болмысына орай нысаналы, биік белес пен межелі жерге жету десек, оның өзі әрекетсіз, күш-қозғалыссыз болмайды. Адам болмысы екі жақты, яғни жартылай рухи, жартылай тәнді болуы себепті оның рухани ізденісі де тән көмегінсіз жүзеге аспайды, адам ақылы мен жаны оның тәніне байлаулы және олар тәнсіз түгел, толық болмыс бола алмайды. Адам болмысындағы қайрат, тән мен дене ақыл-есі жоқ дегені болмаса, онсыз адам ісі ешбір нәтижеге, кәметке жетпейді.

Ақыл таным құралы ретінде дүние мен ахиреттің мән-жайын, екеуіне не пайдалы, не зиянды болатыны мен ғылым сырын ұғатын қасиетімен көрінеді. Ақыл әрекеті айқын, ол – екі дүниенің сырын танытушы. Танып-білмей адам атану мүмкін болмаса, оның өзі тәндегі бес сезім мүшесі мен әрекет, қозғалыс, еңбексіз жүзеге аспайды.

Жүрек сөзі мен оның өзін-өзі танытуы біршама күрделі көрінеді. Адам баласы тәнімен тіршілік етіп, ақылымен дүние мен өзін танып, саналы болмысқа айналса да, адам бола түсудің берік кепілі – қайырымдылықтар жүректе жайғасатыны көрінеді. Абай айтқандай, ақыл – әуелде бір суық мұз, танып-біліп толыспаған әрі салқынқанды тану болса, жүрек тұла бойды тән жағынан да, рухани жағынан да жылытушы екен. Өзгеге қамқор, қайырымды болу, ұят, рақым, әділет, ынсап, мейірбаншылық бастауы мен мекені саналар жүректің адамгершілікті болуға қосар үлесі мол екені анық. Таным бастауы – түйсік жануарда да бар, бірақ ақыл мен жүрек арқылы қалыптасатын қайырымдылықтар – адамға ғана тән қасиет.

Ғылым сөзі арқылы ақыл, қайрат, жүрек үшеуінің өздері жайлы түйгендері толығып айқындала түседі. Қайрат өз сөзі арқылы ақыл мен жүрекке ұқсап кетсе, ғылым оның жақсылық пен жамандықты ажырата алмас жағдайын ескертіп өтеді. Ал ақылдың жаманшылығы жоқ «жүректің суаты бола» тұра, жаманшылықтың да қызметінде көрініп қалатыны өкінішті. Сірә осындағы ақын айтатын ғылым – адам мен оның адамгершілігі

жайлы жәуанмәртлік ілімі болар. Абайдың жәуанмәртлік іліміндегі жүректен шығар әділет пен рақым – ақылды ауыздықтаушы асыл қасиеттер. Бұлардан өзге амал мен айла да ақылдан бастау алады, алайда олар жүрек жолын бұрмалайды. Абай осы сөзіндегі жүрек жайлы ғылым сөзімен өлеңіндегі ойын ойға оралтады:

Ақыл да, ашу да жоқ, күлкі де жоқ,  
Тулап, қайнап бір жүрек қылады әлек [7, 95-б.].

Ақыл – айла мен амалға ерік беріп, оң-солды білуі мен тануы жоқ қайрат екеуі адасып жатқанда, жақсылық пен тура жолды жоқтап, сақтаушы бір ғана жүрек болып жүреді. Аристотель, әл-Фарабилер адамгершілікті жасайтын қайырымдылықтарды ақыл мен жүрекке қатысты жіктейді де, жүректен шығар әділет, рақым, мейірімді артық көреді. Абай танымы ақыл-ой тарихындағы сондай төркінді тамырмен үндесіп сабақтасады. Ақын айтатын ғылым – Сократ, Платон, Аристотельден басталып, әл-Фараби мен жалғасатын Этика ғылымы мен түркілердің Жәуанмәртлік ілімі болар. Ақыл мен қайрат өз міндеттерін мүлтіксіз орындап, жүректің жетекшілігін мойындаған қалыпта көрінер болса, үшеуінің осындай бірлігін сақтай алған адамды Ғылым «табанының топырағы көзге сүртерлік қасиетті адам» деп бағалайды [6, 114-б.]. 17-қарасөздегі Ғылым атынан айқындалған «қасиетті адам» мен Абай насихаттаған, ғалым М.Мырзахметұлы ғылыми айналымға енгізген «толық адам» – бір болмыс.

Діни-философиялық танымда Алла, Құдай – жаратушы, жарылқаушы, ғылымды, құдіретті, аса қамқор, мейірімді, рақымды Ие ретінде танылады. Әрі Абайдың 38-қарасөзінде Алланы ғылым, құдірет және өз тарапынан қосқан әділет пен рақым сипаттары арқылы танытуына сүйеніп, Алла, Құдай – ақыл мен адамгершіліктің бастауы екенін болжауға болады. Абай 17-қарасөзінде үш қасиеттің бірлігі мен жүрекке басымдық бере айтқан ойларын қорыта келе: «Құдайшылық сонда, қалпыңды таза сақта, құдай тағала қалпыңа әрдайым қарайды» деуінен неғізісінде ақын айтпақ болған түйінді ойдың – адамгершілікті насихаттау екені танылады.

М.Әуезовтің 17-қарасөз жайлы ойының құндылығы – ондағы негізгі мәселенің ғалым тарапынан – «толық сапалы адам

болудың шарты, гармоническая личность жайындағы ойлар» деп айқындалуынан көрінеді. Әрі бұл мәселенің бұрынғы-соңғы ойшылдарда көп сөз болғанын түйіндеп ескертуімен де маңызды. Тек ғұлама ғалымның «адам жан-жақты, асыл қасиетті болу үшін оның бойындағы қайрат, ақыл, жүрек (сезім. – М.Ә.) үшеуі бірдей болып, тең табыссын деген талап қояды» [6, 227-б.] деп, ақын ойынан біршама бұра тартып кететіні де бар. Абай «үшеуі бірдей болып, тең табыссын деген талап қоймаған-ау», қайта үш қасиеттің адам болмысы мен иесін адамгершілікті етуде қосар үлесін ара-жігін аша ажыратып, айқындап айтатыны бар. Ең бастысы, ақын мұнда М.Мырзахметұлы зерделеп танытқанындай, адам болуда жүректің қасиетіне көбірек көңіл бөлген. Ақылды, ойлы болу жүректен шығар қайырымды қасиеттермен ұласып, адам болмысын мүмкін болар биік кемелділікке жеткізеді. Абай шығармаларын, ондағы ішкі ой астарлары мен жүйесін тани оқыған кісі аталған үш қасиеттің мән-жайы одан әрі айқындала түсетінін байқайды.

М.Әуезовтің Абай қарасөздеріндегі адамгершілік жайын арнайы сөз етуші ретінде келесі атайтыны – 18-қарасөз. Бұл сөз жайлы М.Әуезовтің пікірі қысқа да нұсқа берілген, ол мынадай: «Он сегізінші сөзінде және де қысқа қайырып, адамды адам етіп өсіретін, ұлғайтатын ақыл, ғылым, ар, мінез деген ой түйеді» [6, 227-б.]. Шынында Абай қарасөзінің түйінді ойы – осы. Бұған дейін адамдардың адасып, өз-өздерін «бет-пішіні, сақал-мұрты, мүшесі, жүріс-тұрысы, қас-қабағы мен аты, киімі арқасында сыпайы, жұғымды жігіттанбақ» [6, 114-б.] болатынын – Абай масқаралық, ақымақтық деп санайды. Ақын 43-қарасөзінде адам баласының екі нәрсе – тән мен жаннан жаралатынын айтып, «әрнешік тән қуатымен сырттан тауып, сыртта сақтайсыз, оның аты дәулет еді... Соған ұқсаған іштегі жан қуатымен жиған нәрсенің аты ақыл, ғылым еді ғой» [6, 162-б.] деп жазған еді. Осы қарасөзінде жан қуатының үш түрі жайлы айтып бергені де бар. Жиырма алтыншы қарасөзінде қазақтың бәйгеге қосқан аты, күреске түсірген балуаны, салған құсы, қосқан иті озып, асып, артып келсе, соған бір есі шығып қуанатынын сынаушы еді [6, 120-б.]. Міне бұлар да адам болмысының асыл бөлігі – жан қуатымен таппайтын, тән қуатымен келетін әрі сыртта ғана сақталып, адам болмысына бұлардың шын абырой мен қасиет

қоспайтыны белгілі. Бұдан өзге Абай ертеректе жазған «Сап-сап, көңілім, сап, көңілім» өлеңінде-ақ ақыл тоқтатып ұлғайған шағында айтуына орынды, қисынды көрінетін тапқыр түйінін былайша жеткізген:

Хош, қыз алсын қойнына,  
Бейнет көрмей, дәулет жоқ [7, 16-б.].

Ақын алғашқы тармақта тән құмарымен табылатын тән рахатын айтып отыр, бірақ сол тән рахатын жақсы көру, ұнату мен сүю-күю секілді жан қуатының «бейнетінсіз» табуды ақын жөн санамайды. «Бейнет» сөз-қолданысының жан қуатымен байланысты болатыны ақынның «Кейде есер көңіл құрғырың» өлеңіндегі үзіндіден байқалады:

Кейде есер көңіл құрғырың,  
Махаббат іздеп талпынар.  
Ішсем деп бейнет сусының,  
Асау жүрек алқынар [7, 119-б.].

Тән қалауы – ішу-жеу, ұйықтау, ақыл қалауы – тану, білу болса, жүрек ісі – сүю, ақын мұны 14-қарасөзінде: «асықтық та – жүрек ісі» деп түйген болатын [6, 110-б.]. Байқағанымыздай, Абай адам болмысының артықшылығы мен асылы – ақыл мен жан арқылы айқындалатынын баса айтады. 7-қарасөзінде де: «Тәннен жан артық еді, тәнді жанға бас ұрғызса керек еді» [6, 103-104-б.] деп жазады. Дүние-байлық пен дәулеттің өзі жан қуаты арқылы пайда болатын ақыл мен ғылымның көмегімен келетіні тағы бар:

Дүние де өзі, мал да өзі,  
Ғылымға көңіл берсеңіз.  
Білгендердің сөзіне  
Махаббатпен ерсеңіз [7, 41-б.].

Ақын ойлары өлең, қарасөздерінің бірінде әрі екеуінде де ұшырасып, өзара байланысып, сабақтасып жатады. Мысалы, өлеңнің соңғы екі тармағындағы ой 19-қарасөзде былайша сабақталады: «естілердің айтқан сөздерін ескеріп жүрген кісі өзі де есті болады... Сол кісілерден естіп білген жақсы нәрселерін



ескерсе, жаман дегеннен сақтанса, сонда іске жарайды, соны адам десе болады» [6, 114-115-бб.]. Ал «Қайғы шығар ілімнен» өлеңінде ақын жан мен тәннен шығар ақыл мен дәулет және келбет – үшеуінің ара-жігін ғажап ажыратып былайша танытады:

Ақыл бітпес дәулетке,  
Дәулет бітпес келбетке [7, 146-б.].

Яғни ақын айтқан «бет-пішін, сақал-мұрт, мүше, жүріс-тұрыс, қас-қабақты – келбет десек, бұлармен адам дәулетті болмайды екен. Аты, құсы, киімі, барша дүниесі – дәулетін құраса да, сол дәулетімен ақыл таппайды екен. Осылайша әрбір өлең, қарасөзінде әр қырынан айтылып келген ойлар 18-қарасөзінде былайша түйінделеді: «Тегінде, адам баласы адам баласынан ақыл, ғылым, ар, мінез деген нәрселермен озбақ. Онан басқа нәрселермен оздым ғой демектің бәрі де – ақымақтық» [6, 114-б.]. Яғни адам баласы жан-жануар, жәндіктерде жоқ, тек өзінде ғана бар «көрсем, білсем, үйренсем екен» деген жан құмары, солар арқылы пайда болып жиналатын ақылы, ғылымы, ары, мінезі арқылы ғана артық, асыл, биік болмысқа айналады. М.Әуезов өзінің қысқа да нұсқа пікірімен біз біршама таратып айтқан ойдың түйінді тұсын ғана жеткізген. Ал сол қысқа ойларын М.Әуезовтің өзі таратып айтқан болса, біздер бүгінде Абай танымы мен тағылымын бұдан да терең тани түскен болар едік.

Осы орайда бір мәселені айтып өту орынды болады. Бұрынғы-соңғы ойшылдар адамның адамдық қасиеттерін ақыл мен жүрекке қатысты интеллектуалды, ойшылдық және этикалық, адамгершілік қайырымдылықтар деп бөлетіні бар [14, 13-14-с., 129-с.; 16, 195-196-б.]. Адамгершілік қасиеттерді осылайша жіктеу қасиетті Құранда да орын алған. Абай да сол дәстүрмен екі топтағы қайырымдылықтарды бірдей қамтып теңдей атаған. Яғни ақыл мен ғылым – ойшылдық қайырымдылықтар болса, ар мен мінез – этикалық қайырымдылықтарды ойға оралтады. Ал әл-Фарабидің мінезді – ақыл мен әрекеттің бірлігінен туындатып барып басқаша танытатыны да бар.

Сөйтіп Абай 18-қарасөзінде адамгершілікті танытатын ақыл, ғылым, ар, мінезді – адам болмысын айқындап, айғақтап, әрі

адамды асыл, артық етер қасиеттер ретінде атайды. М.Әуезов осы жайларды дәл танып, олардың өзегін, мәнін ғана түйіп айтқан.

М.Әуезов бұдан әрі ойын тым қысқа қайырып, адамгершілік жөніндегі тақырыптың 32, 44-сөздерде қайталай сөз етілетінін атап қана өтеді. Және бұларда «ғылым басқа есеп үшін емес, адамның бас қасиеті өсуі үшін арлы, мінезді, толық мағыналы адам болу үшін жәрдем етсін дейді» [6, 227-б.] деп, жақша ішіне 38-қарасөзді көрсетіп қояды. Демек аталған екі қарасөздегі түйінді ойдың 38-қарасөздегі мазмұнмен сабақтасып ұласатынын танытқаны байқалады.

Абай 32-қарасөзін «Білім-ғылым үйренбекке талап қылушыларға әуел білмек керек» деп бастайды [6, 128-б.]. Ғылым-білімнің адамгершілікті құрайтын кесек қасиеттер екені белгілі. Демек бұл қарасөздің мазмұны да М.Әуезов атап өткендей адамгершілік жайын танытуға елеулі үлес қосады. Енді осы қарасөздің мазмұнын адамгершілік ілімі мен тәрбиесіне қатысты саралап көрейік. Абай мұнда білім-ғылым үйренбекке талап қылушылықтың өзіндік шарттары жайлы сөз етеді. Ең әуелгі шарт – білім-ғылым іздеуші оның жалғыз өзін, ғылымның өз болмысын ғана асыл көріп ізденуі керек. Абай ойы астарлы, сан қатпарлы, қыртысты келеді. Кейде соларды бір-бірлеп, нөмірлеп танытуға да тура келетіні бар. Мысалы, ақынның үшінші қарасөзіндегі қазаққа берген сипаттамасын былайша тізіп көрсетуге болады.

1. Бірінің-біріне қаскүнем болатыны;
2. Бірінің тілеуін бірі тілеспейтұғыны;
3. Рас сөзі аз болатұғыны;
4. Қызметке таласқыш болатұғыны;
5. Өздерінің жалқау болатыны.

Ақын бұдан әрі мораль философиясының аясында жалқау адамдағы қасиеттің арғы-бергі төркін-тегін, мән-мазмұнын былайша таратып ұқтырады:

1. Әрбір жалқау кісі – қорқақ, қайратсыз келеді;
2. Әрбір қорқақ, қайратсыз адам – мақтанғыш келеді;
3. Әрбір мақтаншақ – ақылсыз, надан келеді;
4. Әрбір ақылсыз, надан – арсыз келеді;
5. Әрбір арсыз жалқаудан – сұрамсақ, өзі тойымсыз, тыйымсыз, өнерсіз, ешкімге достығы жоқ жандар шығады [6, 97-б.].

Мораль философиясы мен адамгершілік іліміне қатысты осындай ізерлі, байқампаз, тапқыр ізденістерін Абай әр-әр тұста жиі-жиі танытып отырады. 32-қарасөзінде де ақын айтар ойын тәптіштеп танытады. Яғни әр адам білім-ғылымды іздегенде, оны ғылым арқылы келетін өзге бір пайда, қызықты көздеп, ойлай жүріп іздемеуі керек екен. Абай жазғандай, ғылым іздеуші талапкер білім-ғылымның бір өзіне ғана құмарланып, ынтық болып, бір ғана білім-ғылым жолындағы білмектіктің өзін ғана дәулет, қызық, бақыт санап үйрену керек. Яғни білім-ғылымды өзге бір дүнияуи нәрсеге жету үшін құрал, баспалдақ етпей, оның өзін ғана қалап, өзіне ғана құмар болып үйренбек керек. Осы орайда ақын «Ғылым таппай мақтанба» өлеңінде былай деп жазады:

Өзін үшін үйренсең,  
Жамандықтан жиренсең,  
Ашыларсың жылма-жыл.  
Біреу үшін үйренсең,  
Біреу білмес, сен білсең,  
Білгеніңнің бәрі тұл [7, 42-б.].

Қандай нәрсенің, нендей мәселенің де өзіндік өзегіне, түп мәніне, нағыз өзіне ұмтылған жөн. Сонда көздеген нысана, мақсат-мұратыңа дөп түсіп, тез жетіп, ізденіс, уақытың да ысырап болмайды. Абай жазғандай, әр білмегенінді білген уақытта көңілде бір рахат тыныштық, жайлылық пайда болады. Яғни бұл рахат пен тыныштық білім-ғылымның өзін ғана біліп-танып иеленгеннен пайда болады. Осы рахат пен қуаныш, жайлылық білгенінді берік ұстап, білмегенінді тағы да сондай білсем екен деп үміттенген құмар, махаббатты тудырады. Сонда әрбір естігенінді, көргенінді көңілің жақсы ұғып, анық өз суретімен ішке жайғастырып алады. Осынау жан қуатымен болатын игі әрекетті қысқа әрі бірінен-бірі пайда болатын ретімен тізбектеп берер болсақ, ол мынадай желіні құрайды: білім-ғылымға махаббат – білім-ғылым – рахаттанған, тыныштық тапқан жан – тағы да біле түсуге деген құмар мен махаббат – шынайы білім-ғылым. Абай 38-қарасөзінде тыңдаушыларына адам баласының мінездері жайлы айтуды ойлап, мұны ықыласпен тыңдап, ұғып алғанның махаббаты толады деуші еді

[6, 136-б.]. Ал махаббаттың өзін – әуел адамның адамдығы, ғақыл, ғылым деген нәрселермен де айқындаған. Адамдық, ғақыл, ғылым дегендер адамзат болмысының тек өзіне ғана тиесілі жан қуатымен табатын түпкі қазына, нәтижесі. Сол түпкі қазына, нәтижеге бастау болатын да әуелде махаббат екен: «талап, ұғым махаббаттан шығады» [6, 136-б.]. Баланың «адам» деген ардақты атты иеленуін де ақын осы махаббатпен байланыстырған: «қашан бір бала ғылым, білімді махаббатпенен көксерлік болса, сонда ғана оның аты адам болады» [6, 136-б.]. Абай адам өмірі мен оның адамгершілік қалпы мен қасиетін махаббатпен байланыстыруы жиі ұшырайды. Мысалы, «Кейде есер көңіл құрғырың» өлеңінде:

Махаббатсыз – дүние дос,  
Хайуанға оны қосындар [7, 119-б.] -

деп, махаббат сезімінсіз адамның хайуан болып кететінін мегзесе, «Ерекше естен кетпес қызық қайда» өлеңінде:

Бұл өмірдің қызығы махаббатпен,  
Көрге кірсең үлгілі жақсы атакпен [7, 221-б.] -

деп, махаббаттың екі өмірде де адам үшін абыройы мен қасиеті, иманы боларын баса айтады. Өрі осы өлеңдегі ақын аңсайтын асыл арман да махаббатпен сабақтасып танылады:

Жүректен ізі кетпес қызық көрсек,  
Жақсылықты аянбай жұртқа бөлсек,  
Жақынның да, жардың да, асықтың да  
Бәрінің де қызығын көріп білсек [7, 221-б.].

Ақын айтар ойлар осылайша өз жүйесі, өз орнымен, ортақ арна, күретамыр қалпымен мәнді мазмұн, өзекті сырды жеткізуге ұмтылады. Яғни ақынның махаббатты соншалық әспеттеп, әр-әр тұста жүйелі насихаттап отыруы тегін емес екен. Махаббат – Абай өмірі мен шығармашылығындағы өзі ұстанған жолы мен өмір бойы жырлап өткен адамгершілік ілімінің биік шыңы. Мұны ақынның «Адам бір – боқ көтерген боқтың қабы» өлеңі мен 45-қарасөзінде әсіресе түйіндеп жеткізген ойынан байқаймыз:

Адамды сүй, алланың хикметін сез,  
Не қызық бар өмірде онан басқа [7, 233-б.]?!

«Адамды сүюді» – махаббаттың өзі деп ұқсақ, «алланың хикметін сезбек» те махаббатсыз болмайды. Абай 38-сөзінде «алла тағала өзі – хақиқат жолы» [6, 137-б.] деп жазады. Алланың хикметін Оның сегіз сипаты ішіндегі Ғылымы деп қабылдасақ, сол жолдағы ізденісіміз де махаббатсыз жүзеге аспайды: «Адамның ғылымы, білімі хақиқатқа, растыққа құмар болып, әр нәрсенің түбін, хикметін білмекке ынтықбірлән табылады. Ғылым – Алланың бір сипаты, ол хақиқат, оған ғашықтық өзі де хақлық һәм адамдық дүр» [6, 137-б.]. Абай махаббаттың адам болмысын айғақтар асыл қасиет екенін адамнан тыс мысалдарымен де танытып бағады. Мысалы, «Жазғытұры» өлеңінде әлемдегі, табиғаттағы махаббат пен сүю көріністерін әдемі де тапқыр жеткізген:

...Анамыздай жер иіп емізгенде,  
Бейне әкендей үстіңе аспан төнер.

...Қара тастан басқаның бәрі жадырап,  
Бір сараңнан басқаның пейілі енер.  
Тамашалап қарасаң Тәңірі ісіне,  
Бойың балқып, еридi іште жігер.

...Күн – күйеу, жер – қалыңдық сағынысты,  
Құмары екеуінің сондай күшті [7, 121-б.]

Адамдағыдай ақыл-сана, сезімі жоқ әлем мен табиғаттың өзі осылайша махаббатын, сүюін тамашалап танытып жатқанда, асыл болмыс, ақылды жаратылыс саналарадамзаттың махаббат пен сүюсіз тірлік етуі тіпті қисынсыз деген ой туады. Абай анайылау болса да, 45-қарасөзінде «Бұлардың керек емес жері жоқ, кіріспейтұғын да жері жоқ. Ол жаратқан тәңірінің ісі. Айғыр биеге ие болмақта да махаббат сезім бар» деп ақиқатты ашып айтады. Абай сөзінің анайылығы ақиқатты айту әрекетімен «жуылып-шайылып» кететінін кезінде А.Байтұрсынов жазған болатын. Сөйтіп Абай ойының түйінін «Адамшылықтың алды – махаббат, ғаделет сезім» деп танысақ болады [6, 164-б.].

Білім-ғылым, әсіресе ынта, ықылас, махаббатпен табылатын білім-ғылым адамдықты арттыра түседі. Білім-ғылымды үйренбекке талап қылудың бірінші шарты – білім-ғылымның өзін махаббатпен іздеу болса, екінші шарты – білім-ғылымды айқын мақсатпен бір ғана білмек үшін үйрену екен. Мұны Абай ертеректе жазған «Жасымда ғылым бар деп ескермедім» өлеңінде айтып қойған:

Баламды медресеге біл деп бердім,  
Қызмет қылсын, шен алсын деп бермедім [7, 22-б.].

Баланы қызмет үшін, шен үшін оқыту – бахасқа бола үйрену болады. Абай 43-қарасөзінде «ішпек, жемек, кимек, күлмек, көңіл көтермек, құшпақ, сүймек, мал таппақ, мақтан іздемек, айлалы болмақ, алданбастық – бұл нәрселердің де өлшеуі бар. Өлшеуінен асырса, боғы шығар» [6, 162-б.] деп жазғанындай, бахастық та білім-ғылымға ұмтылуда аздап жәрдемші болады. Бірақ Абайдың пікірінше, көбірек бахас адамды түземек түгіл, бұзады [6, 129-б.]. Бахастық жасап жүріп адам түпкі мақсаты – хақты табуды ұмытып кетеді, әйтеуір жеңуді ғана ойлап бахас болады. Абай қай мәселені сөз етсе де, түпкі мәнін, өзегін танытып сөз етеді. Мысалы, осы білім-ғылымды білмекке талап қылушыларға қатысты шарттары – сондай мәнді мәселе және ол атақты ойшылдар сөз еткен мазмұн мен қалыпта көрінеді. Белгілі бір жанама игілікті негізгі, басты игілікке жету жолында уақытша пайдаланып қызықтауға болады. Керісінше, негізгі, басты, ең құнды игілікті арзан игілікке жетуде басқыш етіп тірлік ету – Абайдың он бесінші қарасөзінде айтатын есер кісісінің әрекеті. Адамның әрбір ой ізденісі мен тән әрекетінде де – айқын, дұрыс, оң мақсат көздеудің маңызы аса зор. Мақсат – философияда елеулі категория ретінде қарастырылады. Түпкі мақсат оң, дұрыс болып, өзге мақсаттар сол негізгі мақсатқа қызмет еткенде ғана адам өмірі мәнді де абыройлы болады. Мысалы, Шәкәрім ақын адам мен айуанның мақсатын былайша айқындайды: адам ізгілік үшін өмір сүреді, айуан тіршілік таласы үшін әрекет етеді [17, 6-б.]. Міне, өте айқын, анық әрі түпкі мақсатты қоя білудің мысалы осы. Айуанда ізгілік үшін өмір сүре алатындай жан құмары мен ақыл-сана жоқ, олар тек қана тән құмарымен тіршілік етеді. Абай

ғылымды үйренгендегі негізгі мақсатты – хақты табу, ақиқатқа жету, адамшылықты зорайту деп біледі. Аристотель «Этика» атты еңбегінде барша игіліктер жайлы айта келіп, оларды пирамида бойына қадір, қасиетіне орай орналастырады, сонда пирамиданың ең биік төрі мен шыңында ақыл мен адамгершілік тұрады, өзге игіліктер ауа, тамақ, киім, денсаулық, үй-жай, отбасы, дүние-байлық, қызмет-мансап, атақ-даңқ, ойын-сауық, демалыс болып пирамиданың табанынан бастап бірте-бірте биіктеп орналаса береді. Бірақ бұлардың бәрі де пирамида шыңындағы негізгі де басты игілік – ақыл мен адамгершілікке жетуде жәрдемші, баспалдақ-басқыш қана болатын қосымша, қосалқы, жанама игіліктер. Өмірде Аристотель мысал еткен пирамиданың шыңына ақыл мен адамгершілікті қоймай, яғни ақыл мен адамгершілікті мақсат етпей, дүние-байлық, қызмет-мансап, ойын-сауық, атақ-даңқты қойып та тірлік ететін елдер мен адамдар ұшырасады. Бірақ олардың жанама игіліктерді негізгі игілік ретінде қабылдап өмір сүруі – айқын, оң, дұрыс мақсат қоя алмай адасқандық болып табылады. Абай айтатын бахас өзінен туындайтын күншілдік, өтірік, өсек, ұрыс-төбелес секілді әрекеттерге алып келеді де, адамның өзін абыройсыз, ал өмірін мәнсіз етеді. Бәрі де білім-ғылымды үйренбекте хақты табу мен бір ғана білмектікті көздеген айқын мақсат қоя алмаудан пайда болады.

Білім-ғылымды үйренудегі үшінші талап пен шарт – хақиқатқа жетіп, соңынан соны ғана тұтынып, ұстана білу. Жеткен хақиқатыңа ең әуелі өзің құрмет көрсетіп, содан соң ғана өзін тұтынған хақиқат жолына өзгені сала аласың. Білім-ғылым – өлшеусіз, шексіз игілік. Себебі адамның ғылымы Алланың бәрін білетін Ғылымын бетке алып ізденуімен толығады, жетіледі. Ал Алланың Ғылымы – таусылмайтын таным. Осы өлшеусіз білім-ғылымды көбейтуде Абай екі түрлі құралды атайды, бірі – мұлахаза, яғни ойласу, пікірлесу, ғылыми, ойлы орта, екіншісі – мұхафаза – жеткен хақиқатыңды сақтау, бекіту, қорғау. Осы екі құралмен білім-ғылым артып, ұлғаяды, зораяды. Бұл екі құралды зорайту әрекетінде болу – білім-ғылымды үйренудегі төртінші шарт.

Абай отыз бірінші қарасөзінде естіген нәрсені ұмытпасқа жеткізетін төрт түрлі себепті әңгімелеген. Естіген нәрсе дегенде,

білім-ғылым, өнегелі нәрсені ұғамыз ғой. Шындап келгенде 31-сөздің мазмұны 32-сөз мазмұнынан алшақ кетпейді, тек 31-қарасөзінде ақын ойы қысқа қайырылған да, 32-сөзде онысын тарата сөз еткен. Тағы бір айырмашылығы – 31-сөзде естіген нәрсені ұмытпаудың амалдары айтылады да, 32-сөзде білім-ғылым үйренбекке талап қылушыларға ақыл-кеңес беріледі. Естіген нәрсені ұмытпау мен білім-ғылымды үйренбекке талап қылу бір-бірімен байланысты әрекеттер. Содан да екі сөздегі ой-мазмұн бір-бірінен алшақ кетпей, қайта бір-бірін толықтыратынақтаған. Мысалы 31-қарасөзінде ақын «төртінші – ой кеселді нәрселерден қашық болу керек» десе, 32-сөзінде: «бесінші – осы сөздің он тоғызыншы (отыз бірінші) бабында жазылған ақыл кеселі деген төрт нәрсе бар, содан қашық болу керек» деп, алдыңғы сөзге сілтеме жасап, әрі сол ойды қайталап айтады. Білім-ғылым үйренушіге залалды төрт кесел 31-сөзде айтылғандай, уайымсыз салғырттық, ойыншы-күлкішілдік, бір қайғыға салыну және бір нәрсеге құмарлық пайда болу еді [6, 128-б.]. Абай 32-сөзінде осылардың ішіндегі, әсіресе уайымсыз салғырттық деген кеселінен сақтандырады. Осы уайымсыз салғырттық – құданың, халықтың, дәулеттің, ғибраттың, ақылдың, ардың дұшпаны ретінде аталады. Әрі уайымсыз салғырттық болған жерде аталған қасиетті де киелі, пайдалы игіліктердің болмайтынын айтады.

Алтыншы шарт ретінде мінездің пайдасы мен орны жайлы ой айтылады. Абай мінез жайлы ұғым, ақылды сақтайтұғын сауыт, мінез беріктігі дегендерді сөз еткенде, адам жанының қайырымдылыққа кенелген жақсы, сау халін айтып отырған секілді. Адамдағы әрбір жақсы қасиет – екі шеткі кемшілікті, кесел қасиеттің орта тұсы болатын қайырымдылық қалпы [10, 22-б.; 14, 130-с.]. Абай кемшілікті қасиеттерге бой алдыруды мінез беріктігінің бұзылуы деп біледі. Білім-ғылымды үйренуде «тоқтаулылық, қалыпты шыдамдылық» керек, алған бетінен қайтпайтын, айнамайтын беріктік қажет. Абай осы сөзінде мінез сауытын сөз еткенде, толық адам қалпын сақтауды айтатын секілді: «қылам дегенін қыларлық, тұрам дегенінде тұрарлық, мінезде азғырылмайтын ақылды, арды сақтарлық беріктігі, қайраты бар болсын. Бұл бір ақыл үшін, ар үшін болады» [6, 130-б.]. Мұнда Абай армандаған ақыл, жүрек, қайрат – үш қасиеттің



бірлігі танылады. Сөйтіп Абайдың бұл қарасөзінде білім-ғылым, ақыл мен ар, адамгершілік жайлары сөз болады. Сөз соңындағы «бұл бір ақыл үшін, ар үшін болсын» деген ақын түйіні текке айтылмаған деп білеміз. Өйткені білім-ғылым үйренудегі түпкі мақсат – хақты табу, адамгершілікті болу. Осы бір түйінді ой М.Әуезовтің пікірінде арнайы айтылған: «Бұларда ғылым басқа есеп үшін емес, адамның бас қасиеті өсуі үшін арлы, мінезді, толық мағыналы адам болу үшін жәрдем етсін дейді (отыз сегізінші сөз)» [5, 227-б]. Байқағанымыздай, Абайды кейінгі зерттеушілер қаншалықты терең таныса да, М.Әуезов айтып, танытып, төбесін көрсетіп кеткен таным төңірегінен табылады. М.Әуезов Абайға қатысты келелі ойларды таратып, мәресіне жеткізе айтпаса да, таратып айтылар мол мазмұнның өзегін, мәнін өз заманынан асып, алға шығып оза айтып қояды. Мұны жоғарыдағы ғалым жазған пікірден ғана емес, сонау 1918 жылы оның Ж.Аймауытовпен бірге жазған мақаласындағы түйіндеуден де байқауға болады. Ж.Аймауытов пен М.Әуезов сол бір ерте кезеңде-ақ ақын шығармашылығының ауқымы мен бағытын, негізгі мазмұнын айқындап берген, кейінгі зерттеушілер көбіне сол баяғы аталған мәселелерді тарата сөз етумен келеді. Әрі екі қаламгер пікіріндегі айқындалған мәселелердің айтылу ретінде де үлкен мән бар деп ойлаймыз. Мысалы, олар Абайдағы басты мәселені «мінез түзететіндік (ахлақи), жүрекпен толғайтындық (фәлсафа) деп екеуін алғаш атауы тегін емес, өйткені аталған екі ерекшелік Абайда айрықша айқын көрінеді: бұдан әрі «сыншылдық (критика), суретшілік (художественность), жүректің мұң-зарын, сырын тапқыштық (лирика), ащы тілділік, ызамен күлетін (сатира), һәм керемет переводчиктік» деп, Абай шығармашылығының бар болмысын анықтап береді [3, 96-б.]. Міне осындай білгірлік пен көрегенділік М.Әуезовтің Абайды танытуында жиі ұшырайды.

М.Әуезов ақынның «үлкен адамгершілік, ақтық, тазалық, азаматтық жөніндегі тәрбиелік ойлар айтатын» қарасөздерінің ішінен ең соңында 44-қарасөз жайлы қысқа пікірін келтіреді: «Қырық төртінші сөзінде тәрбиелік ойдың тағы бір шартын адамның басындағы мінезділікпен байланысты талапқа әкеп саяды» [6, 227-228-б.]. Абай әркез адам болмысы мен мораль философиясы аясындағы адамгершілік жайларын жайшылықта

көзге түсе бермейтін нәзік, тосын қырларымен танытады. Аталған қарасөздегі ақын танытпақ болған түйінді ойлар мыналар: талапсыздық – ең жаман қасиет, талап қылушылар да, талаптың өзі де әртүрлі болады, талаптылық – қалайда жақсы қасиет, адам баласы «бәрекелді» деп қолдағанды көңілі қалап тұрады, әрі мұндай «бәрекелдіні» кездейсоқ кісі я әркімнен емес, өзімен жолдас, майдандас, сырлас қауымынан күтеді екен. Абай бұл қарасөзінде адам баласының өз басына қадір іздеп талаптануы жайлы айтады. Қауымындағы көп кісі малымен елеулі, дүниесімен қадірлі болуды ойлаумен жүрсе, Абай мұндай әрекетті адамдық өлшемі, ақыл көзімен қарағанда көңіл жиіркендіретұғын іс деп біледі. Заманының қалыбына қарап, соның ыңғайымен әрекет етіп, біршама кісі «қожеке», «батыреке», білгіш, қу, сұм атанамын деген талаппен жүр. Абайдың пікірінше, өз басын елеулі, қадірлі етемін деген мұндай талап надан қауымның қалып-көзқарасымен қарағанда орынды көрінсе де, кітап бетінен алынып табылған дұрыс талап емес. Олардағы өз басын қадірлі етемін деген талап онды болса да, көздеген мұраты – тым сұйық, алдамшы, жеңілтек, арзан армандар. Осы орайда Абай өз ойын былайша түйіндеп жеткізеді: «Аның үшін кітап сөзіменен іздеген талап болса, әуелі көкіректі тазалау керек дейді, онан соң ғибадат қыл дейді [6, 164-б.]. Көкіректі тазалау – мораль философиясының насихаты мен адамгершілік жағынан жетілудің қамы. Абай ақындыққа мықтап, шындап ден қойып, 1886 жылы жазған «Ғылым таппай мақтанба» өлеңінде:

Бес нәрседен қашық бол,  
Бес нәрсеге асық бол, –  
Адам болам десеңіз [7, 41-б.], –

деуші еді. Бұл – адам болудағы қағидалы талап, талассыз міндет. Мұнда адамгершілік жағынан жетілудің, кемелденудің міндетті екі кезеңі бар, бес нәрседен қашық болу – кеселді қасиеттерден арылу, яғни «әуелі көкіректі тазалау», ал «бес нәрсеге асық болу» – тазарған көкірек пен көңіл, ділге асыл қасиеттерді орнықтыру, яғни жетілу жолына түсу, «ғибадат қылу». Абай айтатын «кітап бетінен оқып іздеген талап» осы болар. Ал өз заманындағы

ағыммен кеткен қауымы «ит те болса, малдыны сөге алмайды деп, бойыма бұл мал һәм пайда, һәм қасиет болады деп» ойлайды. Осы қалыптағы мінез бен көзқарасты Абай өлеңінде де сөз еткен:

Жалға жүр, жат жерге кет, мал тауып кел,  
Малың болса, сыйламай тұра алмас ел [7, 173-б.].

Кей кісі, тіпті көп адам мал байлығы мен дүние дәулеті арқылы өзімен «жолдас, майдандас, сырлас» қауымына елеулі, «қадірлі» көрінуі мүмкін, алайда ақыл, адамдық тұрғысынан қарағанда түк те қасиетті, қалаулы бола алмайды. Абай 44-қарасөзінде қауым ойы мен кітап сөзінің екі түрлі екенін айтқан. Ел қалпы мен жағдайы, өскен ортасынан пайда болған осылайша өзін елеулі етер талаптың – көңіл құлазытар адасқандық күйін ақын аяусыз әшкерелеген.

Қорыта айтқанда, М.Әуезов – Абайды бала кезінен-ақ ерте тануға мүмкіндігі болған жан. Оның ақыл-ойы толысып, алғаш жазған мақаласы да Абайға арналған. Абайдың өзін көріп, онымен жақын жүріп таныс болған адамдардың айтуымен ақынның ғылыми өмірбаянын жазып алған да – М.Әуезов. Ақын шығармаларының санын арттырып, сапасын да жетілдірген, сөйтіп ақынның толық шығармалар жинағын дайындаған да – М.Әуезов. Абай өмірі мен мұрасын терең де толық танытып, «Абай жолы» роман-эпопеясы мен «Абай Құнанбаев» монографиясын жазып жариялаған да – М.Әуезов. Және ең бастысы, М.Әуезов – Абайдағы адамгершілік танымның өзегі мен бастауын айқындап берген ғұлама ғалым. М.Әуезов абайтануының ізімен ақындағы өзіндік адамгершілік ілім – Толық адам танымын мән-мазмұны, төркін-тегі, желілі жүйесімен жан-жақты танытқан абайтанушы ғалым М.Мырзахметұлының іргелі зерттеуі [18] дүниеге келді. Ендігі міндет – Абай жырлап насихаттаған адамгершілік ілім – Толық адам танымын ел игілігіне айналдырып, мемлекетімізді мықты да қуатты, қазақ қоғамын қайырымды да құтты ету.

**Пайдаланылған әдебиеттер тізімі**

1. Мұхтар Әуезов туралы естеліктер. – Алматы: Жазушы, 1997. – 608 б.
2. Әуезов М. Адамдық негізі – әйел. 22-24-б. – Шығармаларының елу томдық толық жинағы. I том. Мақалалар, пьесалар. 1917-1920. Алматы: Дәуір, Жібек жолы, 2014. – 464 б.
3. Аймауытов Ж., Әуезов М. Абайдың өнері һәм қызметі. 94-102-б. – Абайды оқы, таңырқа... (Құрастырған, алғы сөзі мен түсініктемелерін жазған – М.Мырзахметов, филология ғылымының докторы). – Алматы: Ана тілі, 1993. – 160 б.
4. Әуезов М. Абайды білмек парыз ойлы жасқа. – Алматы: Санат, 1997. – 416 б.
5. Әуезов М. Жиырма томдық шығармалар жинағы. XX том. Монография, мақалалар. – Алматы: Жазушы, 1985. – 496 б.
6. Абай (Ибраһим Құнанбаев). Екі томдық шығармалар жинағы. II том. – Алматы: Жазушы, 1986. – 200 б.
7. Абай (Ибраһим Құнанбаев). Екі томдық шығармалар жинағы. I том. – Алматы: Жазушы, 1986. – 304 б.
8. Бейсембиев К. Мирозрение Абая Кунанбаева. Алма-Ата: Издательство Академии наук Казахской ССР. 1956. – 172 стр.
9. Толстой Л. Не могу молчать. Москва: Советская Россия, 1985. – 528 с.
10. Әл-Фараби. Философиялық трактаттар. Алматы: Ғылым, 1973. – 448 б.
11. Құнанбаев К.Ы. Абай (Ибраһим) Құнанбайұғлының өмірі. 38-49-б. – Абайды оқы, таңырқа... (Құрастырған, алғы сөзі мен түсініктемелерін жазған – М.Мырзахметов, филология ғылымының докторы). – Алматы: Ана тілі, 1993. – 160 б.
12. Философский энциклопедический словарь. Москва: Сов. Энциклопедия. 1983. – 840 с.
13. Әліпхан М. Адамгершілік ілімі және Хакім Абай. Алматы: Қазақ кітабы, 2020. – 480 б.
14. Аристотель. Никомахова этика. Перевод: (С) Нина Брагинская (satis@qlasnet.ru) Философы Греции ЗАО «Издательство «ЭКСМО-Пресс», Москва, 1997. – 191 с.
15. Аристотель. Үлкен Этика. 249-312-б. – Әлемдік философиялық мұра. Жиырма томдық. 3-том. Аристотель философиясы. Алматы: Жазушы. 2005. – 568 б.
16. Әл-Фараби. Әлеуметтік-этикалық трактаттар. Алматы: Ғылым, 1975. – 455 б.
17. Құдайбердіұлы Ш. Үш анық. Алматы: «Қазақстан» және «Ғақлия» ғылыми-әдеби орталығы, 1991. – 80-б.
18. Мырзахметов М. Мұхтар Әуезов және абайтану проблемалары. – Алматы: Ғылым, 1982. – 296 б.

---

## II тарау. АБАЙДАҒЫ ТОЛЫҚ АДАМ ТАНЫМЫ – М.МЫРЗАХМЕТҰЛЫНЫҢ ҒЫЛЫМДАҒЫ ЗОР ЖАҢАЛЫҒЫ

### «Нравственная личность» тұлғасынан – «Толық адам» танымына қарай жалғасқан ізденіс

М.Мырзахметұлы – «Мұхтар Әуезов және абайтану проблемалары» [1] атты іргелі зерттеу еңбегін жазып, өз тарапынан да абайтану ғылымына аса елеулі үлес қосқан ғалым. Оның Абайтану проблемаларын М.Әуезов жасаған ғылыми жетістіктермен байланыстыра танытуында зор білгірлік бар. Көкжиектің кеңдігі биіктеу тұстан қарағанда алыстай түсіп анығырақ көрінеді. «Құласаң, нардан құла» дегендей, Абайды М.Әуезов ізденісінің ізімен жүріп отырып тану оқырманды дұрыс жолға салады, ақынды ақиқат болмысымен тануға жеткізеді. Оқырман алдында осы Абай шығармашылығы туралы М.Әуезов қорытып айтқан пайымдау, ой-пікірлерден М.Мырзахметұлы нендей өзекті желіні таныды, өз тарапынан қандай ой түйді деген мәселе тұрады. М.Мырзахметұлы анықтағандай, М.Әуезов ең әуелі Абай шығармаларында мораль философиясының алар орны аса елеулі екенін айқындаған және ғұлама ғалым бұл мәселеге алдыңғы туындыларымен бірге, кейінгі зерттеулерінде де «ерекше мән бере қараған». Екіншіден, Абай шығармаларындағы мораль философиясына қатысты ойларды сөз еткенде, М.Әуезов мұны ақын шығармаларына қатысты өзі арнайы қолданған «Нравственная личность» мәселесімен «тікелей бірлікте, байланыста алып қарастырған». Үшіншіден, М.Мырзахметұлы айқындап танытқандай, М.Әуезов – Абай шығармаларындағы мораль философиясына қатысты ой, танымның жүйелі де желілі болып

келетінін білген және ол үнемі ақындағы мұндай жүйелі танымды аса өзекті «Нравственная личность» мәселесімен байланыстыра түйіндеп отырған. Нәтижесінде, М.Мырзахметұлы М.Әуезовтің өрелі ізденісін өзіне бағыт-бағдар ету арқылы өз тарапынан да Абайдағы «Толық адам» атты жаңа тың танымды ғылыми айналымға енгізген. Абай шығармаларындағы күретамыр мәселені осылайша мораль философиясымен тығыз бірлікте алып қарастырған М.Әуезов те – ғажап білгір, керемет көреген тұлға болса, ақын шығармаларындағы адамгершілік ілімін терең төркін, желілі жүйе, ақиқат мән-мазмұнымен танытып берген М.Мырзахметұлы ағамыз да – абайтану ғылымындағы шоқтығы биік жаңашыл ғалым.

Абай шығармаларындағы тақырыптық, танымдық мән-мазмұнының өзегі – адамгершілік екені анық байқалады. Мұны М.Әуезовтің «Абай ақындыққа үлкен өрісті әлеуметтік еңбек деп кіріскен» [2, 104-б.], «әрбір көркем терең ойлы шығармасы әлеуметтік тартыстың үлкен бір құралы, тарихтық акт есебінде туып, қалыптанып отырады» [2, 111-б.], «Абай көп қырлы, терең сырлы үлкен әлеуметтік идеяны жыр қылған ұстаз ақын болады» [2, 125-б.], «...өзінің ендігі сөзі қоғамды, халықты түзейтін үлкен күш деп түсінеді. Өсиет өлең халық дертінің, тарих қайшылықтарының бәрін емдеп, тазартатын өзгеше құрал деп біледі. Ал Абайдың үгіттейтіні зор адамгершілік пен халықшыл тазалық жолдар болғандықтан, өз заманындағы барлық мінді, сорақылықты сол тура жолдағы жақсы өлең-өсиетпен түгел жойып, жоғалтуға болады деп иланады» [2, 131-б.], «Ақынның мораль философиясы ретінде айтқан көп сөздері адамшылықты сипаттайды. Сол адамшылықтың ақын өзі ұғынған айнымас шындық қасиеттерін айтады» [2, 156-б.], «Бұл өлең (Өсемпаз болма әрнеге) басынан ақырына шейін қоғамдық тілекке қадірлі қасиетті адам болудың Абай ұғымындағы сипаттарын баян етеді. Бұнда адамгершілік қағидаларын ақын өз тұрғысынан атап береді» [2, 161-б.] деген сықылды қайта-қайта оралып келіп түйіндеп отыратын пайымдауларынан анық, айқын тануға болады. Нәтижесінде М.Әуезовтің Абайдағы адамгершілік танымды соншалық өзекті санағаны оның мына бір түйіндеуінен бекітіле түседі: «Әрбір ұстаздық сөздің үлкен адамгершілік негіз,

қасиеттерін терең түрдегі мораль философиясымен байланыстыра айтады. Жалғыз ғана өлеңдері емес, Абайдың қарасөздерінде, «Масғұт» сияқты дидактикалық өсиет поэмасында да біз осы жолды ақынның өзіне ең бір айнымас арна етіп алғанын байқаймыз» [2, 162-б.]. М.Әуезовтің Абай жайлы зерттеу еңбегінің өн бойынан біз теріп алған бұл ойлар М.Мырзахметұлы түйіндеп жеткізгеніндей, ғалымның бұрынғы-соңғы ойларын қорыту үстінде «Абайдың мораль философиясына қарым-қатысы жайлы мәселеге... зерттеулерінде ерекше мән бере қарағанын» анық танытады. М.Әуезов ақын өлеңдерін хронологиялық әдіспен талдап таныта келе, ақын өмірінің соңына таман жазылған «Алланың өзі де рас, сөзі де рас» өлеңі тұсында Абайдағы адамгершілік танымды бағалап білудің шыңы деуге лайық айрықша пікірін ұсынады: «Ол адамгершілікті, моральдық философияны барлық жайдан жоғары қояды» [2, 179-б.]. Абай оқу-білім, ел мінезі, тұрмыс көрінісі, кәсіп қызығы, ғашықтық жайы, тәрбие мен дін мәселесінің қайсысын жырласа да, осы бағыт, осы бетінен еш айнымаған. Қоғамдық сананың айрықша ақиқат, қасиетті де киелі түрі – дін, иман жайынан толғағанда да, Абай діні адамгершілікпен аса тығыз қабысып отыратынын М.Әуезов арнайы атап өтеді: «...мұсылманшылықтың «алласынан» бастап, адамшылықтың үлкен мағынадағы адамдығымен тоқтайды... Абайдың діні – ...ақылдың, адамгершіліктің діні болады» [2, 179-180-б.]. Адам өміріне қатысты ақиқатпен бірге, жалпы тірлік пен барша болмыстағы түпкі мән мен себептерді танумен айналысатын ой адамдары әдетте ойшыл, философ, хакім атанады, ондай жандар адамзат тарихында көп те болмайды. Абай сондай санаулы саңлақтардың сапындағы бірегей болмыс иесі, өзі қазақ болса да, сөзі, ойы адамзатқа ортақ хакім тұлға. М.Әуезов Абайдың «өз заманындағы қоғамдық мәселелерге, ақындық, көркемдік, эстетикалық мәселелерге, тәрбиелік, ұстаздық мәселелерге қатысты озық ойлар айтқан ақын екенін айта келіп, олардан бөле әсіресе ақынның адам мен адамгершілік ұждан, мораль философиясына төтелі қатынасы бар ойшылдық пікірлерге ие болғанын» [5, 182-б.] айрықша атап өтеді. Абайдың мораль философиясына қатысы соншалық өткір де өзекті екенін М.Әуезов «темірді қызған кезінде соғып» жол-жөнекей айтқан мәнді пікірлерімен де танытып, әрі арнайы

аялдап қайталай бекіте түсетін түйіндеуімен де осылай шегелеп отырады. М.Әуезов түйіндегендей, Абай «ақындыққа үлкен өрісті әлеуметтік еңбек деп кіріссе» [2, 104-б.], әрі «әрбір көркем терең ойлы шығармасын әлеуметтік тартыстың үлкен бір құралы» [2, 111-б.] деп білсе, нәтижесінде «ұстаздық, әлеуметтік талабының түп мақсаты – жеке адамдарды жаманшылықтарынан арылтып, сол арқылы заманындағы қауым-қоғамын және бар халқын түзетіп өзгертпек болады» [2, 182-б.]. Сөйтіп М.Әуезовтің «Абайдағы философиялық көзқарастың көбі адамгершілік мәселесіне тіреледі» деп жазғанындай, М.Мырзахметұлының да ақындағы толық адам жайлы зерттеулік ойларын «Абайдың мораль философиясына қатысы» тақырыбының аясында алып танытуы өте орынды болған. Себебі Абайдың Толық адам танымы оның мораль философиясына қатысты ақыл-ой қарым-қатынасынан туындайды. М.Әуезов Абайдың «...адам мен адамгершілік ұждан, мораль философиясына төтелей қатынасын» мына бір мейлінше мәнді пікірімен қорытып түйіндейді: «Қысқасы, нравственная личность мәселесін бар тартысының, талап-арманының тетігі етеді» [2, 182-б.]. Ғұлама ғалым өзінің Абайдағы адамгершілік таным жайлы ұзақ жылғы үлкен өрісті ғылыми ізденісін кейінгі буын өкілдеріне осылайша түйіндеп келіп тапсыратыны бар.

М.Мырзахметұлы «Мұхтар Әуезов және абайтану проблемалары» атты іргелі зерттеуі арқылы М.Әуезов абайтануын ізерлей әрі кешенді түрде танытып, әрі өз тарапынан да абайтанудың бұған дейін беймәлім жаңа беттерін ашады. М.Әуезов Абайдағы адамгершілік танымды ең әуелгі әрі ең өзекті проблема ретінде танып, одан соң мұны мораль философиясынан тартып, ондағы басты тетік – нравственная личность мәселесіне дейін негіздеп жеткізсе, М.Мырзахметұлы осы бір терең ұғым, адамгершілік категориясы ретінде айқындалған «нравственная личность» мәселесін Абайдағы өзіндік жеке ілім, төркінді таным деңгейіне көтеріп танытты. Яғни М.Әуезовте ұғым, категория ретінде айқындалған «Нравственная личность» мәселесін М.Мырзахметұлы ішкі мән-мазмұнын таныта отырып «Толық адам» танымына айналдырды. М.Әуезов тұжырымдаған «Нравственная личность» мәселесі арқылы Абайдағы адамгершілік проблемасы айқындалса, «Толық адам» арқылы Абайдың өзіндік



төл танымы ғылыми айналымға еніп кетті. М.Әуезовте «Нравственная личность» деп аталып танылатын бұл мәселе М.Мырзахметұлының зерттеуі нәтижесінде Толық адам танымы түрінде деректеніп тереңдей берген. М.Әуезов ойларын М.Мырзахметұлы соншалық ыждахаттылықпен тауыса отырып таниды, адамгершілік ілімі Абай шығармаларындағы адамгершілік тәрбиесі, оның негізі – мораль философиясы, одан әрі нравственная личность секілді танымдық желілер арқылы таныла беретінін айқындайды. Ғалым ойынша, М.Әуезов ақын шығармаларын талдау үстінде де, Абайдың өмірі мен өлеңдеріндегі әлеуметтік күресі мен гуманистік мұрат-мақсаттарының өзекті желісінде де ақында кең түрде таратылатын осы нравственная личность (толық адам) жайлы пікірлеріне сүйеніп, тірек етіп отырады. Абай арманы мен талабы соншалық асқақ, биік болғаны байқалады, ол өзі өмір сүрген әлеуметтік ортаны, одан да асып адамзат қауым-қоғамын өзгертуді ойлаған, осы жолда өзінің адамгершілік ілімін құрал етіп қолданбақ болған. Адамзат тарихындағы ақыл-ойы толық, алайда қайраты мен билігі кем болған дана саңлақтардың бәрі дерлік осылай ойлаған, өйткені олар зорлық пен қиянат, қан төгумен туатын төңкерісті жақтаушылар емес, керісінше табиғи тәрбие жолымен, ақыл-ой, жан-жүректің жетілуімен келетін кемелділікті қалаған ағартушы ақылмандар болатын. М.Мырзахметұлы түйіндеп танытқандай, Абай «осы себепті өз шығармаларында көп сөз болатын түбірлі, желілі негізі бар толық адам жайлы өте күрделі әрі тамыры ғасырлар қойнауында жатқан гуманистік танымға мейлінше мол түрде көңіл бөлген» [1, 230-б.].

Бүгінде біздер М.Әуезов пен М.Мырзахметұлының зерттеулері негізінде Абай шығармаларынан толық адам жайлы ой желілерін байқап байыптай алатын халге жеттік. Ақын шығармаларымен әрбір жаңа жолыққан сайын ақыл-ойымыз бұрын байқамаған бір бұйымын тапқандай бола береді. Бәрі де алдымызда бағыт-бағдар берер бағдаршымыздың болуынан. Әйтпесе М.Әуезовтің Абай жайлы қорытынды ойлары жинақталған монографиясы қырқыншы-елуінші жылдары-ақ айтушыдан тыңдаушыға өтіп еді, сәл кейіндеу оқырманға да жетіп еді, бірақ ғалым дәрісі, баяндамалары мен зерттеулеріндегі өзекті ой бәрібір тасада қалып келді. Абайдағы өзіндік

адамгершілік танымының өзі емес, тақырыбының жайы ғана жол-жөнекей жалпылай айтылумен жүрді. Абай жайлы өрелі ой айтуға әрекеттенген ғалымдардың бәрі дерлік ақындағы адамгершілік тақырыбының артықша өзектілігін байқады, айтты, жазды, алайда ақиқатын айту керек, сол ғалымдар Абайдағы адамгершілік жайының желілі де жүйелі, терең төркінді төл таным екенін танытпады. Абайтанудағы осы олқылық М.Мырзахметұлының Абайдағы толық адам танымын арғы төркін-тегі, бергі өзіндік мән-мазмұнымен танытып берген ғылыми табысы арқылы өтелгені анық, айқын, талас тудырмайтын ақиқат. «Ақылды бол, арлы бол, адам бол» деп адамгершілікті насихаттай жырлау ақын атаулының бәрінде дерлік азды-көпті ұшыраса береді, бірақ сол ақындар дәл Абайдай адам өмірі мен болмысының, сол адамның бүгіні мен болашағының мәні мен өзегі – адамгершілік екенін терең түйсіне танып, әрі дәстүрлі де тамырлы бастаудан тартып өздерінің төл танымын жасай бермеген. Ақыл-ой ізденісі мен пейнетінін мұндай артықшылығы Абайға ғана бұйырып, адам болу мен адамгершілік жайы Абайда ғана арнайы нысанаға алына жырланды да, біз бүгінде М.Мырзахметұлының зерттеуі арқылы танып-біліп отырған Толық адам танымы ғылым мен ел игілігіне айналып отыр. Абайдың мораль философиясына қарым-қатысы жайлы мәселеге М.Әуезовтің айрықша мән бере қарауын негізге ала отырып, М.Мырзахметұлы кең өрісті ізденіске түсіп кеткен, нәтижесінде ақындағы өзіндік төл таным – Толық адамды Абайтанудағы ғылыми жаңалық пен игілікті табысқа айналдырды.

М.Мырзахметұлы Абайдағы толық адам жайлы ой, пікірдің ең алғаш арнайы айтыла бастауын оның «Ғылым таппай мақтанба» өлеңімен байланыстырады. Ғалым пікірінен байқалатыны, толық адам болу – жеке адамның ақыл, мінез жағынан пісіп жетілуі түрінде танылады [1, 230-б.]. Мұны әл-Фараби: «Болмыс атаулының сұлулығы, әсемділігі мен көркі өз болмысын ең оңды жолмен баянды етуде және оның толық кемелділігіне жетуде» [3, 238-б.] деп біледі және оны қайырымдылықтарды көбейтіп, адамгершілікті арттырумен ғана жүзеге асыруға болатынын жазады. Мыңдаған жылдар бойы адамзаттың өз болмысына сай болып жетілуі жолындағы әрекеті мен ілімі – Абайда Толық адам танымы арқылы өзіндік

ерекшелігімен жалғастық тапқан. М.Мырзахметұлының пікірінше, «Ғылым таппай мақтанба» өлеңінде насихатталатын толық адам танымы ең әуелі ондағы «Адам болам десеніз» тезисінің аясында айқындалып таныла беруге бет алады. Шынында да «адам болам деп қайғы жесеніз», «өз болмысына сай болып жетілу» жолына түспек болсаңыз, оның өзіндік талап, шарттары болары анық. М.Мырзахметұлының ақын өлеңіндегі толық адамға қатысты «адам болу шарттары», «адам болам десеніз» ұғым, әрекеттерін екшеп алып танытуы ақыл-ойымызды дұрыс, оң бағытқа бастайды. Ғалым түйіндегендей, «өлеңдегі Абайдың басты ойы – «Адам болам десеніз» деген тезисінде жатыр» [1, 231-б.]. Ғалым өлең мазмұнынан «адамшылық қасиеттер мен толық адам туралы даналық ой желістерін» таниды. М.Мырзахметұлы бұған дейін ақын өлеңінде дерек ретінде бар болып келгеніне ешкім де мән бермеген Ғұламаһи Дауани тұлғасына ең алғаш назар аударады. Ғалым осылайша толық адам танымы Шығыстық қайнар бұлағы жөнінен төркін-тегі бар дәстүрлі ілім болғанын байқата бастайды. Әрі ақынның өз шығармаларындағы толық адам танымымен сабақтасатын жаңа ұғымдар сырына бойлата түседі. Мысалы, ақынның 7-қарасөзіндегі «жан тамағы» ғалымның танытуы бойынша, бұған дейінгі бұлыңғыр белгісіз болмысынан философиялық мән-мазмұны бар түсінікті, таныс қалыпқа көшеді. Ғұламаһи Дауанидің шәкірті, бұқаралық ғалым Жүсіп ал-Қарабағидің «Рисала» кітабындағы «жанның пайдалы азығы» мен «жанның зиянды азығы» жайлы ғылыми деректі негізге ала отырып, М.Мырзахметұлы Абай өлеңінің мазмұнын жаңаша түсінуге жол ашады. Әрі ғалым ізденісінің нәтижесінде 7-қарасөздің мән-мазмұнын шынайы түсіну де жеңілдей береді. Осылайша Абай өлеңі мен қарасөзінде айтылатын «толық боласың», «толық адам» – жәй ғана «сәтті» сөз немесе кездейсоқ қолданыс тапқан тіркес қана емес, терең төркін-тегі, аса танымды мазмұн-мәні бар іргелі ілім екені мойындала бастайды. М.Мырзахметұлы жазғандай, Жүсіп ал-Қарабағидің дерегімен салыстыра таныр болсақ, Абайдағы «бес асыл іс» – жанның пайдалы азығы, «бес дұшпан» – жанның зиянды тағамы болып шыға келеді. Сонда жанның пайдалы азығы «бес асыл іс» арқылы ғылым-білім, ақыл, қасиет тауып адам бола бастасақ, жанның зиянды тағамдары –

өсек, өтірік, мақтаншақ, еріншек, бекер мал шашпақ арқылы асыл болмысымыз керісінше бұзыла береді екен. М.Мырзахметұлы Абайдағы толық адам танымына жеткізер адам болу жайлы ойлар желісі ақын өлеңдерімен бірге қарасөздерінде де мол таратылып танылатынын онда ұшырасатын терең мәнді термин сөздер мен күрделі ұғымдар арқылы байқатып, оқырманын ойға қалдырып қояды. Өйткені олардың төркін-тегі мен мән-мазмұны камили инсан жайлы бүгінгі буын өкілдері байыптап біле бермейтін пікірлер тарихымен сабақтасып жатады. Ал олар жайлы танып білу Абайдағы толық адам танымын тиянақты түсінуге жеткізеді. Адам баласы есін біліп, ақылы толысқан сайын өз-өзін төл болмысына сай жетілдіре беру қамында болған. Өйткені әлемдегі барша байланыстар мен түрлі-түрлі қарым-қатынастар жалғыз ғана саналы болмыс адам арқылы мазмұнданып байи береді, әрі адамның өз өмірі мен болмысы да оның ақыл, қасиет, мінезі жағынан ұшталып жетіле түсуінен сапасы артып жақсара береді. Осы орайда Шығыстық ой тарихындағы камили инсан мен Абайдағы Толық адам танымдары адамды өзіндік төл болмысына сай жетілген жақсы күйге жеткізуді көздеген ортақ мақсат, ортақ мазмұнымен ерекшеленеді. М.Мырзахметұлының пікірінше, Абай қарасөздеріндегі адам болу, толық адам жайлы ойлар желісі мынадай терминдер мен ұғымдардың сырын танып білумен жемісті болмақ: «адам болу», «жарым адам», «толық адам», «адамның адамдығы», «адамшылық», «адамшылығының кәмалат таппағы», «бенделіктің кәмалаты», «толық инсаният», «инсанияттың кәмалаттығы» т.б. [1, 232-б.]. Байқасақ, бәрі де – адамның өзіне ғана тән болмысы мен қасиеті, адамдығымен байланысты ұғымдар.

М.Мырзахметұлы – Абай шығармаларында айтылған ойлар негізінде толық адамға жеткізер жолдың бастауы мен желілі жүйесі жайлы өз пайымдауын ұсынады. Адам болудың шарты мен бастауы ғалымның 38-қарасөзде айтылған ақын ойынан түйіндегеніндей, баланың саналы түрде өздігінен махаббатпен қызығуынан туатын жан құмары арқылы білім-ғылымды меңгеруге ұмтылатын талабында жатады екен [1, 232-б.]. Байқасақ, Абайдың 38-қарасөзден он жылдай бұрынырақ жазылған «адам болам десеніз» тезисімен туған өлеңін әуелі «Ғылым таппай мақтанба» деп бастап, әрі бұл өлеңінде әуелі

ғалым болу мен ақыл жайын жиі айтуы тегін емес екен. М.Мырзахметұлы ғалым болу мен адам болуда өзінің игі ықпалын тигізетін Абай айтқан үш себеп (нәсілі, әлеуметтік ортасы, алған тәрбиесі) пен керісінше қиянатшылдықтың зор залалы жайлы мәселеге ерекше назар аударып өтеді. Абай ойының жүйелі желісін толық адамға байланысты дәл бұлайша пайымдау өте орынды. Шынында да адам болу әрекеті жақсы ата-ана, жақсы құрбы және жақсы ұстаздың игілікті ықпалымен жемісті де жағымды болса, қиянатшылдық арқылы оң бағытынан бұра тартып бүтіндей бүлінеді. Абай шығармаларында, әсіресе 38-қарасөзінде қайырымдылық қасиеті көптен-көп дәріптеледі. Бұл – адамгершілікті қайырымдылыққа балап, сол қайырымдылық, ізгілікпен тең түскен адамзаттық асыл ақиқатпен қабысады. Ал қиянатшылдық – керісінше қайырымдылықтың қарсы беті, адамдық атты асыл қасиеттің тініне түскен құрт секілді. Абай «бұл қиянатшылар жарым адам, жарым молла, жарым мұсылман. Олардың адамшылығының кәмалат таппағы – қиынның қиыны» [4, 137-б.] дегенде, жас ұрпақты, барша адамды адамшылықтың осы бір басты әрі аса залалды жауынан сақтандырады.

Абайдағы толық адам танымының төркіні камили инсан ілімімен тікелей табысады, әйтсе де бенделіктің кәмалаттығы жолынан бөлектеу тұрады, М.Мырзахметұлы осы жайды ақынның озық ойлы болмысын негіздеуде әсіресе баса атап өтеді. Бенделіктің кәмалаттығы жолындағы топтың әрекетінде бір ғана оқшауланған ахиреттің қамында болып, бұл өмірдің қызығы мен қайырымынан бет бұрып безінгендік бар. Осы орайда М.Мырзахметұлы былай деп жазады: «Абай енді осы танымға қарама-қарсы негіздегі өз ойы, төл танымы толық адам жайлы ойларын тереңірек танытуға ерекше көңіл бөледі» [1, 234-б.]. М.Мырзахметұлы адамгершілік жағынан жетілудің бұған дейін камили инсан мен бенделіктің кәмалаттығы атты екі бағыт, екі болмыста жалғасып келгенін өте орынды атап өтеді. Мұнсыз адамгершілік жағынан жетілудің жайы мен мазмұны толыққанды танылмас еді. Ғалым – ақын шығармаларындағы көзқарас пен танымды негізге ала отырып, бенделіктің кәмалаттығы бағытын оң әрекет деп санамайды, қайта оны ақын ойының ізімен «ешбір ақыл сынына толмайтын ғұмырсыз көзқарас» деп біледі. Біздіңше, бенделіктің кәмалаттығы тек қана ресми діндар топтың

ғана емес, анық дін мен оның негізі Құран мен хадистердің өзегі мен мәнінен бастау алатын сопылық таным, өмір салтының да мықты ұстанған бағыты мен жолы. Мұхаммед әл-Ғазалидің талай жылғы өмір, ілім тәжірибесімен: «Мәртебелі жасаған Алла жолымен жүрушілер дәл осы сопылар екені, олардың тұрмыс салты – ең жақсы тұрмыс салты екені, олардың жолы – ең дұрыс жол және олардың жан дүниесі ең таза екендігі мен үшін мейлінше айқын болды» деп түйіндегеніндей, сопылық таным мен қалып – саф алтындай таза, ақиқат жол [5, 343-6.]. Тек сопылардың бұл асыл жолын «дүние дос», дүниеқұмар, нәпсі билеген «ақымақ көп, ақылды аз» жетілмеген қауым ақылы мен тағаты жетіп ұстана алмайды. Әрі қай заманда да өзінен дінді бөліп, ажыратып тастаған мемлекетте, тіпті Мұхаммед пайғамбар мен сахабаларынан кейінгі билік кезіндегі халифатта да әділдік пен туралықтың тініне бірте-бірте құрт түсе бастаған. Содан да өзгелердің адал, тура жолда жүруі былай тұрсын, тіпті өздері де қиянат пен қараулық жайлаған кемшілікті қоғамда хақ жолын ұстанып жүруден жаңылар болған соң, алғашқы дәруіштер қайырымсыз қауымынан бөлек кетіп оқшау өмір сүруге көшкен. Мұндай жағдай Орта ғасырды былай қойғанда, бергі дәуірдегі Л.Толстой [6, 41, 48, 62, 81, 84-6.] мен Шәкәрім [7, 241-6.] ақынның басында да болған. Абайдың да бенделіктің кәмалаттығы жолындағыларды адасқан адамдар деп санағанымен, оларды түпкі ойымен соншалық адамзат жауы санамайтыны байқалады. Мысалы Абай былай деп толғанады: «Бұл үш түрлі фиғыл (ақыл, әділет, рақым) құданың соңында болмақ, өзін құл біліп, бұл фиғылдарға ғашық болып, тұтпақты пайғамбарлар үйретті, әулиелер оқыды, ғашық болды. Бірақ ұхрауи (ақиреттік) пайдасын ғана күзетті. Ғашықтары сол халге жетті, дүниені, дүниедегі тиерлік пайдасын ұмытты. Бәлкі хисапқа алмадылар. Хакимдер дүниеде тиетін пайдасын сөйлейді, ғибрәт (үлгі) көзімен қарағанда, екісі де бірінен-бірі көп жырақ кетпейді. Аның үшін әрбірінің сөйлеуі, айтуы басқаша болса да, алла тағаланың сұңғатына қарап пікірлемекті екісі де айтты. Пікірленбектің соңы ғибратланбақ болса керек. Бұл ақыл, ғылым екісі де өзін зорға қисабламақты, залымдықты, адам өзіндей адамды алдамақты жек көреді. Һәм екісі де мархаматты, шапағатты болмақтықты айтып

бұйырды, бұл рақым болса керек» [4, 145-146-б.]. Байқағанымыздай, Абай камили инсан мен бенделіктің кәмалаттығы жолындағылардың екеуі де жәуанмәртлік (адамгершілік) жолымен Алланы бетке алып жетілетінін айтып отыр. Бенделіктің кәмалаттығы жолы оны түсініп, ұғу жағынан ғана емес, оның өз болмысын шынайы тану жөнінен де «өте шетін, өте нәзік» жол. Бұл жолдағылар Абай айтқандай, өте сирек, адамзат қауымында өте аз кездеседі. Әрі ақын дәл бұлайша жетілу үшін ақыл-ой, әділет, күш-қайраттың да артықша зоры қажет болатынын мойындайды: «...бұған ғылымның да зоры, сиддық, қайраттың да зоры, махаббатың халлақна да, уа халық ғаламға да бек зоры табылмақ керек» [4, 147-б.]. Сонымен бенделіктің кәмалаттығы жолына Абайдың бүйрегі бұра сөйлейтінін көреміз. Әрі ақынның бенделіктің кәмалаттығына қатысты оны жақтағандай кейіп танытуы да – талассыз ақиқатқа ұмтылғандық. Егер ақын бенделіктің кәмалаттығы жолының мәні мен оның артықшылық, ерекшелігі жөнімен санасып дәл осылайша пайымдамаған болса, мәселенің бар болмысы ашылмай қалған болар еді. Сөйтіп ақын түпкі ойымен өзі терістейтін жолдың да қалтарысты құпиясы мен нәзік мәнін осылайша дәл әрі толық қамти танытады. Біз ақындағы бенделіктің кәмалаттығы жолына қатысты пайымдауда осы жайлар ескерілсе екен дейміз. Түптеп келгенде М.Мырзахметұлының осы орайдағы пікірі дұрыс, орынды. Шынында да Абай бенделіктің кәмалаттығы жолындағылардың көпке ортақ, пайдалы бола алмаған оқшау, оңаша өмір салтын ескеріп, одан гөрі бұл өмірдің игілігі мен қызығын, кісілер қауымының өзара қамқор қайырымдылығын көздеген камили инсан жолын артық санайды: «Яғни пенделіктің кәмәлаты әулиелікбірлән болатұғын болса, күллі адам тәркі дүние болып һу деп тариқатқа кірсе, дүние ойран болса керек... Екінші – бұл жолдағылар қор болып, дүниеде жоқ болып кету де хаупі бар... Адаспай тура іздеген хақимдер болмаса дүние ойран болар еді» [4, 146,148-66]. М.Мырзахметұлы адамгершілік жағынан жетілудің осындай екі бағыты жайлы айта келіп, әрі соның бірі – бенделіктің кәмалаттығын Абай ізімен терістей отырып, ақындағы Толық адам танымын кезекті кезеңнің әрі бүгінгі заманның жаңа, төл танымы деп біледі. Алайда Абайдағы Толық адам танымы ақын шығармаларынан о баста-ақ орын

алғанымен, ол абайтанудың сексен-тоқсан жыл зерттеліп келген тарихи кезеңінде дәл М.Мырзахметұлы анықтап танытқанындай мәлім болмай келді. Бұл енді – ақыл-ой ізденісі мен ғылым тарихында бола беретін үйреншікті, қалыпты жағдай. Мысалы абайтанушылардың ешбірі дәл М.Әуезовтей Абай шығармаларындағы мораль философиясына ерекше дендеп көңіл бөлмеді, дәл сол секілді М.Мырзахметұлына дейін де ғалымдар ақындағы төл таным – Толық адам танымын білмей келді. Бәрі де ақын шығармаларын мұқият оқып, олардағы өзекті мән-мазмұн мен оның өзімен қоса арғы төркінін де тауып терең танумен байланысты туатын қиындық болатын. Осы орайда М.Мырзахметұлының мына пікірі үнемі жадымызда жүруге тиіс: «Бірақ адамшылық негізі жайлы өз шығармаларында таратылатын ұлы ойшыл пікірлерінің желісін тауып, ой өзектерін қуалай отырып ұғынбайынша ақын пікірін дөп басып дәл танудың өзі қиын» [1, 234-б.]. Мұндай үлкен өріске бастайтын байқампаз да бейнетті ізденісті М.Мырзахметұлының өзі ақынның Шығысына қатысты толық адам, жәуанмәртлік, иманигүл, жүрек культі, кәмәлат-ғазамат, хауас, жан құмары мен жан қуаттары, Ғұламаһи Дауани тағы басқа атау, ұғым, танымдарына қатысты анық, айқын танытып берген. Абай шығармаларындағы біраз сөздердің қарапайым қолданыстағы атауынан бөлек ұғымдық, категориялық мәнге ие екенін біле түсеміз. Ғалым пайымдауында, «бенде» – сопылық таныммен астасатын діни моральдағы құдайдың құлы, ал «инсан» – өмір гүлі саналатын адам деген гуманистік мағынаны білдіреді [1, 234-б.]. М.Әуезов өзі ерекше көңіл бөліп қараған мораль философиясының басты тетігін – «нравственная личность» деп атаса, М.Мырзахметұлы ақын шығармаларында көбірек көңіл бөлумен негізделіп, түйінделіп берілетін «толық адам» деген қазақы сөзбен танытады. Әрі М.Мырзахметұлы Абайдағы толық адам танымын мұсылмандық шығыс ойшылдарында көп сөз болған камили инсан танымымен өзектес, төркіндес деп санайды. Бұл әрине – шығыстың қазақтарға діні, ділі, танымы тұрғысынан біршама жақын болуынан туған түйін.

М.Мырзахметұлы өз ойын нақтылай әрі тереңдете түсіп, ақындағы Толық адам танымын түбі, тегі түркілік саналатын жәуанмәртлік ілімімен көбірек байланыстырады. Жәуанмәртлік – ғалымның танытуында жомарттық, қайырымдылық пен ізгілік,



ал Абайша ақыл, әділет, рақым қасиеттерінің жиынтығымен адамшылық негізін білдіретін мағынасын танытады. М.Мырзахметұлы Абай қарасөзінде жанама түрде ғана аталып өтетін жәуанмәртлік сөзінің терең төркінді мән-мазмұнын жаңадан ашумен бірге, оның әдебиеттегі елеулі көрінісінен де деректі хабар береді. Өрі ақындағы толық адам болуға жеткізетін жәуанмәртлік сипаттары адамның өз әрекет, өз ізденісімен жүзеге асатын құбылыстар екенін де атап айтуы ғалымның байқампаздығымен қоса, ақынның озық ойлы болмысын да танытады. Толық адам болуға жеткізетін жәуанмәртлік сипаттары жибили жолмен емес, кәсіби әрекетпен қалыптасқанда ғана адамның еңбегі мен асыл болмысы айқындала түседі. Ғалым толық адам болудың бастауын жәуанмәртлік сипаттарын меңгерумен байланыстырады және осы тұста толық адам болуды ақыл, қайрат, жүректің бірлігімен емес, ақыл, әділет, рақым атты жәуанмәртлік сипаттарының түгел, толық болуымен сабақтастыра түсіндіреді: «Абай жәуанмәртліктегі аталмыш үш сипатқа толық адам болудың негізі ретінде қарағанда, ұғымдарды бірлікте алып отырады. Осы бірлік келісімінің бұзылуы, яғни үш сипаттың бірінің болмауы тұтастықты бұзады. Яғни толық адамға жеткізбей, жарым адам дәрежесінде қалдырады» [1, 235-б.]. Мұны біздің сәл өзгешелеу түсінетініміз де бар. Абай жәуанмәртлік сипаттары жайлы айтқанда «толық» сөзін «инсаниятқа» байланысты қолданады: «Сенде бұл ғылым, рақым, ғадаләт үш сипатбірлән сипаттанбақ ижтиһадің шарт еттің, мұсылман болдың һәм толық инсаниятың бар болады» [4, 145-б.]. «Әуелде бір суық мұз – ақыл зерек» өлеңінде «ақыл, қайрат, жүректі бірдей ұста, сонда толық боласың елден бөлек» [8, 95-б.] дегенде, «толық» сөзін «инсаният» сияқты адамгершілікке қатысты емес, адамға байланысты айтатыны байқалады. Біздіңше, ақын өлеңіндегі «толық» сөзі адам жаратылысы мен болмысының түгелдігімен қоса, мүмкін адамгершіліктің де толықтығын танытатын болар, ал қарасөзінде анық адамгершілікті танытып тұр. Өрине адам жаратылысы мен болмысын құрайтын үш қасиет оның адамгершілігін де артыруға үлес қосады. Қайрат көбіне тәнге қатысты көрінсе де, жибили емес, кәсіби жолмен жүзеге асатын нәрсенің бәрі де күш, қайратпен келетін әрекет, еңбек, бейнет, ізденіссіз болмайды. «Алла деген

сөз жеңіл» өлеңінде айтылғандай, адамның басты мақсаты – «махаббат қылса тәңрі үшінге» дене, тән де өз әлінше күш-қайратын жұмсап жүріп үлес қосады екен:

Дененің барша қуаты  
Өнерге салар бар күшін.  
Жүректің ақыл суаты  
Махаббат қылса тәңрі үшін [8, 215-б.].

Мысалы, мұсылманшылықтың бір парызы – намаз оқу барысында кісі иіліп-тізерлеп, отырып-тұрып тәнімен де әрекет етеді. Ораза ұстау да тәни шыдамдылық пен өзін-өзі шектеп ішім-жемнен тартынуынсыз жүзеге аспайды. Әрине тәндегі әрекеттің бәрі де өздігінен жүзеге аспай, ақылдың шешімі мен жүректің ықылас, ниетімен болатыны белгілі, сөйтсе де «бұйрықты» нақты орындайтын – тән мен дененің қуаты. «Жомарттың қолын жоқтық байлайды» дегендей, қайырымдылық, адамшылық жасайын деген ниетіңе кейде жарлылық пен жағдайсыздық, тән саулығы мен күш-қайраттың кемдігі кедергі жасауы мүмкін. Сөйтіп ақыл-ой мен жүректен шығар қайырымды қасиеттердей болмаса да, қайраттың да «тоқтаулылық, қалыпты шыдамдылық», әрекет, еңбекпен адамшылыққа, яғни толық адам болуға үлес қосатыны анық. Ал ақыл мен жүрек – адамгершілік қасиет пен қалыптың нағыз бастауы мен суаты. Аристотель, әл-Фарабилердің адамгершілікті ойшылдық (ақыл) және этикалық (жүрек) қайырымдылықтардың жиынтығы, қоспасы ретінде танытуы тіпті тегін емес. Осы орайда жәуанмәртлік – ақыл мен жүректен шығар ақыл, әділет, рақымның бірлігімен болатын адамгершілік негізі мен оның нағыз өзін танытады. Абайдың осы жәуанмәртлік сипаттарына ие болған адамға «толық инсаниятың (адамгершілігін) болады» дегені қайраттың қосымша, жанама болатын тәни үлесін ойға алмай, нағыз таза қалпындағы адамгершіліктің өзін ғана айтқаны болар. Біздіңше, ақынның «Әуелде бір суық мұз – ақыл зерек» өлеңінде негіздегеніндей, ақыл, қайрат, жүректің бірлігімен адамның ең әуелі жаратылысы мен өзіндік болмысы түгел, толық болады, әрі адамгершілігі де осы үшеуінің бірлігімен жетіліп, кемел болады. Абай әртүрлі өлең, қарасөздерімен толық адамға жеткізетін үш қасиеттің

өзіндік сипаттарын танытып отырады: «Пендесінде ақыл – хұкімші, қайрат, қуат – қызмет қылушы еді» [4, 140-б.], «Аспаса ақыл қайраттан, тереңге бармас, үстірттер», «Малда да бар жан мен тән, ақыл, сезім болмаса. Тіршіліктің несі сән, тереңге бет қоймаса», «Жүректе қайрат (ынта, ықылас, сүю) болмаса, ұйықтаған ойды кім түртпек. Ақылға сәуле қонбаса, хайуанша жүріп күнелтпек» [8, 227-б.], «Талап, ұғым махаббаттан шығады» [4, 136-б.], «Асықтық та – жүрек ісі» [4, 110-б.], «Адамшылықтың алды – махаббат, ғаделет сезім» [4, 164-б.]. Ақын сөздерінен байқағанымыздай, адамгершілік көбіне қайраттан гөрі негізінен ақыл мен жүректен шығар қасиеттерден құралып жасалады екен. Сонда жәуанмәртлік адам болмысының негізгі мәні мен қасиеті – адамгершілігін танытатыны көрінеді. Біздіңше, «Әуелде бір суық мұз – ақыл зерек», «Әсемпаз болма әрнеге», «Малға достың мұңы жоқ малдан басқа» тағы басқа өлеңдерінде Абай адам жаратылысының түгелдігі мен адамгершілігінің толықтығын негіздеп алып, одан әрі толық адам болудың өзегі мен мәніне қарай дендеп ене береді. Абай айтқандай, «малда да бар жан мен тән», «ақылға сәуле қонбаса», яғни адам баласы өмір тіршілігінде ақылын тұтынып, қолданып жүріп танымаса, білмесе, онда ол «хайуанша жүріп күнелтпектің» күйін кешеді. Осылайша Абай қайратты танытар тән, дененің адамгершілікті жасауда жанама, қосымша көмегі болса да, елеулі үлесі кем, шамалы ғана болатынын танып, толық адамға жеткізер адамгершілік жағынан жетілу – ақыл мен жүректен шығар қасиеттер арқылы жүзеге асарын біліп, осы екеуінен құралатын жәуанмәртлік ілімін басымырақ насихаттайды. М.Мырзахметұлының толық адам жайлы ізденісті ойларын жәуанмәртлік сипаттарынан бастауында осындай аса мәнді, маңызды өзекті деп басып білгендік бар. М.Мырзахметұлы Абайдың жәуанмәртлікті құрайтын үш сипаттың әсіресе екеуіне, яғни әділет пен ақылға бөлекше мән бере қарайтынын да орынды атап өткен [1, 236-б.].

М.Мырзахметұлы – М.Әуезов айқындап берген, алайда оның ішкі терең мазмұнын тарата айтып үлгермеген Абайдағы мораль философиясына қатысты танымды ендігі кезекте ақындағы жүрек культі арқылы таныта түседі. Ғалымның Абайдағы мораль философиясының басты тетігі – толық адам танымын «адам болу» шарттарынан бастап, адамгершілік негізі – жәуанмәртлік

арқылы танытып, нәтижесінде жүрек культімен түйіндемек әрекетінде зор білгірлік бар. Өйткені ақын толық адам танымының өзегіне ой ізденісімен ұмтылғанда әуелі адамгершілік негізі – жауанмәртлікті негіздеп алған, яғни бұрынғы-соңғы ойшылдар түйіндегендей, адамгершілік – ақыл мен жүректен шығар қайырымдылық қасиеттер арқылы қалыптасып жетіледі. Сөйтсе де осы екі топтағы қайырымдылықтардың адамгершілік қасиетті қалыптастыруда өзіндік үлес, салмақ, алар орындары бір-бірінен бөлек-бөлек. Адам денесіндегі он екі мүшенің бәрі де, тіпті шеттеу орналасып керексіздеу көрінетін тырнақтың өзі де тіршілік үшін өз орнымен қажетті, пайдалы. Әйтсе де биологиялық өмір, тіршілік үшін жүрек пен шынашақ саусақтың, ми мен соқыр ішектің қызметі мен қадірі бірдей емес. Дәл сол секілді адам болу мен адамгершілікті жетілдіруде де жүректен бастау алатын әділет, рақым, ар-ұят пен ақыл арқылы пайда болатын оқу-білім, ой-пайымның үлес-салмағы әртүрлі. Осы тұрғыдан келгенде, М.Мырзахметұлы мынадай түйін жасайды: «Әсіресе, Абайда адамшылық, гуманистік ойларының астарында үшінші сипат – рақым, шафағатқа шешуші мән беретіні байқалады» [1, 236-б.]. Ғалым толық адам жайлы түбірлі танымның Абайда сонау жігіттік шағында-ақ өмір сүрген ортасы мен оқыған кітаптары арқылы қалыптаса бастағанын нақты дерекпен білдіреді. Ақынның өз өмірі мен мінез-әрекетінде, өлені мен қарасөзінде толық адам туралы танымының құрамындағы жүректен шығар қасиеттерге көңілі көбірек ауып тұратынын байқатып өтеді. Және М.Мырзахметұлы осындай ойларға М.Әуезовтің зерттеулері негізінде жеткенін ескертіп, белгілі бағдармен ақындағы жүрек культін, әсіресе өзіне дейін сөз болмаған жүректің «ақын көздеп отырған гуманистік бағытын» тереңдей танытуға көшеді. Ғалым «Абай жүректі эмоциялық сезімнің, адамгершілік негіздегі рақым шафағаттың қайнар көзі ретінде таниды» [1, 238-б.] деп білумен бірге, жүрек туралы ойлардың көне бастауларына да батыл барлау жасайды. Өрі Абайдың жүрек жайындағы танымдары алдағы уақытта арнайы зерттеуді қажет ететінін айтып, өзі осы аталмыш мәселенің өзекті де елеулі желістерінің кейбір жақтарын ғана сөз етумен шектелетінін ескертеді. Ғылымдағы сабақтастық, дәстүр жалғастығы бойынша, соңғы жылдары біз тараптан айтылып

жүрген біраз ойлардың нәр алып, таным тапқан түп негізі ғалым М.Мырзахметұлының өнімді де жаңалықты ізденістерінен бастау алады. Кейінгі ұрпақтың алдыңғы буыннан бір артықшылығы – өзіне дейінгі ой мен ғылымның мол табысын меңгеру арқылы өресі жетіп жатса, өз ізденісін өнімдірек етіп жасай алуында. Біз де абайтанудағы асқар тауымыз – М.Әуезов пен М.Мырзахметұлының терең де тиянақты ізденіс нәтижелерін санаға сіңірумен ілгерілеп келеміз. Жалпы толық адам жөніндегі ұғымдар М.Мырзахметұлы түйіндеп жазғандай, Абайдың жиырма жылдық ақындық жолында үзіліссіз өрістеп, толассыз даму, толығу үстінде беріліп отырған күрделі ұғым. Ғалым ойын жалғай түссек, толық адам туралы танымның қатпарлы астарлары ашыла түседі: «Осы үштік ұғымның философиялық мән-мағынасынан өз өмірінің соңғы шағына дейін қол үзбей, оған, негізінен, гуманистік астар бере отырып, әсіресе, ондағы жүрек мәселесіне Абайдың өзі үш сүю немесе имани гүл деп атаған таным тұрғысынан өзіндік ой байламдарын жан-жақты таратып беруге ұмтылған ақынның белсенді әрекетін көреміз» [1, 140-б.]. Байқап қарасақ, ғалым ойы мол мазмұнға құрылған әрі түбірлі танымдардың қарасын, төбесін танытып өткен.

Біз ғалым ойларынан нәр ала отырып, әрі адамгершілік жайлы ой толғаған бұрынғы-соңғы ойшылдар еңбектеріне сүйене түсіп, ақындағы Толық адам танымы туралы былайша ойлап кетеміз. Толық адам – адамзаттың басты мақсаты болған кемелдену жолындағы камили инсан секілді Абай негіздеген өзіндік түбірлі таным. Толық адам – бұрыннан айтылып келе жатқан адамгершілік жайлы ойлар негізінде Абайдың өзі ізденіп тапқан төл танымы. Абайдағы адамгершілік жайлы ойлардың бәрі де осы Толық адам танымының аясы мен қойнауынан тарамдалып өріс таба береді. Философиядағы атақты категориялардың бір жұбы – құбылыс пен мән. Құбылыс нәрсенің, мәселенің жалпы болмысы, көрінген нобайы болса, мән – сол болмыстың өзін, өзіндік қасиетін танытар ең түпкі мәні мен өзегі. Әдетте нәрсенің, мәселенің өзегін, мәнін терең білмей тұрып, оның құбылыс күйіндегі бадырайып көрініп тұратын ә дегендегі алғашқы бар болмысын түгел де толық, ең бастысы, анық та айқын тану мүмкін болмайды. Осы тұрғыдан келгенде, толық адам – Абайдағы адамгершілік жайлы ойлардың жалпы жиынтығы,

ақындағы гуманистік ойлардың бәрін қамтыған негізгі атауы, басты танымы. Өйткені ақыл, қайрат және жүрек адамның рухани және тәни бөліктен тұратын қоспа жаратылысы мен болмысын толық, түгел етумен бірге, оның өзіне ғана тән адамгершілігін де толық, кемел етеді. Қалай болғанда да қайраттың адам болу мен адамгершілікке қатысы бар, мұны «Әуелде бір суық мұз – ақыл зерек», «Әсемпаз болма әрнеге», «Сенбе жұртқа, тұрса да қанша мақтап» өлеңдері мен 17-қарасөзіндегі ақын ойларынан байқауға болады. Абайдағы «Әуелде бір суық мұз – ақыл зерек» өлеңінің мән-мазмұны өте елеулі, ол туралы М.Мырзахметұлы былай деп жазады: «Абайдың 1889 жылы өленді барынша өндіре жазған жылдары дүниеге келген «Әуелде бір суық мұз – ақыл зерек» деген өлеңінде-ақ адам бойындағы ақыл, қайрат, жүрек жөніндегі күрделі ұғымға алғаш рет ерекше назар аударып, ой толғай бастайды» [1, 239-б.].

Әуелде бір суық мұз – ақыл зерек,  
Жылытқан тұла бойды ыстық жүрек.  
Тоқтаулылық, қалыпты шыдамдылық –  
Бұл – қайраттан шығады, білсең керек.  
Ақыл, қайрат, жүректі бірдей ұста,  
Сонда толық боласың елден бөлек.  
Жеке-жеке біреуі жарытпайды,  
Жол да жоқ жарыместі «жақсы» демек...  
Біреуінің күні жоқ біреуінсіз,  
Ғылым сол үшеуінің жөнін білмек [8, 95-б.].

Біздіңше, Абай адамның жалпы жаратылысын да, оның өзіндік адамшылық болмысын да осылайша түгелдеп, толықтап алғаннан кейін, енді басты арманы мен мақсаты – адам жаратылысындағы адамгершіліктің нақты өзіне, оның мәні мен өзегіне дендеп ене бастайды. Міне осы жолдағы ақынның алғашқы аялдамасы – өзі жаңғыртқан жәуанмәртлік ілімі. Бұл ілімде толық адамдағы үш қасиеттің екеуі ғана қамтылған, яғни жәуанмәртлік сипаттарына ақыл мен жүректен шығар – ақыл және әділет пен рақым жатады. Ақын осылайша толық адам атты адамгершілік танымның өзегі мен мәніне бет алғанын көреміз. Яғни «малда да бар жан мен тән» түріндегі қайратпен, яғни жанды дене, жанды тәнмен салыстырғанда, жәуанмәртлікті

құрайтын ақыл, әділет, рақым – тек адамда ғана бола алатын өзіндік адамгершілік қасиеттер. Абай адам болуда қайраттың «малда да бар» болатын төмендік, шектеулі сипатын айтқанда, тіпті ақылдың да «әуелде бір суық мұз», «біле алмай бір тәңріні болдыратын», «жақсының да, жаманның да іздегенін тауып беріп жүретін» кемшілігін термелегендегі мақсаты – оларды керексіз, қажетсіз көру емес, адам болу мен адамгершілікті жетілдіруде атакты үш қасиеттің (ақыл, қайрат, жүрек) қайсысы айрықша артық, асыл, соны анықтау, яғни адамгершілік қалып пен болмыстың өзегі мен мәніне үңілу. Жәуанмәртлік сипаттарында толық адамдағы үш қасиеттің екеуі қамтылса, имани гүл-үш сүюде жалғыз ғана жүрек қалады. Бұдан байқайтынымыз, адам болу мен адамгершілікті жетілдіруде әрі ақиқатты біліп, хақты тануда ең биікте, мәртебелі орында жүрек тұрады екен. Адамдықтың басты белгісі – ақылдың өзін жүректегі ынта мен ықылас, сүю оятады: «Талап, ұғым махаббаттан шығады», «Махаббат – әуел адамның адамдығы», «Жүректе қайрат (ынта, ықылас, сүю) болмаса, ұйықтаған ойды кім түртпек», «Ақылмен хауас (Жаратушы) барлығын білмейдүр, жүрек сезедүр». Сократ жетпіске жақындаған жасында абақтыға қамалып, онда өткізген алғашқы түнінде-ақ бұған дейін танымай келген ақиқатына жеткен болып масаттанады: сол сәтке дейін адам үшін ең маңызды нәрсені – білім деп келген ол енді «ең қасиетті де киелі нәрсе – сүю мен махаббат екен» деп мойындапты. Шәкірті Платон да: «Познает не тот, кто мыслит, но тот, кто любит. И познает не тот, кто видит, слышит и осязает, но тот, кто любит» [9, 105-б.] деп, сүюдің құдіретін аса жоғары бағалаған. Әл-Фарабидің де ұлы махаббатты, алғашқы махаббатты Бірінші Тұлға, Алламен байланыстырып, сүюдің өзі тіршілік пен өмір, барша болмыста бәрінен де биік тұратынын тұжырымдайтыны бар [10, 77-78-б.]. Абайда да М.Мырзахметұлы бекіте танытқанындай, жүрек культі басым көрінеді. Ғалым ойының ізімен жүріп отырып ойласақ, Абайдағы Толық адам танымы мен ондағы адамгершілік қасиеттің өзегі мен мәні, әрі ақындағы адамгершілік қасиеттің өзегіне үңілудегі соңғы аялдама – имани гүл-үш сүю екені айқындалады. Абайда адамгершілік іліміне байланысты осындай жүйелі де желілі танымдық жол бар.

Абайтануға қатысты бұрынғы зерттеулерде Толық адам танымындағы үш қасиеттің адамгершілікке байланысты жүйелі мазмұны мен оның шынайы ақиқаты айтылмайтын, «Малға достың мұңы жоқ малдан басқа» өлеңіндегі үш қасиетке берілген анықтауыштық атаулардың сыры да бұрын беймәлім болатын. М.Мырзахметұлы Толық адам танымын ғылыми айналымға ендірумен қоса, жаңағыдай анықтауыштық атаулардың да (ыстық қайрат, нұрлы ақыл, жылы жүрек) кездейсоқ аталмағанын айқындаған, ақындағы жүрекке байланысты ықыласты көңіл мен тамырлы ойдың негізін әл-Фараби танымынан тартып танытқан. М.Әуезов аса мән беріп пайымдаған Абайдағы адамгершілік жайлы өзекті тақырыпты М.Мырзахметұлы Толық адам деп аталатын төл таным тұрғысынан танытып, оның ішкі сырын жауанмәртлік, имани гүл ілімдері арқылы ашып берген.

### **Адамзатқа ортақ ілімге Абайдың қатынасы**

Адам мен оның өмірі және осы екеуінің болмысы мен мәні туралы мәселе адамзат ойшылдарын әлімсақтан мазалап, толғандырып келеді. Ой соңындағы әрбір ақылды, парасатты адам ой жарысының түпкі мәресінде адам мен оның адамгершілігі тақырыбында табысып, тоғысып отырған. Әлемде ойлы адам айналысар мәселе өте көп, сөйтсе де айрықша ақылды, асыл, сара, дана жандар мәселенің өзегіне ұмтылған, мәнді тануға тырысқан, адам ақылының құрығы жетер ең түпкі ақиқатты айтуға әрекеттенген. Біз хал-қадерімізше іздене жүріп адамзат ойшылдарының әр-әр кезең, дәуірлерде айтылып жүрген тұжырымдарының түпкі түйіні мен құлабызы – Аристотель жасаған қорытындыда жатқанын байқадық. Аристотельдің пікірінше, ең басты мәселе, биік игілік, қасиетті құндылық – ізгілік пен қайырымдылық, яғни адамгершілік екен. Аристотель «Үлкен этика» атты еңбегін: «...алдымен ізгілік жөнінде, оның мәні, қалай пайда болатыны жөнінде айтуымыз керек» [11, 249-б.] деп бастайды. Әрине бәрінің де бастауы, әлем мен адамды жаратқан Түп Ие – Құдайдың бізге беймәлім болмысы қашанда биік тұрады. Аристотель: «Құндылар деп мен Құдайдан тарайтын ең қадірлі игілікті айтамын, мысалы, жанды, ақылды, бұлар



бастапқы, алғашқы принцип деуге болатын нәрселер» [11, 253-б.] деп жазады. Мәселе – адамзат пен оның өмірі, адам абыройы мен өмірінің мәні жайлы болған соң, әрі бәрі де осы адамзат болмысынан туындайтынын ескерсек, бұрынғы-соңғы әлем ойшылдары әбден айтып, жазып, шегелей бекітіп кеткеніндей, адам болмысы ақыл мен жан және тәннен тұратыны белгілі. Жаратушыға жақын әрі барша әлемнен биік, оқшау тұратын бекзат болмысты Ақылдың өзі өзінің асыл міндетін жан құмары, жан қуаттары арқылы ғана атқара алады. Ақылды биік, бекзат, асыл болмыс санасақ та, әлемдегі күллі өсімдіктер мен жануарларға да тән, оларда да бар жанның әмбебап әрі қолданбалы сипатын мойындауға тура келеді. Осы орайда Аристотельдің адамзат тұтынар барша игілік атаулыны ақылмен байланыстыра айқындамай, жан мен тәнге қатысты жіктеуіне түсіністікпен қарауға болады. Оның үстіне адамзаттың басым бөлігі ақылды бетке алып данышпан, кемеңгер болып кетпейді, бірақ солардың бәрі де жан деңгейінде әрекет етіп, сондай-ақ жанның денсаулығы мен жақсы халін орнықтырып жасайтын қайырымды, ізгілікті болмысты сақтап өмір сүруге міндетті. Адамзат қауымында өзара көмек пен түсіністік, қайырымдылық болмаған жағдайда олар өз болмысын жоғалтып, жануарлар деңгейіне дейін төмендеп кетуі мүмкін. Адам болу мен адам болып қалудың кепілі мен алғышарты, өзегі мен мәні – ақыл айқындаған түрлі қайырымдылықтар. Аристотель ақиқаттың түп тегі мен өзегіне қарай ұмтылып, адамзат тұтынар барша игілікті үш-ақ топқа бөліп танытады. Әуелгісі жанға қатысты игіліктер, олар – ақыл мен адамгершілік, ізгілік, қайырымдылықтар, екіншісі – тәнге қатысты игіліктер, олар – денсаулық пен сұлулық, үшіншісі – жанға да, тәнге де қатысы жоққа жуық, екеуінен де бөлектеу болатын игіліктер, олар – байлық, билік, мансап, мақтан және сол сияқты сырттан келер игіліктер. Аристотель осы үшеуінің ішіндегі жанға қатысты игіліктерді – ең жоғары асыл игіліктер деп санайды [11, 255-б.]. Оның ойынша, адамзатқа қатысты ең басты мақсат пен ең биік бақыт және ең құнды игілік – қайырымдылық, ізгілікпен өмір сүру, яғни адам болу, адамгершілікті болу. Сөйтіп ізгілік пен қайырымдылық, яғни адамгершілік – дін мен философия, ғылым мен өнер, «өнер алды – қызыл тіл» – әдебиеттің де мәңгілік әрі басты мәселесі.

Осы адамгершілік ілімі қазақ әдебиетінде де желісін үзбей, ғасырлар бойы жүйелі жырланып келген. Адамзаттың озық ойлы данышпандары ғана айта алып, әрі өздерінің ізерлі ізденістерінің өзегі еткен осы бір күретамыр тақырыпқа қазақ ақындары да жан-жақты үлес қосқан. Адамгершілік пен оның негізі, төркіні саналатын ізгілік – адамзат танымы айналысар ең басты әрі ең негізгі тақырып. Көбіне ойшыл, философ ғалымдар ғана сөз ететін өзекті, ілімдік деңгейдегі адамгершілікті сол биік деңгейінен титтей де төмендетпей қазақ ақындарының да өз шығармаларында жырлап өткені – мақтан етерлік жағдай. Қай заманда да өмірді мәнді, адамды абыройлы да абзал, қоғам мен мемлекетті қуатты да құтты ететін басты тетік – адамгершілік, яғни қайырымдылық. Адамзатты өзге тіршілік иелерінен биік, бекзат, абзал етіп әрі оны осындай әйбат, асыл қалыбында сақтап қалушы да – ізгілік пен қайырымдылық. Адамгершілікті әркез күн тәртібінен түсірмей дәріптеп, жарнамалай насихаттап отыру – заман мен өмір талабы.

Адамзат әлемінде ғылым мен өнердің, дін мен сопылықтың, әсіресе философия мен әдебиеттің адамнан тыс, адамға қатыссыз тақырыбы кемде-кем. Академик М.Қаратаев жазғандай, «Поэзия мен философия – бұл бөлінбейтін біртұтастық, бірақ тұтастығы сирек болғанмен, олар адамгершіліктің биік шыңы мен ұлылығын өзара бөліседі. Бірақ олардың әртүрлі бағыты орта кезеңде түйіседі, мұнда ұлылықтың ұлылық тұңғығында поэзия мен философияның рухы біртұтас, бірлікте және бір-біріне кірігіп кеткен» [12, 19-б.]. С.Әшімбаев философияның бір саласы мораль мен әдебиеттің арақатысы туралы айта келіп, философиядағы мазмұнның әдебиетте өзіндік түр, стильде көрініс табатынын жазады: «...әдебиет түрдің орнында болса, ал мораль мазмұнның міндетін атқарады. Әдебиетті қоғам өміріндегі кездейсоқ шындықтардың таза көркемдік айнасы деп қана қарауға болмайды. Жазушы өз шығармасында өзі өмір сүріп отырған қоғамдағы моральдық атмосфераны реалистікпен суреттеу арқылы әлеуметтік өмірдің тынысын танытады» [13, 46-б.] Оның үстіне философ ғалым М.Орынбеков жазғандай, «нақты философиялық еңбектерге қалам тартқан мамандар аз болғандығымен негізгі еңбектерді әдебиетшілер, ақындар, ойшылдар, сопылар мен суниттер жазып қалдырды» [14, 60-б.]. Мәселен

Сократ, Платон, Аристотель, Плотин, Конфуций, әл-Фараби, ибн-Сина секілді адамзаттың озық ойлы ұлдары жазып қалдырған асыл ойларды «мұртын бұзбай, әрін кетірмей» кейінгі Ж.Баласағұн, А.Ясауи, Абай, Шәкәрім сынды ақындар өз шығармаларында қағида, қалып, ілім деңгейіне жеткізіп, өнерге тән көркем тіл, әдеби стильмен жырлай білді. М.Орынбеков жазғандай, «Шығыс философиясы негізінен философиялық емес сипаттағы шығармаларға негізделген... Шығыста пайымдаудың философиялық емес қалыптарының басымдығымен бұл ұғымдар дәстүрлі текстерде көмескіленіп мәнін тереңде сақтаған» [14, 63-б.]. Яғни философиядағы адам мәселесі, мораль, этика қағидалары Ж.Баласағұнның жәуанмәртлік, А.Иасауидің хал ілімі, Абайдың толық адам танымы, Шәкәрімнің ұждан, ар білімі арқылы көркем түрде бейнеленді. Ойшылдар жеткен терең танымға ақындар да иек артып, адамзат ойы жетер ортақ ақиқатты олар да жырлады. Мәселен Абай мен Шәкәрім өздері жырлаған таным мен білім, ілімнің арғы төркіні тым тереңде жатқанын саналы түрде сезінген, жақсы білген. Абай «Әбдірахманға Кәкітай атынан хат» өлеңінде өзіне дейінгі өрелі ойға өзінің де ортақ әрі оған өзінің де ие болып отырған жағдайын былайша байқатып өтеді:

Кісі айтпаған сөз бар ма,  
Тегіс ұғар қай құлақ?  
Сөккенің оны ұнар ма,  
Үйренген сөзге мен де ортақ [8, 168-б.].

Абай өзіне дейінгі ойшылдар сөзін үйреніп, соларды ғана айтып қоймай, ел түзеу, адам жөндеу қамымен өзінің де түйген ойларын әркез дамытып, жетілдіріп, бекітіп, қайталап келгенін танытады:

Талай сөз бұдан бұрын көп айтқанмын,  
Түбін ойлап, уайым жеп айтқанмын [8, 172-б.].

Өлеңдері философиялық мән-мазмұн мен ғылыми танымға толы болып келетін Шәкәрім ақын да өзіндік «Үш анығын» айқындап түйіндеу барысында көп ізденген, әрі осы жолда өзін ақын ғана емес, ғылым өкілі ретінде танытқан. Ол ашық түрде:

«менің ойымша, ескі замандарда ойламаған ой, айтылмаған сөз, істелмеген іс қалған жоқ. Бәрінің де басын олар бастап кеткен» [15, 25-б.] деп, өзі айтар ойдың негізі мен төркіні бұрыннан белгілі, баяғыдан бар мағлұмат екенін мойындайды. Ақиқатты кім, қашан айтса да, ол ақиқат өзінің байырғы, бастапқы мәні мен мазмұнын сақтап қалады. «Бұрын, бүгін, ертең» шындар [7, 241] секілді құбылып өзгере бермей, өзінің бастапқы асыл қалпында қалу – ақиқаттың өзіне ғана тән ерекшелігі. Тек заман мен жағдай, саясат пен өзге де жайларға байланысты аз-кем «жамау салынып» түрленгені болмаса, ақиқат өзінің бұрынғы бар болмысын жоғалтпайды. Шәкәрім ақын ақиқаттың осындай қадір-қасиеті мен киесін мойындай келіп былай дейді: «біз де жоғарғы екі сұрауға өткен білімділердің сөзінен қорытып, оның үстіне тұңғыш ой деп өз ойымыздан жамау салып, бөрік жасамақпыз. Бірақ тұңғыш дегеніміз әлдеқашанғы кімнің ойы болып шығарын білмеймін» [6, 25-26-бб.]. Сірә, ақынның «бөрік», «тұңғыш» деп отырғаны – өзі қорытып тапқан ұждан анығы, ар білімі екені анық.

Адамгершілік мәселесі – адамзаттың ең әуелгі әрі мәңгілік мәнді болып қалар тақырыбы. Адамзат ақыл-ойының бастауындағы қытай, үнді, грек, араб-мұсылман ойшылдары мен ақындары адамгершілік жайын бір сәт те күн тәртібінен түсірмеген. Аристотельдің белгілі бір қалып, қағида, жүйеге салып, ілім ретінде дамытқан адамгершілік мәселесі қай заманда да өзекті болып қала береді. Абайдағы адамгершілік ілімі адамзат болмысына қатысты ежелгі, көне ойлар мен тұжырымдардан туған, яғни Абай адамзаттық ой тарихындағы ең көне әрі ақиқат таныммен таныс болған әрі оны өз шығармаларында желілі де жүйелі түрде жырлай білген. Адамзат болмысын құрайтын ақыл, жан, тәннен – Абай насихаттаған нұрлы ақыл, жылы жүрек, ыстық қайрат ұғымдары іркіліссіз әрі оңай туындай кеткен. Шынында да адам болмысын осы үшеуінен бөлек, өзге нәрсе құрайды деу ешқандай қисынға келмейді. Адамзаттың Алладан келер рух пен төркіні топырақ саналатын тәннен тұратынын ғылым да, дін де терістемейді, қайта растап бекіте түседі.

Адамгершілік – барлық қаламгерлерге ортақ тақырып. Әйтсе де сол қаламгерлердің бәрі бірдей бұрыннан айтылып келе жатқан дәстүрлі тақырып – адамгершіліктің өзіндік жүйесі мен

қалыбын, төл танымын жасай бермеген. Абайдың өзге ақындардан бөлек әрі биік болатын жағдайы да осы адам болу мен адамгершіліктің жүйелі жолы мен өзіндік танымын, ілімін жасай білуімен байланысты. Ол адамгершілікті көркемдік қалыпта ғана суреттеумен шектелмей, оны ілім мен таным, ойшылдық деңгейіне көтере жырлады. Абай – этикалық мәселені, мораль философиясын тереңдеп сөз еткен ойшыл ақын. М.Әуезовтің: «Ол адамгершілікті, моральдық философияны барлық жайдан жоғары қояды» [2, 179-б.] деген ойы ақын танымын терең танудан туған. Абай үшін ақындық қана мұрат емес, оның ақындығы – адамгершілік танымының құралы іспетті. Ол белгілі бір адамгершілік қасиеттерді іш тартып қана қоймай, сонымен бірге сол адамгершіліктің, адам болу мен кісіліктің өзі қорытып тапқан қалыбын, жүйесі мен жолын жасайды. Адам тану мен адамгершіліктің мәніне, сырына үңіле түседі. Қайтсем адам атын асқақ, асыл етем деп шарқ ұрады. Жалпы, діни-философиялық ойдың даму тарихында «адам» ұғымының алатын орны орасан зор десек те, оны белгілі бір жүйеге түсіріп, тиянақты түсіндіруге көшбасы болған философ – Сократ. Абайдың толық адам туралы танымы сол Сократтан басталатын, Платон, Плотиндердегі сүюді сүйеніш, тірек еткен адам, қытайлардың дао іліміндегі әбден жетілген адам (совешенномудрый человек), Шығыс ойшылдары мен суфизмдегі камили инсан мен бенделіктің кәмалаттығына ұмтылған адам және төркіні түркілік жәуанмәртлікпен сабақтасып, туыстасып жатады. Абайдың адамгершілікті жырлаудағы ең басты жаңалығы да осы. Абайдағы адамгершілік мәселесі құбылыс ретінде толық адам арқылы көрініп, ең түпкі мәні – махаббат пен әділет, ізгілікке дейін дамып, ұштала береді. Толық адам мен оның өзегі, негізі саналатын махаббат, әділеттің аралығында адамгершілік асыл қалып пен қасиеттің қыр-сыры ашыла түседі. Бұрынғы-соңғы ойшылдар айқындай айтып кеткеніндей, адамгершілік – таным мен ізгілік атты екі арнадан құралып қалыптасады. Таным мен ізгілік жайы – Абайға да соншалық етене жақын тақырыптар. Әдебиетші ғалым Мекемтас Мырзахметов «Мұхтар Әуезов және Абайтану проблемалары» атты монографиясында Абай шығармаларындағы таным жайын хауас, ақыл, ал ізгілік сырын жүрек, жәуанмәртлік, үш сүю арқылы жан-жақты таратып

танытқан [1]. Абайдағы толық адам – тәнімен де, әсіресе жанымен жетілудің биік шыңына жетіп, кемеліне келген адам. Ақынның өмір бойғы ізденісінен туған адамгершілік ілім мен кісілік қалып – оның осы толық адам танымы. Абайдың адамгершілік ілімінде толық адамның мәні мен өзегіне, түп негізіне үңілген белгілі бір жүйе бар. Сол жүйені мынадай күйде көруге болады:

- а) Толық адам: ақыл, қайрат, жүрек;
- ә) ақыл мен жүрек – жәуанмәртлік: ақыл, әділет, рақым;
- б) жүрек: әділет, рақым, шапағат, мейірім, махаббат т.б.;
- в) адамдықтың алды – әділет пен махаббат;
- г) махаббат – үш сүю (имани гүл) – Алланы, адамзатты және әділетті сүю;
- ғ) ізгілік пен қайырымдылық;
- д) адамшылық, адамгершілік;
- ж) Хақ жолы

Абай адам бойындағы барлық асыл қасиеттер мен табиғи қабілеттерді бір орталыққа біріктіріп, оларды өзі қорытып таныған үш қасиет арқылы толық адам бойына жинақтайды. Ақыл, қайрат, жүрек үшеуінің «бір кеудеден табылып», одан толық адам туатын танымы – ұлы ақынның зор табысы. Жәуанмәртлік, әсіресе имани гүл – Толық адам танымының өзегі мен негізі, түп мәні. Әуелі хауаси хамса заһириден бастау алып, одан әрі хауас салим, ақыл-ой, толық адам, жәуанмәртлік, имани гүл танымдары арқылы жетіле түскен Абайдағы адамгершілік ілімі өзін өнеге тұтқан ықыласты оқырманын Хақ жолына – адамшылыққа бастай бермек.

### **Өркениетті елге айналудың алғышарты – Толық адам танымы**

Адамзат ойының алыбы Аристотель жазғандай, адамзат үшін ең әуелгі қажеттілік пен құндылық, бақыт пен байлық – ізгілік тектес адамгершілік [11, 249-260; 16, 256-б.]. Мемлекет шаруашылық пен руханияттың түрлі-түрлі саласындағы білімді де білікті мамандар арқылы қуат тауып, құтқа жетіп өрге басып

өркендей бермек. Мемлекеттің тірегі мен тұтқасы саналар мықты мамандар ең әуелі Абай жырлаған толық адам, жәуанмәртлікті жан, үш сүюді ұстанған қайырымды кісі болмақ керек. Адамзаттың Будда, Конфуций, Сократ, Платон, Аристотель, Плотин, әл-Фараби, ибн-Сина, И.Кант, Л.Толстой, М.Әуезов секілді озық ойлы даналарының бәрі де өз заманында әсіресе адам болу мен адамгершілікті айрықша дәріптеумен болған. Осы адамгершілік жайы Абай мұрасының да өзегі мен мәні болып табылады. Абай жырлаған адамгершілік ілімі пайда болып туған топырағы мен өзін тапқан иесінің тұрғысынан алғанда қазақтық, ұлттық игілік болғанымен, айтар ақиқаты мен қолданбалы сипаты жағынан адамзаттық, әлемдік мән-мазмұнға ие. Абай шығармаларындағы жаңалықты да мән-маңызы аса зор осы бір ізгі ілім ұлтымыздың тәрбиесі мен мемлекетіміздің идеологиясына тіктеп, нықтап негіз етіп алынар болса, іргелі де озық елдердің қатарына қосылуымыз жеделдей түсіп әрі жемісті болар еді. Әл-Фараби армандаған қуатты да құтты, қайырымды қала қиял күйінде қалмай, өмір шындығына айналар еді.

Адамзат өмірі мен тұрмысының ең мағыналы да мәнді, қасиетті де киелі биігі – «малда да бар жан мен тән, ақыл мен сезім (ар-ұят, әділет, сүю) болмаса» [8, 227-б.] деп Абай жазғандай, таным мен қайырымдылық десек, осы бір адам даналығының алғы сапында әдетте Аристотель, әл-Фараби секілді хакім, дана, ойшыл тұлғалар тұрады. Ал ақындарды көбіне қарапайым қауым мен ғалым, ойшылдардың аралығындағы «ауыл-аймақтан» көреміз. Адамдық мәртебесі мен дәрежесі биіктеу саналатын осы ойшылдар мен даналардың деңгейі мен олар жеткен терең танымға ақындардың да біршама жақындап, тіпті тоғысып, түйісіп қалатын кездері болады. Абай – сондай ойшылдық пен терең танымның биігіне жеткен хакім ақын. Абайдың Толық адам танымы – адамгершілік ілімі аясындағы аса елеулі ақыл-ой табысы. Адамгершілік жайының ақын шығармаларында біршама басым жағдайда жырланатыны оның немере інісі Кәкітай Ысқақұлы мен абайтану ғылымының негізін салушы М.Әуезов және өзге де көзіқарақты кісілер тарапынан айтылып, жазылып жүретін. Әйтсе де адам болу мен адамгершілік жайын Абайдың белгілі бір қалыпқа салып, өзіндік

жүйесін тауып, оны өзіндік ілім мен танымға айналдыра жырлаганын абайтанушы ғалым М.Мырзахметұлы өткен ғасырдың сексенінші жылдарынан бері айқындай, тереңдей танытып келеді. М.Әуезов ақын жайлы өз зерттеулерінде «нравственная личность» деп атап, басын бастап төбесін көрсетіп кеткен іргелі танымды Абайдың өзі қолданған сөзі «толық адам» атауымен жан-жақты таратып таныту ізденісі – М.Мырзахметұлының ғылымдағы үлкен ерлігі деп білеміз.

Абай өмірі мен мұрасынан туындатып барып М.Әуезов айқындап айналысқан сегіз түрлі проблеманың бірі де бірегейі – Абайдың Шығысқа қатысы туралы мәселе болатын. Бұл мәселенің мән-жайы М.Әуезов тарапынан 1934 жылы жазған мақаласында ерекше құлшыныспен қарастырыла бастаса да [17, 57-71-б.], заманның жағдайы мен кезең саясаты осы бір игі істің өрістеп кетуіне мүмкіндік бермеді, қайта қасақана кедергі жасады. М.Мырзахметұлы – М.Әуезов армандап, ой-өресі жеткенше жазып, әйтсе де таратып айта алмай кеткен Абайдың Шығысы мен өзіндік адамгершілік ілімін соңғы 40-50 жыл көлемінде жемісті де табысты зерттеген аса көрнекті ғалым [1; 18; 19; 20]. М.Мырзахметұлының ғылыми айналымға ендірген Толық адам ілімі арқылы Абай адамзаттық ақиқатты айта алған санаулы саңлақтардың қатарында танылып жүр. М.Жұмабаевтың ақынды – хакім Абай деп атауының сыры мен шындығы осылайша айқындалып белгілі бола бастаған жайы бар. Абай адамзат баласы үшін ең өзекті мәселе – адамгершілік жайын өзіндік төл ілімге айналдырып жырлады және адам баласының ақылы жетіп айта алуы мүмкін деген ең түпкі іргелі де абсолютті ақиқатты айта алды. Барша гуманитарлық ғылым салалары адамгершілік жайын бұған дейін де ізденіс нысаны етіп келген, сөйтсе де оларда Абайдағыдай адамзаттық әрі ақиқат мән-мазмұндағы ілімдік тұрғыдан жүйелі танылмаған. Тіпті философтар да Абай шығармаларындағы Алла, адам, адамгершілік, таным жайын анық өзінің ақиқат мәнімен жеткізе алмай жүр.

Адам баласы тәні ауырып мазасызданда, дереу барып дәрігерге көрінеді, ал жаны, ділі дерттеніп, ақыл-ойы, жан-жүрегі күншілдік, арсыздық, қиянатшылдықпен кірленіп, кеселденіп жатса, ол өзін дерттімін, науқаспын деп әсте ойлай бермейді. Тәні кеселденіп ауырған адам көбіне өз басымен қиналып, жеке жүріп



әбіржісе, пейіл, ниеті қарауланып қасанданған, ділі дерттенген қайырымсыз, қасиетсіз адам өзімен қоса отбасы мен ортасына, қоғамы мен мемлекетіне де зор залалды, кеселді болмақ. Тән жарасы осылайша кеселденген кісінің өзіне ғана азапты, залалды болса, тексіздік пен тәрбиесіздіктен туатын жан ауруы, яғни көргенсіздік пен қасиетсіздік иесі мен жан-жағына, күллі қоғамға да кеселді кесірін тигізеді. Адамзат қауымы мен қоғамының соңғы кемелділік биігіне ойдағыдай жете қоюы қиын. Себебі адамзат – Жаратушыдан жеткен қасиетті де киелі рухы, ақыл-ойымен қоса, топырақ тектес жексұрын, жиренішті нәпсінің де иесі. Сондықтан қоғам мен мемлекетке тән емшісі дәрігерлікпен бірге жан мен рухтың ем, азығы болар – Толық адам танымы да тыныс табар ауасындай аса қажет. Қоғамды құрап жасаушы әрі мемлекеттің қуаты мен құтын арттырып өркениетке жеткізуші – түрлі саланың мамандары болса, сол кәсіп иелерінің ішкі тіні мен ділін, діні мен рухын, қасиетті адамгершілігін жетілдіріп асыл ететін – Абайдың Толық адам танымы болмақ. Қоғам мен мемлекет үшін өз кәсібін жетік білетін білімді де білікті мамандармен бірге ең әуелі ақылды, ар-ұятты, әділетті адам тәрбиелеп дайындау мәселесі өте-мөте маңызды деп білеміз. Адам тек тәні, тұрмысы, күш-қуатымен ғана адам атанбайды, бұлар адам болуда жай жәрдемші, қосымша көмекші ғана. Адам баласы ең әуелі ақыл-ой, адамгершілік қасиеттерімен ардақты да асыл болмысқа айналмақ. Абайдың Толық адам танымы – бекзат болмысымыз бен асыл адамдығымызды сақтап қалудың таптырмас кепілі. Әл-Фараби армандаған қайырымды қала мен тұңғыш Елбасымыз мұрат еткен келешек мәңгілік ел қауымы ең әуелі ауыз толтырып айтарлықтай АДАМ болып алмағы зор парыз, басты шарт. Абай ілімі арқылы қазақ қауымы рухани сау ұлт пен асыл елге айналмақ.

Толық адам ілімі бүгінгі таңда қалың көпшілік түгілі, зиялымын деген қауымға да түгел танылып болған жоқ. Дін, философия, жантану ілім-ғылымдарының ақиқатын бойына бірдей жинаған Толық адам ілімі терең төркінінен тартып білмесе, өзін оңай көріп, жеңіл санаған астамшыл да үстірт ізденіспен қалаулы нәтиже бере алмайды. Абайдың бұл адамгершілік ілімі қазақтың, түркілердің ғана емес, барша адамзаттың моральдық кодексі болуға лайық өте іргелі таным.

Адам болмысында ақыл-ой мен жан-жүрек және тән қуаты бөлінбес бірлікте орнығып, олардың бәрі де бірдей жаратылысымыз үшін аса қажетті болғанымен, үшеуінің ішіндегі ең асылы – алдыңғы екеуі, яғни ақыл-ой мен жан-жүректен бастау алар ізгі қасиеттері. Мораль философиясы мен Толық адам ілімінің мазмұнын құрайтын бұл жайлар «терең ойдың телміріп соңына ерумен» ғана танылмақ. Толық адам ілімі – жай ғана «ақылды бол», «арлы бол», «адам бол» деген жалаң насихаттан тұрмайды, төркін-тегі, дәстүрлі дамуы, жүйелі де қалыпты мән-мазмұны бар аса іргелі таным. Ақын болудың үстіне хакім де атанған Абай осындай іргелі танымды жасауда өз тарапынан елеулі үлес қосқан. Ақын қалыптаған осы Толық адам ілімін жан-жақты зерттеп тану мен оны ел игілігіне айналдыру – бүгінгі қоғамымыз бен мемлекетіміздің кәдімгідей саяси-әлеуметтік мұқтажы мен мәдени-рухани міндеті деп білеміз. Әсіресе ақша мен пайда, дүние мен байлық «құндылықтары» арсыздана алға шыққан бүгінгідей нарық заманында ақыл-ой мен ар-ұят, адамгершілік пен имандылықты насихаттайтын бұл ілім бағыт-бағдарымызды дұрыстап, адами асыл қалпымызды сақтап қалмақ. Бүгінде бай мен кедейдің арасы тым бадырайып алыстап бара жатса да, тұрмыс, тіршілігіміз тәуба дейтіндей жағдайда, бірақ аса мақтанып, марқаятын халде емеспіз. Қарын тояды, киім бүтінделеді, тұрмыс та бірте-бірте жақсарар, әйтеуір адамдар аш қалмау мен жалаңаш жүрмеудің амалын жасайды, тән мен тұрмыстың әл-ауқаты мен деңгейін көтерудің амалы солайша табыла береді, бірақ сөйтіп жүріп рухымыз жүдесе, діліміз дерттеніп, адамшылық, адамдық болмысымыз жетілмей қалар болса, қоғам мен мемлекетіміздің шын мәніндегі қайырымды қалыпқа көшуі кешеуілдеп қиындай түспек. Біздіңше, бала бақшаны да назардан тыс қалдырмай, мектептен бастап жоғары оқу орындарында жас ұрпаққа тек қана білім, ғылым мәліметін берумен шектелмей, олардың ойы мен бойында ең әуелі «адам» деген ардақты да асыл болмысты тәрбиелеуді басты бағдарда ұстау қажет болады, өйткені бүгінгі бала мен шәкірт те, ертеңгі азамат пен маман да – бәрі де мәлімет пен нұсқаудың құлы, қабілет пен дағдының ғана иесі болып қалмай, өзіндік ой-көзқарасы мен ұстанымы, дүниетанымы мен адамшылық болмысы бар зор саналы азамат та болмағы керек. Абай

қалыптастырған Толық адам ілімімен қаруланған әрбір ар-ұятты, әділетті, иманды адам ғана өз кәсібі мен қызметі арқылы ел игілігін арттырар ақылды да білімді, мықты маман бола алады. Сонда ғана қоғамдағы түрлі әділетсіздік пен арсыздық, күллі жамандық атаулы азайып, әлсіреп, жойылуға бет алады. Тіпті түрлі қызмет бабындағылардың Толық адам іліміне негізделген ереже мен қалыпқа сүйеніп жұмыс жасауы да жөн болады. Бұл – шындап келгенде мемлекет мүддесі мен қоғам игілігін ойлаудан туған асыл арман. Қалай болғанда да, кәсібін ғана меңгерген «орындаушы» маманнан гөрі ең әуелі адамшылығын ойлап жетілу жолында жүретін адам әлдеқайда артық, асыл болмақ. Абайдың әркез қайталап көп айтатын жан құмары – тән құмарындай табанының бүрі жоқ ұстамсыз, «арсыз», ашқарақ емес, керісінше тіршілік иелерінің ең асылы ретіндегі біздерді «көрсем, білсем, үйренсем» дегізіп, қашанда АДАМ болуға жетелеумен жүретін кірпияз да нәзік, айрықша асыл әрекет. Тіршілік иелерінің ішінде тек адам ғана жаны мен тәнінің қос құмарын қатар алып жүреді, ал айуанда адамдағыдай жан құмары жоқ, олар тек «ішсем, жесем, ұйықтасам» дейтін тән құмарымен ғана тіршілік етеді. Осындай іргелі ұғымдарды тәптіштеп танытатын Абайды ақын ғана емес, сонымен бірге ғылыми таным мен асыл ақиқатты өлең арқылы жеткізуші ойшыл хакім деп те тану орынды болады. Ақын армандаған толық адам – тәні, дені сау, ақыл-ойы жетік, әділет, рақым, мейірімі мол жан болуға тиіс. Қайрат арқылы танылатын дене жаратылысы мен тән қуаты айуанда да бар. Содан да Абай тек адамда ғана бар ақыл мен сезім, таным мен қайырымдылық жайын дәріптеуге ерекше көңіл бөлген:

Малда да бар жан мен тән,  
Ақыл, сезім болмаса.  
Тіршіліктің несі сән,  
Тереңге бет қоймаса [8, 227-б.].

Абай айтатын «малда да бар жан мен тән» – айуан секілді әйтеуір тірі жүріп күнелтуді танытады, ал адам «тіршілігінің сәні» мен мәні, қызығы мен қуанышы – тереңге бет қойып танитын ақылы мен ар-ұят, әділет, сүю секілді сезімдері, яғни өзі

мен барша әлемді танып-біліп, ар-ұят, әділет жолымен жүріп АДАМ болу. Абайдың Толық адам ілімі дәл осы Алла жолы – адам болу мен адамгершілікті жүйелі де желілі түрде насихаттап танытады. Біздер Алланың рухынан үлес, ұшқын болып жеткен ақыл-ойымыз бен ізгі болмысымыз жолында жүрумен ғана адам болып қалатынымызды ұмытпауға тиіспіз. Абайдың Толық адам танымы – кісі қайткен күнде аты мен затына сай қасиетті, қадірлі болады деген ой-толғаныстан туған. Толық адам ілімі – адам жаратылысы мен болмысының түгелдігі мен толықтығын және адамгершілік жағынан жетіле түскен кемелділігін танытады. Яғни адамның жаратылысы мен болмысы – қайраты (тәні), ақыл-ойы мен жүрегі (жаны, қайырымдылығы) түгел болғанда ғана толық әрі кемел саналады.

Ақыл, қайрат, жүректі бірдей ұста,  
Сонда толық боласың елден бөлек.  
Жеке-жеке біреуі жарытпайды,  
Жол да жоқ жарыместі «жақсы» демек.  
...Біреуінің күні жоқ біреуінсіз,  
Ғылым сол үшеуінің жөнін білмек [8, 95-б.].

Адам баласының өз болмысына сай адам бола бастауы әуелі ақылы мен қайраты арқылы жүзеге асады да, жүректен бастау алатын ізгі қасиеттерімен жетіліп, кемелдене түседі, толық адамға айналады:

Қайрат пен ақыл жол табар  
Қашқанға да қуғанға.  
Әділет, шапқат кімде бар,  
Сол жарасар туғанға [8, 162-б.].

Әділет пен шапқат – жүректен шығатын әрі жүрекке қатысты ізгі қасиеттер. Негізі, адамшылық, адамгершілік болмыс «малда да бар жан мен тән» сипатындағы қайраттан (тән, дене) бөлек ақыл мен жүрекке қатысты танымдық, қайырымдылық қасиеттер арқылы қалыптасып толысады, кемеліне келеді. Абай ойы өзіне дейінгі ұлылар айтқан аталы ақиқатпен ғажап үндесіп жатады. Бұрынғы-соңғы ойшылдардың айтуында, адамның өз жаратылысы мен болмысына сай кемелденуі екі бағытта жүзеге

асады. Әл-Фараби оның алғашқысын даналық пен таным, ал екіншісін ізгілік пен қайырымдылық деп атайды да, кісілік кемелдікті жанның жетілуі түрінде былайша танытады: «... дене жан үшін өмір сүреді, ал жан мінсіз жетілгендік үшін, яғни қайырымдылық болып табылатын бақыт үшін өмір сүреді, демек жан даналық пен қайырымдылық үшін өмір сүреді» [10, 288-б.]. Әл-Фарабидің осы ойы – оның өзінен кейінгі избасарларының көбіне бағыт-бағдар берер құбылнама іспетті болды. Ғұлама ойын Абайдың да ұстанғанын көреміз. Әл-Фараби түйіні мен Абай ойы бір-бірінен алшақ кетпейді, қайта екеуі де ортақ ақиқатты өздерінше танытады. Әл-Фараби сөзіндегі «дене», «даналық», «қайырымдылық», «жетілу» ұғымдарынан – Абай жырлаған «қайрат», «ақыл», «жүрек», «толық боласың» қасиет, әрекеттері арқылы жетіле келіп толық адамға айналууды ұққандай боламыз.

Толық адам ілімі – Абайдың өзіне дейінгі адамгершілік іліміне сүйеніп тапқан, өзі жырлап, өзі негіздеп жасаған тәл танымы. Абай ілімінде адам болмысына қатысты ең іргелі, абсолютті ақиқат айтылған. Өмір мен ғылымның әр-әр саласында ақиқатқа жетпеген, ақиқатқа айнала қоймаған шикі пайымдаулар мен шала шындықтар жетерлік. Абай ілімінде дін мен сопылық, философия мен ғылымның мәлімет, қағидалары кешенді түрде түгел қамтылып көрініс тапқан. Бәрінің де «илегені бір терінің пұшпағы» екені айқындалған. Абайдағы Толық адам ілімі ең әуелі қайратты көмекші, жәрдемші етумен жан құмары, ақыл арқылы жетіле беруді танытады. Адамгершілік жайы Абайда Толық адам ілімі арқылы құбылыс сипатында көрініп, арадағы жауанмәртлікті өткел етіп, ең түпкі мәні – махаббат пен әділет, ізгілік пен сүюге, яғни жүректің басты қасиеті үш сүю, имани гүлге дейін дамып ұштала береді. Абайда толық адамның мәні мен негізіне бет алған, үңіле түскен белгілі бір осындай жүйе бар екенін жоғарыда жаздық. Сол жүйенің жетіле келіп жеткен биігі мен шыңы – сүю, яғни имани гүл. Өмірде адам-пенденің сүйетін қызық, қуаныштартары өте көп болса да, Абай өзі түйіндеп жырлаған, қалыптап жасаған имани гүл, үш сүю танымы арқылы оқырмандарын Алла мен адамзатты және әділетті сүюге шақырған. Бұл – Абайдағы адамгершілік ілімнің ең биік шыңы. Абайдағы толық адам – тәнімен де, жанымен де жетілудің

шыңына жетіп, кемеліне келген адам. Қоғам көркеюінің кепілі мен алғышарты – ондағы әрбір жеке адамның ақылды, арлы, әділетті, ынсапты болуымен айқындалады. Сонда ғана қауымдасқан осындай абзал адамдардан сапалы да сара, білгір де білікті, мықты мамандар дайындалып, олар өз кезегінде қоғам мен мемлекет ісін қайырымды да қасиетті қалыпта жүргізетін болады, нәтижесінде амал мен айла бастаған алдау мен арбау, ашкөздік пен жемқорлық, жауыздық пен қиянатшылық жолы пышақ кескендей үзіледі, тыйылады. Міне Абайдың осындай мақсат пен міндеттерді көздеген Толық адам ілімі – ұлттық қоғамымыз бен ондағы барша оқушы, тыңдаушы, студент шәкірттерге, сондай-ақ өмірін мәнді, болмысын асыл етуді қалаған күллі қауымға адамгершілік оқулығындай пайдалы да шипалы, игілікті де ізгілікті болмақ. Егемен ел мен Тәуелсіз Қазақстанның барлық орта, жоғары оқу орындарында адамгершілік пәні – толық адам, жәуанмәртлік (түркілік адамгершілік ілімі) сабағы жүргізілер болса, бүгінгі шәкірттер мен болашақ мамандардың Абай айтқандай, көкірек көзі ашылып, адамдық қасиеттері арта бермек. Нәтижесінде Толық адам ілімі арқылы адамдық болмысымыз бен әрекетіміз адамшылық аясында толыса түспек. Шәкәрім ақын жазғандай, «осы дүниеде көзге ілінбейтін кішкентай жандылардан бастап адамдарға шейін бәрі өзі хәм нәсілдерінің жақсылықта болып өсіп-өнуіне қам қылады. Мұны – «барлық таласы» дейді. Бұл жаратылыстың берік жолы... Ақыл қарауындағы адам толығы барша адамға бақ іздеген болады» [15, 6.б.]. Ендеше «тіршілік» пен «барлық таласы» және ізгілік жолындағы даналық пен қайырымдылық әрекетімізді Абай насихаттаған толық адам биігіне ұмтылып жүріп жасағанымыз абзал.

Абайтану пәні Қазақ Мемлекеттік университеті Қазақ филологиясы мамандығының студенттеріне ең алғаш 1942 жылы М.Әуезов тарапынан арнайы курс ретінде өтіле бастаған. Осы игі дәстүрдің жаңа кезеңде жалғастық табуының көрінісі ретінде – 2008 жылы Абай атындағы ҚазҰПУ-де «Абайтану» ғылыми-зерттеу орталығы ашылып, университеттегі барлық факультеттің бірінші курс студенттеріне «Абайтану» пәні бүгінге дейін оқытылып келеді. Бұл бастама руханиятқа басымдық беріп

жүрген жаңашыл ректор Д.Қожамжарованың байыпты шешімімен ОҚМУ қабырғасында да жалғастық тауып, 2018 жылдың қыркүйек айынан бастап ол басқаратын университеттегі барлық мамандықтың студенттері «Абайтану» сабағы арқылы ақын Абайдың ойшылдық, хакімдік болмысымен танысып, ақиқат пен адамгершіліктің өнегесін меңгеруде. Абай дүниетанымы мен оның өзіндік Толық адам ілімін танып білу, сөйтіп оны ел игілігіне айналдыру – қазақ руханияты мен ғылымының кезек күттірмейтін зор міндеті. Осы міндеттің орындалуымен қоғамдағы адамгершілік келбет көркейіп, мемлекетіміздің де мәртебесі құтты да қуатты болып арта түспек.

Өткен ғасырдың отызыншы жылдары М.Әуезов атап көрсеткеніндей, Абайдың телегей теңіз танымы Шығыстық қайнар көздің мол қоры арқылы қалыптасқан. Абайдағы желілі де жүйелі адамгершілік ілімі – толық адам, жауанмәрттік, үш сүю ұғым, танымдары арқылы жас ұрпақтың санасы мен жүрегіне сіңіріле бермегі – уақыт пен заманның кезек күттірмес талабы. Абайдағы адамгершілік ілімі бұрынғы-соңғы ойшылдар айтқан іргелі ақиқатпен терең үндесіп дамыған. Абай қазақтың Шыңғыстау өңірінен шығып, адамзаттық ақиқатты айта алған ғажайып тұлға.

### **Абай айқындаған іргелі, асыл ақиқат**

Түптеп келгенде, адам болмысы мен оның өмірі екі нәрсемен байланысты болып келеді. Мұның бірі – адам өзі қызығып, ұмтылып, өмірінде пайдаланып тұтынатын түрлі-түрлі игіліктерінің жайы болса, екіншісі – сол адам тұтынатын сан қилы игіліктердің асылы мен жасығын ажырата біліп, олардың ішінен артығы мен асылын, қасиеттісі мен мәндісін тануға жеткізетін ақыл-ой ақиқаты. Әдетте адамзат баласы көбіне кездейсоқ қызықтар мен қуаныш, рахат, түрлі игіліктердің соңында жүріп адасумен болады. Адам қызығып, соңына «шырақ алып» ұмтылатын мұндай игіліктердің біразын Абай өлең, қарасөздерінің әр-әр тұсында орайымен ауызға алып отырған: «Ақыл таппақ, мал таппақ, адал жүрмек [8, 23-б.]; жұртқа жақпақ [8, 32-б.]; ішсем, жесем, ұйықтасам, білсем, көрсем, үйренсем [4,

103-б.]; тамақтан да, ойыннан да, күлкіден де, мақтаннан да, кербездіктен де, тойдан да, топтан да, қатыннан да [4, 115-б.]; ішпек, жемек, кимек, күлмек, көңіл көтермек, құшпақ, сүймек, мал жимақ, мансап іздемек, айлалы болмақ, алданбастық» [4, 162-б.]. Айналып келгенде, бұлардың бәрін де адам баласы тәні мен жанынан бастау алатын екі түрлі құмары арқылы қызық көріп табады. Абай адам баласы ұмтылып жүріп табатын сан түрлі көп игіліктің ішіндегі ең артығы мен асылын түптеп келгенде екі-ақ нәрсе деп біледі:

...Адамды сүй, алланың хикметін сез,  
Не қызық бар өмірде онан басқа [8, 233-б.].

Ақын айтқан «адамды сүй» дегеннен – жүректен бастау алатын ізгі қасиеттерді, ал «алланың хикметін сез» деуінен – ақылмен қалыптасатын білім-ғылым, даналықты ұғамыз. Бұл екі топтағы адамгершілік қасиеттерін Аристотель мен әл-Фараби ойшылдық, интеллектуалдық және адамгершілік, этикалық қайырымдылықтар деп екі топқа бөле атаған [16, 13-14-б., 129-б; 10, 195-196-б.]. Бұл екеуінің жиынтығынан кісілік қалып пен адамшылық болмыс, адамгершілік қасиет қалыптасады. Мұны бұрынғы-соңғы ойшылдардың бәрі де бір ауыздан мойындай тұжырымдап, әбден түйіндеп кеткен. Абай да осы төркінді, тамырлы таныммен, асыл да абсолютті ақиқатпен ортақтасып, өз тарапынан төл танымы – жәуанмәртлік ілімін қалыптастырған. Және Абай адамның өзіне тән хас қасиеті – адамгершілігін Алланың сипаттарынан туындатып барып танытқан. Адамзат даналары, әсіресе діни ойшылдар Алланы – ұқсасы, ортағы, серігі жоқ айрықша бірегей болмыс деп білген. Абай да осы аталы ақиқат жолымен адамның асыл болмысын Алламен, Оның затия сипаттары, көркем есімдерімен байланыстырған. Ақын ойының ақиқаттығы әл-Фараби тұжырымдаған оймен сабақтасуынан көрінеді. Адам – Аристотель, әл-Фарабилер айтатын ақиқат бойынша, Ай астындағы материалдық, заттық әлемде өмір сүретін қоспалығы ең көп жаратылыс, сөйте тұра жетілу мүмкіндігі де бар болмыс. Себебі адам – Ай астындағы әлемде қоректеніп, өсіп, қозғалып, көбейетін тіршілік иелері ішіндегі Абайша айтқанда, өзгеше «ірі жаратылған» жанның иесі.



Өсімдіктер мен жан-жануар, жәндіктердің жанындағы қабілет, күш-қуаттар адамдікіне қарағанда кемдеу, тым төмен. Өсімдік жанында қоректену, өсу, көбею қабілеттері болса, жануар жаны бұларға қоса бес сезім мүшесімен түйсінуі және әрлі-берлі қозғалу қуаты арқылы өсімдік жанынан «ірілеу», биіктеу болады. Ал адамның жаны өзіне дейінгі өсімдік пен жануар жанындағы қабілет, күштердің үстіне ойлай алатын қуаты қосылып олардан әлдеқайда жоғары тұрады. Өз жанындағы дәл осы ойлау қуаты арқылы адам баласы – Ай астындағы әлемдегі ең жетілген жаратылыс саналады. Және адамға қатысты жетілу әрекеті өсімдіктер мен жануарлардағыдай тек қана тән жағынан өсіп, өзгеруімен, ұлғаюымен шектелмейді. Адамда өзіне дейінгі төменгі жаратылыстарда жоқ, оларда мүлдем болмайтын айрықша бекзат рухани жетілу мен кемелдену әрекеті бар. Адамды болмысы бөлек, ортағы жоқ Алламен байланыстыратын да – оның осы рухани жетілу, кемелдену әрекеті. Адам баласы дәл осы әрекеті арқылы өзінің төл болмысына жетеді және оны өмірінше сақтай алады. Әйтпесе адамның айуаннан айырмасы болмас та еді:

Жүреkte қайрат болмаса,  
Ұйықтаған ойды кім түртпек?  
Ақылға сәуле қонбаса,  
Хайуанша жүріп күнелтпек.

...Малда да бар жан мен тән,  
Ақыл, сезім болмаса.  
Тіршіліктің несі сән,  
Тереңге бет қоймаса [8, 227-б.].

Ақынның бұл өлеңін жаратылыс пен шындыққа тікелей еліктеуден туатын ғылым туындысы емес, «еліктеуге еліктеу» арқылы пайда болатын өнер туындысы деп қана қабылдау жеткіліксіз, тіпті обал. Себебі хакім Абайдың бұл екі шумағында дәлдік пен ақиқатқа негізделген ғаламат ғылыми таным бар. Әдетте өнер туындысы мұндай ғылыми таным жасауды мақсат етпейді. Ал Абай болса – аса ойшыл ақын, ол – түпкі, іргелі ақиқаттарды өлеңмен жеткізуші хакім ақын. Ақын жазғандай, адам – ақыл-ой, санасы мен ойлай алатын жаны арқылы танып

біле алатын қабілетімен ғана биік әрі асыл жаратылыс. Төнге қатысы шамалы ғана, жанама түрде ғана көрінетін жан құмары тек адамда ғана бар. Адамнан өзге жаны бар тіршілік иелерінде «ішсем, жесем, ұйықтасам» деген қоректену мен тынығуды ғана тілейтін бір ғана тән құмары бар. Тек адам ғана тән құмарының үстіне жан құмарының да иесі, яғни қоспа жаратылыс. Абай мұны былайша танытқан: «Жас бала анадан туғанда екі түрлі мінезбен туады. Біреуі – ішсем, жесем, ұйықтасам деп тұрады. Бұлар – тәннің құмары, бұлар болмаса, тән жанға қонақ үй бола алмайды, һәм өзі өспейді, қуат таппайды. Біреуі – білсем екен демеклік... Мұның бәрі – жан құмары, білсем екен, көрсем екен, үйренсем екен деген» [4, 103-б.]. Осы соңғы жан құмарымен ғана адам айуаннан ажырап, алыстап, олардан биік, жоғары тұрады. Бұлай болмағанда адам баласы «ақылына сәуле қонбай, хайуанша жүріп күнелткен» күй кешеді. Ақын жазғандай, адамда бар жан мен тән малда да бар, тіпті өсімдікте де бар. Адамды айуаннан бөлектеп биік ететін – «жүректегі қайраты», яғни ынта, ықыласымен білмекке құмар болған жан қуаттары арқылы танып білу, ойлау мен ар, ұят, әділет, рақым, сүю сезімдері. Абайдың «ақыл, сезім болмаса» дегені осындай адамшылық, адамгершілік қасиеттерді танытады. Жан-жануар атаулының жаратылысына сырттан енетін нәрселер тек тән құмарымен ғана келсе, адамның асыл болмысы тәнінің тілегімен қоса Абай айтатын білім, ғылым, өнер секілді «жан тамағын» да қажет етіп тұрады. Адамды осы жан құмары мен қажеттілігі ғана болмысы мен мәніне, қасиетіне жақындата береді.

Сөйтіп Абай адам жаратылысының екі жақты қоспа болмысын білген әрі өз туындылары арқылы бұл танымды бекіте түскен және ойшыл хакімдерше өмірінше адам жайын жан-жақты терең танытумен өткен. Жан-жануар тек тәнінің ғана қамымен тіршілік етсе, адам айуанда да бар тәнін, денесін көмекші, қызметші етіп жанының да жетілуін ойлап, сол жолда кемелдене береді, яғни жан құмарымен «көріп, біліп, үйреніп» білім-ғылым табады, ақылын арттырады, қайырымдылық қасиеттерін көбейтеді. Адам баласы – Ай астындағы жанды материя, тән иелері жануарлар мен биік те кемел Алла арасындағы артықша, айрықша болмыс. Адамның өзіне ғана тән төл болмысы – материя, зат, дене мен ойлаушы жан, ақылдан тұратын екі жақты

қоспа жаратылысы. Жаратылыс пен Барлықта адамнан өзге мұндай қоспа болмыс жоқ. Ай астындағы әлемде жанмен бірге ақыл-ой, санасы да бар екі жақты қоспа жаратылыс – адамнан өзге жансыз материя, заттар, денелер мен жанды тән иелері де бар, бірақ бұларда төркіні Жаратушымен байланыстыратын рух, яғни ақыл-ой мен ойлаушы жан жоқ. Олар тек материя ғана, әрі кеткенде қоректенетін, қорғанатын, қозғалатын тән мен дененің иелері. Өсімдіктер мен жануарлардағы жан тек материя мен тәннің ғана тіршілігіне жәрдем жасауымен ерекшеленеді. Бұлардағы басты мақсат, негізгі нәрсе – тек қана тән қамымен тіршілік ету. Адамның да айуан секілді ет пен сүйектен жаралған тәни жаратылыс екені талас тудырмайды. Және бұл биік жаратылыс тек тәнімен ғана адам болмайды. Ол – төркіні Жаратушы Алладан бастау алатын ақыл-ойы, санасы мен тегі, төркіні топырақ саналатын тәні екеуі біріккенде ғана өзіндік адам атты болмысқа айналады. Байқасақ, адам – материалдық, заттық, тәни дүние мен рухи болмыс Алла арасындағы өзгеше жаратылыс екен. Яғни адам – екі жақты қоспа болмыс. Әл-Фарабидің «Қайырымды қала тұрғындарының көзқарастары туралы» трактатында «...әлгі басқа болмыс екі нәрседен құралмақ» [3, 223-б.] дегені адамның осы қоспа жаратылысын мегзеп тұрғандай. Алладан өзге барша жаратылыстарды «Одан (Бірінші Тұлғадан, Алладан) өзгеше ететін нәрсе оның (өзге жаратылыстардың) өз болмысы болар еді» [3, 223-б.]. Демек жаны жоқ материалдық денелер мен жаны бар тән иелерінің (өсімдіктер мен жануарлар) «өз болмыстары» – материядан тұратындығы және бұлардың бар болмысы – осы материясы мен тәні ғана, яғни бұлар – бір жақты материалдық жаратылыстар. Ал адамның болмысы бөлектеу әрі биіктеу, себебі адамда төркін-тегі Алладан бастау алатын рухани болмыс бар. Міне осы рухани болмысымыз біздерді Алламен байланыстыратын көпір іспетті. Осы орайда әл-Фараби былай деп жазады: «Сонда әлгі басқа болмыс екі нәрседен құралмақ: бұлардың бірі – оның өзіне ғана тән, ал екіншісі – Бірінші Тұлға екеуінің ортақ нәрсесі» [3, 223-б.]. Ғұлама ойшыл жасаған бұл тұжырым мен түйіннің мән, маңызы айрықша зор. Бұдан шығатын ақиқат – Алла мен адам болмысында олардың екеуіне де ортақ болатын нәрсе бар, ол – рух пен ақыл. Бұрынғы-соңғы ойшыл даналардың адамдағы асыл

болмысты рух, ақыл-ой, қайырымдылықпен байланыстыруы тегін емес. Ал рух, ақыл-ой, қайырымдылықтың бастауы мен төркіні – Жаратушы Алла. Қарапайым халық ұғымындағы Алла, Құдайдың – Жаратушы, Жарылқаушы атануында терең мән, ғажап сыр бар. Алла – ғалам мен адамнан тұратын барша Барлықтың Иесі, Барлықтағы бар нәрсенің бәрін де жаратушы – бір Алла. Ал жарату – игілікті де ізгілікті іс, жақсылық пен қайырымдылық. Керісінше бұзу мен бүлдіру, қирату – қиянат пен жамандық. Ал Аллаға қатысты айтылатын жарылқаушылық – Оның жоқтан бар етіп жаратқандарының қамын тағы да жасай түсіп несібелі еткен қайырымдылығы мен ізгілігі. Адам да өз кезегінде Аллада бар осындай игілікті де ізгілікті істерді хал-қадерінше жасай алуымен қадірлі де қасиетті, абыройлы да адамгершілікті болмақ. Адамды өзге жаратылыстардан да, өз қауымында да артық, асыл, биік ететін нәрсе – адамгершіліктің Алладан бастау алатын осындай терең төркін-тегі бар.

Абай да әл-Фараби негіздеп түйіндеген іргелі де абсолютті ақиқатты өзінің отыз сегізінші қарасөзіне басты өзек етіп алған. Яғни бұл қарасөзінде Абай Алладан бастау алатын адамгершілік пен жәуанмәртлікті ақиқат төркінінен тарта отырып танытқан: «Енді біздің бастағы тағриф (тану) бойынша құдай тағала ғылымды, рақымды, ғадаләтті құдіретті еді. Сен де бұл ғылым, рақым, ғадаләт үш сипатбірлән сипаттанбақ: ижтиһадің (талап) шарт еттің, мұсылман болдың һәм толық инсаниятың (адамгершілік) бар болады. Белгілі жәуанмәртлік үш хаслат (сипат) бірлән болар деген сиддық (шындық), кәрәм (ізгілік), ғақыл (даналық) – бұл үшіндән сиддық ғадаләт болар. Кәрәм шафағат болар, ғақыл мағлұм дүр, ғылымның бір аты екендігі, бұлар әр адамның бойында алла табарақа уатағала тәхмин (шамамен) бар қылып жаратқан» [4, 145-б.]. Абайдың «...бар қылып жаратқан» дегенінен әл-Фараби жазған «Бірінші Тұлға екеуінің ортақ нәрсесі» деген өзекті ойды ұғамыз. Алла мен адам болмыстарындағы ортақ нәрсенің барын Абай отыз сегізінші қарасөзінің әр-әр тұсында бекітіп айта түседі: «Алла тағалаға ұқсай алам ба деп, надандықбірлән ол сөзден жиіренбе, ұқсамақ – дәл бірдейлік дағуасыбірлән емес, соның соңында болмақ. Аның үшін алла тағаланың сипаттары: Хаят (тіршілік, тірі болу), Ғылым, Құдірет (күш), Басар (көру, көруші), Сәміг (есту, естуші),

Ирада (тілеу, қалау), Кәлам (сөздер), Тәкин (болдыру). Бұл сегізінен алла тағаладағыдай кәмәлатғазамат (жетілу, толысу) бірлән болмаса да, пендесінде де әр бірінен өз халінше бар қылып жаратыпты» [4, 138-б.]. Мұнда да әл-Фараби түйіндеген «ортақ нәрсенің» Абай тарапынан адамгершілікті мегзеген мазмұнымен айтылатынын байқаймыз. Абай – өте сұңғыла ойшыл, хакім ақын. Ол асыл ақиқаттың көпшілік байқай бермейтін нәзік қырларын соншалық дәлдікпен жеткізеді. Мысалы, Алладағы сипаттардың ұлық, кемел, зор, ал адамдағы сол аттас сипаттардың титтей, зәрредей (кішкентай) екенін тәптіштеп танытуы осыны байқатады. Және Алла мен адамдағы ортақ сипаттардың өзіндік ерекшелігі мен Алланың айрықша, бірегей болмыс, ал адамның екі бастаудан тұратынын танытуы тіпті тамаша. Ақын жазған мына ойды мұқият оқып көрейік: «...бір ғана құдірет пендеде болған қуат: құдірет – ғылым, ақылдан басқа болатұғын еді, алла тағалада болған құдірет – ғылым һәм рақымет» [4, 141-б.]. Әл-Фараби жан-жақты танытуға тырысқан Бірінші Тұлға, Алла мен басқа болмысқа (адамға) ортақ нәрсенің парқы қарапайым және бөлінбейтін нәрсе. Ал басқа болмысқа (адамға) ғана тән нәрсенің парқы бөлінгіш болады және күрделі де қайшылықты келеді. Алла бір ғана рухи болмыстан тұрар болса, басқа болмыс саналатындардың бірегейі адам рухани болмысымен бірге тән, дене, материяның да иесі. Яғни адам – Алладан бастау алатын рух, ақыл-ой, адамгершілік пен тән, дене, материяның да қоспасы. Абай жазғандай, Алладағы құдірет – «пендеде болған қуат» – тек күш-қайрат қана және бұлар адам болмысында «ғылым, ақылдан басқа болады». Ал «алла тағалада болған құдірет – ғылым һәм рақымет» [4, 141-б.]. Бұлай болатын себебі – Бірінші Тұлға, Алла – тегі жағынан жалғыз, бір ғана рухи болмыс. Ал басқа болмыс саналатын адам – Алладан бастау алатын рухани болмыс пен материяның қоспасы. Соған сәйкес адамдағы күш-қуат, қайрат – тән мен ондағы бұлшық еттерден бастау алып туындаса, ғылым, ақылы – Алла берген рухани болмысынан пайда болып туады. Ал Алладағы ғылым, құдірет сипаттары Оның бір ғана рухи болмысынан шығады. Абайдың Алладағы ғылым, құдірет сипаттарын біріктіріп жіберіп, оларды бір ғана ақыл деп танып және Түп Иедегі бір ғана құдіретті – ғылым һәм рақымет деуінің осындай сыры бар. Және нағыз, анық

адамгершілік ілімі саналатын жәуанмәрттікті Абай тән, дене мен одан шығатын күш-қуат, қайратқа қатыссыз тек ақыл мен жүректен бастау алатын ақыл, рақым, әділет үш қасиетімен қалыптастырған. Осыған сәйкес Абай адамгершілік қалып пен қасиетті — Құдай жолы деп танытады: «Енді біліңіздер, перзенттер! Құдай тағаланың жолы деген жол ниһаятсыз (өлшеусіз) болады. Оның ниһаятына ешкім жетпейді. Бірақ сол жолға жүруді өзіне шарт қылып кім қадам басты, ол таза мұсылман, толық адам делінеді. Дүниеде түпкі мақсатың өз пайдаңа болса, өзің ниһаятлысың, ол жол құдайдың жолы емес. Ғаламнан жиылсын, маған құйылсын, отырған орныма ағып келе берсін деген ол не деген ынсап? Не түрлі болса да, я дүниенен, я ақылыңнан, я малыңнан ғадаләт, шапағат секілді біреулерге жақсылық тигізбек мақсатың болса, ол жол — құданың жолы» [2, 151-б.].

Сөйтіп адамгершілік — Алла жаратылысын адамшылық, адамдық болмысқа жеткізетін форма мен қасиет. Ал тәні мен денесі — форма, адамшылық қасиеті арқылы болмысқа айналатын адамның алғашқы, бастапқы материясы ғана, әрі кеткенде «ішсем, жесем, ұйықтасам» дейтін жануарлық жаратылысы ғана. Адамзат өз абыройын арттыратын кемелділікке Аллада бар «ортақ нәрсесі» — ақылы, білім-ғылымы, ізгілігін жетілдіріп жүріп жетеді. Ал ақыл мен ізгілікті бұрынғы-соңғы даналар адамгершілік деп білген. Абайдағы ақыл мен жүректен бастау алатын адамгершілік қасиеттер Аристотель, әл-Фарабилердің танымында осы қалпымен интеллектуалдық, ойшылдық және этикалық, адамгершілік қайырымдылықтар түрінде танытылған [16, 13-14-б., 129-б; 10, 195-196-б.]. Абай жырлап жүйелеген, жаңадан жасап қалыптастырған адамгершілік ілімнің осындай мән-мазмұны мен төркін-тегі бар.

#### **Пайдаланылған әдебиеттер тізімі**

1. Мырзахметов М. Мұхтар Әуезов және абайтану проблемалары. — Алматы: Ғылым, 1982. — 296 б.
2. Әуезов М. Жиырма томдық шығармалар жинағы. XX том. Монография, мақалалар. — Алматы: Жазушы, 1985. — 496 б.
3. Әл-Фараби. Философиялық трактаттар. Алматы: Ғылым, 1973. — 448 б.
4. Абай (Ибраһим Құнанбаев). Екі томдық шығармалар жинағы. II том. — Алматы: Жазушы, 1986. — 200 б.

5. Әлемдік философиялық мұра. Жиырма томдық. 5-том. Ортағасырлық діни философия. – Алматы: Жазушы, 2005. – 560 б.
6. Толстой Л. Исповедь. 39-97-с. – Толстой Л. Не могу молчать. Москва: Советская Россия, 1985. – 528 стр.
7. Құдайбердиев Ш. Шығармалары. – Алматы: Жазушы, 1988. – 560-б.
8. Абай (Ибраһим Құнанбаев). Екі томдық шығармалар жинағы. I том. – Алматы: Жазушы, 1986. – 304 б.
9. Лосев А.Ф. История античной эстетики. Софисты. Сократ. Платон. Т. 2. – Москва: Искусство, 1969. – 715 с.
10. Әл-Фараби. Әлеуметтік-этикалық трактаттар. – Алматы: Ғылым, 1975. – 455 б.
11. Аристотель. Үлкен этика. 249-312-б. – Әлемдік философиялық мұра. Жиырма томдық. 3-том. Аристотель философиясы. Алматы: Жазушы. 2005. – 568 б.
12. Қаратаев М. Тарихи шындық пен аңыз («Қорқыт ата» кітабы бойынша). 10-28-б. – Қазақ даласының ойшылдары IX-XII ғғ. Алматы: Ғылым, 1995. – 160 б.
13. Әшімбаев С. Шындыққа сүйіспеншілік. – Алматы: Жазушы. 1993. – 624 б.
14. Орынбеков М. Жүсіп Баласағұнның «Құтты білік» дастанындағы философиялық ойлар. 58-94-б. – Қазақ даласының ойшылдары IX-XII ғғ. Алматы: Ғылым, 1995. – 160 б.
15. Құдайбердіұлы Ш. Үш анық. – Алматы. «Жазушы» және «Ғақлия» ғылыми-әдеби орталығы. 1991.
16. Аристотель. Никомахова этика. Перевод: (С) Нина Брагинская (satis@qlasnet.ru) Философы Греции ЗАО «Издательство «ЭКСМО-Пресс», Москва, 1997. – 191 с.
17. Әуезов М. Поэтическое окружение Абая. 57-71-б. – Әуезов М. Абайтанудан жарияланбаған материалдар. Неопубликованные материалы по абаеведению. Алматы: Ғылым, 1988. – 368 б.
18. Мырзахметов М. Абайдың адамгершілік мұраттары. – Алматы: Рауан. 1993. 279 б.
19. Мырзахметұлы М. Абай және Шығыс. – Алматы: Қазақстан. 1994. – 208 б.
20. Мырзахметұлы М. Абайдың «Толық адам» ілімі. – Алматы: Қазығұрт. 2020. – 240 б.

### III тарау. АБАЙДЫҢ АДАМШЫЛЫҚ, АДАМГЕРШІЛІК ТУРАЛЫ ТАНЫМЫ

#### Адамзат – қоспа болмыс

Абайды ерте жастан, ерте бастан тануға талпынып, Абайтану ғылымының негізін қалаған әрі ақын өмірі мен шығармашылығын тиянақты да терең танытқан ғалым – Мұхтар Әуезов. Ал ақын жайлы алғаш рет дерек беріп, оның өмірбаянын жазған – ақынның немере інісі Кәкітай Ысқақұлы. Екеуі де адамгершілік жайының Абай өмірі мен шығармашылығынан алар орны айрықша болғанын жазған. Жарияланған уақыты (1905) жағынан Әлихан Бөкейхановтың ақын жайлы мақаласы бұрынырақ жарық көрсе де, оның Абайды баласындай болып кеткен немере інісі Кәкітайдан артық білуі көңілге қона қоймайды. Және Абай жайлы деректерді Ә.Бөкейхановтың К.Ысқақұлынан алуы да әбден қисынды. Біздің айтпағымыз, Абайдың өзі мен сөзін, өмірі мен шығармашылығын шынайы да терең білуші – ең әуелі К.Ысқақұлы мен М.Әуезов. Екеуі де адамгершілік жайы – Абай өмірі мен шығармашылығының өзегі мен мәні деп біледі. Осы орайда Абайды көріп жанында жүрген, тәлім-тәрбиесін алған Кәкітай Ысқақұлы былай деп жазады: «Абай жазған өлендерінен басқа әншейін отырғанда, көбінесе, өзінің қызықты көріп, көңілі рахат тұтатұғын сөзін ұғар деген бала-шағасы уа ғайри жаңа талап байыпты жас жеткіншектер ортасында өзге ел сөзі, шаруа сөзі сөйленбей, өзінің білгенін, сезгенін айтып, адамның адамшылығы қандай мінезбенен түзеледі, қандай қылықпен бұзылады, ғылымды қайдан іздеу керек, өмірді қалай кешірсе жөн болады, бұрын қандай ғалымдар өткен, олардың артықша айтқан сөздері қандай, әйтеуір не түрлі насихатпен болсын жастарға ғибрат болып, адамшылығы түзелер



деген сөзді айтып отырудан қанша уақыт болса да еш жалықпай, ынталы көңілмен бек рахаттанып айтып, ұқтырып отырушы еді» [1, 48-б]. Ғылым іздеу мен өмірді қалай кешіру жайы да – адамшылықпен астасып жатқан қасиетті ұғым, әрекеттер. Мұхтар Әуезов те Абай өмірінің мәні мен оның шығармаларындағы өзекті ойды адамгершілікпен байланыстырады: «Ол адамгершілікті, моральдық философияны барлық жайдан жоғары қояды» [2, 179-б]. Абайдағы адамгершілік жайының өзектілігін тұжырымдаған ойлар баршылық, жетерлік, біз тек осы екі тұлғаның ғана пікірімен шектелеміз. Абайдың өмірі де, өлеңмен өрілген өнері де, қарасөзбен толғаған терең ойлары да – бәрі-бәрі адамгершілік ілімімен тығыз байланысқан. Біз енді Абайдағы сол адамгершілік ұғым, мен танымды тәптіштеп тануға тырысамыз.

Адам жаратылысының екі жақты сипаты жайлы біз әркез айрықша мән беріп айтамыз. Адам болу мен адамшылық қасиетінің өзектілігі де осы адам болмысының бір жақты емес, екі жақты жаратылыс болған ерекшелігінен туады. Алладан өзге періште мен шайтан, жан-жануарлар мен өсімдіктерде бір-біріне қарсы келетін болмыс болмайды. Себебі оларда бір ғана бағыттағы болмыс бар: періште – нұрдан ғана жаралған әрі тек жақсылық пен құлшылық жолындағы болмыс, шайтан керісінше, оттан жаралып, өзінің шын төркін-тегіне ұмтылып әрекеттенген адамзат баласын азғырушы әзәзіл. Жақсылық пен жамандық жолын екеуі жеке-жеке бөліп алғандай болмыстарында бар жалғыз ғана нәрсе, бағыт, әрекетімен танылады. Шайтан өз жаратылысына қарай жаман, жексұрын көрінсе де, ол өзіне тиесілі азғырушылық міндетін мүлтіксіз бірыңғай атқарушы. Яғни бұл екеуінде адамдағыдай екі түрлі болмысымен танылу сипаты жоқ. Адамда Алладан келген, Алладан жеткен рухани болмыс пен топырақтан жаралған тәни жаратылыс бірігіп кеткен, содан да адам баласы өз өмірінде періштелік пен шайтандық болмысын қатар танытып жүреді. Бірыңғай Алла жолын ұстанған періштелік болмыс адамзатта әркез сақтала бермейді. Өйткені адамда еріксіз етекпен тартатын тәни, шайтани, нәпсілік төмен болмыс бар. Осындай болмысының ырқымен жүріп адамзаттың тек тәнімен ғана қоректеніп, қорғанып күнелтетін жануар, айуан деңгейіне түсіп кететіні болады. Абай «Өлсе өлер табиғат, адам

өлмес» деген өлеңінде адам жаратылысына қатысты осы бір екіұдай болмысты былайша танытады:

Дүниеге дос ақиретке бірдей болмас,  
Екеуі тап бірдей боп орныға алмас.  
Дүниеге ынтық, махшарға амалсыздың  
Иманын түгел деуге аузым бармас [3, 178-б].

«Дүниеге дос» – аты айтып тұрғандай, тән мен тұрмыстың қамын жеумен жүретін затшыл, дүниешіл адамды танытады, мұндай адам ертеңгі ақиретін алаңсыз, жайлы ететін бүгінгі абыройы мен адамшылығын ойлап қам жемейді. Осы тұста тағы бір мәнді мәселе бар, ол – «дүниенің де, ақиреттің де ұпайын түгелдеп жүрмін» деп өз-өзін алдап жұбатушылықты Абай жансақтық, адасушылық деп біледі. Адамның екі көзі бір мезетте екі жаққа бірдей қарай алмайды, екеуі бірігіп я оң жаққа, я сол жаққа қарайды. Екі көздің біреуі бір мезетте оңға, екіншісі дәл сол сәтте сол жаққа қарай алмайды. Адам баласының жаратылысындағы адамшылық пен нәпсілік, дүниешілдік жолдарын ұстануы да осыған ұқсайды. Оң көздің оңға қарағанында сол көздің оған қосыла кетіп оңға, ал сол көздің солға қарағанында оң көздің оған қосыла кетіп солға қарайтыны секілді адам болмысында бар екі жол Абай жазғандай, «екеуі тап бірдей боп орныға алмайды», тек біреуі басым болып, екіншісі соған көмекші, қызметшілік ете алады. Абай жазғандай, аңсары ақша, мал, дүниеге ауып кеткен адамзаттың адамшылығы мен иманы түгел, толық болмайды:

Дүниеге ынтық, махшарға амалсыздың  
Иманын түгел деуге аузым бармас.

Ақирет пен ондағы махшардың жайын ойлай жүрген адам бұ дүниедегі өмірінде адамшылық жолына басымдық береді, «малым жанымның, жаным арымның садағасы» дегендей, дүниебайлық, барша игілігін өзінің адам болуы мен иманын арттыруға жұмсайды. Ал тән мен тұрмыс, дүние рахатымен жүрген жанның анда-санда ғана амалсыз жасап қоятын жақсы істерімен өз-өзін жұбатып қоятын ой-әрекетін Абай отыз төртінші қарасөзінде де жетуі жеңіл болатындай етіп ұқтырады, осы сөзден ұзақтау болса

да үзінді бергенді жөн көреміз: «Жұрттың бәрі біледі өлетұғынын және өлім үнемі қартайтып келмейтұғынын, бір алғанды қайта жібермейтұғынын. Қазақ осыған да, амал жоқ, нанады, анық өз ойына, ақылына тексертіп нанбайды. Және һәмманы жаратқан құдай бар, ахиретте сұрау алады, жамандыққа жазғырады, жақсылыққа жарылғайды, жазғыруы да, жарылғауы да пенде ісіне ұқсамайды, бегірек есепсіз қинауы да бар, бегірек есепсіз жетістіруі де бар деп, бәріне – сендік дейді. Жоқ, онысына мен сенбеймін... Кімде кім ахиретте де, дүниеден де қор болмаймын десе, білмек керек: еш адамның көңілінде екі қуаныш бірдей болмайды, екі ынтық құмарлық бірдей болмайды, екі қорқыныш, екі қайғы – оларда бірдей болмайды. Мұндай екі нәрсені бірдей болады деп айтуға мүмкін емес. Олай болғанда қай адамның көңілінде дүние қайғысы, дүние қуанышы ахирет қуанышынан артық болса – мұсылман емес» [4, 131-б.]. Яғни жақсылық жасау, адамгершілік, ахирет қамы дүние қуанышынан артық, басым болғанда ғана ондай жол мұсылмандыққа жеткізеді. Ал мұсылмандық Абай ұғымында адамшылық, адамгершілікпен бірдей мазмұнда қолданылады: «құдай тағала ғылымды, рақымды, ғадаләтті құдіретті еді. Сен де бұл ғылым, рақым, ғадаләт үш сипатбірлән сипаттанбак: ижтиһадің шарт еттің, мұсылман болдың һәм толық инсаниятың (адамгершілік) бар болады» [4, 145-б.]. Жақсы, ізгі қасиеттерді иелену мен толық инсаният (адамгершілік) ақын қолданысында мұсылмандықпен мағыналас мазмұнда келіп тұр. Сондай-ақ адамшылық – «ұят», «ақыл», «шариғат», «абиұрлы бой» ұғымдарымен баламалас келеді. Осылардың бәрі де адамдық қалыпты, адамшылықты жасап, адамға ғана тән жақсы, бекзат болмыстың шайтандық, нәпсілік, жануарлық болмысқа ауып кетуінен сақтайды: «Ұят деген адамның өз бойындағы адамшылығы иттігінді ішіңнен өз мойнына салып, сөгіп қылған қысымның аты» [4, 134-б.]. Сөйтіп адам баласының артықшылығы мен абыройы – өз жаратылысындағы шайтандығы мен «иттігін» шектеп, тыйып, жойып, адамшылық болмысына басымдық беріп өмір сүруінде болады.

**«Адамшылықтың алды – махаббат, ғаделет сезім»**

Енді осы адамшылықтың өзі не нәрсе, соны Абай ойларының ізімен танып көрейік. Отыз сегізінші қарасөздің мазмұны – ақынның өз түйіндеуі бойынша, «адам ұғылының мінездері туғралы». Егер осы сөзін «ықылас бірлән оқып, ұғып алсаңыз, махаббатыңыз толатынын» жазады. Ақын осында адам мінезі, адамшылық, адамгершілік жайлы сөзінің мазмұны мен мақсатын махаббат ұғымымен текке байланыстырып отырған жоқ. Ғұлама данышпан Сократ өмірінше ақыл мен білімді адам қасиетінің шыңы деп санап келеді де, өлерінің алдында ғана адам қасиетінің абзалы – сүю деп түйеді. Әл-Фараби де адам Бақытын – даналық пен әділетті сүю деп білген [5, 241-б.; 288-б.; 6, 260-б.]. Абайдың өзі де адамгершілік ілімінің шыңы ретінде иманигүл танымын тұжырымдаған [7, 236-246-б.; 8, 121-124-б.]. Егер Абайдағы адамгершілік ілімін айқын көрінетін құбылысынан ішкі мәніне қарай ізерлеп таныр болсақ, ол мынадай жүйе, ретпен танылады. Толық адам – Абайдағы өзіндік адамгершілік танымның жалпы атауы. Және бұл танымды құрайтын қайрат, ақыл, жүрек қасиеттері адамгершіліктің толықтығымен бірге адам жаратылысының жарым-жарты емес, толық, түгел тұлғасын танытады. Шынында да адам жаратылысы қайраты (тәні), жүрегі (жаны) және ақылы түгел, толық болғанда ғана өз аты мен затына сай толық болады. Жаратылысымыз ақыл-ойсыз адами емес, хайуани, жануар тектес болар еді, себебі ақыл тек адамда ғана бар. Тәнсіз, денесіз (қайрат) болар болсақ, періштеге ұқсап кетер едік. Ал жансыз (жүрексіз) ақылды болмақ түгілі, қозғалып, қимылға келіп тірілікке де жете алмас едік. Сөйтіп ақыл, қайрат (тән), жүрек (жан) үшеуінің барлығы және бірлігі, толықтығымен ғана Алла жаратқан адам деген болмыс бола аламыз. Екінші жағынан адамгершілік қалып-қасиет пен болмыс та негізі осы үшеуінің қатысуымен, бірлігімен ғана барлыққа айналып, болмыс ретінде қалыптасады. Бір қарағанда рухани болмыс – адамгершілікке қатысы жоқтай көрініп, төркін-тегі тән, дене саналатын қайрат та адамшылықты жасауға өз әлінше ат салысады. Мұны Абай «Әуелде бір суық мұз ақыл зерек» өлеңіндегі мына ойымен байқатады:

Әуелде бір суық мұз – ақыл зерек,  
 Жылытқан тұла бойды ыстық жүрек.  
 Токтаулылық, талапты шыдамдылық –  
 Бұл – қайраттан шығады, білсең керек.  
 Ақыл, қайрат, жүректі бірдей ұста,  
 Сонда толық боласың елден бөлек.  
 Жеке-жеке біреуі жарытпайды,  
 Жол да жоқ жарыместі «жақсы» демек [3, 95-б].

Шындап келгенде, адам баласында тән мен денеден бастау алатын күш-қайратсыз ешнәрсе де жасалмайды. Мұны он жетінші қарасөздегі қайрат атынан айтылатын уәжді ойдан білгендей боламыз: «Ей, ғылым, өзің білесің ғой, дүниеде еш нәрсе менсіз кәмелетке жетпейтұғынын; әуел өзінді білуге, ерінбей, жалықпай үйрену керек, ол менің ісім, құдайға лайықты ғибадат қылып, ерінбей, жалықпай орнына келтірмек те – менің ісім. Дүниеге лайықты өнер, мал тауып, абұйыр, мансапты еңбексіз табуға болмайды...» [4, 112-б.]. Тәнді, затты жаратылыс – адамзаттың дүнияуи тірлігімен қатар танып білу, адам болу сияқты рухани жетілу, кемелденуі де күш-қайратсыз жүзеге аспайды. Мысалы, адамшылықпен төркіндес, мазмұндас мұсылмандық парыздарын ойға алсақ, олар да «дененің барша қуаты өнерге салар бар күшін» дегендей, дене, тән қуатының қатысуынсыз атқарылмайды. Намаз, ораза, хаж парыздары ықылас, ниеттен бөлек тән мен дене мүшелерінің күш-қуаты, шыдам-төзімі, өзіндік қалауынан бас тартуы сияқты әрекеттері арқылы орындалады. Танып білу мен ғибадаттың күш-қайратсыз, яғни дене қуатынсыз жасалмайтыны ақынның он жетінші қарасөзінде айтылған. Қайрат осылайша Абайдың Толық адам танымының құрамында болып, танып білу мен ізгілік, қайырымдылықтардан тұратын адамгершілік қалыпты жасауға өз әлінше ат салысады. Ал ақыл мен жүрекке талас жоқ, бұл екеуінен шығар қасиеттер арқылы адамгершілікті құрайтын қайырымдылықтарды бұрынғы ойшылдар интеллектуалдық, ойшылдық және адамгершілік, этикалық деп екі топқа жіктеген. Абайдың толық адамнан кейінгі мәнді адамгершілік ілімі – жәуанмәртлік те ақыл мен жүректен шығар қасиеттерді қамтиды: ақыл және рақым мен әділет. Ақындағы толық адам, жәуанмәртлік танымдарынан кейінгі адамгершіліктің өзегі мен

мәні саналар имани гүл ілімі бір ғана жүректен шығар сүю мен махаббатты танытады:

Махаббатпен жаратқан адамзатты,  
Сен де сүй ол алланы жаннан тәтті.  
Адамзаттың бәрін сүй бауырым деп,  
Және хақ жолы осы деп әділетті.

Осы үш сүю болады имани гүл,  
Иманның асылы үш деп сен тахқиқ біл.  
Ойлан дағы, үшеуін таратып бақ,  
Басты байла жолына, малың түгіл [3, 134-б.].

Толық адам – Абайдағы адамгершілік ілімінің сыртқы сарайы, қаңқасы, көрінер құбылысы болса, имани гүл – оның ішкі сарайы, өзегі мен мәні саналады. Адамның басты қасиеті саналатын танып білу де «жүректе қайрат болмаса, ұйықтаған ойды кім түртпек» дегендей, сүюден басталады. Адам болудың өзі осындай танып білуді ықыласпен сүю арқылы қалыптасады: «Қашан бір бала ғылым, білімді махаббатпенен көксерлік болса, сонда ғана оның аты адам болады» [4, 136-б.]. Сөйтіп адам болудың басы да, жетіліп жетер биігі де – махаббат пен сүю екен. Басы екені ақынның әсіресе «талап, ұғым махаббаттан шығады» деп жазуынан байқалса, жетіліп жетер биігі екені жоғарыда келтіргеніміздей, адамшылық жайлы сөзін «ықылас бірлән оқып, ұғып алыңыздар, аның үшін махаббатың толады» деген ойынан білінеді. Әрі Абай мұны адамгершілік ілімінің шыңы – имани гүл танымы арқылы да түйіндеп танытады. Адам өмірінің өзі оның игілік деп таныған нәрсесіне талпынып ұмтылуымен басталып, түрлі игіліктерді тұтынумен жүріп жалғасады. Дүние-тіршілікте адам сүйіп ұмтылар тәни, рухани нәрселер мен құбылыстар өте көп. Алайда Абайдың ойынша, сол көп игіліктердің тек үшеуі ғана адам баласының абыройы мен қасиеті болуға жарайды. Ол – жоғарыда келтірілген өлең шумақтарында айтылғандай, Алланы, адамзатты және әділетті сүю. Сөйтіп адамгершіліктің өзі де, жетіліп барып шығар шыңы да – осы үшеуін сүйіп өмір сүру екен. Абайдың «махаббатың толады» дегені осы имани гүл болса керек. Махаббат – адамдық: «махаббат – әуел адамның адамдығы, ғақыл, ғылым деген нәрселербірлән» [4, 136-б.]. Ақыл,

ғылымның өзі жүректен шығар ынта, ықылас, сүюден бастау алып толысады. Ақынның «адамшылықтың алды – махаббат, гаделет сезім» деген түйіні көп жайды аңғартады. Бұрынғы-соңғы данышпандардың бәрі де адамшылықты Абай секілді махаббат, әділет сезім, қасиеттерімен байланыстырған. Махаббатпен бірге әділет те адамшылықтың көзіндей, өзіндей аса дәріптеліп айтылады. Әділет ақындағы толық адам, жәуанмәртлік, имани гүл атты ілімдерінің үшеуінен де орын алған: толық адам – ақыл, қайрат, жүрек (бұдан шығар ізгі қасиеттің бірегейі әділет); жәуанмәртлік – ақыл, рақым, әділет; имани гүл – Алланы, адамзатты, әділетті сүю. Байқағанымыздай, адамшылық қасиет махаббат, сүю мен әділет сезімдері арқылы айқындалады. Сол себепті осы екі қасиеттің адамшылыққа қатысын ақын шығармалары негізінде тануға тырысамыз. Абай ақындығының бастауындағы «Ғылым таппай мақтанба» атты мәнді өлеңде [3, 41-б.] негізі адам болу мен адамшылық жайы тиянақты жырланады. Ақын «адам болам деген» жасқа ең әуелі «бес нәрседен қашық болып, бес нәрсеге асық болуды» басты міндет етіп қояды. Бес дұшпан саналатын кеселді қасиеттерден жиреніп қашық болу да кісінің бес асыл іске аңсары ауып асық болуынан (сүю) бастау алады. Талап, еңбек, терең ой, қанағат, рахым секілді асыл қасиеттерді пір тұтқан адам ғана өсек, өтірік, мақтаншақ, еріншек, бекер мал шашпақ сияқты кеселді қасиеттерден тезірек құтылуға тырысады. Сонда адам болуға бастау болатын – асыл қасиеттерге асық болып (сүю) ұмтылу екен. Әрі ақын атаған бес асыл іс, ізгі қасиет толық адам танымындағы үш сипатты ойға оралтады: талап пен еңбек көбіне дененің күш-қуатынан туып, қайраттың жемісі мен өзі ретінде танылады, терең ойынан – ақылды ұғамыз, ал қанағат, рақым – жүректен шығатын ізгі қасиеттер. Ақын өлеңінің тақырыбы «Ғылым таппай мақтанба» деп аталса да, негізгі мазмұн «адам болам десеңіз» деген арнамен өрістейді. Ал ғылым, білімнің көп сөз болуы да қисынды, себебі адам болу ең әуелі адамға ғана тән жан құмары мен ақыл арқылы танып білумен басталып қалыптасады. «Білгендердің сөзіне махаббатпен еріп» білім-ғылымды меңгеру адамдық пен адамшылыққа бастайды: «Алла тағала өзі – хақиқат жолы... Адамның ғылымы, білімі хақиқатқа, растыққа құмар болып, әр нәрсенің түбін, хикметін білмекке

ынтықбэрлэн (сүюмен) табылады... Ғылым – алланың бір сипаты, ол хақиқат, оған ғашықтық өзі де хақлық һәм адамдық дүр» [4, 137-б.]. Танып білу, білім-ғылым, хақиқат – адамшылықпен еншісі бөлінбеген баламалас егіз ұғымдар, бұлардың адамшылыққа қатысы бөлек әңгіме. Өзірге біз махаббат, сүюдің адамшылықпен байланысын сөз етудеміз. Махаббат пен сүю ақын танымында құмарлықтан бөлек жол ретінде танылып, адамшылық болмысты білдіреді:

Ғашықтық, құмарлықпен – ол екі жол,  
Құмарлық бір нәпсі үшін болады сол.  
Сенен артық жан жоқ деп ғашық болдым,  
Мен не болсам болайын, сен аман бол [3, 96-б.].

Абай қолданысындағы құмарлық тәнге қатысты тілекті танытады, егер адам баласы осы деңгейде ғана қалса, онда оның хайуаннан айырмасы аз-ақ болмақ. Ал сүю – айуанда жоқ, адамда ғана бар жан құмарының жемісі мен көрінісі. Ақын өлеңіндегі өзінен гөрі сүйгенінің қамын жеген ғашықтық арқылы танылған адамшылық жолының мазмұны ақын қарасөзінде де айқындала түскен: «Дүниеде түпкі мақсатың өз пайдаңа болса, өзін ниһаятлысың (шектеулі), ол жол құдайдың жолы емес... Не түрлі болса да, я дүниеңнен, я ақылыңнан, я малыңнан ғадаләт, шапағат секілді біреулерге жақсылық тигізбек мақсатың болса, ол жол – құданың жолы» [4, 151-б.]. Ал құдай жолы – жарату мен жарылқау, ақыл мен әділет, рахым мен махаббат жолы, яғни адамшылық, адамгершілік қалып. «...Біреулерге жақсылық тигізбек мақсаты» сүюден туатыны анық. Демек ақынның махаббатты – адамдық деп білуі, тануы ақиқат екен. «Мен өлейін, сен сау-ақ бол» [3, 99-б.], «Айттым сәлем, қалам қас, саған құрбан мал мен бас» [3, 101-б.], «Сорлы асық сарғайса да, сағынса да, жар тайып, жақсы сөзден жаңылса да, шыдайды риза болып жар ісіне, қорлық пен мазағына таңылса да» [3, 108-б.], «Мал түгіл, басымды – жолыңа берсем де аз» [3, 136-б.], «Бұл өмірдің қызығы махаббатпен, көрге кірсең үлгілі жақсы атақпен...» [3, 221-б.] дегендей сүюмен сабақтас болған хал мен өмір адамшылыққа толы болады. Сүю сезімі иесін де қайырымды етеді әрі сүйікті болған жанға да жақсылық болып жетеді. Жалпы адамгершіліктің



өзі – өзінен асып өзгенің қамын жей алатын қайырымдылық, ізгілікпен қалыптасады. Өзінің ғана қамын жеп, өзінің ғана жағдайын жасаудан адамшылық қалып, қасиет танылмайды. Өзінен бөлек өзгенің қамын жеумен қайырымдылық жасауға ең әуелі сүю мен махаббат бастайды. Тіпті барша асыл қасиеттің алғышарты мен бастауы – осы сүю мен махаббат. Сүюдің өзі әділет, рахым, мейірім, ар-ұят сияқты қасиеттермен бірге жүректен шығады. Жүрек – Абай ұғымында жақсылық пен қайырым-ізгіліктің төркіні мен мекені: «Рақымдылық, мейірбандылық, уа әрбір түрлі адам баласын өз бауырым деп, өзіне ойлағандай ойды оларға да болса игі еді демек, бұлар – жүрек ісі, асықтық та – жүрек ісі» [4, 110-б.]. Абай қарасөздерінің орыс тіліндегі бір нұсқасында «асықтықты» – «поспешность» деп аударыпты. Бұл қате аударма. Ақынның асықтық дегені – ғашықтық, сүю мен махаббат. Ең құдіретті, ең мейірімді, рахымды, шексіз қайырым бастауы Алланың өзі адамзатты махаббатпен жаратқан. Пендесі де төркіні мен тегіне тартып Иесіндей мейірімді, рахымды, сүюші болуға тиіс: «Кім сені сүйсе, оны сүймектік қарыз емес пе» [4, 143-б.]. Болмысымызға сай адамгершілікті болуымыздың амалы мен жолы осы. Жаратушы, жарылқаушы Алла – еш нәрсеге мұқтаж емес бақи, кемел тұлға, кәмәлатғазамат. Алла – ақылы бар адамзат баласының жетілу жолында ұстанар, құлабыз етер үлгі-өнегесі. Адамзат баласының Алланы ғана үлгі-өнеге тұтып, бір ғана Оған табынып сыйынуы жарасымды әрі орынды. Себебі Алла – барша Барлықты адамзатпен қоса жаратып, жарылқаушы Ғылым мен Құдірет, Әділет пен Рахым Иесі. Абай жазғандай, Алла тағала бұл сипаттардың «әр бірінен пендесінде де өз халінше бар қылып жаратыпты» [4, 138-б.]. Тек Алла мен адамдағы бұл аттас сипаттар Иемізде зор, «ұлың», кемеліне келіп жетілген кәмәлатғазамат қалыпта болса, адамда кішкентай, «зәрра», кемеліне келмеген күйде болады. Әл-Фараби адам баласы ең биік игілік көріп ұмтылар Бақытты – даналық пен қайырымдылық жолында жетілу деп біледі [5, 3-б., 288-б.]. Ал даналық пен қайырымдылық, хикмет пен махаббат өлшеусіз, шама-шексіз қалыпта Аллада ғана бар. Адамзаттың қасиетті де мәртебелі мақсат-мұраты – Алла жолында жетіле беру. Бұл жайында Абай жиі айтады: «Өз пиғылдарыңды соған өз халіңше ұқсатуды шарт қыл. Алла

тағалаға ұқсай алам ба деп, надандықбірлән ол сөзден жиіркенбе, ұқсамақ — дәл бірдейлік дағуасыбірлән емес, соның соңында болмақ» [4, 138-б.], «құдай тағала ғылымды, рақымды, ғадаләтті құдіретті еді. Сен де бұл ғылым, рахым, ғадаләт үш сипатбірлән сипаттанбақ... бұлар әр адамның бойында алла табарақа уатағала тәхмин бар қылып жаратқан. Бірақ оған рауаж (пайдаға асыру) беріп гүлдендірмек, бәлки адам өз халінше кәмалатқа жеткізбек жәһәтінде болмақ. Бұлар – өз ижтиһадінбірлән, ниет халис бірлән ізденсең ғана берілетін нәрселер, болмаса жоқ» [4, 145-б.],

Алла мінсіз әуелден, пайғамбар хақ,  
Мүмин болсаң, үйреніп сен де ұқсап бақ.  
...Алланың, пайғамбардың жолындамыз,  
Ынтамызды бұзбастық иманымыз [3, 248-б.].

Бұрынғы-соңғы данышпандар сүю мен махаббаттың адам өмірі мен адамгершілікті қалыптастырып, сақтаудағы елеулі орнын біршама жеткізіп жүйелі айтқан. Абай да солардың ізімен сүю сырын жан-жақты жырлаған. Тіпті Алладан, адамнан, әділеттен бөлек табиғаттан, кәсіптен де ақын сүюдің көріністерін таныған:

Анамыздай жер иіп емізгенде,  
Бейне әкендей үстіне аспан төнер.  
...Қара тастан басқаның бәрі жадырап,  
Бір сараңнан басқаның бейлі енер.  
...Күн – күйеу, жер – қалыңдық сағынысты,  
Құмары екеуінің сондай күшті [3, 121-б.].

...Көкіректе жамандық еш ниет жоқ,  
Аң болады кеңесің құс салғанда [3, 19-б.].

Байқасақ, адам өмірі ғана емес, барша табиғат тіршілігі мен кәсіп, hareket те сүюге лайық, сүюге толы әрі сүюмен ғана көрікті, қызықты екен. Адамдағыдай қолданбалы, жария, танушы ақылы жоқ табиғат, кәсіптің өзі сүюмен құлпыра түскенде, өзі мен жан-жағын тани алатын қолданбалы да жария ақылы бар адамзаттың болмысы мен өмірі махаббат, сүюмен қасиеті артып, шуақтанып кетерін болжауға болады. Байқасақ, байыбына барып білер болсақ, адамдық пен адамшылық, адамгершілік бұрынғы

данышпандар көп айтып, түйіндегендей, қайырымдылықтардан тұрады, әсіресе адамшылық махаббат, сүюмен қалыптасады. Плотин деген данышпан өз дүниетанымын екі-ақ ұлы ұғыммен танытқан: Барлықтың мәні мен оны танып білуде ақылдың жетер түйіні – бәрін-бәрін Бірлік пен Көптік атты құбылыс, ұғымдармен байланыстыруда екен. Ақылды, дана, иманды адам Алла берген жан қуаты, ақылы арқылы тани жүріп, өз болмысына сай адам болуы мен танып білуінің ақиқат бағыты мен шыңы – даналық пен қайырымдылық деп табады. Ал Абай жазғандай, даналық пен қайырымдылықтың шын төркіні – ақыл, рақым, әділет, яғни хақиқат иесі Алла. Абайдың «адамды сүй, алланың хикметін сез, не қызық бар өмірде онан басқа» дегеніндей, өмір мен тіршілікте, барша Барлықта Алла берген ақылы мен иманы, ғибадаты бар адамзаттың өзара сыйласып, тату болып, Алла жаратқан өзі мен әлемді ізерлеп тани беруінен артық, асыл ешбір қызық-қуаныш, бақ-береке жоқ. Сонда Абай айтқан «адамды сүй, алланың хикметін сез» деген екі түрлі мақсат түптеп келгенде бір-ақ нәрсе болып шығады, ол – Алла. Плотиннің Бірлік дегені – осы Алла, жаратушы Ие. Абай айтатын (ақымақ көп, ақылды аз) аз ғана ақылды топ осы шындық, растық, ақиқат, хақиқат, хақ – Аллаға ұмтылумен жүріп адамшылық жолында болады. Ал көп ақымақ, пенделер «көрмегенге көсеу таң» болып, әр нәрсенің де өзегі мен мәнін тани алмай, көптіктің ішінде адасып жүреді. Дүние-тіршілікте, өмірде көзді алдап қызықтыратын, көңілді өзіне тартып аландататын түрлі қызық-қуаныштар мен жайлы, тәтті, рахатты нәрселер өте көп. Олардың баршасы түгілі, бір-екеуінің, тіпті біреуінің ғана соңына түсіп, қызығына батып кетер болса, адам баласы сөйтіп жүріп өмірінің де өткенін білмей қалады. Сондықтан адамзат Абай айтқан иманигүлдегі үш-ақ нәрсені сүйер болса, өзі де, өмірі де бағалы, бекзат, мәнді болмақ:

Махаббатпен жаратқан адамзатты  
Сен де сүй ол алланы жаннан тәтті.  
Адамзаттың бәрін сүй бауырым деп,  
Және хақ жолы осы деп әділетті [3, 247-б.].

Әсіресе адамзатты махаббатпен жаратқан Алланы сүю аса маңызды. Абайдағы осы Бірінші сүюді әл-Фараби де ең озық

тұлға, сүюші әрі сүйікті тұлға деп дәріптеген [6, 242-б.]. Аристотель мысалдап танытқан пирамиданың ұшар басы, шыңында да Алладан бастау алатын ақыл мен адамгершілік тұрады. Өйткені Алла – әлем мен адам, барша Барлықтың иесі, жаратушысы болумен бірге асыл, ізгі қасиеттердің де төркіні – бір Өзі. Біз әлем мен адамды, барша Барлықты ізерлеп танып білу мен қайырымдылық, ізгілік, жақсылық жасау арқылы Аллаға ұмтылып Алланы сүйеміз. Адам махаббаты мен сүюінің ұшар шыңы – Алла болып, сол Аллаға жақындау жолындағы барша ой-әрекетіміз де сүюмен өтеді. Абай Алланың әлем мен адамды жарату әрекетінен махаббат пен әділетті таниды: «Бұл хикметтерінен һәммасына һәм мархамат, һәм ғадаләт заһир (көріну) тұр екен» [4, 143-б.]. Сүю мен махаббат араласқан жердің бәрі де киелі, бәрі де қасиетті, ардақты. Әл-Фарабидің адамзат ұмтылар Бақытты – даналық пен қайырымдылықты сүю деп жазуы тегін емес. Абай да адамшылықты – махаббат, әділет сезімі деп біледі: «Адамшылықтың алды – махаббат, ғаделет сезім. Бұлардың керек емес жері жоқ, кіріспейтұғын да жері жоқ. Ол – жаратқан тәңірінің ісі. Айғыр биеге ие болмақта да махаббат сезім бар. Бұл ғаделет, махаббат сезім кімде көбірек болса, ол кісі – ғалым, сол – ғақил» [4, 164-б.]. Махаббат, сүю – өзінің бар болмыс, мазмұнымен де ардақты, асыл сезім, әрі адам болудың алды – танып білуге талпынтып ұмтылдыруымен де соншалық қасиетті: «Ғылым-білімге махаббаттандырмақ әлгі айтылған үшеуінен (жақсы ата, жақсы ана, жақсы құрбы, жақсы ұстаз) болады» [4, 136-б.]. Адамшылық, адамгершіліктің өзі де махаббат пен сүюден бастау алады. Негізі, Абайдағы анық адамгершілік ілім – жәуанмәртлік. Ақындағы Толық адам танымында адам баласының бар болмысы мен тұтас жаратылысы танылады. Және онда адамгершілікке қатысы шамалы ғана болып жанама түрде ғана көрінетін әрі хайуанға да тиесілі болатын қайрат та қамтылған. Имани гүлде бір ғана жүрекке қатысты сүю бар. Ал жәуанмәртлік осы екеуінің ортасында тұрып, адамгершілік қалыптың өзі мен өзегін танытады. Абай адамдар қауымын адамгершілік қасиеті жағынан түрлі топтарға бөлгенде, осы жәуанмәртлік сипаттарына сүйенеді. Бұл үш қасиет әуелі Алланың сипаттары түрінде танылады. Ал адамзат – Алланың сол сипаттарын хал-қадерінше иемденумен жетіліп кемелденуші

болмыс: «Бұл айтылмыш хаслэттің иелерінің алды – пайғамбарлар, онан соң – әулиелер, онан соң хахимдер, ең ақыры – кәміл мұсылмандар. Бұл үш түрлі фиғыл құданың соңында болмақ, өзін құл біліп, бұл фиғылдарға ғашық болып, тұтпақты пайғамбарлар үйретті, әулиелер оқыды, ғашық болды... Хахимдер дүниеде тиетін пайдасын сөйлейді... екісі де бірінен бірі көп жырақ кетпейді... алла тағаланың сұңғатына қарап пікірлемекті екісі де айтты» [4, 145-б.]. Сөйтіп адам болу мен адамгершілік Алланың сипаттарына, асыл, ізгі қасиеттерге «ғашық болып, тұтпақпен» қалыптасады екен. Аллаға ғашықтықты білдіретін Абайдағы Бірінші сүю осылайша адамшылыққа бастайды. Алланың қай ісін алсаңыз да, абзал, асыл, ардақты. Халықтық ұғымда Алла – жаратушы, жарылқаушы, күллі қайырымды, ізгі сипат, қасиеттердің иесі мен төркіні. Халық пен Абайдың, барша даналардың Алла жайлы танымы осындай ортақ мазмұн, бірдей сипатта келеді. Жарату, жасау, бар ету – жақсы нәрсе, ізгілік пен қайырымдылық, ал бүлдіру, бұзу, қирату – керісінше қиянат пен зұлымдық. Жарылқау, жақсылық жасау, несібелі ету де – қайырымдылық, ал «ғаламнан жиылсын, маған құйылсын, отырған орныма ағып келе берсін» [4, 151-б.] деген пиғыл – өзімішлдік, «өзі үшін оттаған хайуанның бірі» [4, 135-б.] болу. Алланың сипаттары мен ізгі, көркем есімдері де – адамшылыққа азық болар үлгі-өнегелер. Алланың жолында болу – Оның жаратушылық, жарылқаушылық сипаттарын әр адамның өз әлінше өнеге етуі, Иесіндегі затия сипаттар мен көркем, ізгі есімдерді діліне дарыту, өзіндік қасиетіне айналдыру.

Адамгершілік – асыл қасиеттердің жиынтығы, әйтсе де солардың кейбіреуі адамгершілікті жасауда айрықша қызмет атқарады. Сондай асыл қасиеттің бірі – махаббат екенін ақын шығармаларына сүйене отырып жоғарыда айттық. Бұдан бөлек әділет те – адамгершілікті жасаушы асыл қасиеттердің бірегейі. Ақын «Әсемпаз болма әрнеге» өлеңінде адамгершілік қалыпты тиянақтап бекітуші айрықша қасиет ретінде әділет пен шапқатты атайды [3, 162-б.]. Бұл екеуі болмаған жағдайда адамшылық пен адамгершіліктің ақсап қалатынын ақын қадап тұрып айтады, яғни осы екі қасиетпен толыққанда ғана адамшылық қасиет түгел болады, оларсыз «алды – жалын, арты – мұз, барар едің қай жаққа» дегендей, адами қасиет пен тірлік тұйыққа тіреледі.

Пайғамбарлардан кейінгі ақиқатты айтушы – ақындар өздерінің қасиетті сөз, «көрген-білгенін алыс, жақынға әділет пен ақылға сынатып» [3, 205-б.] барып айтады екен. Келесі бір сөзінде де ақын өзінің ақиқат ойына «ғадәләт пен мархамат – көп азығы» [3, 213-б.] деп әділетті өлшеуіш етеді. Адам болу мен адамдықтың бастауы ақыл болса да, адамшылық, адамгершіліктің жетіліп кемеліне келуі Абай танымында тағы да әділетпен тиянақталады. Отыз сегізінші қарасөзінде ақын адамшылықтың өзегіне тереңдей беріп, «бәлки ғадәләт барша езгуліктің анасы дүр. Ынсап, ұят бұл ғадәләттен шығады» [4, 144-б.] деуімен оны (әділетті) негіздердің негізі санайтынын көреміз. Тіпті адамдықтың бастауы ақыл да әділетті ұстанумен суық ақылдан асып нұрлы ақылға айналатыны танылады: «...әділетті ақыл мойындаған нәрсеге, қиын да болса, мойындау, әділетті ақыл мойындамаған нәрсеге, оңай да болса, мойындамау – ерлік» [4, 110-б.]. Абайдың ұғымында ақыл үнемі ақиқатшыл болмайтын-дай көрінеді, мұны он жетінші қарасөзіндегі ғылым атынан айтылған сөзден байқаймыз: «Ей, ақыл! ...жаралған екі дүниенің жайын да сен білесің. Бірақ сонымен тұрмайсың, амал да, айла да – бәрі сенен шығады. Жақсының, жаманның – екеуінің де сүйенгені сен: екеуінің де іздегенін тауып беріп жүрсін, соның жаман. ...әмірші жүрек болса жарайды» [4, 113-б.]. Әділет – жүректен шығар асыл қасиеттердің көшбасшысы іспетті. Сөйтіп жүрек әділет арқылы ақылға басшылық етеді. Әрине адам жаратылысы мен болмысынан ақылдың алар орны орасан зор. Өйтсе де ақыл әділеттің ақиқатын айта алуымен ғана ардақты, асыл көрінеді. Ақыл – танып білу құралы, ақиқатқа жеткізуші. Ал әділет – әр нәрсенің түбі, өзегі, сол әр нәрсенің болмысына Алла дарытқан хикметі мен мәні секілді құбылыс. Осы әр нәрсенің түбін, хикметін адаспай танығанда ғана ақыл – Абайша айтқанда нұрлы ақыл, әділетті ақыл, ал Шәкәрімше – таза ақыл атанады. Әділет таным құралы болмаса да, Абай оны ақылға әмірші, тіпті танып білудегі тізгінді де әділеттің қолына тапсыратындай көрінеді: «Растың бір аты – хақ, хақтың бір аты – алла, бұған қарсы қаруласқанша, мұны ұғып ғадәләтпен тәптіштеуге керек» [4, 149-б.]. Шындық пен растық – күнделікті қарапайым өмір мен адами қарым-қатынастың мәні мен сәні болса, бұл қасиетті ұғымдардың бұдан да биіктеп барып жетер тұсы – Алла тағала.

Осы Алла тағала хақиқат жолы болумен бірге қырық бесінші қарасөзде айтылғандай, әділет пен махаббаттың да иесі мен жаршысы сипатында танылады. Абай адамшылықты танытар ақылдан бөлек әділет пен махаббатты және осы екеуінің айналасындағы шапқат, шапағат, мархамат сияқты ізгі қасиеттерді адамшылықпен байланыстырып жиі айтады. Әділет осылардың қатарында өзге бәрінен де шоқтығы биік, мерейі үстем болып көрінеді. Абайдың адамгершілік танымын танытар толық адам, жәуанмәртлік, имани гүл атты ілімдердің үшеуінде де әділеттің орны айрықша танылып тұрады әрі сол үшеуінен алар орны да орасан зор. Әділет – жүректен шығар асыл қасиеттердің бірегейі ретінде толық адам құрамында (ақыл, қайрат, жүрек) келеді. Мысалы, ақын толық адам танымын бейнелеген «Әсемпаз болма әрнеге» атты өлеңінде жүректі арнайы атамаса да, оны әділет пен шапқат арқылы танытады:

Қайрат пен ақыл жол табар,  
Қашқанға да қуғанға.  
Әділет, шапқат кімде бар,  
Сол жарасар туғанға.  
Бастапқы екеу соңғысыз  
Біге қалса қазаққа,  
Алдың – жалын, артың – мұз,  
Барар едің қай жаққа? [3, 162-б.]

«Туғанға» дегеннен «адам боп туған жанға», «жалпы адамзатқа» деген мағына мен мазмұнды ұғамыз. «Бастапқы» мен «соңғыға» түгел ие болған бұл «адам боп туған жан» – он жетінші қарасөзде айтылғандай, «табанының топырағы көзге сұртерлік қасиетті адам» [4, 114-б.]. Өлеңінде де, қарасөзінде де ақын ақыл, қайрат, жүрек – үш сипатты көңіл қалағандай иеленіп, болмысына бойлатқан адамды өмір бойы армандап келгендей көрінеді. Ақын өмірде де, өнерде де арман еткен мақсат-мұраты – толық адам екенін «Қайрат пен ақыл жол табар қашқанға да қуғанға; әділет, шапқат кімде бар, сол жарасар туғанға», «Осы үшеуің (қайрат, ақыл, жүрек) бір кісінде менің айтқанымдай табылсандар» дегендей арманды ойларымен байқатып қояды. Жәуанмәртлікте толық адамдағы үш сипаттың ақыл, жүрек екеуі ғана қамтылып, онда да жүректің бірегей өкілі болып әділет

жүреді: ақыл мен әділет, рақым. Ал имани гүл ілімі бір ғана жүректен шығар махаббат пен сүюді қамтиды және ол сүю Аллаға, адамзатқа, әділетке бағышталады. Әділет мұнда хақ жолы ретінде аталады және отыз сегізінші қарасөзінде әділет – Құдай жолымен тығыз байланыста танылады: «Не түрлі болса да, я дүниеннен, я ақылыңнан, я малыңнан ғадаләт, шапағат секілді біреулерге жақсылық тигізбек мақсатың болса, ол жол – құданың жолы» [4, 151-б.]. Сөйтіп әділет Абай танымында адамшылықты жасар асыл қасиет, күллі қайырымдылық, барша ізгіліктің анасы, хақ, Алла жолы мағына, мазмұнымен келеді.

### **Ақылға сәуле қонбаса, хайуанша жүріп күнелтпек**

Біз Абай шығармаларындағы адамшылық жайын сөз еткенде, оны әуелі адам жаратылысының екі жақты қоспа сипатымен, одан соң адамшылықты махаббат пен әділетке байланыстырып баяндауымыз, тануымыз тегін емес. Бұл екі қасиеттің ақылдан бұрын айтыларлықтай артықшылығын жоғарыда білгендей болдық. Әйтсе де адам болмысынан ақылдың алар орны аса зор. Өзгесін былай қойғанда, ақылсыз болмыс – адам емес, хайуан. Десе де, Абай ақиқатын айтқандай, «жүректің ақыл суаты, махаббат қылса тәңрі үшін» деген ойдан ақыл мен әділет, махаббат бастауы жүректің қадір-қасиеті айқындала көрінеді. Жүрек пен одан шығар барша асыл, ізгі қасиеттер ақиқатты танытар ақылсыз қадір-қасиет түгілі, мән-мазмұнға де ие бола алмай қалады. Жүрек қайырымдылық бастауы болса, ақыл даналыққа жеткізеді. Адамдықтың бастауы мен мәні – жан құмары, білмекке құмарлық, білім-ғылым, ақыл. Оның үстіне Алла тағала ақылды тек адамға ғана бұйырып берген. Ақыл-ой, санаға ие болу – адам баласының артықшылығы. Осы бір тұста Абайдың мына ойы ақиқатты айқындауымызға елеулі түрде жәрдем етеді:

Жүректе қайрат болмаса,  
Ұйықтаған ойды кім түртпек?



Ақылға сәуле қонбаса,  
Хайуанша жүріп күнелтпек [3, 227-б.].

Шумақтан ұғарымыз, қозғаусыз жатқан ақыл-ойды танып білуге бастайтын – төркін-тегі жүректе болатын ынта, ықылас, сүю екен. Біздіңше, «жүректегі қайрат» ғалым З.Ахметов болжағандай, күш-қуатты танытпайды [9, 83-б.], «білмекке құмарлықты» қозғап іске қосатын ынта, ықылас, сүюді білдіреді. Адамдық пен адамшылыққа бастаушы – танып білу, ақыл болса да, сол ақыл-ойды «ұйқыдан оятып» танып білуге бастаушы – жүректегі сүю. Ақынның отыз сегізінші қарасөзінде жазғанындай, танып білудің басы – «талап, ұғым махаббаттан шығады» [4, 136-б.]. Міне осылайша ынта-ықылас, махаббат пен сүюден басталатын «ақылға сәуле қонып» танып білуге жеткізетін адами әрекет біздерді «хайуанша жүріп күнелтуден» биіктетіп адамшылыққа бастайды. Абайдың осы бір ғана шумағындағы терең ой хайуандықтан адамшылыққа биіктеуді ғана танытып қоймай, ақыл мен жүректің, одан шығар асыл қасиеттердің ара-жігі мен қадір-қасиетін де айқындап береді. Абай танымы бойынша, адамшылық болмыс пен қасиет махаббат, сүюмен басталып, тағы да осы махаббат, сүюмен айқындалатын имани гүл арқылы өзінің биік шыңына жетеді. Ақиқаты осы. Адамзаттың ең ұлы мақсат-мұраты – «махаббат қылса тәңрі үшін», «махаббатпен жаратқан адамзатты сен де сүй жаннан тәтті». Ал сопылар мен даналардың Алланы сүюінде терең мән-мағына, ғажап мазмұн бар. Абайша түсінер болсақ, «алланың хикметін сезу» – Ол жаратқан әлем мен адамның хикмет, сырын танып білу. Әлем мен адамды танып білу – адамзатқа мәңгілік таусылмайтын рухани азық. Абай Алланың әлем мен адамды жаратқан өлшеусіз, шексіз игілікті әрекетінен ғылым мен құдіретті, рақым мен әділетті таниды. Адамзат баласы айналысатын ең қасиетті де киелі, анық баянды білім-ғылым, «алланың хикметін сезу» – Алла тарапынан «жаралып, жасалып қойған нәрселерді көзбен көріп (сезімдік таным), ақылмен танып (логикалық таным) сезбек» [4, 164-б.] екен. Сөйтіп бұрынғы-соңғы данышпандар түйіндегендей, Алланы сүю – Алланың өзіндік болмысы болып табылатын әрі Алладан бастау алар даналық пен қайырымдылықты сүю. «Алланың хикметін сезу» –

адамзат баласының киелі де қасиетті кәсібі – танып білу, білім табу, ғылыммен айналысу, ақыл арттыру. Яғни «алланың хикметін сезуді» Абай жазғандай, «адамның ғылымы, білімі хақиқатқа, растыққа құмар болып, әр нәрсенің түбін, хикметін білмекке ынтықбірлән табылады» деген оймен байланыстырып ұғамыз. Сөйтіп Абай айтатын Алланы сүю – адамдық, адамшылық, адамгершілік жолымыз бен қалып, қасиетіміз, адами асыл өмір салтымыз екен. Міне осы «махаббат қылсаң тәңрі үшін», «ол алланы жаннан тәтті сүю» деген киелі де қасиетті жолда зор жауапкершілік әсіресе жүрекке жүктеледі екен. Өл-Фараби ізімен жүректі айрықша артық санап, оған риясыз жүгіну танымы Абайға да ортақ: «...билеуші, әмірші жүрек болса жарайды... Құдайшылық сонда, қалпыңды таза сақта, құдай тағала қалпыңа әрдайым қарайды...» [4, 113-114-бб.], «ақыл да, ашу да жоқ, күлкі де жоқ, тулап, қайнап бір жүрек қылады әлек» [3, 95-б.]. Адам болу мен адамшылыққа бастап қана қоймай, оны жетілдіріп мәресіне жеткізетін де махаббат пен сүю осы жауапкершілігі аса зор жүректен шығады екен: «асықтық та – жүрек ісі» [4, 110-б.]. Аллаға жол салып, Иемізге жақындататын да – осы жүрек:

Алла деген сөз жеңіл,  
Аллаға ауыз жол емес.  
Ынталы жүрек, шын көңіл,  
Өзгесі хаққа қол емес.  
...Ақылмен хауас барлығын  
Білмейдүр, жүрек сезедүр [3, 215-б.].

Абайдың жүрек жайлы танымын осы тұста таратып әкетсек болар еді, алайда ол арнайы ізденістің үлесі болмақ. Сонымен сүю – жүрек ісі болғандықтан, «махаббат қылса тәңрі үшін» жолында жүректің жетекшілік жасайтынын байқаймыз. Осы бір қасиетті жолда ақыл өзінің танып білушілік сипат, әрекет-қабілетімен ақиқатты айқындап, сонысымен де жүрекке – таным табар «суаты болып» жәрдем жасайды. Себебі Абайдың «әрбір ақылы бар кісіге иман парыз, әрбір иманы бар кісіге ғибадат парыз екен» [4, 126-б.] дегені бар. Танып білуден бөлек иман, ғибадат та – ақылы бар адамда болатын ізгі әрекеттер. Содан да Абай ең асыл, ең ізгі әрекет – Алланы сүюде ақылды – жүректің

суаты, ақиқатты танытар көмекшісі болар қасиет ретінде атайды. Жетекшілік – жүректе, ал жәрдемшілік – ақылда болып тұр. Адамға тән барша ізгі, асыл, адамшылық қасиеттер: зерек, есті, білімді, ойлы, әділет, рақым, мейірім, ар-ұят, қанағат-ынсап болып осы ақыл мен жүректен бастау алады. Адамшылық қалып пен адамгершілік қасиеттің өзі – негізі мен іргетасы саналатын жәуанмәрттіктің құрамындағы осы ақыл мен жүрек арқылы қалыптасады. Ал қайраттың, тән мен дененің адамшылыққа қатысы жанама түрде ғана, «малда да бар жан мен тән, ақыл, сезім болмаса» дегендей жағдайда ғана көрінеді. Қайрат пен дене қуаты адамға әсіресе жаратылысының түгелдігі үшін, сосын ғана адамшылығына жанама түрде көмекшілігі үшін қажет. Тән мен денеден бастау алатын күш-қуат, қайрат, шыдам, төзімділік дегендер ақыл мен жүректен шығатын танып білу мен қайырымдылық, ғибадатқа көбіне тәни, заттық тұрғыдан ғана көмекшілік етеді. Толық адам құрамындағы ақыл, қайрат, жүректің әрқайсысы жөмыла түсіп «махаббат қылса тәңрі үшін» деген бір ғана ұлы мақсат-мұратқа өз орны, өз халінше үлес қосып қызмет етуі ақынның мына өлең шумағынан айқын байқалып тұрады:

Дененің барша қуаты (қайраты)  
 Өнерге салар бар күшін.  
 Жүректің – ақыл суаты,  
 Махаббат қылса тәңрі үшін [3, 215-6.].

Байқасақ, адамзат үшін өте киелі де қасиетті саналатын мақсат-мұратқа «дененің барша қуаты» – қайрат пен күш-қуат та хал-қадерінше өз үлесін қосады екен. Шумақтағы жүрек пен ақылдың арасына сызықшаны біз қойдық, себебі осылай еткенде ғана «ақыл – жүректің суаты», таным табар бастауы деген мазмұн айқын аңғарылады. Сөйтіп біздің адамшылық қалыпты жасауға қатысты ақылдан бұрын махаббат пен әділетті сөз еткен себебіміз – жүректің жетекшілік жағдайына байланысты болды. Абай танымы бойынша, адамзаттың ұлы мақсат-мұраты – «ақылға сыймас ол алланы» сүюге «ынталы жүрек, шын көңіл» ғана қол, құрал болып жәрдемшілік етеді, Аллаға жол сала алады. Ал махаббат пен әділет – жүректен бастау алатын асыл қасиеттер,

содан да біз бұл екеуінің адамшылыққа қатысын алдымен баяндадық. Адамшылық, адамгершілік атты рухани биік қалып пен қасиетке апаратын адамдық жаратылыстың өзі ең әуелі ақылмен басталады. Абайда айтар ақылы, берер тәлімі бар ойлы өлеңдер біршама көп, солардың қатарында көркемдік шындығынан өзге танымдық дерегімен таң қалдырарлық туындысы – «Жүректе қайрат болмаса» өлеңі. Мұнда Абай өзі танытпақ болған жаратылыстың хайуан болмай, адам болуы, биіктеп барып адамдыққа көтерілуі – ақылдан екенін ғылыми негіздеп жеткізген:

Малда да бар жан мен тән,  
Ақыл, сезім болмаса.  
Тіршіліктің несі сән,  
Тереңге бет қоймаса? [3, 227-б.]

Жан мен тән – адам мен малда, хайуанда бірдей бар болмыс. Тек өзінен төмен жануар мен өсімдікте де бар жаннан – адамның жаны «ірі жаралған», яғни адам жанында тәнге қозғалыс, тірілік беруден бөлек «көрсем, білсем, үйренсем» деген хайуанда жоқ айрықша, артықша құмарлық бар. Осы танып білуге бастау болатын, ойлай алатын жаны мен ақылы арқылы ғана Алла жаратылысы – адам атанған. Ойлаушы (мыслящая) жаны мен ақылы арқылы «тереңге бет қойып» тани бастаған әрекет – адами өмір мен тіршіліктің мәні мен сәніне негіз болған. Жан мен тән – дене, қайрат түрінде хайуанда да бар, ал ақыл мен сезім – тек адамға ғана берілген асыл қасиеттер. Абай мұнда «сезім» деп – әділет, ар-ұят, сүю сияқты адамға ғана тән сезімдерді айтып отыр, әйтпесе бес сезім мүшесі жануарда да бар. Егер сол бес сезім мүшесінің түйсінуімен ғана жүрер болса, адам баласының айуаннан айырмасы болмас еді де, адам да «ақылға сәуле қонбай, хайуанша жүріп күнелтер» еді. Сөйтіп Абай бұл өлеңімен бөлекше асыл жаратылысқа айналуға адам болу мен адамдықтың бастауы – ақыл екенін танытады. «Ақылға сәуле қонған» тұстан ғана адамшылық пен адамгершіліктің бастау алып жалғасып кететіні белгілі. Ақылдың – қайрат, тән мен дене ұғымындағы «жан мен тәннен» биік, бөлекше бекзат болмыс екенін мыңа өлең жолдарымен танытады:

Ақыл бітпес дәулетке,  
Дәулет бітпес келбетке [3, 146-б.].

Абай мұнда айтар ойын белгілі бір жүйемен жеткізген. Адамда «жан мен тән», яғни жаратылысынан «дайын», туғаннан бар сыртқы келбеті мен көркі болады, одан бөлек дене, тәнінен тыс «тән қуатыменен сырттан тауып, сыртта сақтайтын дәулеті» болады. Үшінші – ақылы болады, яғни ақын жазғандай, ол «іштегі жан қуатыменен жиған нәрсенің аты ақыл, ғылым еді» деген адами асыл қасиет, зор қазына [4, 162-б.]. Абай айтқандай, адам сыртқы көрік, келбетін көрсетіп я саудалап жүріп дәулетті болмайды екен және дәулет, байлығымен де беделді, ақылды, абыройлы болып кетпейді екен. Ақыл – «іштегі жан қуатымен жиған», іздену арқылы кәсіби жолмен табатын адами байлық пен қасиет. Отыз сегізінші қарасөзінде Абай «сыртқа қасиет бітпейді, алла тағала қарайтұғын қалыбыңа, боямасыз ықыласыңа қасиет бітеді» [4, 151-б.] деп, өлеңіндегі өзекті ойын қарасөзімен бекіте түседі. Келбет пен дәулет адамның өзіндік қасиеті бола алмайды, сыртына, дүниесіне ғана сенген жандарды ақын «бұл айнаға табынғандардың ақылы қаншалық өсер дейсін. Ақыл өссе, ол түпсіз терең жақсылық сүймектікбірлән өсер» [4, 151-б.] деп сынап алады да, оларды ақыл мен адамшылық әлеміне тарта түседі. Абайда «мен» мен «менікі» деген ұғым бар, бұл ұғымдарды ақын «Өлсе өлер табиғат, адам өлмес» деген өлеңінде қолданады да, мағынасын келесі «Көк тұман – алдындағы келер заман» өлеңінде өзі танытып береді:

Ақыл мен жан – мен өзім, тән – менікі,  
«Мені» мен «менікінің» мағынасы – екі.  
«Мен» өлмекке тағдыр жоқ әуел бастан,  
«Менікі» өлсе өлсін, оған бекі [3, 212-б.].

Өзге де шығармаларымен Абай «менікі» деген ұғымға дене, тәнмен бірге дүние-байлық, дәулетті де қосып танытады. Ақын «мен» сөзімен – «ақыл мен жан» арқылы жасалатын адамгершілік қалып, қасиет пен білім-ғылым, өнерді білдіреді. Әр адамның жеке тұлға ретіндегі болмысы оның көрік-келбеті, дүние-байлығымен емес, ақылы мен жаны арқылы қордаланып көбейіп қалыптасатын қасиетімен көрінеді. Ал қасиет дегеніміз –

адамдық қалып пен адамгершілік, бұлар бұрынғы даналар тұжырымдап кеткендей, білім-ғылым, даналық пен әділет, рахым, ар-ұят, қанағат-ынсап секілді қайырымдылық қасиеттері. Абайдың тән қуатымен табатын дәулет пен жан қуаты арқылы жиған нәрсе ақыл, ғылым туралы арнайы түсінік беретіні тегін емес, бұлар адамға қатысты «мені» мен «менікін» танытады, бірі – ақыл мен жан арқылы жасалатын, қалыптасатын қасиет болса, екіншісі – мал мен байлық, дәулет. Ақын адам ұмтылып ұстанар мақсат ретінде осы екеуін жиі айтады, ара-кідік әрі шешуші тұста жүрекке қатысты қасиет пен әрекетті де атайды:

Орынды іске жүріп, ой таппаған,  
Не болмаса жұмыс қып, мал бақпаған [3, 21-б.].

Адамзат тірілікті дәулет білмек,  
Ақыл таппақ, мал таппақ, адал жүрмек [3, 23-б.].

Ақыл тапсақ, мал тапсақ, қуаналық [3, 33-б.].

Қызмет қылып мал таппай,  
Ғылым оқып ой таппай,  
Құр үйінде жатады [3, 55-б.].

Ғылымды іздеп,  
Дүниені көздеп,  
Екі жаққа үңілдім [3, 89-б.].

...Жүрегіңе сүңгі де, түбін көзде,  
Содан тапқан – шын асыл, тастай көрме [3, 214-б.].

Ақыл, ой, ғылым табу – қасиет те, ал мал мен дүние-байлық – дәулет. Адамшылық қалып пен қасиет танып білуден бастап, адами қайырымдылық, ізгіліктердің бәрін де қамтиды. Ақыл, ғылым мен дүние-байлық, дәулеттің адам өмірі мен болмысына қатысты ақын тарапынан жиі айтылуы тегін емес. Осы тұста ақын айтқан мына ойды біліп алған жөн: «Әрнешік тән қуатымен сырттан тауып, сыртта сақтайсыз, оның аты дәулет еді... Соған ұқсаған іштегі жан қуатыменен жиған нәрсенің аты ақыл, ғылым еді ғой» [4, 162-б.]. Бұл екі түрлі нәрсенің адамға қажет болатындай жөні бар. Адамның айуаннан айырмасы – ақылының барлығында екені анық, абсолютті ақиқат. Адамның тән

қуатымнен табатын дәулеті – тамағы, киімі, баспанасынан бастап бүкіл заттай байлығын қамтиды. Бұлардың адам атты асыл болмыс пен қасиетке титтей де қатысы жоқ. Олар «малым – жанымның садағасы» дегендей, адамның тірі жүріп тіршілік етуіне қажетті қосымша сыртқы игіліктер ғана. Ал ақыл мен ғылым – адамның жан құмары, жан қуатымен ізденіп жүріп өзі табатын Аристотель жазғандай жанға қатысты игілігі, Абайша айтқанда өзіндік қасиеті мен адамшылығы. Аристотель адам пайдаланып тұтынатын игіліктерді жанға қатысты, тәнге қатысты және сыртқы игіліктер деп үшке топтап танытса, ал Абайда бұлар жетінші қарасөзінде жазғанындай, негізі, жан мен тәннің қалауынан туындап екі топқа бөлінеді, олар ақын өлеңдерінде жүйелі айтылғандай, ақыл, ғылым, ой мен мал, дүние-байлық. Адам баласы өмір, тіршілігінде ешнәрсені қажетсінбей, керек етпей жүре алмайды, Алла ғана ешнәрсеге мұқтаж емес, ал өзге жандылардың бәрінде де керекті нәрселер осы қорек, тамақ, ауа, күн нұры, көбею, қорғануға қатысты мұқтаждықтан басталып, адамға келгенде бұл қажеттілік оның дүниеқоңыздық, ашқарақтығымен тіпті көбейіп, салаланып кетеді. Адамға бітер ақыл, ғылым мен дүние-байлық, дәулет, яғни оның рухани ізденуімен сырттан табар игілігінің бәрі де түптеп келгенде оған Абай айтатын жан құмары, тән құмары арқылы келетін екі-ақ арнамен енеді. Жан құмары арқылы енген білім-ғылым, өнер, даналық, жақсы, ізгі мінез бен қылық адамшылықты жасауға негіз болады. Абайда Алланы тануға ұмтылған ақын талабын танытар өлең бар, ол «Лай суға май бітпес қой өткенге» деп аталады. Осы өлеңнің түйінді шумағында былай делінеді:

Өмір жолы – тар соқпақ, бір иген жақ,  
Иілтіп екі басын ұстаған хақ.  
Имек жолда тиянақ, тегістік жоқ,  
Құлап кетпе, тура шық, көзіңе бақ [3, 177-б.].

Мекен берген, халық қылған, өзгеше биік жаратылыс берген  
Түп Иені көксеп танымақ болған туындының түйінді ойы осы.  
Өмір жолының тар соқпақ болатыны – туу мен өлу аралығының  
шектеулі, өлшеулі екенінде. Мәңгілік болмыс – Алла ғана.  
Жақтың екі басын иілтіп ұстаған – Алла, себебі ақын айтқан сол

жақтың екі басы болған дүниеге келу де, сосын өмірден өту де – Алланың еркінде. «Тиянақ, тегістігі жоқ имек жолда», яғни өлшеп берілген өмірде адам баласының «кұлап кетпей, тура шығуы» не десек, ол – осы өмірде адамдық, адамшылықты сақтап, адам болып өту. Өмір ақтауы осы ғана. Ақын мұқтажы көп, кемшілігі де жетерлік, өмірі де өлшеулі адамзаттың жалғыз ғана абыройлы жолын – адамшылық, адамгершілік деп біледі.

Алла жайлы келесі бір күрделі де құнарлы шығарма – «Алланың өзі де рас, сөзі де рас» өлеңі. Абайдың атақты имани гүл танымы осында тұжырымдалған. Дүние-тіршілікте адам баласының тән құмары мен жан құмарын өзіне тартып қызықтыратын жағымды-жағымсыз, пайдалы-пайдасыз игіліктер өте көп. Бұларды ақынның ақыл, білім-ғылым, өнер мен дүние-байлық, дәулет деп жіктейтінін жоғарыда айттық. Ал Аристотель ақыл мен адамгершілікті барша игіліктің абзалы, биік шыңы санайды. Абай да «тегінде адам баласы адам баласынан ақыл, ғылым, ар, мінез деген нәрселермен озбақ» [4, 114-б.] деп, адамшылық қалып, қасиетті бәрінен де биік қояды:

Махаббатпен жаратқан адамзатты  
Сен де сүй ол алланы жаннан тәтті.  
Адамзаттың бәрін сүй бауырым деп,  
Және хақ жолы осы деп әділетті.

Осы үш сүю болады имани гүл,  
Иманның асылы үш деп тахқиқ біл.  
Ойлан дағы, үшеуін таратып бақ,  
Басты байла жолына, малың түгіл.

Дін де осы, шын ойласаң, тағат та осы,  
Екі дүние бұл тасдиқ – хақтың досы.

...Распенен таласпа мүмин болсаң,  
Ойла, айттым, адамдық атын жойма [3, 247-248-б.]!

Абай жасап, қалыптастырған имани гүл адамгершілік ілімі бойынша, ең биік адамшылық қалып пен қасиет мал мен мақтан, дүние-байлық, ойын-сауық, түрлі қызық-қуанышпен емес, Алланы, адамзатты, әділетті сүйіп, солардың жолында болумен келеді екен. Бір ғана Алланы сүюдің өзінде ғаламат мазмұн бар,



мұның жайын жоғарыда айттық. Ал түйіп айтар болсақ, Алла – хақиқат жолы, даналық пен қайырымдылық. Бұларды Алланың Ғылымы мен Рахыметі деуге келеді. Абайдың жазуынша, «Ғылым – алланың бір сипаты, ол хақиқат, оған ғашықтық өзі де хақлық һәм адамдық дүр» [4, 137-б.]. Әл-Фараби даналық пен қайырымдылықты – толық адамгершілік, Бақыт деп біледі. Байқасақ, осылардың бәрі де Алла болмысымен байланысты болып келеді. Адамзат қауымын түр-түсі, нәсілі, діні, тілі, ұлты, жақын-жаттығы, бары мен байлығына қарамай, олардың «бәрін де бауырым деп» бірдей сүю – зор гуманизм, кең көңіл, үлкен қайырымдылық. Абай айтқан «адамзаттың бәрін сүй бауырым дептің» ішінде ата-ана, туыс-бауыр, дос-жаран, жолдас-жора, әріптес-қызметтес, халқын, ұлтын, барша адамзаттың бәрі де қамтылған. Осылардың бәрімен бірдей тату-тәтті, сыйлы, қадірлі қарым-қатынаста болу да – нағыз адамгершілік көрінісі. Әділетті – хақ жолы деп сүю де – адамзат өмірінің асыл мұраты, ақиқат мәні. Бұрынғы-соңғы данышпандар ізімен Абайдың да «әділетті барша ізгіліктің анасы» санауы тегін емес. Біздіңше, әділет – Абай жазғандай, «әр нәрсенің түбін, хикметін білу» [4, 137-б.]. Ал «әр нәрсенің түбі, хикметі» – олардың болмысы мен жаратылысына Алла сіңірген мән-мағына мен мазмұн, форма. Адам ақылы осы мән-мағына, форманы, Алла хикметін тани алғанда ғана – әділетті, нұрлы ақылға айналмақ. Әділет – ақиқат, хақиқатпен туыс, жақын ұғым. Сөйтіп осы Алла, адамзат, әділетті сүюмен болатын имани гүл – адамгершіліктің биік шыңы.

Жалпы адамдық болмыс пен адамшылық, адамгершілік, адам болу сезім мүшелері, ақыл-сана, ойы бар кісінің білмекке ынтық болған жан құмарымен басталады. Ақынның «ақылға сәуле қонбаса, хайуанша жүріп күнелтпек», тіршіліктің несі сән, тереңге бет қоймаса» дегені – анық, айқын ақиқат. Осы танып білуге талпынтатын да – тек адамда ғана бар жан құмары. Яғни «көрсем, білсем, үйренсем» деген жан құмары материя күйіндегі жаратылысты адам деген болмыс пен формаға айналдырады. Мұны Абай отыз сегізінші қарасөзінің басында тұжырымдап айтқан: «Қашан бір бала ғылым, білімді махаббатпенен көксерлік болса, сонда ғана оның аты адам болады» [4, 136-б.]. Яғни адам болу, адамшылық – Алла тағала адамға ғана бұйырып берген ақыл-ой, сана, жан құмарынан бастау алып жалғасады.

## Қайырымдылық – жан халі, адамдық негізі

Бұрынғы-соңғы даналар, философ ойшылдар адамгершілік қалып, қасиетті қайырымдылық, ізгілікпен байланыстырған. Тіпті адамгершілікті – қайырымдылық деп білген [10, 9-с.]. Аристотель мен Әл-Фарабидің екеуі де адамгершілікті ойшылдық, интеллектуалдық және этикалық қайырымдылықтардың жиынтығы деп санаған [10, 13-14-с., 129-с.; 5, 195-196-б.]. Абай да отыз сегізінші қарасөзінде адам мінезі туралы ойын таратып келіп, Құран мен хадис деректері арқылы ізгілік, қайырымдылықтың артық қасиетін түйіндеуге жетеді. Негізі, барша ізгі, асыл қасиеттердің бәрі де – қайырымдылық түрлері мен көріністері. Қайырымдылық пен ізгілік – адамгершілікті жасайтын барша асыл қасиеттердің ортақ жалпы атауы. Құран – Алланың сөзі, асыл ақиқат, жақсы үгіт-насихат. Құран – жақсылық пен адамдыққа бастаушы. Осы Құран іші – адамшылық азығы ізгілікке толы: «Ата марру ан-Наса би-л – бири уа ахсану. Инна Аллаха йухиббу-л-мухсинин» (Жұртқа жақсылық істе және өзін де қайырымды бол, өйткені Алла жақсылық істеушіні жақсы көреді), «уа алазина амәну уә амилу с-салихати л-алаика с-хабул жаннатихум фиха халидун» (сондай адамдар құдайға иман келтіреді, жақсы істер істейді, ондайлардың орны мәңгі жұмақта) деген аяттар құранның іші толған ғамалус-салих (ізгі іс) не екенін білмейміз» [4, 143-144-бб.]. Ізгілік, қайырымдылық қалайда жақсы, асыл қалып, қасиет. Адамзат баласы үлгі-өнеге тұтар Алланың сипаттары мен ізгі көркем есімдерінің бәрі де – Түп Иенің шексіз даналығы мен қайырымдылығының көріністері. Алла, хақ жолында болу – осы Түп Ие болмысындағы даналық пен қайырымдылықтарды ақыл-ой, жан-жүрегіміз, ділімізге хал-қадерімізше дарыта беру, сіңіре беру. Иманды болудың өзі – Алла жолында жүріп адамгершілікті, қайырымды болу: «Енді белгілі, иман құры инанышбірлән болмайды, ғадаләт уә рафғатбірлән болады. Ғамалус-салих ғадаләтті, мархамәтті болмақ... Бәлки ғадаләт барша езгуліктің анасы дүр. Ынсап, ұят бұл ғадаләттән шығады... Шүкірліктен ғибадаттың бәрі туады. Енді зинһар (қалайда) ғадаләт, шапағаттан босанбандар. Егер босансаң, иман да, адамдық та, һәммасы босанады» [4, 144-б.]. Абай осындай тұжырым, түйіндеуінен кейін өзінің атақты жауанмәрттік ілімін

негіздеп шығарады. Адамзат баласы игілік көріп, құт санап иемденбек болатын қайырымдылықтар өте көп, оларды бәрі де иесін адамгершілікті етуде елеулі үлес қосады. Әйтсе де сол көп қайырымдылықтар мен адамгершілік қалып, қасиеттің өзегі мен мәні, негізі болады. Адамгершіліктің сондай мәнді негізін Абай жәуанмәртлік деп біледі де, оны өзі ойланып-толғанып айқындаған ақыл, рақым, әділет үш сипатымен танытқан. Абай тұжырымдап танытқан үш сипатты жәуанмәртлік [4, 145] Аристотельде калогогатия [10, 42-с.; 11, 299-б.], Шәкәрімде ұждан деп аталады [5, 30-б.]. Аристотель мен Абай ілімінде адамгершілік қалып, қасиетті танытатын ойшылдық қайырымдылық пен этикалық қайырымдылықтың екеуі де қамтылған, яғни ақыл – ойшылдық, интеллектуалдық қайырымдылық болса, рақым мен әділет – этикалық қайырымдылықтарға жатады. Абайдың Алланың сипаттары жайлы баяндау барысында «оның екеуі – ғылым, құдірет. Сегіз сипаттан қалған алтауы – бұларға шарх (түсіндіру, түсінік беру)» [4, 139-б.] дегеніндей, жәуанмәртліктегі үш сипаттан өзге барша ізгі, асыл қасиеттер тарамдалып, салаланып шыға береді. Яғни ақыл, рақым, әділет сипаттарын иеленген адам өзге де асыл қасиеттерді діліне дарытуға бейім келеді. Ақылы, рақымы, әділеті бар адам ынсапты, ар-ұятты, мейірімді де бола алады. «Алланың, пайғамбардың жолындамыз, ынтамызды бұзбастық иманымыз» [3, 248-б.] дегендей, Аллада бар сипатты пендесінің де ықыласпен иеленуі – адамшылық жол: «Енді біздің бастағы тағриф бойынша құдай тағала ғылымды, рақымды, ғадаләтті құдіретті еді. Сен де бұл ғылым, рақым, ғадаләт үш сипатбірлән сипаттанбак: ижтихадің шарт еттің, мұсылман болдың һәм толық инсаниятың (адамгершілік) бар болады» [4, 145-б.]. Сөйтіп адамшылық, адамгершілік – әсіресе жәуанмәртлік құрамындағы ақыл, рақым, әділетті жан-жүрекке сіңіру, дарыту екен.

Адам болу мен адамгершілікке жету, оны сақтап жүру – өте қажырлы іс. Себебі адамгершіліктің өз аясынан шығып кетпей, қайырымдылық қалпында бұлжымай сақталып тұруы – таразы тілінің тең тұстан айнымай қалуындай күрделі жағдай. Әдетте таразы тілі бір тастары мен тауар салмағының теңдігіне жете алмай екі жаққа алма-кезек ауумен болады. Бір тастары мен тауар салмағы теңелгенде ғана таразы тілі тұрақтап тоқтайды. Дәл сол

секілді адамның жан-жүрегі, ділінде қайырымдылықтардың қиянат пен кемшілікке ауып кетпей, өз қалпын, жақсы халін сақтап тұруы қажырлы әрекетті керек етеді. Себебі Аристотель, Әл-Фарабиердің жазуынша, ақылдылық, мейірімділік, мырзалық, достық, ер жүректілік тағы басқа қайырымдылықтар екі шеткі кемшіліктердің орта тұсы [10, 130-с.; 6, 22-б.], оны үнемі қадағалап, сақталуына қам жеп отырмаса, қайырымдылықтың кемшілікті, кеселді қасиетке айналып кетуі оп-оңай. Мысалы, мырзалық, жомарттық қайырымдылығы асып кеткен шетіне ауа бастаса, ысырапқорлыққа, ал кеми бастағанда, сараңдыққа айналып кетеді. Осындайда Абай айтқандай, адамның өзіндегі қайырымдылық қасиетін кеселді кемшілікке ауып кетуден сақтап қалуы – адамгершілігін де қорғап қалуы: «әрбір жаманшылықтың жағасында тұрып адамның адамдығын бұзатын жаманшылықтан бойын жимақтық, бұл адамға нұр болады» [4, 152-б.]. Ер жүректілік – қайырымдылық қасиет болса, мұны бұзатын жаманшылық – екі жағасында жанасып жүретін кеселді кемшілік – қорқақтық пен көзсіз батырлық. Адамгершілік қалып пен қасиет – кісінің өз жан жүйесіндегі түрлі қайырымдылықтарды екі шеткі кемшілікке ауып кетуінен сақтап қалуы. Хайуандық пен сайтандық, надандық – адамшылықтың қарсы беті. Мұны ақынның «білімсіздік хайуандық болады» [4, 152-б.], «...үйренген өнеріміздің бәрі де адамшылыққа ұксамайды, сайтандыққа тартып барады» [4, 155-б.], «етінен өткен, сүйегіне жеткен, атадан мирас алған, ананың сүтіменен біткен надандық әлдеқашан адамшылықтан кетірген» [4, 158-б.], «оған құдай тағала... Ойын-күлкімен, ішпек-жемеке, ұйықтамақпен, мақтанмен әуре бол да, ішіндегі қазынаңды жоғалтып алып, хайуан бол деген жоқ... соны жоғалтып алу жарамас, ол жоғалса, адам ұғылы хайуан болды, адамшылықтан шықты» [4, 161-бб.] деген ой, тұжырымдарынан байқаймыз. Білмекке құмарлық, білім-ғылым, ақыл-ой, сана, қайырымды, ізгі қасиеттер ғана айуан секілді жанды тәнді – бұларға қоса ақылы бар адам болмысына айналдырады. Демек адамшылық қалып пен қасиет осы аталған қасиет, құбылыстармен қалыптаспақ. Ал түрлі кеселді қасиеттердің адамшылықты азайтып жоғалттары белгілі. Мұндай кеселді қасиеттер мен жағымсыз әрекеттер ақын шығармаларында молынан ұшырайды әрі олар аяусыз әшкереленеді:

Тура тілді кісіні дейміз орыс,  
Жиреніп жылмаңдықты демес бұрыс.  
Жылпылдақтан айрылып, сенісе алмай,  
Адамдықты жоғалтар ақыр бұл іс [3, 53-б.].

«Өзің үшін еңбек қылсаң, өзі үшін оттаған хайуанның бірі боласың; адамшылықтың қарызы үшін еңбек қылсаң, алланың сүйген құлының бірі боласың» [4, 135-б.]; «Мал, мақтан, ғиззат-хұрмет адамды өзі іздеп тапса, адамдықты бұзбайды һәм көрік болады. Егер де адам өзі оларға табынып іздесе, тапса да, таппаса да адамдығы жоғалады» [4, 137-б.]; «Қазақтың бірінің біріне қаскүнем болмағының, бірінің тілеуін бірі тілеспейтұғынының, рас сөзі аз болатұғынының, қызметке таласқыш болатұғынының, өздерінің жалқау болатұғынының себебі не? Һәмма ғаламға белгілі данышпандар әлдеқашан байқаған: әрбір жалқау кісі – қорқақ, қайратсыз тартады; әрбір қайратсыз, қорқақ – мақтанғыш келеді; әрбір мақтаншақ, қорқақ – ақылсыз, надан келеді: әрбір ақылсыз, надан – арсыз келеді; әрбір арыз жалқаудан сұрамсақ, өзі тойымсыз, тыйымсыз, өнерсіз, ешкімге достығы жоқ жандар шығады. Мұның бәрі төрт аяқты малды көбейтеміннен басқа ойының жоқтығынан... Қыстауы тарлық қылса, арызы жеткендік, сыйы өткендік, барлық қызметімен біреудің қыстауын сатып алмақ, ептеп алмақ, тартып алмақ. Ол қыстауынан айрылған және біреуге тиіспек, я болмаса орынсыздығынан елден кетпек, – әр қазақтың ойы осы» [4, 97-98-бб.]; «...көбірек бахас адамды түземек түгіл, бұзады... Ондай бахас хасудшілдікті (күндеу) зорайтады, адамшылықты зорайтпайды. Бәлкім азайтады» [4, 129-б.]. Сөйтіп адамшылық – білім-ғылым, ақыл-ой, ар-ұят, әділет, рақым-мейірім, қанағат-ынсап секілді адами асыл қасиеттермен, қайырымдылықтармен толысып, надандық, арсыздық, күншілдік, қиянатшылдық сияқты кеселді қасиеттермен азайып, азып жоғалады екен. Біз Абайдың таным жайлы ойларын арнайы сөз етпекпіз, әйтсе де адамшылықтың әуелі білумен байланысты болатынын аз-кем айтып өтпекпіз. Адамшылық пен адамгершілік – адам баласының өзіндік қасиеті мен мәні. Ал адам айуаннан ақылы барлығымен биік тұрады әрі ақылы арқылы адам атанады. Адамда ғана бар жан құмарының қалауы да – білмекке құмарлық. Білу, тану әрекеті – ақылы бар адамға ғана тән асыл

кәсіп. Он тоғызыншы қарасөзінде ақын кімді адам деуге болары жайлы былай деп жазады: «Адам ата-анадан туғанда есті болмайды: естіп, көріп, ұстап, татып ескерсе, дүниедегі жақсы, жаманды таниды-дағы, сондайдан білгені, көргені көп болған адам білімді болады. Естілердің айтқан сөздерін ескеріп жүрген кісі өзі де есті болады. Әрбір естілік жеке өзі іске жарамайды. Сол естілерден естіп білген жақсы нәрселерін ескерсе, жаман дегеннен сақтанса, сонда іске жарайды, соны адам десе болады» [4, 114-115-бб.]. Бес сезім мүшесі жануарда да бар, бірақ олардағы бес сезім мүшесі – қоректену мен қорғануға байланысты тіршілікке керекті түйсік ғана. Ал адамдағы бес сезім мүшесінің түрлі мәлімет, дерегі жан құмарымен ойлап, ақылмен тануға азық болады. Адам болудың алғашқы қадамы ақынның жетінші қарасөзінде жазғанындай, әрекет, талаптан басталады. Абай мейлінше зерек, сұңғыла ойшыл, ол өте нәзік жайларды да назардан тыс қалдырмайды. Мысалы ақын сипаттаған бала әрекетінде екі түрлі жастағы жағдай баяндалған, біріншісі – екі-үш жастағы баланың әрекетіне келіңкірейді: «Не көрсе, соған талпынып, жалтыр-жұлтыр еткен болса, оған қызығып, аузына салып, дәмін татып қарап, тамағына, бетіне басып қарап, сырнайкерней болса, дауысына ұмтылып», екіншісі – шамамен бес-алты жастағы есі кіре бастаған баланың әрекетіне келеді: «онан ержетіңкірегенде ит үрсе де, мал шуласа да, біреу күлсе де, біреу жыласа да тұра жүгіріп, «ол немене?», «бұл немене?» деп, «ол неге үйтеді?», «бұл неге бүйтеді?» деп, көзі көрген, құлағы естігеннің бәрін сұрап, тыныштық көрмейді» [4, 103-б.]. Екеуіне де ортақ жай – «білсем, көрсем» деген жан құмары. Осындай құмарымен де бала адам бола бастайды, адамдығын таныта түседі. Жан адамнан басқа өсімдіктер мен жан-жануар, жәндіктерде де бар, әйтсе де адам жаны білмекке құмар болған сипатымен өзге жандардан биік тұрады. Танып білу әрекеті ғана адамшылыққа бастайды әрі адамшылықтың толысуы да осы танып білу әрекет, ізденісімен жүзеге асады. Мұны ақынның өзі де ғылыми дәлдікпен жеткізіп жазады: «Дүниенің көрінген һәм көрінбеген сырын түгелдеп, ең болмаса денелеп білмесе, адамдықтың орны болмайды. Оны білмеген соң ол жан адам жаны болмай, хайуан жаны болады» [4, 103-б.]. «Ол жан адам жаны болмай, хайуан жаны болады» дегенде терең сыр бар:

біріншіден, адам жаны – ойлаушы жан, ал хайуан жаны санасы жоқтықтан ойлаушы бола алмайды, екіншіден, «білсем, көрсем, үйренсем» деген жан құмары тек адамда ғана бар, ал хайуан «ішсем, жесем, ұйықтасам» деген тән құмарымен ғана тіршілік етеді, жан құмары хайуанда болмайды, олардағы жан өз иелерінің қоректеніп, қорғанып тіршілік етулеріне ғана жағдай жасайды. Білу мен білім-ғылымсыз адам болу мен адамшылықтың қалыптаспайтынын ақын өлеңдерінде де айтады:

Біреуден біреу артылса,  
Өнер өлшеніп тартылса,  
Оқыған, білген – білген-ақ,  
Надан – надан-ақ сан қылса [3, 80-б.].

Не пайда бар – мың надан  
Сырттан естіп таңданын.  
Онан дағы бір есті  
Ішкі сырын аңғарсын.

Өздерің де ойлаңдар,  
Неше түрлі жан барсын,  
Ғылым да жоқ, ми да жоқ,  
Даладағы аңдарсын [3, 118-б.].

Сөйтіп адамшылық қалып пен қасиет – білмекке құмар қылған жан қалауы мен ақыл-ой арқылы танып білумен тікелей байланысты құбылыс. Бұлай болмағанда адамшылық та жоғалады: «Бұл қуаттың ішінде үш артық қуат бар, зинһар соны жоғалтып алу жарамас, ол жоғалса, адам ұғылы хайуан болды, адамшылықтан шықты» [4, 161-б.]. Танып білу әрекеті жан қуаттары арқылы жүзеге асады. Бес сезім мүшесі – жанның алғашқы қуаттары мен құралдары, бұлар танып білуге алғашқы бастаушы болып, әрі қарай түйсік, ес, болжау, қиялдау, ойлау қуаттары арқылы ең биік таным – даналық пен оның қабатында жүректен шығар қайырымдылықтар да қалыптасады. Ал даналық пен қайырымдылық – адамшылық, адамгершіліктің қос қанаты іспетті.

Бұрынғы-соңғы даналардың адамшылық пен адамгершілікті көбіне қайырымдылықпен байланыстыратынын біз жиі айтамыз. Аристотель, Әл-Фарабилердің жазуынша, адамгершілік қасиет –

интеллектуалдық және этикалық қайырымдылықтар арқылы қалыптасады. Қайырымдылық өзін ойлаудан асып, өзгенің қамын жей алушылықпен көрінеді. Өзінен өзгенің қамын ойлап, оларға ақыл-оймен саналы түрде жақсылық жасай білу тілегі мен қабілеті тек адамда ғана болады. Өзін ғана ойлаумен шектелу – өзімшілдік, өзіне тілеп ойлағандай жақсылық, жайлылықты өзгеге де жасап ұмтылу – қайырымдылық, адамшылық. Мұны Абай отыз жетінші сөзінің жетінші бөлігінде былайша тұжырымдаған: «Өзің үшін еңбек қылсаң, өзі үшін оттаған хайуанның бірі боласың; адамшылықтың қарызы үшін еңбек қылсаң, алланың сүйген құлының бірі боласың» [4, 135-б.]. Адамшылықтың қарызы – жақсылық, қайырымдылық. Абай адамшылықтың қайырымдылықпен байланысты сипатын біршама жүйелі танытқан. Білу, тану, зеректік, естілік, білім-ғылым, ойлылық, ғұламалық, даналық сияқты адамшылықты жасайтын ойшылдық, интеллектуалдық қайырымдылықтары ақылмен байланыстырылса, адамдар қарым-қатынасы мен болмысын ізгілікті ететін рақым-мейірім, ар-ұят, әділет, қанағат-ынсап, махаббат-сүю қайырымдылықтарының бастауы мен мекені жүрек делінеді. Ақылдан туатын қайырымдылықтардан даналық қалыптасса, жүректен шығатын ізгі қасиеттерден қайырымдылық пайда болады. Сөйтіп интеллектуалдық (ақыл) және этикалық (жүрек) қайырымдылықтардан адамшылық қалыптасады. Интеллектуалдық қайырымдылықтармен білімді, ойлы, ақылды болу жақсы, мұнымен қоса әділетті, ар-ұятты, рақым-мейірімді, қанағат-ынсапты болу тіпті ғажап. Осы орайда ойымызға Абайдың «Әсемпаз болма әрнеге» өлеңі оралады:

Қайрат пен ақыл жол табар  
Қашқанға да қуғанға.  
Әділет, шапқат кімде бар,  
Сол жарасар туғанға.

Бастапқы екеу соңғысыз  
Біте қалса қазаққа,  
Алдың – жалын, артың – мұз,  
Барар едің қай жаққа [3, 162-б.].?



Адам баласы жағымды, жарамды, оңды нәрсенің соңына түсіп оған жетсем, иеленсем деп қуады да, надандық, білімсіздік, келтелік, кемшілік, жағымсыз, кеселді қасиеттерден арылсам, құтылсам деп олардан қашады. Оларға осы екі түрлі әрекетінде де қайрат пен ақылдың көмекші, құтқарушы болатыны анық. Алайда жаман мен жақсыны ажыратып, пайдалы мен пайдасызды біліп білімді де білікті, ақыл-ойлы болып жүрген адам ара-кідік обал-сауапты, ар-ұят, ынсапты, рахым, әділетті ұмытып кетер болса, ондайлардың адамдық болмысы да жартыкеш, кемшілікті, тірлігі де қиянатшыл болмақ. Абай арманы – қайратты, білімді, ақылды адам әділет, шапқат, обал-сауапты да ұмытпай жүрсе екен деген ой. Байқағанымыздай, адамшылықты бекітіп, тиянақтап толықтыра түсетін – жүректен шығатын қайырымдылықтар екен. Тән саулығы мен хауас сәлимі қалыпты адам ең болмағанда тірлігі мен кәсібіне керекті білім мен білікті меңгереді, ақыл-ойлы да болады, әйтсе де имандылық пен толық адам жүректен шығатын қайырымдылық, қасиеттермен қалыптасып беки түседі. Адамшылық пен адамгершілікті қалыптастырудағы жауапкершілік әсіресе жүрекке жүктелетінін Абай «Әуелде бір суық мұз – ақыл зерек» өлеңінде де байқатып өтеді:

Ақыл, қайрат, жүректі бірдей ұста,  
Сонда толық боласың елден бөлек.

Жеке-жеке біреуі жарытпайды,  
Жол да жоқ жарыместі «жақсы» демек.

Ақыл да, ашу да жоқ, күлкі де жоқ,  
Тулап, қайнап бір жүрек қылады әлек [3, 95-б.].

Абай ұғымындағы қайырымдылық негізі, жүректен шығар қасиеттерді танытуымен ерекшеленеді. Қайырымдылықтың басты белгісі – өзгеге қатысты жақсылық пен игілік жасауға ықыласты әрі бейім болушылық. Осы ойларымызды тұжырымдауға ақынның мына толғанысы түрткі болды: «Рақымдылық, мейірбандылық, уа әрбір түрлі адам баласын өз бауырым деп, өзіне ойлағандай ойды оларға да болса игі еді демек, бұлар – жүрек ісі, асықтық та – жүрек ісі» [4, 110-б.]. Абайдағы жүрек сөзіне қатысты ұғым, танымды өз алдына арнайы саралап тануға

болады, біз оны бұл тұста сөз етпейміз. Өзгені артық көріп сүю, оған жақсылық жасауға асық болу мағынасындағы қайырымдылық жайы ақынның ғашықтық туралы өлеңінде де ұшырайды:

Ғашықтық, құмарлықпен – ол екі жол,  
Құмарлық бір нәпсі үшін болады сол.  
Сенен артық жан жоқ деп ғашық болдым,  
Мен не болсам болайын, сен аман бол [3, 96-б.].

Адамның анық асыл қасиеті осы «мен не болсам болайын, сен аман бол» дегендей ізгі, қайырымды қасиет. Жүректің жақсы жан, асыл болмысты аңсап, сондай адамды сүюге ұмтылып тұруы – жақсылық, қайырымдылық. Ал қайырымдылық – адамшылықтың өзі, осы асыл адамгершіліктің баламасы іспетті. Ұнату, жақсы көру, сүю сезімі әдетте жастық шақта ер мен әйел затының арасында тасқындап туады. Мұндай жағдайдағы сезімге адамдар кейінгі ұлғайған шақта да ұмтылғыш келеді, тек кісінің жасы мен адамгершілік болмысына орай бұл сезімнің мән-мазмұны да әр қилы болады. Бұл – ақын өлеңінде былайша көрініс тауыпты:

Кейде есер көңіл құрғырын  
Махаббат іздеп талпынар.  
Ішем деп бейнет сусынын  
Асау жүрек алқынар.

Тартқан бейнет, өткен жас  
Жүректің отын сөндірмес.  
Махаббат – өмір көркі, рас,  
Өлген соң ол да үндемес.

Махаббатсыз – дүние дос,  
Хайуанға оны қосыңдар.  
Қызықтан өзге қалсаң бос,  
Қатының, балаң, досың бар.

Жүрегі жұмсақ білген құл  
Шын дос таппай тыншымас.  
Пайда, мақтан бәрі – тұл,  
Доссыз ауыз тұшымас [3, 119-б.].

Өлең мазмұнынан алар тағылым мен таным елеулі болғандықтан, оны толық мәтінімен ұсындық. Біздіңше, өлеңдегі басты

ой – жүректен шығар жақсы көру, сүю сезімін – махаббатты, қайырымдылықты дәріптеу. Ақынның «махаббат – өмір көркі» деген түйіні – ғажап ақиқат. «Махаббат ғазуатпен майдан-дасқан» дегендей, өмір мен тіршілік – махаббат пен жауыздық, қайырымдылық пен қиянаттың арпалысымен өтеді де, махаббат, қайырымдылықпен өткен өмір мәнді де адамгершілікті болады. Ақын айтқандай, пайда, мақтан, тағы басқа байлық, мансап, атақ-даңқ, мазалы, рахатты жағдайдың бәрі де – тұл, өмір деген қадір тұтып жақсы, сыйлаған, жақсы көріп, сүйген адамыңмен ғана қызықты, қуанышты, мәнді де сәнді. Абай өз өлеңін өмірде ұшырасар көріксіздеу шындықты айтумен бастап, жақсы көруге лайық шын жақының, асылың – жарың, балаң, досыңды сыйлап, соларды сүюге шақырумен түйіндейді. «Асау жүрек пен көңіл құрғырдың бейнет сусынын ішем деп махаббат іздеп талпынуы» – айып көріп кінәлайтын нәрсе емес, тек ұзақтап ұлғайып кеткен кезеңнен уақыты өтіп кеткен шаққа «шақырусыз қонақтай» оралу жөн емес. Осыны танытқандай болып ақын «махаббат іздеп талпынған» күйді «кейде есер көңіл құрғырың» деп суреттейді. Көңілдің «құрғыр», «есер» болатыны – беймезгіл уақыттағы лайықсыз махаббатты көксеуіне байланысты айтылған. Махаббатсыз өмір сүруге болмайды әрине, тек бүгінгі сүйері – жары, баласы, досы болса ғана – абырой мен адамшылық сақталмақ. Махаббатпен өмір сүру – қайырымдылық әрі адамшылық. Махаббаттың асылдығын ақын «бұл өмірдің қызығы махаббатпен» [3, 221-б.] деп «Ерекше естен кетпес қызық қайда» деген өлеңінде де терең толғаған. Мұнда осы махаббат сезімінен туатын ізгілік пен қайырымдылықтың ғажап ақиқаты айтылған:

Жүректен ізі кетпес қызық көрсек,  
Жақсылықты аянбай жұртқа бөлсек,  
Жақынның да, жардың да, асықтың да  
Бәрінің де қызығын көріп білсек [3, 221-б.].

Махаббат сезімі – қайырымдылықтың да, адамшылықтың да қайнар көзі. Жақсы көру, жақсылық жасау, қайырымдылық таныту – адамшылық көріністері. Танып білуден бөлектену ізгі қасиеттердің бәрі жүректен шығатын этикалық қайырымдылықтарды құрайды. Ғалым М.Мырзахметұлы жазғандай, Абай

жүректің гуманистік мазмұнына айрықша көңіл бөлген. Ақын бір өлеңінде көркемдік стильмен-ақ мынадай танымдық ойларын баяндаған:

Жүрек – теңіз, қызықтың бәрі – асыл тас,  
Сол қызықсыз өмірде жүрек қалмас.  
Жүректен қызу-қызба кете қалса,  
Өзге тәннен еш қызық іс табылмас.

Достық, қастық, бар қызық – жүрек ісі,  
Ар, ұяттың бір ақыл – күзетшісі.  
Ар мен ұят сынбаса, өзге қылық,  
Арын, алқын – бұл күннің мәртебесі [3, 249-б.].

Осындағы ойлардың астарында мол мазмұн бар. Мұнда өнер туындысымен ғылыми-танымдық ақиқат айтылғандай. Әдетте әдебиет туындысы өмірлік шындықтан бастау алса да, ғылым туындысындай өмірді өзгеріссіз дәл қалпында көшіре салмайды, әсемдік, сұлулық, бақыттылық талаптарына қарай тарта көркемдеп, құлпыртып жеткізеді. Оқырман әдебиеттен әсіресе эстетикалық, сұлулық сезімін алуға ұмтылады. Ал Абай шығармалары бұған қоса оқырманына ізденіп тапқан терең танымын да ұсынады. Асыл тастар теңіз түбінде сүзіліп, сұрыпталып сақталады, ақын айтқан жүрек жайына мұның қандай қатысы бар деуге болар. Теңіз аймағы кең үлкен кеңістік қой, жүрек те сондай мекенге ұқсап тұр. Теңіздегі асыл тас жүректен шығар асыл қасиеттерді ойға оралтады. Жүрек – тірілік пен тіршіліктің соңғы тірегіндей физиологиялық мүше болумен бірге адамшылықты құрайтын ең асыл, ізгі қасиеттердің де мекені. Жүрек адам үшін рахым-мейірім, ар-ұят, әділет пен сүю секілді асыл қасиеттердің шығар көзі, мекені болуымен құнды, қасиетті. Ақын осы өлеңінде әсіресе ар, ұятты бөле-жарып атайды, ең бастысы, жүректен шығар бұл екі асыл қасиет ақылдың қадағалауы, күзетуі арқылы сақталады делінеді. Ақын жүрекпен әрі одан шығар жақсы, ізгі қасиеттермен өмір сүруді дәріптеп отырғандай. Осындағы ар, ұятты ақын өзге өлеңінде де басты назарда болатын қасиеттер ретінде атайды:

Жалығу бар, шалқу бар, іш пысу бар,  
Жаңа сүйгіш адамзат – көрсекызар.

Ар мен ұят ойланбай, тәнін асырап,  
Ертеңі жоқ, бүгінге болған құмар [3, 241-б.].

Жүректен шығар ар, ұят қайырымдылықтары болмаса, өзге қасиеттер мен дене, тәннің толық адамшылыққа жеткізуі қиын. Сөйтіп Абайда М.Мырзахметұлы жазғандай, жүрек культі басым. Адам болу үшін ақыл-ойдың берері мол, әйтсе де ар-ұят, әділетсіз өмір де мәнді, адам да абыройлы, адамшылық та толық болмайды. Әр-әр кезде қайталап жазып жүреміз, Абай айтқандай, адамзаттың басты мақсат-мұраты – «махаббат қылса тәңрі үшін» [3, 215-б.], «алланың хикметін сезу» мен «адамды сүю» [3, 233-б.]. Себебі «алланың тағала өзі – хақиқат жолы... Адамның ғылымы, білімі хақиқатқа, растыққа құмар болып, әр нәрсенің түбін, хикметін білмекке ынтықбірлән табылады... Ғылым – алланың бір сипаты, ол хақиқат, оған ғашықтық өзі де хақлық һәм адамдық дүр» [4, 137-б.]. Адам – ақыл-ой, санасымен, ізгі, қайырымды қасиеттерімен ғана адам. Абай жазғандай, «жүректің ақыл суаты», яғни ақыл – жүректің суаты, оған ақиқатты танытушы әрі жүректен шығар «ар, ұяттың бір ақыл – күзетшісі». Осы екі әрекетімен-ақ ақыл – жүрек үшін үлкен тірек, абыройын асырар жәрдемшісі екен. Және жиырма сегізінші қарасөзінде Абай «Әрбір ақылы бар кісіге иман парыз, әрбір иманы бар кісіге ғибадат парыз екен» [4, 126-б.] деп жазады, бұдан ұғарымыз, түпкі мақсат – «махаббат қылса тәңрі үшін» және құлшылық ету, ғибадат қылу болса, бұлардың бастауы – ақыл екен. Алла бұрынғы-соңғы даналардың тануынша, әлем мен адамды жаратушы, бұл екеуі де шексіз шеберлік пен зор хикмет арқылы жаратылғаны оларды тануға талаптанған адам ғылымының нәтижесі арқылы айқындала түсуде. Әлем мен адамды тани беру – адамзат үшін мәңгі таусылмас рухани азық. Екеуін танудан адамның сан түрлі ғылымы пайда болған. Ақылы бар адамзат баласының өмірі, негізі, Алланың хикметін, яғни Оның шеберлігі мен хикметінен туған әлем мен адамды әр қырынан игілік, ізгілік жолында танып білуімен өтеді. Алла тағаланың өзі – даналық пен қайырымдылық болса, адам өмірі бұл екеуінсіз өтпейді, бұларға қатыссыз өткен өмірде мән мен адамшылық қасиет те болмайды. Сөйтіп Абай адам өмірінің басты мұратын айқындағанда ең әуелі «махаббат қылса тәңрі үшін» деп, жүректің ісін бәрінен жоғары

қояды. Жүректің осы асыл әрекетіне ақыл азды-көпті ажыратып ақиқатты танытуы арқылы жәрдемші, көмекші, суаты болады. Дене мен одан шығар күш-қуат та қарап қалмай, бұл іргелі де қасиетті іске өз әлінше ат салысады. Мұны ақынның мына өлең шумағынан байқауға болады:

Дененің барша қуаты  
Өнерге салар бар күшін.  
Жүректің ақыл суаты  
Махаббат қылса тәңрі үшін [3, 215-б.].

Бұл «махаббат қылса тәңрі үшін» мақсат-мұратының мазмұнынан «алланың хикметін сез», «адамды сүй» әрекеттерін де танимыз. Әйтсе де Алланы сүю бәрінен биік тұр. «Асықтық та – жүрек ісі» дегендей, махаббат пен сүю – жүректің бейнеті. Ақыл ісі – танып білу арқылы даналыққа жету болса, жүрек ісі – нағыз ізгілік пен қайырымдылық. Бұл екеуін (даналық пен қайырымдылық) Әл-Фараби адамгершілік қасиет пен Бақыт деп білген. Абай да Алланың сипаттары ретіндегі үш қасиетті адамгершілік негізі – жәуанмәртлік деп таныған: «Енді біздің бастағы тағриф бойынша құдай тағала ғылымды, рақымды, ғадаләтті құдіретті еді. Сен де ғылым, рақым, ғадаләт үш сипатбірлән сипаттанбақ: ижтиһадің шарт еттің, мұсылман болдың һәм толық инсаниятың бар болады. Бұл жәуанмәртлік үш хаслат бірлән болар деген сиддық, кәрәм, ғақыл...» [4, 145-б.]. Әл-Фараби қолданысындағы даналықты – ақыл, ал қайырымдылықты – рақым мен әділет танытады. Байқасақ, әл-Фараби мен Абай тұжырымының ақиқаты мен мән-мазмұны ортақ. Ақылдың адамшылықпен байланысын жоғарыда айтқанбыз, ал әзірге жүректен шығар асыл қайырымдылық қасиеттерін сөз етудеміз. Жүректен шығар бұл қайырымдылықтың мән-мазмұнын Абай он жетінші қарасөзінде былайша танытады: «Жұмсақ төсекте, жылы үйде тамағы тоқ жатқан кісіге төсексіз кедейдің, тоңып жүрген киімсіздің, тамақсыз аштың күй-жәйі қандай болып жатыр екен деп ойлатып, жанын ашытып, ұйқысын ашылтып, төсегінде дөңбекшітетұғын – мен. Үлкеннен ұят сақтап, кішіге рақым қылдыратын – мен... әділет, нысап, ұят, рақым, мейірбаншылық дейтұғын нәрселердің бәрі менен шығады» [4, 113-б.]. Бұл – кісіге жақсылық, жайлылық

ойлап, рақым, мейірім танытушылық – қайырымдылық, осы қалып, қасиет – адамшылық. Әрине күллі қайырымдылықтың бастауы мен қайнар көзі, әуелгі жақсылық жасаушы – Алла. Ал адам баласы Құдай жолында жүріп, Иесінің барша ізгілігі мен қайырымдылығын үлгі-өнеге етеді. Абай өзі жасаған адамгершілік ілімінің атауын Құдай жолын ұстанумен байланыстырып атаған: «Құдай тағаланың жолы деген жол ниһаятсыз (шексіз, өлшеусіз) болады. Оның ниһаятына ешкім жетпейді. Бірақ сол жолға жүруді өзіне шарт қылып кім қадам басты, ол таза мұсылман, толық адам делінеді» [4, 151-б.]. Алла тағаланы ғылым, рақым, әділет иесі десек, Оның осы ғылым, рақым, әділет сипаттарының кемелділігі шексіз, өлшеусіз. «Оның ниһаятына ешкім жетпейді» деп кесіп айтылғандай, пендесі ешқашан да Иесіндей ғылымды, рақымды, әділетті бола алмайды. Бірақ талаптанып, ізденіп «сол жолға жүруді өзіне шарт қылып кім қадам басты, ол таза мұсылман, толық адам делінеді». Абай армандаған жақсы, жетілген, толық адам Құдай жолында жүріп, ақыл, рақым, әділет атты үш түрлі жәуанмәртлік сипаттарын бар мүмкіндігімен бойына, діліне, жан-жүрегіне дарытқан, сіңірген адам. Абайдың адамгершілік ілімі ретіндегі толық адам танымын осы жәуанмәртлікпен байланыстырып таныған жөн. Яғни жәуанмәртлік адам болмысының нағыз адамгершілік қалып, қасиетін танытады. Себебі адамгершілік қасиет – материядан, денеден жоғары, биік тұратын рухани қалып пен күй. Имани гүл (үш сүю, махаббат) – осы жәуанмәртлік арқылы танылатын адамгершілік қасиеттің өзегі мен мәні. Ал ақыл, қайрат, жүрек адам жаратылысының барша болмысын, тұтас толықтығын танытады. Ақынның «ақыл, қайрат, жүректі бірдей ұста, сонда толық боласың елден бөлек» [3, 95-б.] дегені адам жаратылысының ішкі, сыртқы рухани және тәни болмысын түгел, толық қамтиды. Жаратылысымызда дене мен тәннің, одан шығар күш-қуат пен қайраттың болуына байланысты біз тәнсіз періште емес, ет пен сүйектен жаралған адам боламыз, келтелігі мен кемшілігі бар пендеміз. Рухани-адамгершілік жағынан жетілуіміз бізді періштелікке, кәмәлатғазамат Құдай жолына жақындатса, тәніміз бен одан шығар нәпсіміз біздерді жануармен жақын етіп, айуандықпен туыстастырып төмендетеді. Екі жолдың біріне басымдық беріп таңдау еркі Алла тарапынан тек адамға ғана

бұйырылған. Адамның еңбегі мен бейнеті адал, оның күреспен жалғасатын қажырлы ізденісі елеулі. Адам өзінің дене, тән жағынан өсіп, өзгеріп толысуына тікелей өзі пейнеттеніп еңбек сіңірмесе де, білім іздеп, ақыл тауып, қайырым, ізгілігін арттыруда ғаламат кәсіби еңбек етеді. Даналық пен қайырымдылықтан тұратын адамгершілік қалып, қасиет – адам баласының таза төл табысы, өз еңбегі, ізденіп, тырысып тапқан биік рухани хал-күйі.

Адамшылықтың, оның басты белгісі – қайырымдылықтың өзіндік ерекшелігі – өзінен асып, өзгеге жақсылық ойлау, жақсылық жасау. Өзінің қамын жасауды әркім де біледі, бұл ақылсыз-ақ, қайырымдылықсыз-ақ, ешқандай ізденіс әрекетінсіз-ақ бола беретін табиғи, жибили әрекет. Ал ақыл мен ғылым, қайырымдылық пен адамшылық – адамның өз әрекетінен туып, қалыптасатын кәсіби құбылыстар. Абай қайырымдылықтың қарсы беті – өзімшілдікті «Дүниеде түпкі мақсатың өз пайдаңа болса, өзің ниһаятлысың, ол жол құдайдың жолы емес. Ғаламнан жиылсын, маған құйылсын, отырған орныма ағып келе берсін деген ол не деген ынсап?» [4, 151-б.] деп жағымсыз мән-мазмұнымен танытқан. Алла ешнәрсеге мұқтаж емес, Онда бәрі бар, Ол жоқтан бар жасап жаратушы және жаратқандарына несібелерін де беріп жарылқаушы. Бұл – өзгенің қамын жеген нағыз қайырымдылық, Құдай жолы. Мұның жанында өз пайдасын ғана ойлап тарылу – анық жағымсыз, жексұрын қасиет. Абай тұжырымдаған Құдай жолы мен қайырымдылық мынадай: «Не түрлі болса да, я дүниеңнен, я ақылыңнан, я малыңнан ғадаләт, шапағат секілді біреулерге жақсылық тигізбек мақсатың болса, ол жол – құданың жолы» [4, 151-б.]. Құдай жолы – қайырымдылық – адамшылық осы. Адамшылықты осылайша қайырымдылықпен байланыстырар болсақ, қайырымдылықтың өзі көбіне жүректен шығар ізгі қасиеттерді танытады. Ал жүректен шығар асыл қасиеттердің ең абзалы – жоғарыда саралағанмыздай, әділет пен махаббат, сүю. Абайдың имани гүл танымы түптеп келгенде осы сүюді ғана білдіреді. Өмір мәні, адамшылық өзегі – сүю. Өмірде құмар болып, қызық көріп сүйетін нәрселер өте көп. Абай өзінің иманигүл танымында ақыл, көңіл, жүректі және тәнді тартып қызықтыратын көп қуаныш, игіліктердің ішінен тек Алла, адамзат, әділет үшеуін ғана сүюді ақиқат әрі адамға лайықты асыл қасиет деп таныған:



Махаббатпен жаратқан адамзатты  
Сен де сүй ол алланы жаннан тәтті.  
Адамзаттың бәрін сүй бауырым деп,  
Және хақ жолы осы деп әділетті [3, 247].

Алланы, адамзатты және әділетті сүюді насихаттап дәріп-теген имани гүл танымы — Абай жасап қалыптастырған адамгершілік ілімнің өзегі мен мәні әрі ең биік шыңы. Сүю — сүюшінің де жүрегін ізгілендіреді, сүйгеніне де көңіл ықыласы мен жақсылығын арнайды, нағыз қайырымдылық осы.

### **Құдай жолы — адамшылық, адамгершілік**

Адамшылық адамда ғана бар «іштегі жан қуатыменен жиған нәрсенің аты ақыл, ғылыммен» [4, 162-б.] қалыптасады. Негізі, өзіміздей жаратылысты адам ететін — ақыл мен ғылым. Әуелі ақыл-ойымен танып білмей жатып адамның білімді, ғылымды болуы және мұның қабаты мен ар жағында қайырымды болуы да мүмкін емес. Абай айтқандай, «білімсіздік хайуандық болады» [4, 152-б.], ақыл, ғылыммен адам болады. Тек білім-ғылым, ақыл — ізгілік, жақсылықпен жарастық, бірлікте болуға керек. Осы орайда айуандықтан арылып, адамшылыққа бет алған әрекетті баяндаған ақын ойы мынадай: «Ақыл өссе, ол түпсіз терең жақсылық сүймектікбірлән өсер... Бұлардың (надандық, еріншек-тік, залымдық) емі халлақына махаббат, халық ғаламға шапқат, қайратты тұрлаулы, ғадаләт ісінің алды-артын байқарлық білімі, ғылымы болсын. Ол білім, ғылымы құдаға мұқтәди (еру, жолға түсу) болсын, яғни құдай тағала бұл ғаламды жаратты, ерінбеді, келісімменен, хикметпенен көмәләтті бір жолға салып жасады, сіздердің ісіңіз де бір жақсылықты бина (негіз, тірек) қылып, арқа сүйерлік шеберлікпенен болсын. Және құдай тағала әрне жаратты, бір түрлі пайдалы хикметі бар. Сенің де ісіңнен бір зарарлар шығып кеткендей болмай, көпке пайда боларлық бір үміт бар іс болсын. Бұларсыз іс іс емес. Бәлки бұларсыз тағад (кұлшылық ету) — тағат емес... сіздер әрбір ғамал қылсаңыз езгулік деп қыласыз, езгулікке бола қасд (ниет, арнау) етіп ниет етесіз» [4, 151, 152-153-бб.]. Әуелі білім, ғылым табылады және

олар жақсылық, ізгілікті көздеумен толысады, адамшылық осы. Және мұның бәрі де адамның сыртына емес, ішкі болмысына біткен қасиет болып табылады. Абай жазғандай, «сыртқа қасиет бітпейді, алла тағала қарайтұғын қалыбыңа, боямасыз ықласыңа қасиет бітеді» [4, 151-б.]. Адам мәні мен қасиеті ішкі қалыбында екені ақынның он жетінші қарасөзінде де айтылады: «...мен жүректі жақтадым. Құдайшылық сонда, қалпыңды таза сақта, құдай тағала қалпыңа әрдайым қарайды деп кітаптың айтқаны» [4, 114-б.]. Жүрек, діл – адами асыл қасиеттердің қоймасы іспетті. Иман да осы жүректен орын табады. Иман мен адамшылық – егіз ұғымдар. Иман да мұсылмандықтың бес парызындағы ішкі өзегі, мәнді бөлегі. Абай әсіресе осы иман тазалығына айрықша көңіл бөледі. Діндегі қалыптасқан иманның алты шарты мен Абай қалыптастырған имани гүлдегі үш сүю бір-біріне жақын, мазмұндас. Ақынның өзі де отыз сегізінші қарасөзінде мұсылмандықтың иманын танытуда оның бірінші шарты – Алланың бір, бар екендігін Оның сипаттары арқылы кең толғаған және онысын адамгершілікті насихаттаумен ұластырған: «Енді белгілі, иман құры инанышбірлән болмайды, ғадаләт уә рафғатбірлән (әділдік, жоғарылату) болады. Ғамалус-салих (ізгі іс) ғадаләтті мархамәтті болмақ, күллі тәнбірлән қылған құлшылықтарын ешбірі ғадаләтті мархаматті бермейді» [4, 144-б.]. Біріншіден, иман – әділет, мархамат, ізгілікпен толысады, екіншіден, иманға азық болар ішкі рухани-адамгершілік қалып тәнмен қылған құлшылық арқылы жасалмайды. Және сыртқы ғибадат ішкі иманмен мұраттас, ниеттес болғанда ғана парыз етіледі: «Сіздің батиныңыз (ішкі қалып) таза болмағы ол иман болып, бұл заһир ғибадатыңыз иманды болған соң ғана парыз болған, сіздің заһирыңыздағы ғибадат – батиныңыздағы иманның көлеңкесі, һәм сол иманның нұрланып тұрмағына көрік үшін бұйырылған» [4, 153-б.]. Мұсылмандықтың бес парызы ішінде иман – асыл, ал қалған төртеуі иманды болуды көздеп мұрат тұтуымен ғана қадірлі, құнды болады және парыз етіледі. Абай жазғандай, «надандар ол ғибадаттың ішкі сырын ескермей қалса, соны қылып жүріп, иманы сөнер деген» [4, 153-б.]. Мұсылмандық мәні – иман екенін Абай өлеңімен де бекітіп танытады:

Руза, намаз, зекет, хаж – талассыз іс,  
Жақсы болсаң, жақсы тұт бәрін тегіс.  
Бастапқы үшін бекітпей, соңғы төртті  
Қылғанменен татымды бермес жеміс.

...Иман білмес тағатты қабыл демен.

...Иманның тазалығын жақсы ұқтырмай,  
Сыртын қанша жуса да, іші оңбаған.

...Мүмин болсаң, әуелі иманды бол,  
Бендеге иман өзі ашады жол.  
Шын илан да, таза ойла бір иманды,  
Мұнафиқ намаз қылмап па, мағлұм ғой ол [3, 248-б.].

Иман – ақылы бар адамның Аллаға құлшылық етіп ақиқатты тануы, мойындауы. Бұл – әрі адамшылық. Және иман – адамның Алланы бетке алып ойлаумен ағарған, тазарған ділі, ішкі рухани қайырымды күйі. Абай толық адамдағы ақылға, әсіресе жүрекке айрықша мән беріп, қайратқа көңілін кем бөлгені сияқты мұсылмандықтың бес парызы ішінде әсіресе иманға басты назар аударатыны бар. Себебі Абайдың ойынша, намаз, ораза, зекет, қажылық иманды ойлаумен және иманға жетер жолда баспалдақ болуымен құнды, қадірлі. Ақын жазғандай, «күллі тәнбірлән қылған құлшылықтарын ешбірі ғадаләтті мархаматты бермейді. Көзің күнде көреді намаз оқушы, руза тұтушылардың не халәттә екендіктерін, оған дәлел керек емес» [4, 144-б.]. Өлеңінде «мұнафиқ намаз қылмап па, мағлұм ғой ол» деп, екі жүзділерге күмәнмен қараған Абай қарасөзіндегі ойын қайталап бекіте түскендей. Абайдың жырлап дәріптегені – «иман тазалығы», «әуелі иманды болу», «шын илан да, таза ойла бір иманды» деген ізгі, ақиқат ойлар, яғни адамшылық.

Барлық жағынан да толық, кемел, озық болмыс – Алла. Барша Барлық Алланың хикметі мен шеберлігінен пайда болған. Және бәріне де өлшеуіш әрі өнеге де – Алла. Алла – әсіресе адамзат үшін зор үлгі-өнеге. Қараңғыда жарық, сәуле, нұр болмаса, барар бағыт та бұлыңғыр, белгісіз болады. Ал ақылды адамға бастауы да, барар жері де, мақсат-мұраты да анық, айқын, ол – Алла. Абай Құдай жолы – адамгершілік деп біледі де, «құдай тағаланың жолы деген жол ниһаятсыз (өлшеушіз, шексіз) болады. Оның

ниһаятына ешкім жетпейді. Бірақ сол жолға жүруді өзіне шарт қылып кім қадам басты, ол таза мұсылман, толық адам делінеді» [4, 151-б.] дейді. Құдай жолына қадам басқан адам – адамшылық, адамгершілік жағынан жетілу жолына түскен адам. Адамшылық, адамгершілік пен осы жолда жетілу, кемелдену бір-бірінен айырғысыз ұғымдар. Себебі құдай жолы – адамшылық және ол шама, шексіз, өлшеусіз болады, сондықтан адамгершілікті әркез сақтап, қадағалап, жетілдіріп отыру керек. Адамшылыққа алып барар танып білу де, екі шеткі кемшіліктің ортасы қайырымдылық та жетілу жолындағы кәсіби әрекетсіз дамымай тоқырап қалады: «Бұл қуаттар әуелден кішкене ғана болады. Ескеріп баққан адам үлкейтіп, ұлғайтып, ол қуаттардың қуатын зорайтады. Ескерусіз қалса, ол қуаттың қайсысы болса да жоғалады, тіпті жоғалмаса да, аз-маз нәрсе болмаса, үлкен еш нәрсеге жарамайтын болады» [4, 160-б.]. Ақын мұнда танып білу жолындағы жан қуаттарының үздіксіз әрекетте болу керектігі жайлы айтып отыр. Ал танып білудің адамшылыққа тікелей қатысы бар. Жан қуаттарының жан тамағымен азықтанып отыратыны секілді қайырымдылық қасиеттер де орта тұстан ауытқып кетпей, өзінің қайырымдылық, сау қалпын сақтап, сапалық күйін жетілдіріп отыруы тиіс. Алланың сипаттары ретіндегі ақыл, рақым, әділет өлшеусіз зор күйінде болатыны секілді пендесі де сол сипаттардың өзіндегі зәрредей кішкене қалпын Алланы бетке алып жетілдіре береді. Бұл – ақылы бар адамзаттың басты мақсаты мен әрекеті. Терең ойлы жазушы Т.Әбдіковтің «Ақиқат» әңгімесінде «бәйгенің ең жақсысы ар бәйгесі, жетсең де, жетпесең де, тура жолдасың» дегеніндей, Абай да өз кезінде: «сол жолға жүруді өзіне шарт қылып кім қадам басты, ол таза мұсылман, толық адам делінеді» [4, 151-б.] деп тұжырымдаған. Қалай болғанда хайуандық, сайтандық емес, Құдай жолы – адамшылықты бетке алып жетіле беру жақсы, орынды. Даналық та, қайырымдылық та кісінің кәсіби әрекеті арқылы қалыптасып, сапасы мен деңгейі арта береді. Бұл – адамзатқа тән қасиетті де киелі әрекет – жетілу. Әл-Фараби бақытты – жетілу деп біледі: «тән жан үшін өмір сүреді. Жан жетілу үшін. Ал жетілу – даналық пен қайырымдылық» [5, 288-б.]. Адам баласының өзі шектеулі, өлшеулі болмыс болған соң, оның ізденіп тапқан адамшылығы да біреуден ілгері біреуден

кейін дегендей салыстырмалы болады. Абсолютті кемелділік тек Аллаға ғана тән. Осы орайда адамзат әркез ақылы мен ізгі қасиеттерін ұштап, ұлғайтып отырады, себебі рухани-адамгершілік жағынан жетілусіз адам өз аты мен затын ақтай алмайды. Тек тәни, биологиялық жағынан өсу – ақылы жоқ жануарлар мен өсімдіктерге ғана тән табиғи әрекет. Ал адам баласы – ақылы, жан құмары, қуаттарымен ізденіп жүріп жетілуімен асыл болмыс. Адамзаттың адамшылығы қандай мәнді, маңызды болса, сол адамшылығын жетілдіріп отыруы да сондай қасиетті. Адам мен оның адамшылығы үшін жетілу әрекеті актуалды екені ақынның отыз жетінші қарасөзіндегі мына нақылынан танылады: «Мен егер закон қуаты колымда бар кісі болсам, адам мінезін түзеп болмайды деген кісінің тілін кесер едім» [4, 135-б.]. Бұл – Абайдың анық өз пікірі мен ұстанымы. Ақынның өмір мен өнердегі мақсаты да – адам мінезі мен қасиетін ұштап жетілдіре беру:

Максұтым – тіл ұстартып, өнер шашпақ,  
Наданның көзін қойып, көңлін ашпақ [3, 67-б.].

Плотин деген данышпан көкірек, көңіл көзі әркімде болса да, көкірек көзін ашатындар тым сирек болатынын жазады [12, 18-с.]. Мұндай ойлар Абай мен Шәкәрімде де бар. Абай мұнда ақындығын жетілдірумен қоса қараңғылықта қалған халқының көңілін, ділін, адамшылығын да көркейтіп арттыруды көздеген. Ақын «адам мінезін түзеп болмайды деген кісінің тілін кесер едім» дегенде, адамшылық жағынан жетілуді жақтап отыр. Абай Алла жайын көп айтып, Оның ең озық болмыс екенін танытып мойындайды. Және Аллаға лайық, Аллаға тән сипаттарды адам баласына үлгі-өнеге етіп ұсынады: «Өз пиғылдарыңды соған өз халіңше ұқсатуды шарт қыл. Алла тағалаға ұқсай алам ба деп, надандықбірлән ол сөзден жиіркенбе, ұқсамақ – дәл бірдейлік дағуасыбірлән емес, соның соңында болмақ» [4, 138-б.]. Ойлап қарасақ, адамзаттағы ой, әрекеттің бәрі дерлік Алла мен Оның жаратқандарын шама-шарқына қарай қайталау болып келеді. Жаксы, жағымды боламын десек те, ерікті-еріксіз түрде Алладағы болмыс, әрекеттің төңірегінен табыламыз. Көпшілікке тән қарапайым ақыл-оймен саралап көргеннің өзінде ойымызға

мына жайлар оралады. Алла халықтық ұғым мен түсінікте жаратушы, жарылқаушы делінеді. Шынында да Алла – әлем мен адамзатты жоқтан бар етіп жаратушы. Ал жасау, жарату, бар ету – қашан да қайырымды, игілікті іс. Адамзат та игіліктер өндіріп, жақсылық жасап Алланың ізгі жолында болады. Керісінше қирату, бұзу, жою – қиянат, жауыздық. Абай бұларды кеселді қасиеттер ретінде әшкерелеп жиі сынаған. Аллаға тән жарылқау да – жақсылық жасау, несібесін беру. Әлемдегі тіршілікке ой жүгіртсек, сан мыңдаған жан иелері бар. Оларды жаратушы да, несібесін дайындап жарылқаушы да – Алла. Адам қарауындағы мал қырылып қалуы мүмкін, алайда даладағы, көктегі, судағы түрлі тіршілік иелері Алланың жарылқауымен жойылмай, өлмей, тіршілігін жалғастырып жатады. Адам да өз кезегінде өзгенің жайлы, жақсы, сау-аман жүруіне жағдай жасай алса, Иесіндей жақсылық жасаушы, қайырымдылық етуші болғаны. Алланы жомарт дейміз, пендесі де кең пейіл, қамқор, мырза болса, Алласына ұқсап көпке шапағаты тиеді. Мұның бәрі де ең озық, кемел Алланы бетке алып жетілу, кемелдену болып табылады. Абайдың адамгершілік жағынан жетілу мен кемелденуді өзекті мәселе ретінде қабылдап, оны арнайы танытуы жәуанмәртлік жайлы ой қорытуы тұсында да көрініс тапқан. Абай отыз сегізінші қарасөзінде иман жайынан бастап, оның алғашқы шарты Алланың барлығы мен бірлігі, сипаттары жайлы кеңірек әңгімелеуге ойысып кетеді. Абай бұрынғы-соңғы дін ғұламаларының қалыптастырып бекітіп қойған қағидалы ойларын ойсыз, сынсыз қабылдай бермейді.

Ақыл сенбей сенбеңіз  
 Бір іске кез келсеңіз.  
 Ақсақал айтты, бай айтты,  
 Кім болса, меңлі, сол айтты –  
 Ақылменен жеңсеңіз [3, 42-б.] –

және «құмарсыз құр мүлгуге тоя алмаймын» [3, 176-б.] дегендей, ақын ақылдан өзге ешнәрсенің беделіне қарамайды. Мысалы, діни ғұламаларда Алланың сегіз сипаты бар екені айтылса, Абай оған өз ақылы мен ойының тұрғысынан қарайды. Және ақын ойының жөні мен қисыны да бар. Абай Алланың сегіз сипаты жайлы ойлана, толғана келіп, олар туралы өзінше түйін жасайды.

Абай өзінің түйінді тұжырымында Алланы дәстүрлі сегіз сипатымен емес, сегізінің ішінен ғылым мен құдіретті ғана алып, оған өз тарапынан рақым мен әділетті қосып, нәтижесінде Түп Иесін үш сипат арқылы түсіндіреді. Ғылым мен құдіретті біріктіріп жібереді, себебі Алладағы ғылым әрі құдірет, ал құдіретінен ғылымы танылып тұрады, содан да бұл екеуін бір ғана ақыл сипаты деп біледі. Сөйтіп ақын «Енді біздің бастағы тағриф бойынша құдай тағала ғылымды, рақымды, ғадаләтті құдіретті еді» деп, Алланы – ақыл (ғылым), рақым, әділет сипаттарының иесі ретінде танытады. Сегіз сипаттың өзге алтауы осылардың, яғни ғылымды құдіреттің ішіне еніп, сіңісіп кететінін Абай байыптап айтқан. Құдірет үшеуіне де ортақ, яғни ғылымды құдірет, рақымды құдірет, әділетті құдірет. Я Алланы – құдірет иесі десек, Оның құдіреті әрі ғылымды, әрі рақымды, әрі әділетті. Нәтижесінде Абай Алланы ғылым, рақым, әділет сипаттарымен танытып, пендесі де сол қасиеттерді иеленумен жәуанмәртлікті, яғни адамгершілікті болады дейді. Абай бұл үшеуін Алланың да, адамның да сипат, қасиеттері ретінде өте орынды, өте қисынды таңдап тапқан. Адамға қатысты көптеген адамгершілік қасиеттерді ойға алар болсақ, солардың бәрі дерлік осы үшеуімен бар болып көрінетіндей. Яғни ақылы, рақымы, әділеті бар адам ар-ұяттан аттамайды, қанағат-ынсапты да біледі, ешкімге обал жасамайды, сүйюі де опалы, тұрақты болады, жинақтап айтқанда, даналық та, жүректен шығар қайырымдылықтар да осы үш сипат, қасиетпен қалыптасып, түгелденіп толысады. Ал Шәкәрімнің Ұжданында (әділет, мейірім, ынсап) ақыл қасиеті жетпей тұратындай көрінеді. Абайдағы жәуанмәртлік – толыққанды адамгершілік негізі. Абайдың жазуынша, «бұлар (ғылым, рақым, ғадаләт) әр адамның бойында алла табарақа уатағала тәхмин (шамамен) бар кылып жаратқан» [4, 145-6.]. Бұрынырақ айтқанындай, адамдағы бұл сипаттар кішкене әрі жетілмеген күйде. Алланың сипатынан туындатып барып жасаған жәуанмәртлік сипаттары – адамгершіліктің негізі мен өзегі әрі адамгершіліктің нақ өзі. Осылайша Абайдың адамгершілік негізін қисынды айқындағаны – бір ерлік болса, жәуанмәртлік сипаттарын негізге алып жетілу жайын мәселе етіп сөз етуі – екінші ерлігі: «Бірақ оған рауаж (пайдаға асыру) беріп гүлдендірмек, бәлки адам өз халінше көмәлатқа жеткізбек жәһәтінде

болмақ. Бұлар – өз ижтиһадіңбірлән, ниет халис (шын ниет) бірлән ізденсең ғана берілетін нәрселер, болмаса жоқ» [4, 145-б.]. Алла сипаттарын өнеге тұтудан туған жәуанмәртлік үш қасиет адам үшін дамусыз, қозғаусыз өз қалпында құнды бола алмайды. Бұл үш сипат Аллада толысқан, кемеліне келген күйде бар, ал адамда олар арнайы ізденіс, жетілу әрекеті барысында ғана бірте-бірте қалыптасады. Хайуан өзінің күллі әрекетін қоректенуі мен қорғануы жолында жасайды, ал адам бұларға қоса өзіне ғана тән адамгершілік жағынан жетілуі үшін де зор бейнет етеді. Дәл осы қасиетті де киелі әрекетімен адам өзіне тән болмысын жасайды және мұнсыз адам болу да мүмкін емес. Алла біздің тәни жағынан өзгеріп өсуімізді ғана жибили, өздігінен болатын еткен де, ал адам болуға бастайтын жан құмарымыздың алдын, келешегін шеті, шегі көрінбейтіндей өлшеусіз қылып жаратқан. Яғни жан құмарынан басталатын білу, білім-ғылым, даналықтың шегі жоқ, тек адам жаратылысының шектеулі болмысы мен өмірінің қысқалығы мұны да амалсыз өлшеулі етіп қояды. Алладан бастау алатын және Аллада ғана зор күйде болатын даналық пен қайырымдылықты қамтитын адамгершілік жағынан жетілудің шегі, шыңына көтеріліп кәмаләтғазамат халге жету адам баласының мүмкіндігінен тыс нәрсе, себебі Абай айтқандай, «Алла тағала өлшеусіз, біздің ақылымыз – өлшеулі. Өлшеулі бірлән өлшеусізді білуге болмайды» [4, 139-б.] және «Лай суға май бітпес қой өткенге» өлеңінде жазғанындай, «өзгені ақыл ойға қондырса да, біле алмай бір тәңріні болдырады» [3, 176-б.] деп, ақын Алланы тануда өз қауқарсыздығын мойындайды. Сөйтіп адамгершілік жағынан жетілудің Алламен байланысы бары байқалады.

Абайдың «Ақылдың жетпегені арман емес, құмарсыз құр мүлгуге тоя алмаймын» деген ойы ақылы бар, иманы бар адамзаттың бәріне ортақ. Адам ақылының өлшеулі болатынынан бөлек оның тәнінің тозатыны мен өмірінің мәңгі еместігі тағы бар. Соған қарамай адам баласы Алла берген жан құмарымен өлшеулі ақылының мүмкін болған қабілеті мен қуатын барынша пайдалана білуі тиіс. Өйтпегенде ол адам деген асыл болмысқа жетпей, дүниені танып білмеген надан, хайуан қалпында қалады. Абай жазғандай, әрі барша ойшылдар айқындағандай, «білімсіздік хайуандық болады» [4, 152-б.]. Біздің айтайын дегеніміз, адам



болмысы мен ақылы қаншалық шектеулі болса да, ол Алладан бастау алатын, Аллада ғана зор күйде болатын даналық пен қайырымдылықты қамтитын адамгершілік қасиетін үнемі жетілдірумен болу керек. Өзге жол мен амал жоқ, бар болса, ол – надандық пен хайуандық, ал бұл екеуі есі бар, ақылы бар адамға лайықты қалып пен қасиет бола алмайды. Өз аты мен затына сай адамның алдында бір-ақ абыройлы жол бар, ол – әл-Фараби жазғандай, өз болмысына сай болып жетіле беру және сол өзіндік болмысын баянды ету. Ал оның шегі мен шеті, биігіне жету-жетпеу – өзге әңгіме. Ең бастысы, сол қасиетті жолға бет алып қадам басу: «Енді біліңіздер, перзенттер! Құдай тағаланың жолы деген жол ниһаятсыз (өлшеусіз) болады. Оның ниһаятына ешкім жетпейді. Бірақ сол жолға жүруді өзіне шарт қылып кім қадам басты, ол таза мұсылман, толық адам делінеді» [4, 151-б.]. Абайдың осы түйіндеген ойында зор ақиқат бар. Біріншіден, құдай жолы – шегі, шеті жоқ өлшеусіз. Ал бұл, яғни Құдай жолы Абай түйіндегендей, барша ақылды ойшылдар мойындағандай, адамшылық пен адамгершілік. Мұның өзі жеке басыңнан асып, өзгенің қамын жей алатын жақсылық пен қайырымдылық: «Не түрлі болса да, я дүниенен, я ақылыңнан, я малыңнан ғадалат, шапағат секілді біреулерге жақсылық тигізбек мақсатың болса, ол жол – құданың жолы» [4, 151-б.]. Міне осы жол ниһаятсыз, өлшеусіз. Себебі әуелі «ғылымды да іздеп, дүниені де көздеп» ақыл мен дүние, мал табу керек, бұл оңай шаруа емес. Бұл екеуінен (ақыл мен дүние, мал) – ақыл мен қайратты танимыз. Енді екіншіден, осы екеуін әділет пен шапағат жолымен өзіңнен өзгелерге жақсылық етіп жұмсау – зор қайырымдылық. Бұл – жүрек ісі. Сөйтіп адамдағы ақыл, қайрат, жүрек үшеуінің бірліктегі әрекетінен туатын адамгершілік қалып, қасиеттің шеті, шегі көрінбейді, себебі шексіз ақыл, хикмет пен қайырымдылық, ізгілік иесі – Алла ғана. Ал ақылды, есті адам баласы надандық, сайтандық, хайуандық емес, Алла жолының жолаушысы. Осылайша төркін-тегі мен бастауы – ғылым, құдірет, рақым, әділет иесі Алла болатын адамшылық жолы да көкжиегі көрінбейтіндей шексіз болады. Адам баласы ет пен сүйектен жаралған тәннің де иесі болуы себепті және ақылының өлшеулілігі мен өмірінің шектеулілігіне байланысты Алладан бастау алатын адамшылық қасиеттің абсолютті биігіне көтеріле алмайды. Абаймен бірге

бұрынғы-соңғы ойшылдардың бәрі дерлік адамшылық пен адамгершілікті – Алла, Құдай жолы деп білген және мойындаған. Ал Абай жазғандай, «құдай жолы деген жол ниһаятсыз (өлшеусіз) болады. Оның ниһаятына ешкім жетпейді» [4, 151-б.]. Сонда адамға қалған сыбаға, мақсат пен мұрат тағы да Абай айтқандай, «сол жолға жүруді өзіне шарт қылып кім қадам басты, ол таза мұсылман, толық адам делінеді» [4, 151-б.], яғни адамгершілік жағынан жетіле берудің жолына түсу. Осы сөйлем тұнып тұрған терең танымға толы, мазмұнынан тартып-тартып талай жайды айтып кетуге болатындай. Біріншіден, Абайдың «сол жол» дегені – Алла жолы – адамшылық пен адамгершілік. «Сол жолға жүруді өзіне шарт қылып» алудың да мән-мазмұны терең. Барлықта адам ғана жаратылысынан екі түрлі болмыстан тұратын екі жақты қайшылықты құбылыс. Және жариялы, әрекетшіл, танушы ақыл-ой, сана адамда ғана бар. Осы ақыл-ойының көмегімен адам баласы жаратылысында бар екі түрлі болмысынан туатын екі жолдың бірін өз еркімен тандай алады. Жоғарыдағы періштеде, төмендегі хайуанда біріншіден, бір ғана болмыс бар, екіншіден, соған сәйкес оларда екінші бірін тандау әрекеті болмайды. Олар болмыстарына Алла сіңірген өмір салты, жаратылысындағы дайын жолымен ғана жүреді: кірсіз, күнәсіз, тәнсіз, таза періштелер тек ғана жақсылық, құлшылықпен болса, жан-жануар, жәндіктер тәнін ғана асырап, қорғанумен болады. Ал адам баласының екі жақты болмысына сай алдынан шығар нәпсілік, шайтандық жолды емес, адамшылық, адамгершілік жолын тандауының өзі – ерлік, ақылдылық. Сөйтіп осы адамшылық жолымен айнамай жүре беру – жетілу мен кемелділік. Ал адамгершілік жағынан жетіле беру – иесін таза мұсылман, толық адам етеді. Абай жырлап насихаттаған толық адам – барша адамзаттың да арманы мен мақсаты.

### **Адам болу мен адамгершіліктің міндетті екі белесі**

Адамгершілік жағынан жетілу жайын Абайдың ақындыққа кіріскен алғашқы жылдарында жазған мәнді өлеңінен-ақ танып білеміз. Мысалы «Ғылым таппай мақтанба» өлеңінде ақын ойы былайша басталады:

Ғылым таппай мақтанба,  
Орын таппай баптанба,  
Құмарланып шаттанба  
Ойнап босқа күлуге.  
Бес нәрседен қашық бол,  
Бес нәрсеге асық бол –  
Адам болам десеңіз [3, 41-б.].

Негізі, М.Мырзахметұлы ағамыздың пікірінше, Абайдың адамгершілік ілімін жырлауы осы өлеңінен басталады [7, 230-б.]. Осындағы «Адам болам десеңіз» атты мақсат-мұрат ақынның бүкіл өмірі мен өнерінде күре тамырдай жүйелі жалғасады. Ақын жазғандай, адам болу мен адамгершілік жағынан жетілу дәл осы үзінді бойынша екі белестен тұрады: «бес нәрседен қашық болу» және «бес нәрсеге асық болу». Екеуі де ыждахатты ізденіс пен әрекетті керек етеді. Нәтижесінде жетілу, кемелдену жолымен адамшылық, адамгершілік қалып, қасиет қалыптасып толысады. Ақын тұжырымдап айтқан өсек, өтірік, мақтаншақ, еріншек, бекер мал шашпақ атты бес дұшпан – біріншіден, көп кеселді қасиеттің ішінен іріктеп, жинақтап алынған бес «өкілі» ғана, екіншіден, бұл бесеуі сол көп жағымсыз қасиеттердің қатарындағы барынша зиянды, аса залалды кеселділері. Ақыл таныған шындықтардың ішіндегі ең киелісі – растық пен хақиқат болса, өтірік – солардың жағымсыз, жиренішті қарсы беті. Адамзат өмірі ақиқатқа ұмтылумен өтер болса, өтірік сол ақиқаттың өзегіне түскен құрт секілді. Өсек – ең әуелі кісінің сыртынан айтылар сұмпайы сөз, содан соң көбіне өсектің шындығы кем болады. Мақтаншақты ақын жиырма бірінші қарасөзінде «бай десін, батыр десін, қу десін, пысық десін, әрнешік не түрлі болса да, «десін» деп азаптанып жүріп, «демесінді» ұмытып кетеді» [4, 116-б.] деп ащы түрде сынап әшкерелейтіні бар. Өмірдің өзі тірілік, өсу, өзгеру, даму болса, еріншектік осы игілікті әрекеттердің бәріне де аяғына оралып кедергі болады. Ал бекер мал шашпақ біріншіден, жасалған, табылған игіліктің қадірін білмеу, екіншіден, бар өнімді ысырап қылу. Міне жинақталып қана берілген бұл бесеуінің өзі адамшылыққа көп залалды, бұлардан өзге де бірқанша кеселді қасиеттер бар, олардан арылып болу оңай емес. Бұлардан құтылу қажырлы, табанды әрекетті керек етеді. Абай қырық төртінші қарасөзінде «әуелі көкіректі

тазалау керек дейді, онан соң ғибадат қыл дейді» [4, 164-б.] дегенде, осындай ділге, ой мен бойға, адамшылыққа зиянды кеселді қасиеттерден арылуды ишаралаған болар. Қырық үшінші қарасөзінде ақын «яғни жүректі мақаншақтық, пайдакүнемдік, жеңілдік, салғырттық – бұл төрт нәрсебірлән кірлетпей таза сақтаса, сонда сырттан ішке барған әр нәрсенің суреті жүректің айнасына анық рәушан болып түседі» [4, 162-б.] деп жазады. Әрине мұны жан қуатына байланысты айтса да, оның осы жан жүйесінде қалыптасатын қайырымдылықтарға да қатысы бар. Аристотель, әл-Фарабилер қайырымдылықтарды жанның жақсы, жайлы жағдайы мен халі, денсаулығы десе, кеселді қасиеттерді жанның ауруы, кеселі, жайсыз жағдайымен байланыстырады. Адам денсаулығын сақтап, оны мықтап сау ету үшін ең әуелі бар ауруын емдеп жазуы тиіс. Дәл сол сияқты адамның ойы-бойы, жан-жүрегіне асыл, ізгі қасиеттерді дарыту үшін әуелі өзінде бар кеселді қасиеттерінен арылуы керек. Абай атаған бес дұшпан – сылып алып тастайтын сондай дерт пен кесел. Ал асыл қасиеттер ауруынан, кеселінен құтылған, арылған тәннің қайтадан қуат таба бастауына ұқсайды. «Қайтадан» дейтініміз, о бастағы нәресте, сәби шақтан бала шаққа дейін әдетте адам болмысы қайырымды, қиянатсыз болады. Абай да жетінші қарасөзінде «Тәннен жан артық еді, тәнді жанға бас ұрғызса керек еді... Жан бізді жас күнімізде билеп жүр екен. Ержеткен соң, күш енген соң, оған билетпедік... Қайта бала күнімізде жақсы екенбіз. Білсек те, білмесек те, білсек екен деген адамның баласы екенбіз» [4, 103-104-бб.] деп, адамшылыққа бастайтын жан құмарының бала шақта елгезек, сергек болатынын жазады. Жоғарыдағы мәнді өлеңінде Абай «қашық», аулақ болатын «бес дұшпаннан кейін бұлттан кейін шыққан жарық күндей «бес асыл істі» атайды, олар – талап, еңбек, терең ой, қанағат, рақым қасиеттері. Бұлар – адамшылық пен адамгершілікті жасайтын асыл қасиеттердің тандаулы өкілдері. Өкілдері дейтініміз, бұлардан өзге әділет, ар-ұят, сүю секілді асыл қасиеттер де бар. Бір ерекшелігі, Абайдың осындай жинақтауларында тыңдаушылары «неге бұлай?», «неге бұлар?» деп келіспеушілік танытатындай қисынсыздық болмайды. Керісінше ақын ойына дендеген сайын оның түйіндерінен білгірлікті танысыз. Абайда мән-мазмұны мен жүйесін ғалым

М.Мырзахметұлы тауып айқындаған, ғылыми айналымға ендірген Толық адам танымы бар. Бұл таным – ақыл, қайрат, жүрек арқылы адам жаратылысы мен адамшылық, адамгершілігінің толықтығы мен түгелдігін танытады. Абайдың «Ғылым таппай мақтанба» өлеңі оның Толық адам танымын тұжырымдаған «Әуелде бір суық мұз – ақыл зерек» өлеңі мен қарасөзіне дейін 1886 жылы жазылған. Бұл – Абайдың ақындыққа дендеп, шындап кіріскен уақыты. Және бұл өлеңді М.Әуезов бағдарламалық сипаты бар терең мәнді туынды деп жоғары бағалаған. Біздің айтпағымыз, Абай бұл өлеңіндегі бес асыл ісі арқылы ізгі қасиеттер ішінен ең өзекті, мәнділерін тандап алған. Және кейінірек айқындап айта бастаған Толық адам танымының алғашқы дерегін осы өлеңінде-ақ білдіре бастағанын байқаймыз. Аталған бес қасиеттен Толық адам танымындағы үш сипат танылады: талап пен еңбектен – қайратты ұғуға бейіміз, терең ойы – ақыл, ал қанағат, рақым – жүректен шығатын ізгі қасиеттер. Сөйтіп алдыңғы бес кесел қасиеттен арылып, кейінгі бес асыл, ізгі сипаттарды жан-жүрекке сіңіріп дарыту – адамгершілік жағынан жетіліп кемелденуді танытады. Осы өлең ішіндегі кейінгі ақыл-кеңестер де – адамшылық қалыпты жасауға қажетті, пайдалы болатын ойлар. Өлеңнің «Ғылым таппай мақтанба» деп басталып, кейінгі біраз тұсқа дейін де осы ғылым жайының айтыла беруі тегін емес. Әйтсе де М.Мырзахметұлының ескерткеніндей, бұл өлеңнің басты мақсаты – «адам болам десеңіздің» мазмұнын тиянақты жеткізу. Ал ғылым жайынан бастап, кейін де ол жайлы біршама сөз ете беруі – адам болудың басы «қашан бір баланың ғылым, білімді махаббатпенен көксерлік» деңгейге жетуіне байланысты болуында. Негізі, бұл өлеңнің мазмұны «адам болам десеңіз» мақсаты жолында әрекет етіп, жетіліп кемелденуді танытады. Ақынның өзі жазғандай, «ісім өнсін десең, ретін табу керек» [4, 135-б.]. Аталған өлеңінде де ақын адам болу жолындағы жетілу жайын рет-ретімен жүйелі жеткізген. «Ойнап босқа күлумен» шаттанудан бойын тартып, білім-ғылым жолына түскен жас баланың басты ұстанымы – «жамандық көрсе, жиреніп, суытып көңіл тыю мен жақсылық көрсе, өнеге тұтып, оны бойға жию» болу керек. Бес дұшпаннан қашық болып, бес асыл іске асық болу да – осы әрекеттің аясында жүзеге асады. Адамгершілік жолында жетілуде бұл екі әрекеттің

(жирену мен өнеге тұту) мән-маңызы өте зор. Бұдан әрі ақын ғылым менгеру мен ғалым болу жайын біршама таратыңқырап сөз етеді. Бұл түсінікті де, ақылы бар адам баласы ең әуелі біліп, танып, білім-ғылымды игеріп барып адам болады. Ақын пікірінше, «дүние де өзі, мал да өзі – ғылымға көңіл берсеңіздің» пайдасы зор, «білгендердің сөзіне махаббатпен ерсеңіз» деп танып білуді махаббатпен ұштастырады.

Ғылым жайынан кейін ақын ақыл туралы айтуға көшеді. Адам болуда ақын үшін ең үлкен қасиет – ақыл. Ақылы бар, саналы адамзаттың тарихында оның ой-танымының тарихы да бірге қабат жүрген, сол ақыл-ой тарихында Абай айтқан аталы асыл сөз де бар. Ақын өзі танып, тауып айтқан сөзге ұрпағы ден қойса екен деп тілейді. Ақынның өзі ескерткендей, оның сөзі – көп айтылып жүрген сөздің бірі емес, біле білгенге ақыл-ойдың асылы, Ғұламаһи Дауаниден тартып, өзі де жүйелеп жеткізген адамгершілік насихаты. Рухқа азық болар ой тарихындағының бәрі де ақыл таразысына тартылып, сүзгісінен өткенінің бәрі де адамзат, ұрпақ игілігіне айналуы керек. Абай «ақыл сенбей сенбеңіз», «ақылменен жеңсеңіз», «ақыл-мизан, өлшеу қыл» деген ақыл беделін көтерер қағидалы ойларын көп айтады. Абай үшін айтушы емес, айтушының ақыл сынына төтеп берер асыл ойы артық, мұны ақын айтқан мына жолдар танытып тұр:

Ақсақал айтты, бай айтты,  
Кім болса, мейлі, сол айтты –  
Ақылменен жеңсеңіз.  
Надандарға бой берме,  
Шын сөзбенен өлсеңіз..  
Сөзіне қарай кісіні ал,  
Кісіге қарап сөз алма [3, 42-б.].

Сөз түйіні біреу-ақ, яғни кім айтса да, тек ақылды сөзді ғана тыңдап қабылдау. Ақын талабы – сол ақылды ойларды ата-анаң, ұстазың, өзгелердің бағасы, мақтан үшін емес, яғни біреу үшін емес, өзің үшін үйрену:

Өзің үшін үйренсең,  
Жамандықтан жиренсең,  
Ашыларсың жылма-жыл [3, 42-б.].

Адам болу мен адамгершілік адам баласына тәні, денесі сияқты Алладан дайын күйінде келмейді, бұлар – өмір бойы ізденіп, өзін-өзі тәрбиелеп адамшылығын жетілдірумен келеді. Адам баласының ақыл-ойын арттырып, жақсылық, ізгілік, қайырымдылық қасиеттерін көбейтуімен жалғасатын рухани әрекеті мен ізденісін – адамгершілік жағынан жетілу, кемелдену деп білеміз. Білім-ғылым, ақыл-ойдың өзі талаптану мен іздену, оқу-тоқу әрекетінсіз толысып қалыптаспайтыны белгілі. Түбі даналық болып түйінделетін бұл танып білу әрекеті – адамгершілік жағынан жетілудің бір қанаты іспетті. Бұдан өзге жүректен шығар әділет бастаған ізгі қасиеттер бар, олар да иесінің әрекетінсіз, қадағалауынсыз қалыптасып жетілмейді. Яғни әділет, рақым, ар-ұят, қанағат-ынсап, мейірім, махаббат, сүю қасиеттерін Алланы бетке алып дамыта беру – адамгершілік жағынан жетілудің екінші қанаты деуге келеді. Ақылға қатысты қасиеттердің жетілуін ақынның мына ойы айғақтайды: «Бағана айттық қой, жан қуаты басында кішкене болады, ескермесе жоғалып та кетеді, ескерсе, күтіп айналдырса зораяды деп. Жан қуатыменен адам хасил қылған өнерлері де күнде тексерсең, күнде асады» [4, 161-б.]. Жан қуаттарымен негізі білім-ғылым, ақыл-ой, даналық қалыптасады. Бұлар – анық, таза бейнет, ізденіспен табылатын қайырымдылық қасиеттері. Ақылды, дана болу көбіне адамның өзіне пайдалы, өзгеге де берері мол, ал жүректен шығатын ізгі қасиеттер, негізі, өзгеге жайлылық пен жақсылық сыйлайды. Яғни кісінің әділетті, ар-ұятты, сүюші болуынан бұлардың иесінен гөрі өзге сырт адамдар пайда көреді, жақсылық пен ізгілік табады. Ал керісінше бұлар болмай я жартыкеш болып қалған жағдайда мұндай әділетсіз, ар-ұятсыз, сүймеген адамнан өзгелер зардап шегіп, жайсыз күйге ұшырайтын болады, өздері де әділетсіз, ар-ұятсыз, сүймегендіктен адамгершілігі төмен жағымсыз адамдарға айналады. Негізі адамгершілік қалып, қасиеттің көркейіп, қадірінің арта түсуіне жүректен шығатын әділет, ар-ұят, қанағат-ынсап, махаббат ізгіліктері көбірек үлес қосады. Содан да Абай «адамшылықтың алды – махаббат, ғаделет сезім» деп білген. Даналықтың да, қайырымдылықтың да толығы – жоғарыда жазғанымыздай, Аллада. Екеуінен (даналық пен қайырымдылық) құралатын адамшылық пен адамгершілік Алланы бетке алып

жетілумен кемелдене түседі: «Біз жаратушы емес, жаратқан көлеңкесіне қарай білетұғын пәндеміз. Сол махаббат пен ғадалетке қарай тартпақпыз. Сол алланың хикметін біреуден біреу анығырақ сезбекпен артылады» [4, 164-б.]. Алла әлем мен адамды жаратып, олардағы титімдей елеусізге дейін назардан тыс қалдырмай, бәрінің де қамын ойлап сүюші. Алланың әрекетінде алалаусыз әділет пен таза теңдік бар. Мұндай кемеліне келген мінсіз қайырымдылық Аллада ғана бар. Ал адамзат баласы ең озық болмыс – Алланы үлгі-өнеге етіп өзінің білім-ғылым, ақыл-ойы мен ізгі қасиеттерін үздіксіз жетілдіріп кемелдендірумен болады. Бұл – адам өмірінің мағыналы мазмұны мен мәні болады, өзінің де абыройы мен қасиеті саналады. Адам ақылы Алланы тани алмайды, тек «жаратқан көлеңкесіне қарай біледі», өзін емес, жаратқан туындыларын ғана танып біліп үлгі-өнеге алады. Жаратушының құдіреті мен хикметі, шеберлік қырлары – бәрі де жаратқандарында жарқырап «сайрап тұр», тек ақылды адам соларды танып білуге талаптана беруі тиіс. Жартқандарына қарап Иесінің рақыметін де болжай алады. Осындай жан қуаты, ақыл-ой, жан-жүрек әрекетімен Алла жаратылысына айрықша ден қою адам баласын болмысына сай жетілу мен кемелденуге бастайды. Тіршілік пен адам өмірі, тіпті өзен суының өзі бір орында, бір қалыпта тұрмайтыны сияқты ізденіспен келетін адамгершілік те үнемі жалғасатын жетілусіз өз болмысын сақтап қала алмайды, иесі де жақсы адам болудан қалады: «Әйтпесе құдайға терістіктен, не ар мен ұятқа терістіктен сілкініп, бойын жиып ала алмаған кісі, үнемі жаманшылыққа, мақтанға салынып, өз бойын өзі бір тексермей кеткен кісі, тәуір түгіл, әуелі адам ба өзі?» [4, 111-б.]. Адам мен Алла аралығында талай саты, сансыз деңгей бар, адамгершілік жағынан жетілуіне қарай әр адам өзіне лайық деңгейі мен халіне ие болады. Адам баласының болмысына сай жетіліп отыруының маңыздылығы мен міндеттілігі оның өз-өзінен есеп алып отыруынан да көрінеді. Өзгеріп өсу мен жетілудің мән-мағына, маңызы болмаса, өткен күндерің мен өміріңді сүзгіден өткізіп есеп алу да қажет болмас еді: «Егерде есті кісілердің қатарында болғың келсе, күнінде бір мәртебе, болмаса жұмасында бір, ең болмаса, айында бір өзіңнен өзің есеп ал! Сол алдыңғы есеп алғаннан бергі өміріңді қалай өткіздің екен, не білімге, не ахиретке, не дүниеге жарамды, күнінде өзің



өкінбестей қылықпен өткізіппісің? Жоқ, болмаса, не қылып өткізгенінді өзің де білмей қалыппысың?» [4, 112-б.]. Адам өмірі мен болмысы адамшылығын арттыру бағытында жетілуімен ғана мәнді әрі құнды. Абай жазғандай, адамдар бір-бірінен «алланың хикметін біреуден біреу анығырақ сезбекпен артылады». Адам адамнан айуан секілді тәни өсуі, семіріп қондануы, етті, сүтті, жүнді, мүйізді болуымен емес, іші, сыры, ділі, адамшылығы даналық пен ізгілікке толып жетілуімен артық, асыл болады, яғни Абай жазғандай, «тегінде адам баласы адам баласынан ақыл, ғылым, ар, мінез деген нәрселермен озбақ» [4, 114-б.]. Ал бұлар – адамның өз ізденісімен, жетілу әрекетімен ғана келетін кәсіби нәрселер. Және бұл адами, асыл ізгі қасиеттерсіз адамшылық қалыптаспайды, адамдық та болмайды. Мұның ар жағында хақ, хақиқат, өсу, өзгеру, даму деген киелі құбылыстар – бар болып тірі жүргенде, өмір сүріп тұрғанда ғана мүмкін болар жайлар. Абай жазғандай, «Ғұмыр өзі – хақиқат. Қай жерде ғұмыр жоқ болса, онда кәмәлат жоқ» [4, 146-б.]. Өмірдің өзі – бар болып дүниеге келген соң, қимыл-қозғалыссыз тұрып, тоқырап қалмай, өсіп, өзгеріп дами беру. Табиғи, тәни жағынан өсіп өзгеру жаны бар болмыстың бәріне де тән нәрсе. Бар нәрсенің өтіп, өшіп жоқ болуы я өзге болмысқа айналуы – өлу, ең болмағанда, уақытша жоқ болу. Адамның өзге тіршілік иелерінен ерекшелігі – ақылы бар болмысымен жан құмарын жұмсап рухани-адамгершілік жағынан жетілуі. Адамгершілік негізі – қайырымдылықтар – жанның өзіне жайлы жақсы халі. Жанның жақсы халі, денсаулығы саналатын қайырымдылықтардың екі шеткі кемшілікке ауып кетпей, орта тұсында қайырымдылық күйінде сақталып қалуы – адамшылық пен адамгершілік және бұл адамдық асыл сапа – рухани-адамгершілік жағынан жетілумен ғана жүзеге асады. Рухани-адамгершілік жағынан жетіліп, кемелденумен ғана тәнді, жанды жаратылыс адамшылығы толысып ақылды, иманды адам болмысына айналады. Жетілу, кемелдену әрекетінің қадір-қасиеті де осында.

## «Түзетпек едім заманды»

Абайда өзгеше, бөлекше жақсы, асыл адамның бейнесі бар. Әрине бұл артықшылық – адамгершілік қалып, қасиетпен өлшеніп айқындалады. Жақсы, асыл адамды аңсаған арманын ақын әр-әр тұста білдіріп, әрқилы қолданыстарымен танытып отырады: «жаны аяулы жақсы» [3, 35-б.], «Сүйікті ер» [3, 36-б.], «ары бар, ұяты бар үлкенге сен» [3, 38-б.], «сәулесі бар жігіттер» [3, 40-б.], «жақсыға айтсаң, жаны еріп, ұғар көңіл шын беріп» [3, 84-б.], «қажымас дос халықта жоқ» [3, 106-б.], «онан дағы бір есті ішкі сырын аңғарсын» [3, 118-б.], «кешегі Оспан – бір бөлек жан» [3, 149-б.], «ол сыпатты қазақтан дүниеге ешкім келмепті» [3, 179-б.], «кешегі өткен ер Әбіш» [3, 180-б.], «мұндай асыл тумайды» [3, 188-б.], «бір шешеден туғанда бәрінен кетті тәуірім» [3, 189-б.], «айырып, от қып өртедің Әбіш сынды асылдан» [3, 190-б.], «Әбіш сынды жарымнан» [3, 193-б.], «орамды тілді ауыздым, ақылға жүйрік маңыздым» [3, 196-б.], «бір тәуір дос тым-ақ керек ойы мен тілі бөлінбес» [3, 245-б.], «...есті кісілер үлкен есі шықпай, ақылды қолдан жібермей, бойын сынатпай жүріп ізденеді екен» [4, 111-б.], «осы үшеуін (ақыл, қайрат, жүрек) бір кісіде менің айтқанымдай табылсаңдар, табанының топырағы көзге сүртерлік қасиетті адам сол» [4, 114-б.], «ақылы түгел, ойлы адамның бір баласы» [4, 115-б.], «Үлкендік – адам ішінен өзін өзі бағалы есеп қылмақ. Яғни надан атанбастығын, жеңіл атанбастығын, мақтаншақ атанбастығын, әдепсіз, арсыз, байлаусыз, пайдасыз, сұрамшақ, өсекші, өтірікші, алдамшы, кеселді – осындай жарамсыз қылықтардан сақтанып, сол мінездерді бойына қорлық біліп, өзін сондайлардан зор есептемек. Бұл мінез – ақылдылардың, арлылардың артықтардың мінезі» [4, 116-б.]. Адамзаттың осылар тектес асыл өкілдері мұндай абыройлы болмысқа адамшылық, адамгершілік қалып, қасиеттерін жетілдірумен жеткен. Жоғарыда жазғанымыздай, адамгершілік пен жетілу, кемелділік қасиет пен кісілік қалып – бірінсіз бірі болмайтын жақын, туыс ұғымдар.

Абайда еліне, халқына, адамға қатысты айтылатын «түзеу» ұғымы бар. Бұл – кемшілікті нәрсені оңды, дұрыс, жақсы қалпына келтіру бағытындағы әрекетті танытады. Алладан өзгенің бәрінде жетіспей тұратын тұсы мен кемшілігі болады, әсіресе адамның

өзі мен ол жасаған нәрседе мін болмай тұрмайды. Ал Алла жаратқан әлем мен адам алғашқы кісі ықпалы тимеген қалпында тамаша, кешіліксіз болады. Себебі Жаратушының хикметі мен шеберлігі ала-бөтен зор: «Ол ғылым құдіретте ішбір ниһаятсыз ғылымында ғафлят (қапы қалу), құдіретінде епсіздік я нашарлық жоқ. Саниғын сұнатына (істеушіні ісіне қарап) қарап білесіз. Бұл көзге көрінген (материалдық), көңілге сезілген (рухани) ғаламды қандай хикмет бірлән жарастырып, қандай құдіретбірлән орнастырған, еш адам ұғлының ақылы жетпейді» [4, 140-б.]. Осылай мінсіз жаратылған Алла ісіне түзеу мен жөндеу қажет емес, ал адам жаратқан нәрсе мен оның өз адамшылығының Алла бағытынан бұра тартқан тұсын жөндеп түзеу қажет әрі орынды. Адам ойы мен әрекетінен туатын түрлі игіліктердің кем-кетігін түзеп жөндеу күнделікті өмір барысында бола беретін, қайталанып тұратын үйреншікті нәрсе. Ал өмірге келген баланың есейе келе ақылы мен қайырымдылығын қамтитын адамшылығын жетілдіру барысындағы жөндеу, түзеу – әсіресе қасиетті іс. Абайда заманын, адамын түзеу арманы зор болған, мұнысын әр-әр тұста айтып та жүрген:

Менсінбеуші ем наданды,  
Ақылсыз деп қор тұтып.  
Түзетпек едім заманды,  
Өзімді тым-ақ зор тұтып [3, 138-б.].

Негізі, адам мен қоғам, заман ұғымдары – бір-біріне өте жақын құбылыстар, бұл үшеуінің өзегі әрине адам, себебі адамсыз қоғам да, заман да болмайды. Ал адамды жөндеу мен түзеу деген оның адамгершілігін жетілдіріп қалыптастыруды көздейді. М.Әуезов – Абай заманы мен қоғамын оның адамдарын адамгершілік жағынан тәрбиелеу арқылы өзгертпекші болғанын жазған. Абай үшін адамгершілікті жырлау зор мақсаттан туған. Бірақ кейбір зерттеушілер (Қ.Бейсембиев) жазғандай [13, 58-с.], Абай қоғамды өзгертудің амалын жолын білмеген деу қате. М.Әуезов жазғандай, Абай адамгершілікті, мораль философиясын барлық жайдан жоғары қойып, халқын, заманын өзі жырлаған адамгершілік ілімі арқылы түземек болған. Сөйте тұра

Абай жүйе мен әкімшілік билікке иек артқан заманды өзгерту онай болмайтынын да жақсы білген:

Өркімді заман сүйремек,  
Заманды қай жан билемек?  
Заманға жаман күйлемек,  
Замана оны илемек [3, 246-б.].

Ақынның айтпағы – заманның мықтылығы мен сол заманды билеп түзей алатын жақсы, «орда бұзып, қамалды алар» тұлғаны аңсау. Жақсылар, арлылар, мықтылар өз заманын жақсылыққа, игілікке бастайды, бірақ ондайлар өмірде кем туады, тіпті жоққа жуық, ал жамандар заманына көзсіз, сынсыз еріп, заманының өз «өкіліне» айналады. Қалай болғанда да Абайда заманы мен адамын түзеуге ықпал жасайтын адамгершілікті аңсау мен жырлау әрекеті бар. Қашаннан ойлаған ежелгі арманы – адамгершілікті жетілдіру арқылы халқын түзеу болғанын Абай былайша толғанып жеткізеді:

Талай сөз бұдан бұрын көп айтқанмын,  
Түбін ойлап, уайым жеп айтқанмын.  
Ақылдылар арланып ұялған соң,  
Ойланып түзеле ме деп айтқанмын

Қазақтың өзге жұрттан сөзі ұзын,  
Бірінің бірі шапшаң ұқпас сөзін.  
Көздің жасы, жүректің қаныменен  
Ерітуге болмайды ішкі мұзын.

...Жұртым-ай, шалқақтамай сөзге түсін,  
Ойланшы, сыртын қойып, сөздің ішін.  
Ыржаңдамай тыңдасаң нең кетеді,  
Шығарған сөз емес қой әңгіме үшін.

Адасып алаңдама, жол таба алмай,  
Берірек түзу жолға шық, қамалмай.  
Не ғылым жоқ немесе еңбек те жоқ,  
Ең болмаса кеттің ғой мал баға алмай [3, 172-б.].

Адамның абыройына лайық әрі болмысына сай қалаулы да жақсы бағытта түзелуін тек қана адамшылық, адамгершілік жағынан жетілуімен байланыстырамыз. Себебі адам баласының

абыройы мен қасиеті – адамшылық, адамгершілік. Ақынға адамгершілік ілімін ойлап табуға себеп те болған – елінің өзі көріп таныған кемшілікті күйі. Ол өз халқын абыройлы биіктен көргісі келді. Өмірі мен өнерін халқын түзеуге жұмсағаны шығармаларынан анық, айқын байқалып тұрады:

...Тәуекел мен батыр ой  
Өткір тілді найза етіп,  
Сайысып-ақ бақты ғой,  
Неше түрлі айла етіп.

Оянбай, қайран жұрт,  
Ұялмай қал жым-жырт.

Ақылмен ойлап білген сөз  
Бойыңа жұқпас, сырғанар.  
Ынталы жүрек сезген сөз  
Бар тамырды қуалар.

Ән салар, жатқа алар,  
Түбінде құр қалар [3, 224-б.].

Мұндағы бейнелеп айтылған әрекет – елін, халқын ақынның өзі қалаған биікке тартып түземек болған қажырлы حرکتін танытады. Күш-қайраты, ақыл-ойы, көркем поэзиясы – бәрін де жұмылдырып ақынның жасамақ болғаны – елін надандықтан алып шығу болғанын байқаймыз. Ақын «Өлсем орным – қара жер сыз болмай ма» өлеңінде «Соқтықпалы, соқпақсыз жерде өстім, мыңмен жалғыз алыстым, кінә қойма» [3, 226-б.] деп күңірене толғануы тегін емес. Өзі жазғандай, ақын етек бастыны өз елінен көп көрген. Сөйткен халқын адамшылық жолына саламын деп шарқ ұрған ақынның күйі де оңай болмаған:

Ой кіргелі тимеді ерік өзіме,  
Сандалмамен күн кешкен түспе ізіме.  
Өзі ермей, ерік бермей, жұрт қор етті,  
Сен есірке, тыныш ұйықтат, бақ сөзіме! [3, 226-б.]

Абай дүние-малдан кемшілік көрген жарлы адам емес еді, жайлы, мазалы, алаңсыз тұрмыс кешуіне бар жағдайы болған. Бірақ ақынның көздегені өз қамы емес, елінің, келешектің

көркемі болатын. Абай ашынғанда, күйінгенде А.Байтұрсынов жазғандай, сөзінің тыңдаушыға жайлы тиюін ойлап жатпайды, әдеп аясынан асып анайылап айтып жіберетіні де бар:

Өзелде тәңрім сорлы етті,  
Арсыз елмен әуре етті,  
Жалғыз үйде күңреңтті,  
Тағдырға білдік көнгенді.  
Адам деген даңқым бар,  
Адам қылмас халқым бар.  
...Қатыныңның ойнасын  
Көрсен, білсен қоймасын,  
Не ойлар ең өз басың?  
Сонымнен тең біз де енді [3, 116-б.].

Ақын айтатын заман, қоғам, халықты түзеудің ар жағында, түп негізінде адамдарға адамшылық, адамгершілік қасиетті сіңіріп дарытсам деген ой-ниет жатады. Бірақ ақын көрген заман мен елдің кемшілігі шаш етекпен болатын. Абайдың үмітінен күмәні басым, жұбануы, қуануынан күйінуі, күңіренуі көп еді. Өйтсе де Абайда халқынан үміт ақтауын көрмесе де, өзі атқарар пайдалы, жақсы, игілікті істі жемісті етіп жасай беру бар. Ол ісі – ақыл-ой, ізгілік, тәрбие, адамшылық жайынан қозғаған терең толғауларын тынымсыз тудырып, қағазға түсіре беру. Абай осы түйген ойы мен шешімін өлеңі мен қарасөзінде бірдей айтады:

Өзгеге, көңлім, тоярсың,  
Өлеңді қайтіп қоярсың?  
Оны айтқанда толғанып  
Іштегі дертті жоярсың.

...Қара басқан, қаңғыған,  
Қас надан нені ұға алсын?  
Көкірегінде оты бар  
Құлағын ойлы ер салсын.

Тыңдамаса еш адам,  
Өз жүрегім толғансын.  
Өр сөзіне қарасын,  
Іштегі дертім қозғалсын.

...Мендей ғаріп кез болса,  
Мойын салсын, ойлансын.

Қабыл көрсе сөзімді,  
Кім таныса, сол алсын [3, 117-б.].

Ақын осы ойын қарасөзін жазуға кіріскен алғашқы сөзінде де түйіндеп, тереңдей дамытып қайта ұсынады. Осы кездегі жер ортасы жасына дейін де ақын қарап жүрмеген, өлеңін «әлеуметтік тартысының құралы етіп» халқына ақыл-ой, адамгершілік азығын беріп, пайдалы насихатын айтумен келген. Қағазға жазылып, сақталып қалар ойларының жерде қалмасын сірә, ақын сезген болар. «Сәулесі бар жігіттің бір шығары» да ойда болса керек: «Ақыры ойладым: осы ойыма келген нәрселерді қағазға жаза берейін, ақ қағаз бен қара сияны ермек қылайын, кімде-кім ішінен керекті сөз тапса, жазып алсын, я оқысын, керегі жоқ десе, өз сөзім өзімдікі дедім де, ақыры осыған байладым, енді мұнан басқа ешбір жұмысым жоқ» [4, 96-б.]. Ақынның «бұларды жөңдеймін деуге, жөнделер, үйренер деген үмітім де жоқ» [4, 105-б.] дегеніндей, өмірінде осылайша өкінгені мен күйінгені көп болса да, артында қалдырған асыл мұрасы аса құнарлы әрі тәлім-тәрбиеге толы болған. Абайдың айналасы, төңірегіндегі замандастарынан бастап, бүгінгі ұрпақ, келер адамзаттың бәріне бірдей арналған игілікті мұрасы – адамгершілік насихаты мен ілімі.

Енді ақындағы «түзеу» ұғымының адамшылық, адамгершілікпен байланысты болатыны және ақын қолданған «түзеу» сөзінің мақсаты – адамгершілік екені туралы біріер ой айтқан жөн болады. Ақын туындыларындағы ойлар бойынша, Құдай жолының – адамшылық, адамгершілік екеніне көзіміз жеткен. Қырық үшінші қарасөзінде ақынның «адам ұғылы екі нәрсебірлән: бірі – тән, бірі – жан» [4, 160-б.] деп жазатынындай, адам жаратылысы мен болмысының екі жағы болады. Соның формалық, мәндік жағы – адамшылық, адамгершілік те, материалдық, сыртқы құбылыстық жағы – тән мен дене. Адам үшін ішкі мәні маңызды, өзекті. Құдай жолы – адамшылықтың шегішеті, шыңына жету қиын, ақын айтқандай, «...сол ниһаятсыз жолға аяғыңды берік бастың ниһаятсыз құдаға тақырып хасил (жақындық табу) болып хас (нағыз) езгу құлдарынан болмақ үміті бар, өзге жолда не үміт бар?» [4, 151-б.]. Өмірде адам баласы қызығып құмартатын, ұмтылып соңына түсіретін неше

түрлі игілік бар, солардың әрбірі адамды қызықтырып өз жолына тарта береді. Біраз адам елігіп адасып та жүреді. Мұны да Абай ескеріп былай дейді: «Кейбіреулердің бар өнері, мақсаты киімін түземек, жүріс-тұрысын түзетпек болады да, мұнысын өзінше бір дәулет біледі» [4, 151-б.]. Абай мұны қолдамайды, адам үшін маңызды, мәртебелі іс санамайды. Адам баласы сыртын түзеумен қадірлі, қасиетті болмайды, себебі оның қасиеті мен мәні – ішінде, мәнінде, адамшылық қалпында. Абай жазғандай, «Сыртқа қасиет бітпейді, алла тағала қарайтұғын қалыбына, боямасыз ықласыңа қасиет бітеді» [4, 151-б.]. Ал бұл – адамгершілік қалып, қасиет. Абай ұғымындағы таза мұсылман, толық адам – адамгершілігі толысып жетілген адам. Демек ақынның «түзеу» әрекеті имандылықты, адамгершілікті жетілдіруді көздейді. Мұны ақын айтқан мына ойдан байқауға болады: «...Егер де осы екеуіне бұлдыр сеніп отырса, енді неге сендіре аламыз. Оны қайтіп түзете аламыз? Оларды мұсылман деп, қалайша иманы бар ғой дейміз» [4, 131-б.]. Адамшылық, адамгершілік – Құдай жолы екенін айтқан Абай Алланың да қалауы – бұзықтық, қиянаттан аулақ болып, ізгілік, жақсылыққа жақын болу екенін жазады: «Тамам жұртқа бұзық болма, түзік бол деп жарлық шашып, жол салады екен» [4, 125-б.]. Абай үшін түпкі мақсат – «махаббат қылса тәңрі үшін», Құдай жолы. Ал осы ниһаятсыз, өлшеусіз Құдай жолына адам баласы адамшылығы, имандылығы арқылы қадам басады, сөйтіп таза мұсылман, толық адам болуға бет алады. Имандылық пен адамшылық, адамгершілік – бір-бірімен ұқсас егіз ұғымдар, екеуі де адамға ғана тән қалып пен қасиет. Мұсылмандықтың бес парызы ішіндегі иман да, Абайдың ізденіп тапқан имани гүлі де – Алла жолы – адамшылықты танытады. Алла берген ақылы барда адам баласы танып білуі мен ойын жетілдірмей жүре алмайды. Имани гүл де – ақынның сондай ақыл-ой ізденісінен туған адамгершілік ілімі. Және ақынның имани гүл ілімі мұсылмандықтың парызымен бағыттас, мәндес, мазмұндас. «Абайдың діні – сыншыл ақылдың шартты діні» деп М.Әуезов тұжырымдағандай, мұның шындығы ақынның имани гүл ілімі мен Алланың сегіз сипатынан ақылды алып, оған өз тарапынан рақым мен әділетті қосып, Алланы осы үш сипаттың иесі ретінде танытып, одан жәуанмәртлік ілімін жасауынан көрінеді. Жәуанмәртлік ілімі – Алланың үш сипатын бетке алып



өнеге еткен адамгершілік негізі екенін жоғарыда айттық. Имани гүл де – мұсылмандықтың иманы негізінде ақынның ақылы мен жүрегінен туып пайда болған төл таным.

Махаббатпен жаратқан адамзатты  
Сен дес сүй ол алланы жаннан тәтті.  
Адамзаттың бәрін сүй бауырым деп,  
Және хақ жолы осы деп әділетті.

Осы үш сүю болады имани гүл,  
Иманның асылы үш деп сен тахқиқ (анық, рас) біл.  
Ойлан дағы, үшеуін таратып бақ,  
Басты байла жолына, малың түгіл.

Дін де осы, шын ойласаң, тағат (құлшылық) та осы,  
Екі дүние бұл тасдиқ (растау) – хақтың досы.  
...Бастапқы үшін бекітпей, соңғы төртті  
Қылғанменен татымды бермес жеміс.

...Істің басы – ретін танымақтық,  
Иман білмес тағатты қабыл демен.  
Мүмин болсаң, әуелі иманды бол,  
Бендеге иман өзі ашады жол

...Распенен таласпа мүмин болсаң,  
Ойла, айттым, адамдық атын жойма [3, 247-248-бб.]!

Абай жиі айтатын «түзеу» әрекеті осы имандылық пен адамшылықты көздеп, адам үшін ең қасиетті парыз – адамгершілік жағынан жетілу мен кемелденуді танытады.

### **Адамгершілік – ахиреттің де азығы**

Абай шығармаларында мол жырланып, жүйелі түрде сөз болатын адамгершілік жайы ахирет ұғымымен тығыз байланысты. Ақынның «дүниеге дос ахиретке бірдей болмас» [3, 178-б.] деуіне қарағанда, «дүниеге дос» болу мен махаббат, адамшылыққа жақын болып, оларды артық көру, асыл санау – екі бөлек нәрсе. Ақын жазғандай, «мал таппақ, мақтан таппақ, ғиззат-хұрмет таппақ секілді нәрселердің махаббатыбірлән

ғылым-білімнің хақиқаты табылмайды» [4, 137-б.]. Ғылым-білімнің адамшылық, адамдыққа бастайтыны белгілі. Тән қуатымен табылатын дәулет-байлық пен жан қуатымен табылатын ақыл, білім-ғылым — адам баласының алдында тұратын екі түрлі жолдың нәтижесі. Сау, таза ақылмен ойлар болсақ, ахирет әсте о дүниенің ғана қамын ойлаушылық емес, бұ дүниемен қоса сол дүниеде де серігің, тірегің болар иманыңды ойлап, осы өмірде Алла жолы — адамшылық, адамгершілікпен өмір сүру.

Дүниеге дос ақиретке бірдей болмас,  
Екеуі тап бірдей боп орныға алмас.  
Дүниеге ынтық, махшарға амалсыздың  
Иманын түгел деуге аузым бармас [3, 178-б.].

«Дүниеге ынтық, махшарға амалсыздың» мағынасын білмек керек. Яғни осы өмірде дүниеге дос, дүниеге ынтық болып жүрген дүниеқоңыз адамның бұ дүниедегі адамшылығы да ақсайды, о дүниедегі имансыздық халі де ахиретін ауырлатады. Сөйтіп осы өмірдегі дүниеге достықтың екі түрлі залалы бар, біріншісі — бұ дүниедегі адамшылықтан айырған абыройсыздығы, екіншісі — о дүние тозақ отыны етер имансыздыққа ұшыратуы. Бұ дүниедегі өміріміз — миллиондаған жылдардың ішіндегі қас қағым сәт, өзгесінің бәрі бізге қыры-сыры беймәлім, алайда ақылдылар ақиқат деп танитын кейінгі өмірде өтеді. О дүниенің, ахиреттің қамын жеп, жайын ойлап, бұл өмірде етек-жеңінді жиып адамшылықпен жүру — екі дүниеге де пайдалы, қажетті абырой мен азық. Абай отыз бесінші қарасөзінде адам пенденің бұл дүниеде біліп-білмей «ғиззат-хұрмет алмақ үшін, қажы болмақ үшін» және «құдай тағаланың разылығын таппақ үшін» өмір сүргендердің махшарға барғандағы халін салыстыра әңгімелеген. Алла тағала адам баласына артықша махаббаты мен хикмет, шеберлігін арнап жұмсауымен көп жақсылық жасаған. Осының өтеуі ретінде адам баласының Құдай жолымен жүріп иманды, адамгершілікті болатын жөні бар-ақ. Бірақ келтелігі мен нәпсісі күшті болып Құдай жолынан бұра тартып кететіні бар. Абай айтуымен жеткен мына Алла сөзінің ақиқатына титтей де күмән келтіруге болмайды, аздап ұзақтау болса да, ұсынамыз, дүние қамымен болғандарға айтқаны: «Сендер дүниеде қажеке, молдеке, сопеке, мырзеке, батыреке аталмақ үшін өнер қылып

едіндер, ол дүниенің мұнда жоқ. Сендердің ол қызықты дүниені харап болған, бірге қылған өнерлерің де бітті. Енді мұнда құрмет алмақ түгіл, сұрау беріндер. Мал бердім, өмір бердім, не үшін сол малдарыңды, өмірлеріңді бетіңе ахиретті ұстап, ден ниетің дүниеде тұрып, жұртты алдамақ үшін сарып қылдыңдар?» [4, 132-133-бб.]. Ахирет – махшардағы, о дүниедегі абыройың, жақсы халің сияқты. Өкінішке орай, көп адам о дүниедегі абыройың, ахиретін ойлай бермейді, мал мен мақтан, дүние құлы болып кетеді. Абайдың көздегені – бұл дүниедегі адамгершілік, абырой мен ахиреттегі имандылық пен Алла ризашылығына ие болған жақсы халі. Имандылық та – адамшылық, адамгершілік – ізгілік, асыл қасиеттердің жиынтығы болса, Абай жазғандай, асыл қасиеттің бірегейі: «Біздің қазақтың өзінің мақалы да бар «ұят кімде болса, иман сонда» деген. Енді бұл сөзден білінді, ұят өзі иманның бір мүшесі екен... Ұят деген адамның өз бойындағы адамшылығы иттігінді ішіңнен өз мойнына салып, сөгіп қылған қысымның аты» [4, 133-134-бб.]. Иман – адамның бұл өмірдегі адамшылығы, абыройы болумен бірге о дүниедегі ахиреттің де азығы. Және ұят – иманды кәміл ететін асыл қасиеттердің бірегейі болса да, оның жалғыз өзі емес, иман барша адами жақсы қасиеттермен толысады. Иман – негізі діни мазмұндағы категория, ал ахирет – бұл дүниеге қарсы о дүниені танытады. Әйтсе де ахиреттің қамы бұл дүниеде жасалады. Бірыңғай ахиреттің қамымен кету – бұл өмірді ұмыту болады. Бұл дүниенің қамы мен адамдар игілігін ойлаушы хакімдерді артық көретін Абай пайғамбарлар мен әулиелер жайлы «бірақ ұхрауи (ахиреттік) пайдасын ғана күзетті» [4, 145-б.] деп, олардың бір жақты ұстанымдарына қынжылғандай болады. Адам баласының жаратылысы екі жақты болуы себепті ол – дүниенің де, адамшылықтың да қамын ойлайды, әрине бірінің ғана қамымен кету адам өмірін толыққанды мәнді етпейді. Ет пен сүйектен жаралған адам баласы тәнін жанына бас ұрғызып әрі баспана етіп, адамшылығына басымдық беріп өмір сүреді. Адамшылық иман түрінде азық болып ахиретке жетсе, мал мен байлық, дүние осы өмірде қалады. Ақын «не дүниеде, не ахиретте басы бір ауырмай», «не дүние шаруасына, не ахирет шаруасына» [4, 100-б.], «ғылымсыз ахирет те жоқ, дүние де жоқ» [4, 107-б.], «не ахиретке, не дүниеге жарамды», «не дүниеге, не ахиретке не

пайдалы» [4, 112-б.] деп, бұл өмірдің екі шегі қиянат пен қайырым сияқты дүние мен ахиретті де егіз түрде қатар атап қолданады. Сөйтіп ахирет – өлшеулі өмірден кейінгі мәңгілік мекеннің атауы, тәнсіз рухтың халі. Ал ахиреттің жайлы болуы осы өмірдегі адамшылық, адамгершілік қалыпқа тәуелді: «әддү-ния мәзрәгәтул – ахирет (дүние ахиреттің егіні) дегендей, ахиретке егіндік болатын дүние сол» [4, 148-б.], яғни хақимдердің адамдар игілігі мен жақсылығын көздеп жасаған қайырымы мен адамшылық, адамгершілік істері – ахиреттегі жақсы, жайлы хал мен күйдің кепілі. Адамдардың ахирет қамын ойлаумен күн кешуі – олардың осы дүниеде адамгершілікпен өмір сүруін танытады. Тағы да қайталауға мәжбүрміз, адамшылық пен адамгершілік – осы өмірдің абыройы болумен бірге ахиреттің де азығы. Ахирет – өз мән-мазмұнымен бірге адам баласының бұ дүниедегі абыройы мен адамгершілігі.

Адамшылық, адамгершілік – жақсы, ізгі, асыл қасиеттердің жиынтығы. Ақынның мына өлеңіндегі «жүрек» сөзінен – адамгершілікті, «асыл тастан» – жақсы, ізгі қасиеттерді ұғуға бейімбіз:

Жүрек – теңіз, қызықтың бәрі – асыл тас,  
Сол қызықсыз өмірде жүрек қалмас.  
Жүректен қызу-қызба кете қалса,  
Өзге тәннен еш қызық іс табылмас.

Достық, қастық, бар қызық – жүрек ісі,  
Ар, ұяттың бір ақыл – күзетшісі.  
Ар мен ұят сынбаса, өзге қылық,  
Арын, алқын – бұл күннің мәртебесі [3, 249-б.].

Абай шығармаларындағы «жүрек» сөзінің мән-мазмұны ауқымды әрі астарлы. М.Мырзахметұлы жазғандай, ақын шығармаларындағы «жүрек» сөзінің гуманистік мән-мазмұны басым көрінеді [8, 116-119-б.]. Бұрынғы-соңғы философтардың жазуында, адамшылық, адамгершілік қасиеттер ақыл мен жүректен бастау алып, осы екі екеуімен байланысты екі топқа жіктеледі: ойшылдық, интеллектуалдық және этикалық қайырымдылықтар мен қасиеттер. Абай айтатын «қайрат» пен бұрын-

ғы даналар тілге тиек ететін «тән» адамшылық пен адамгершілікке тікелей болмаса да, жанамалап келіп ықпал жасайды. Мысалы, танып білу мен адам болуға бастайтын сыртқы бес сезім мүшесінің тәнде орналасуы мен көптеген ізгі ниет пен әрекетті жүзеге асыруға тәннің де көмегі қажет болатыны осыны танытады. Ал рухани сапа ретіндегі нағыз адамгершілік – ақыл мен жүректен туатын асыл қасиеттер арқылы қалыптасады. Абай ұғымындағы жүрек – әділет бастаған көптеген асыл қасиеттердің бастауы мен мекені болумен бірге адамшылық қалып пен адамгершілік қасиетті тиянақтап бекітуші, әрі адамгершіліктің биік шыңына жеткізуші. Адам болу мен адамгершілік қалыпты қалыптастыруда жүректің орны жайлы Абай былайша толғанады: «Рақымдылық, мейірбандылық, уа әрбір түрлі адам баласын өз бауырым деп, өзіне ойлағандай ойды оларға да болса игі еді демек, бұлар – жүрек ісі, асықтық та – жүрек ісі... Айтқанға көнгіш, уағдаға тұрғыш, бойын жаманшылықтан тез жиып алғыш, көштің соңынан итше ере бермей, адасқан көптің атының басын бұрып алуға жараған, әділетті ақыл мойындаған нәрсеге қиын да болса, мойындау, әділетті ақыл мойындамаған нәрсеге оңай да болса, мойындамау – ерлік, батырлық осы [4, 110-б.]. ...жан менде мекен қылады, менсіз тіршілік жоқ. Жұмсақ төсекте, жылы үйде тамағы тоқ жатқан кісіге төсексіз кедейдің, тоңып жүрген киімсіздің, тамақсыз аштың күй-жәйі қандай болып жатыр екен деп ойлатып, жанын ашытып, ұйқысын ашылтып, төсегінде дөңбекшітетұғын – мен. Үлкеннен ұят сақтап, кішіге рақым қылдыратын – мен... әділет, нысап, ұят, рақым, мейірбаншылық дейтұғын нәрселердің бәрі менен шығады... мен жүректі жақтадым. Құдайшылық сонда, қалпыңды таза сақта, құдай тағала қалпыңа әрдайым қарайды деп кітаптың айтқаны осы» [4, 113-114-б.]. Адам баласы үшін танып білу мен қауымдасып өмір сүру өте маңызды әрі адамшылық болмысының алғышарты. «Ақылға сәуле қонбаса, хайуанша жүріп күнелтпек» дегендей, адам баласы танып білмесе, асыл жаратылысқа айналып, өзіне тән биік болмысын сақтай алмайды. Екіншіден, адамшылық қалып пен қасиетті таныту ең болмағанда екінші бір адаммен қарым-қатынасқа енгенде ғана мүмкін болады. Оқып-тоқып, өрелі ойлыларды үнсіз тындап жүріп ақылды болу біршама мүмкін болса да, жүректен бастау алар әділет, ар-ұят,

қанағат-ынсап, рахым-мейірім қасиеттерін адамдармен қарым-қатынасыз таныту мүмкін емес. Сол үшін де Аристотель, әл-Фарабилер қауымдасу мен қоғамдасуды – адам болу мен адамгершіліктің алғышарты мен кепілі деп білген. Сөйтіп ақыл арқылы жан қуаттарының көмегімен танып білуден байқағыштық, зеректік, естілік, білімділік, ғалымдық, ойшылық, ақылдылық, даналық сияқты интеллектуалдық, ойшылдық қасиеттері (қайырымдылықтары) қалыптасса, адамдармен өзара қарым-қатынас жасап жақсылық, қайырымдылық көрсетуден әділет, ар-ұят, рахым-мейірім, қанағат-ынсап, сүю, махаббат секілді этикалық, қайырымды қасиеттер туады. Адам болмысындағы тән мен дене жалпы жаратылысымыздың түгелдігі мен толықтығы үшін және дүнияуи тірлігімізде біздерге тірек болу тұрғысынан қаншалық қажет болса да, адамшылық қалып пен адамгершілікті негізі, ақыл мен жүректен бастау алатын қасиеттер жасайды. Осы орайда Абайдың адамгершілік танымы әсіресе оның жәуанмәртлік ілімі арқылы танылатынын айрықша атап өтеміз. Абай өзінің бұл ілімін ең озық, ең кемел, ең құдіретті Алланың сипаттары мен ізгі, көркем есімдерін әңгімелеуден туындатып барып тұжырымдаған: «Енді біздің бастағы тағриф (тану) бойынша құдай тағала ғылымды, рақымды, ғадаләтті құдіретті еді. Сен де бұл ғылым, рақым, ғадаләт үш сипатбірлән сипаттанбак: ижтиһадің (талап) шарт еттің, мұсылман болдың һәм толық инсаниятың (адамгершілік) бар болады. Белгілі жәуанмәртлік үш хаслат (сипат) бірлән болар деген...» [4, 145-б.]. Ақын тұжырымдаған жәуанмәртлік іліміндегі ақыл – ойшылдық, интеллектуалдық қасиеттердің жиыңтық өкілі болса, рақым мен әділет – жүректен бастау алар этикалық, қайырымды, ізгілікті қасиеттер. Абайдың «мен мұнда сіздерге төртеуін білдіремін. Оның екеуі – ғылым, құдірет. Сегіз сипаттан қалған алтауы – бұларға шарх (түсінік беру)» дегеніндей, адамшылық пен адамгершілікті құрайтын барша асыл қасиеттер жәуанмәртлік іліміндегі ақыл, рақым, әділеттен бастау алады және солар арқылы толысып, тұтастанып танылады. Адамшылықтың мұндай өзегі мен мәнін тауып, тану талабы Аристотельде калогагатия, Шәкәрім ақында ұждан анығы арқылы көрініс тапқан. Философия мен ғылымның өзі мәселенің біршама айқын көрініп тұрған сыртқы құбылысынан бастау алып, көбіне өзегінде құпия болып

жасырынып жататын мәніне қарай дендей, тереңдей енуімен ерекшеленеді. Осы орайда Абайдың жәуанмәртлік ілімін – адамгершіліктің мәні мен өзегі, негізі, ал имани гүлді оның (адамгершіліктің) биік шыңы деп танысақ болады. Алладан өзгенің бәрі де құрамдас бөлшектердің бірігуінен пайда болады. Адамгершілік те – жеке асыл қасиеттерден құралып, жиналып барып пайда болады. Содан да Абай адами асыл қасиеттерді әр қырынан әрқалай дәріптеумен болады. Соның бірқатарын ақынның мына сөздерінен байқауға болады:

Жолдастық, сұхбаттастық – бір үлкен іс,  
Оның қадірін жетесіз адам білмес [3, 36-б.].

Ақыл керек, ес керек, мінез керек,  
Ер ұялар іс қылмас қатын зерек [3, 36-б.].

Ары бар, ақылы бар, ұяты бар,  
Ата-ананың қызынан ғапыл қалма [3, 37-б.].

Көкірегінде қаяу жоқ, қиянат жоқ,  
Қажымас, қайта айнымас қайран тату! [3, 37-б.].

Пайда ойлама, ар ойла,  
Талап қыл артық білуге.  
...Алыс та болса, іздеп тап  
Кореннойға кіруге [3, 49-б.].

Құдай берген бұл достық – кәннің (күш, қуат) бірі,  
Мұңдасқанда қалмайды көңіл кірі [3, 54-б.].

Ынсап, ұят, ар-намыс, сабыр, талап,  
Бұларды керек қылмас ешкім қалап.  
Терең ой, терең ғылым іздемейді,  
Өтірік пен өсекті жүндей сабап [3, 64-б.].

Ынсап, ұят, терең ой  
Ойлаған жан жоқ, жауып қой [3, 86-б.].

Адалдық, ақыл жасынан  
Қозғапты, тыныштық бермепті,  
Мал түгіл, жанға мырза еді...  
Әділ, мырза, ер болып,  
Әлемге жайған өрнекті.  
...Дүниеге көңлін бөлмепті.

Жарлығына алланың  
Ерте ойлаған көнбек-ті [3, 179-б.].

...Әділеттік, арлылық, махаббат пен –  
Үй жолдасың қабірден әрі өткенде [3, 212-б.].

Бұл өмірдің қызығы махаббатпен –  
Көрге кірсең үлгілі жақсы атақпен.

Жүректен ізі кетпес қызық көрсек,  
Жақсылықты аянбай жұртқа бөлсек.  
Жақынның да, жардың да, асықтың да  
Бәрінің де қызығын көріп білсек [3, 221-б.].

Ақын дәріптесін, сақтандырсын, әйтеуір ол жырлаған осы жолдарда адамшылықты жасайтын асыл, ізгі қасиеттер көрініс тапқан. Біз үзіндіні көптеу ұсынып жібергендей көрінсек те, бұлар – ақын дәріптеген асыл қасиеттердің аз бөлігі ғана, теңіздің дәмі тамшысынан дегендей, ақын насихаттаған адамгершіліктің ең өзекті өкілдері ғана. Абай өлеңдерінде сөз еткен өзекті ойларын қарасөздерінде де жүйелі дамытып отырады. Бұл – ақын ойының мақсаттылығын танытады. Ақын ұғымындағы құдайшылық пен адамшылық сабақтас, үндес мазмұнда келеді. Адамшылық – ең озық, ең кемел Құдайдың өзі қалаған, пенделеріне де өнеге еткен жолы. Болмысы биік, ұқсасы, ортағы жоқ аса рахымды, шексіз мейірімді, құдіретінде шек, шекара жоқ Алла барша Барлықты адаммен қоса жаратушы және несібесін де беріп жарылқаушы. Жарату мен жарылқаудың өзі – өлшеусіз қайырымдылық. Абай жазғандай, «алла тағалада болған құдірет – ғылым һәм рақымет [4, 141-б.]. Алладағы құдірет пендесіндегідей бір ғана күш-қуат, тек қана қайрат емес, ғылымды, рақымды, әділетті құдірет. Адамдағы ақылсыз, рақымсыз күш-қуат пен қайрат – айуанда да бар дене мен тәннің «тумасы» және ол ішіп-жеу, ұйықтау, жыныстық қалаудың ғана иесі. Адам – тәнінен жоғары тұратын ақылы мен жүрегінің қасиеттерімен ғана биік, бекзат болмыс. Сондықтан да Абай қарасөздерінде көбіне құдайшылықпен бірге ақыл мен ар-ұятты өлшем, ұстаным мен өнеге етіп отырады: «Бұлай болғанда, күлкіге салынған кісі не шаруадан, не ақылдан, не ұят келерлік істен құр, ғафил көп өткізіп отырса керек» [6, 100-б.], «Әйтпесе, құдайға терістіктен,



не ар мен ұятқа терістіктен сілкініп, бойын жиып ала алмаған кісі... тәуір түгіл, адам ба өзі?» [4, 111-б.], «Бұл бір ақыл үшін, ар үшін болсын» [4, 130-б.]. Мұндағы ақыл, ар мен ұят – адамшылықты жасайтын асыл қасиеттер. Ақынның ұят жайлы ойы мынадай: «Ұят деген адамның өз бойындағы адамшылығы иттігінді ішіднен өз мойнына салып, сөгіп қылған қысымның аты» [4, 134-б.]. Адам баласының көрік-келбеті мен дүние-байлық, түрлі материалдық заттарын малданып өзін зор, өр санамай, керісінше, бір-бірін бауыр, тең, бірдей көріп жақын, тату, туыстай болуы – жақсылық, адамшылық. Адамнан өзге ешбір жаратылыста рухани болмыс жоқ және олардың бәрі де тек қана тәни жаратылысымен ерекшеленеді. Ал адамды айрықша болмыс ететін – оның өзіне ғана тән, өзіне ғана тиесілі адами асыл қасиеттері ғана. Мұны ақын он сегізінші қарасөзінде былайша танытады: «Тегінде адам баласы адам баласынан ақыл, ғылым, ар, мінез деген нәрселермен озбақ. Онан басқа нәрселерменен оздым ғой демектің бәрі де – ақымақтық [4, 114-б.]. Демек бұл ақыл, ғылым, ар, мінез – төрт қасиет – адам баласының өзіндік болмысы болып табылады. Әл-Фараби адам пайдаланар игіліктердің ең озығы мен биігі – Бақытты әр нәрсенің осындай өзіндік болмысымен байланыстырады: «Бақыт – әр нәрсенің де өз болмысына сай болуы және сол болмысын баянды ету» [6, 238-б.]. Яғни адам – ақыл, ғылым, ар, мінез қасиеттері бар болып кемеліне келуімен бақытты болмақ.

### **Толық адам – адамгершілік ілімінің құбылысы**

Абайдағы адамгершілік ілімі оның өзі тұжырымдап тапқан толық адам танымымен тығыз байланысты дейміз. Әр нәрсенің мәні, өзегіне дейін әуелі оның сыртқы көрінісі, құбылысы (явление) көзге бұрынырақ ілігеді. Ғылыми ізденістің мәні де – сол құбылыстан бастап өзегіне қарай дендей еніп терендей беруде. Болмыстың мәні мен өзегі оның сыртында жарқырап танылып тұрмайды, керісінше көз жетпес, оңайлықпен ой да жетпес түкпірінде «тығылып», жасырынып жатады. Тіпті біреулер мәселенің құбылысын да біраз уақытқа дейін бар болмыс ретінде білмей, танымай жүреді. Мекемтас Мырзахметұлы

ағамыз өзінің ұзақ жылғы ізерлі ізденісі [7; 8; 14; 15] арқылы Абайдағы адамгершілік танымның аты мен затын айқындады. Бұған дейін Абайдың өзіндік Толық адам танымы біршама ұзақ уақыт мән-мазмұны мен жүйесі жағынан айқындалып, зерделенбей келді. Мұхтар Әуезов «Абай адамгершілікті, моральдық философияны барлық жайдан жоғары қояды» [2, 179-б.] деп, Абай шығармаларындағы адамгершілік танымның айрықша орны мен сипатын айқындап берсе де, оны арнайы ізденіс нысаны етіп ілгерілей, ізерлей зерттеп кетпеді. Әрине мұның заман мен жағдай, саясат пен идеология және уақыт пен өмір өлшеуілігіне қатысты өзіндік себептері де бар. Әйтсе де Абайдың өмірі мен шығармашылығына байланысты мәселенің басым бөлігі М.Әуезовтің тереңдей зерттеп я төбесін көрсетіп кеткен ойларынан бастау алып дамып жататыны анық. Мекемтас ағамыздың өз іргелі зерттеуін «Мұхтар Әуезов және абайтану проблемалары» деп атауы да тегін емес. Бүгінде біз де өз ізденісімізді көбіне осы екі ғалымның ойларынан азық алып, қуат тауып дамытып келеміз.

Абайдағы адамгершілік танымның толық адамнан бастау алып, имани гүлмен шектелетін өзіндік жүйесі бар. Мұны білу аса маңызды. Әл-Фараби «Бақыт жолын сілтеу» атты трактатында ақыл-парасат, білу мен әрекет, теория мен практикаға қатысты мынадай ой айтыпты: «Адамның білуіне тиісті барлық нәрселерді ол жақсы ақыл-парасат арқылы біледі деймін мен. Ақыл-парасаттың екі түрі болады: бірінші түріне тән қасиет тек білу ғана, бірақ әрекет бұған тән емес... Екіншісінің қасиеті білу және әрекет ету болып табылады... Білім мен әрекет тән болған [түрі] – ақырына дейін жеткізіліп аяқтаушы әрекет. Егер бұл нәрселерді білудің қасында әрекет болмаса, онда ол білімде негіз жоқ, қасиет жоқ» [5, 33-б.]. Яғни жақсы-жаман, пайдалы-пайдасыз нәрселерді білудің соңынан жаманынан қашып, асылына асық болатын әрекет жалғаспаса, біліп танудың да құны болмайды. Және біліп алған игілікті де ізгілікті білімді, ақиқатты әртүрлі себеппен өмірлі ете алмау адамның адамшылығына зор сын болады. Мұндай жағдай өмірде біршама жиі ұшырайды: көбіміз орынды, дұрыс, ақиқат жайды жап-жақсы білеміз, бірақ оны орындауға келгенде осалдық, жігерсіздік танытамыз. Әл-Фараби мұндай адамдарды – құл адамдар деп атайды: «Ақыл-

естің тілегенін [жасауға] парасаты мен батылдығы жететін есті адамдар болады. Мұндай [адамдарды] біз әдетте, өзінің лайығынша, ерікті адам деп атаймыз... ал тек ақыл-есі ғана жетіп, батылы бармайтындарды жаратылысынан құл адамдар дейміз» [7, 29-б.]. Әйтпесе адамгершілік пен әдептіліктің, жақсылық пен жамандықтың қадір-қасиеті мен олардың нендей нәрсе екенін әркім де біледі, бірақ «ақымақ көп, ақылды аз» дегендей қауымда адамдық пен тазалық қасиетін сақтап, баянды етіп жүретіндер тым көп емес. Пенделік пен келтелік болмысын танытып, әйтеуір бір тұстан мүлт кетіп сүрініп қалушылық – адамзат баласының қашанғы қалыпты жағдайы. Шындап келгенде, Абайдың барша туындылары адамзат баласын түрлі-түрлі қателіктен сақтандырып, адамшылық қасиетті жоғалтпауға, сөйтіп адамгершілікті дәріптеуге арналады. Мысалы, ақынның «Әсемпаз болма әрнеге» атты өлеңіндегі мына бір екі-ақ жолда төрт түрлі кесек әрекет айтылған және бұл екі тармақтың түйіні – келешекте болуы мүмкін қателіктен алдын-ала сақтандыру болады:

Пайданы көрсең, бас ұрып,  
Мақтанды іздеп, қайғы алма [3, 162-б.].

Мұндағы бірінші әрекет – адам баласының пенделікпен, келтелікпен «пайданы көріп» оңай олжаға тап болып тұратын жағдайы. Негізі, обал-сауапты біліп, қиянаттан қашық, жақсылыққа жақын болып жүретін адам еңбексіз келген пайдаға қызықпайды да құнықпайды. Екінші әрекет – еңбексіз табылған осындай пайдаға «құдай беріп қалды ғой» деп «бас ұра» құнығып кетушілік. Үшінші әрекет – оңай, жеңіл жолмен келіп жатқан пайдаға ие бола түсіп кісінің мақтан мен мастыққа салынуы, судың да сұрауы боларын болжап білмеуі. Ал «қайғы алу» – төртінші әрекет әрі алдыңғы айтылған әнтек әрекеттердің қайғылы, қауіпті нәтижесі, яғни мұндай теріс жолдағы кісінің қылмысы ашылып әшкереленуі. Өкінішке орай, мұндай жайсыз жағдай – тұрмыс пен шаруашылық, түрлі кәсіп пен қызмет саласындағы адамдарда жиі бола беретін үйреншікті, қалыпты көрініс. Бұрынғы-соңғы данышпандардың адам баласын соншалық ардақтай, дәріптей жүріп, арасында ащы ақиқатын да айтып адамды – айуанға теңестіріп қоятыны тегін емес. Себебі адамның

жаратылысы мен болмысында адамшылықтың да, айуандықтың да бастаулары бар. Мекемтас Мырзахметұлы ағамыз талай жылдар ізденіп жүріп ғылыми айналымға ендірген Абайдың толық адам ілімі – ақын дүниетанымының өзегі болып табылады. Ал ақындағы жалпы адамгершілік танымының тұрғысынан қарағанда бұл толық адам ілімі – Абайдағы аталы танымның, яғни адамгершілік танымның сыртқы қаңқасы, жалпы көрінген құбылысы дер едік. Себебі Абайдың айтуы бойынша, адам баласының толықтығы мен түгелдігі жаратылысы жағынан да, болмысы тұрғысынан да – адамдағы ақыл, қайрат, жүректің бірдей бар болған бірлігімен танылады:

Ақыл, қайрат, жүректі бірдей ұста,  
Сонда толық боласың елден бөлек.

Жеке-жеке біреуі жарытпайды,  
Жол да жоқ жарыместі «жақсы» демек.

...Біреуінің күні жоқ біреуінсіз,  
Ғылым сол үшеуінің жөнін білмек [3, 95-б.].

Шынында да адамның өзіндік жаратылысы мен болмысы аталған үшеуінің бірлігінсіз мүмкін болмайды, яғни адам баласы – жаратылыс ретінде түгел, толық, бүтін болмыс болмайды. «Ақылға сәуле қонбаса, хайуанша жүріп күнелтпек... Малда да бар жан мен тән, ақыл, сезім болмаса» [3, 227-б.] дегендей, ақыл-ойы, санасы жоқ адам – айуан болады. Құр тәнімен күнелткен ақылсыз адамның – айуан екенін Шәкәрім ақын да айтқан [16, 181-б.]. Адам жаратылысының тән мен ақыл және оларға қозғалыс пен тіршілік беретін жаннан тұратынын ежелгі ойшыл даналардың бәрі де бір ауыздан түйіндеп кеткен. Адам жаратылысының толықтығын танытатын Абайдағы үш қасиет осы тән, ақыл, жанды ойға оралтады. Әр кезде айтылғанына карамай бұлар ортақ ақиқатты танытады. Ежелгі даналар мен Абай айтқан бүтіндік пен толықтықты құрайтын үш құрамдас бөлік бұрынғы даналар мен Абайда аздап өзгешелеу аталғанымен, олар – мәні бір нәрселер: тән – қайрат, жан – жүрек, ақыл – ақыл. Тән мен қайраттың бір болатыны – екеуінің бірінсіз екіншісі болмайтын бірліктегі құбылыстар екендігінде. Адам мен

айуанда бірдей бола беретін тән мен денеде – қимыл-қозғалыс, күш-қуат, қайрат болады. Яғни қимыл-қозғалыс, күш-қуат, қайраттың шығар көзі, бастауы – тән мен дене. Осы материалдық тәніміздің болуы арқылы ғана біз періште емес, ет пен сүйектен жаралған дүнияуи жаратылыс боламыз. Періште нұрдан, шайтан оттан жаралған делінеді, оларда тән жоқ. Алла да – тәнсіз рухи болмыс. Мұны Абай отыз сегізінші қарасөзінде былайша танытады: «бір ғана құдірет пендеде болған қуат; құдірет – ғылым, ақылдан басқа болатұғын еді, алла тағалада болған құдірет – ғылым һәм рақымет» [4, 141-б.]. Ақынның осы тұжырымында Алла тағала мен адам арасындағы айырмашылық танылған, яғни Алла жоғарыда жазғанымыздай, тәнсіз рухи болмыс, Оның құдіреті мен рақыметі бір ғана рухи болмысынан бастау алады. Өйткені Алла тағала – бір жақты рухи болмыс. Ал адам баласы екі жақты қоспа болмыс, қимыл-қозғалыс, күш-қуат, қайрат – адамның тәнінен шығатын әрекеттер болса, ақылы мен ғылымы – біз анықтап білмейтін рухани болмысының жемісі мен нәтижесі. Ал үшінші құрамдас бөлік – жан, жүрек болмаса, тіршілік те, тану да болмас еді: «Жә, сен бұл ақылға қайдан ие болдың? Әрине, қайдан келсе де, жан деген нәрсе келді де, сонан соң ие болдың» [4, 123-б.]. Абайдағы Сократ атынан айтылған бұл түйін – діни наным ғана емес, ғылыми таным мен асыл ақиқат та. Бүгінге дейін жанның нақты нендей зат екенін дәлдеп айқындаған ешкім болмаса да, ақылмен бірге қимыл-қозғалыс пен тіршіліктің де жан арқылы жүзеге асатынын бұрынғы-соңғы даналардың бәрі де айтқан. Сөйтіп ақылымыз біздерді айуаннан артық, биік етіп адам атты асыл болмысқа айналдырса, тәніміз (қайрат) бізді періште, шайтаннан бөлекшелеп дүниелік, материалдық жаратылыс етеді. Адамзат баласын дүнияуилік етіп, жан-жануармен жақындастыратын – осы тәніміз бен одан шығатын күш-қайратымыз. Ал жан мен жүрексіз қозғалыс пен тіршілік болмайтынын қайталап айтамыз. Тіпті табиғат, әлемді зерттеумен айналысқан бұрынғы философтар жұлдыз, планеталар секілді аспан денелерін қозғалысқа келтіретін Жаратушы құдіретін – Әлемдік жан деп біледі. Қозғалыс пен тіршіліктен бөлек адамдағы танып білу әрекеті де жан қуаттары арқылы жүзеге асады. Адам баласы Абай жазғандай, жаратылысы жағынан осылайша ақыл, қайрат (тән), жүректің (жанның) бірлігі

арқылы толық, түгел болмыс болады. Біз осы тұжырымды әсіресе мән беріп, бекіте түсіп айтамыз. Яғни Абайдың толық адам танымы М.Мырзахметұлы ағамыз айқындап тұжырымдағандай, адамгершілік ілімі болумен бірге адам жаратылысының бірбүтін болмыс болған толықтығы мен түгелдігін де танытады. Ал Абайдағы толық адамның – М.Мырзахметұлы ағамыз зерттеп айқындағанындай ең әуелі адамгершілік ілімі екені талассыз ақиқат. Толық адам танымының – адамгершілік ілімі екені ақынның отыз сегізінші қарасөзіндегі мына ойынан айқын танылады: «Құдай тағаланың жолы деген жол ниһаятсыз (өлшеусіз) болады. Оның ниһаятына ешкім жетпейді. Бірақ сол жолға жүруді өзіне шарт қылып кім қадам басты, ол таза мұсылман, толық адам делінеді... Не түрлі болса да, я дүниеннен, я ақылыңнан, я малыңнан ғадаләт, шапағат секілді біреулерге жақсылық тигізбек мақсатың болса, ол жол – құданың жолы» [4, 151-б.]. Адам баласы кемелділік шыңы – Алла жолы – толық адамға ақыл, қайрат, жүректің бірлігі және көмегі, жәрдемімен ғана бет ала алады. Біз әдейі «жете алады» емес, «бет ала алады» деп отырмыз. Себебі Абай айтқандай, «Құдай тағаланың жолы деген жол ниһаятсыз (өлшеусіз) болады. Оның ниһаятына ешкім жетпейді», адамның адамшылығы «сол жолға жүруді өзіне шарт қылып қадам басуда» екен. Абайдың Шығысқа қатынасы мен адамгершілік ілімін Мекемтас Мырзахметұлы ағамыз айқындап танытып, нәтижесінде толымды, жемісті зерттеу жасаған [7; 8; 14; 15]. Ал біздің мақсатымыз жоғарыда жазғанымыздай, ақындағы адамгершілік ілімнің өзегіне қарай жол тартқан желісі мен жүйесін нақтылай ойға оралтып, оны абыройымызды арттыра адам болуда пайдалана білсек деген ниет. Әдетте адамдар күнделікті өмірі мен әсіресе қызметтерінде көбіне Абай атаған үш қасиеттің екеуімен ғана өмір сүріп, кәсіп етіп жүреді:

Қайрат пен ақыл жол табар,  
Қашқанға да қуғанға [3, 162-б.].

Сенбе жұртқа, тұрса да қанша мақтап,  
Әуре етеді ішіне қулық сақтап.  
Өзіңе сен, өзінді алып шығар  
Еңбегің (қайратың) мен ақылың екі жақтап [3, 214-б].

Шынында да адам кейіпіндегі жаратылыс — ақылы жоқта әлі адам емес. Жан құмары, жан қуаттарымен «ақылға сәуле қондырып» білмекке ұмтылмаған адам баласы «хайуанша жүріп күнелтпек» [3, 227-б.] дейді Абай. Ал адамзат «дүние мен ахиретке не пайдалы, не залалды» мен жақсы, жаманды ақылымен танып біліп жүріп өмір сүреді. «Бес дұшпаннан қашық болып, бес асыл іске асық болу» да ақыл арқылы жүзеге асады. Яғни адам баласы Абай айтқандай, қай кезде де «ақыл-мизан, өлшеу қылып» [3, 42-б.] өмір сүруге тиіс. Қайрат пен оның бастауы дене, тәнсіз де адами тіршілік толық болмайды. Тіпті жоғарыда жазғанымыздай, біздер ақылымызбен бірге тәніміздің болуымен де періште я шайтан болып кетпей, адам болғанбыз. Жаратылысымыз жағынан айуанға жақын біздердің ақылмен танып білуіміз де ең әуелі тәндегі бес сезім мүшесі (хауаси хамса заһири) арқылы басталады. Ал бұлар — танып білумен бірге адам болудың да алғышарты. Абайдың отыз сегізінші қарасөзінде «Махаббат — әуел адамның адамдығы, ғақыл, ғылым деген нәрселербірлән. Мұның табылмақтығына себептер — әуелі һауас сәлим һәм тән саулық» [4, 136-б.] деп, тәннің саулығы мен содан бастау алар сыртқы, ішкі сезім мүшелерін (көру, есту, иіс, дәм, дене сезінулері мен түйсік, ес, болжау, қиялдау, ойлау) айрықша атауы тегін емес. Орта ғасыр ақындары мен сопылар тәнді — нәпсі мен жамандықтың бастауы деп санаға да, Аристотель адам денесі мен тәнін — алғашқы игілік деп білген. Ал әл-Фараби нәпсісі жоқ адамды — ауру деп санаған. Шынында да ұйқысы қашқан, тамаққа деген тәбеті жоғалған, ұрпағымен көбеюге де қабілетсіз адамды қалайша сау деп білуге болады. Ішсем-жесем, ұйықтасам, көбейсем деп ұмтылу — адам тәнінің табиғи орынды қалауы. Абай жазғандай және бұрынғы даналар да түйіндегендей, «өлшеуін білмек — бір үлкен керек іс. Ойланбақ жақсы, іске тіпті салынып кеткен кісі ойын байлай алмай, қияли болып та кеткені болады. Ішпек, жемек, кимек, күлмек, көңіл көтермек, құшпақ, сүймек, мал жимақ, мансап іздемек, айлалы болмақ, алданбастық — бұл нәрселердің де өлшеуі бар. Өлшеуін асырса, боғы шығады» [4, 162-б.]. Осылай өлшеуін асырғанда ғана тәннің ішсем-жесем, ұйықтасам, көбейсем деген ұмтылысы игілікті, жақсылықты нәрсе болудан қалады да, жаман, жексұрын нәпсіге айналып кетеді. Әйтпесе тән Абай айтқандай, жанның қонақ үйі және

тәннен шығар қайратсыз «дүниеде еш нәрсе кәмететке жетпейді» [4, 112-б.]. Сөйтіп адамзат баласы надандық, білімсіздік, арсыздық, әділетсіздік, жалқаулық, еріншектік, қайғы-мұң, жоқшылық, тәжірибесіздік секілді сан түрлі жаманшылық пен кемшіліктен қашып құтыламын десе де, барлық, байлық, қуаныш, білім-ғылым, адамдық, абырой, бақыт сияқты жақсылық атаулының соңынан қуып, оларды иеленемін десе де, бұл жолда оларға Абай жазғандай, «қайраты пен ақылы жол тауып» беріп жәрдемдеседі. Қарапайым қызметші, шаруа, жұмысшыдан бастап әкім, министр, Елбасыға дейін – бәрі де «еңбегі (қайраты) мен ақылын» пайдаланып жұмсаумен кәсіп етеді, өмір сүреді. Қоғам мен мемлекетіміздегі әртүрлі әлеуметтік, туыстық топ өкілдері мен кәсіп, мамандық иелері дағды-қабілет, білім-ғылым, ақыл-ойы мен күш-қуат, қайратын пайдалана жүріп, кәсіптік, азаматтық, адамдық парыз-міндетін ілгерілі-кейінді, жақсылы-жаманды қалыпта атқарумен болады. Ақыл, білім, ғылымы мен күш-қуат, қайраты арқылы еліне игілікті қызмет етіп, абыройлы өмір сүріп жүргендер де баршылық. Әйтсе де адамдар арасындағы қарым-қатынас пен халық, ел қызметінде жүрген үлкенді-кішілі мансап иелерінің тірлігінде тазалық пен адалдық, әділдік пен обал-сауапты білушілік әркез сақтала бермейді. Білім, ғылымның игілігі мен жақсылығы мол, ақылдың да асыл қасиет екені ақиқат. Бірақ өкінішке орай, адам баласы білім, ғылымымен бірге тіпті асыл ақылын да жеке мүддесі мен өресіз қарау ісіне пайдаланып жүретіні бар. Абайдың ғылым атынан «жақсының, жаманның – екеуінің де сүйенгені сен, екеуінің де іздегенін тауып беріп жүрсін, соның жаман» [4, 113-б.] деп, ақыл жайлы сыншыл ойын білдіруі осыдан. Толық адам – Абай армандаған асыл адам. Ал өмір, тіршілігі мен кәсіп, қызметі саласында ақылы мен қайратын ғана пайдаланумен шектеліп, жүректен шығар ар-ұят, әділет-рахымы мен қанағат-ынсабын назардан тыс қалдырып жүретіндерді Абай «жеке-жеке біреуі жарытпайды, жол да жоқ жарыместі «жақсы» демек» деумен жарым адам санайтындай көрінеді. Сөйтіп Абайдың ойынша, адамдардың басым бөлігі пайдаланып тұтынумен тіршілік ететін бұл екі қасиет, яғни ақыл мен қайрат өз иесін шын мәнінде толық адам ете алмайды екен. Қоғам мен мемлекеттегі адамдар білім, ғылымы мен ақылының аздығынан гөрі жүректен шығар ар-ұят, әділет-рахым, қанағат-



ынсабының кемдігі мен жоқтығынан көбірек зардап шегеді. Абайдағы Толық адам ілімі де ақыл, қайратпен бірге осы жүректен шығар ізгі қасиеттерге көбірек иек артады:

Ақыл да, ашу да жоқ, күлкі де жоқ,  
Тулап, қайнап бір жүрек қылады әлек [3, 95-б.].

Қайрат пен ақыл жол табар,  
Қашқанға да қуғанға.  
Әділет, шапқат (жүрек) кімде бар,  
Сол жарасар туғанға.

Бастапқы екеу (қайрат пен ақыл) соңғысыз (әділет, шапқат)  
Біте қалса қазаққа,  
Алдың – жалын, артың – мұз,  
Барар едің қай жаққа [3, 162-б.].

Ашу мен күлкінің астарынан біз қайратты ұққандай боламыз, сонда ақын армандаған толық адам болуда жүректің жауапкершілігі мен үлесі әсіресе мол екені байқалады. Кейінгі өлең де қайрат пен ақылға жүректен шығар қасиеттер (әділет, шапқат) қосылғанда ғана адам болмысы мен өмірі абзал әрі абыройлы боларын байқатқан. Ақынның «әділет, шапқат кімде бар, сол жарасар туғанға» деуінен адам болмысының жүректен шығар қасиеттерсіз толық (адамгершілікті) болмайтынын ұғамыз және адам боп туған әрбір жанға да ақыл мен қайратын жүректен шығар әділет, шапқатпен ұштастыру жарасымды да абзал болмақ дегенді ұқтырады. Ал бұл үшеуінің бірлігінсіз болған тірлік – «алды – жалын, арты – мұз» болып тұйыққа тірелмек, иесі де абыройсыз болмақ. «Пайданы көрсе, бас ұрып, мақтанды іздеп қайғы алатын» адам да – айла мен амалға иек артып ақылы мен қайратына сенген, бірақ жүректен шығар ар-ұяты мен қанағатынсабынан көз жазып қалған осындай бейбақ жан. Ал «ақыл, қайрат, жүректі бірдей ұстаған» толық адамның қаншалық қасиетті жан екені мен адамшылық қалыптың көбіне жүрекпен тиянақталып, бекітіле түсетіні ақын айтқан мына ойдан әсіресе айқын танылады: «Осы үшеуің (ақыл, қайрат, жүрек) бір кісиде менің айтқанымдай табылсаңдар, табанының топырағы көзге сүртерлік қасиетті адам сол. Үшеуің ала болсаң, мен жүректі жақтадым. Құдайшылық сонда, қалпыңды таза сақта, құдай

тағала қалпыңа әрдайым қарайды деп кітаптың айтқаны осы» [4, 114-б.].

Сөйтіп Абай армандаған толық адам – «ақыл, қайрат, жүректі бірдей ұстаумен» қалыптасса да, адам болу мен абзал адамгершілік, толық адам – әуелі «тән саулық» (қайрат) пен «һауас сәлимнен» басталып, ақыл арқылы жетіле келіп, жүректен шығар қасиеттер арқылы тиянақталып беки түседі. Абайдағы адамгершілік танымның бастапқы көрінген құбылысы – «ақыл, қайрат, жүректі» қамтыған Толық адам ілімі болса, оның өзегі мен мәні – «асықтық та – жүрек ісі» дегендей, жүректен шығар махаббат пен сүю және осы сүюмен танылатын имани гүл ілімі.

Махаббатпен жаратқан адамзатты,  
Сен де сүй ол алланы жаннан тәтті.  
Адамзаттың бәрін сүй бауырым деп,  
Және хақ жолы осы деп әділетті.

Осы үш сүю болады имани гүл,  
Иманның асылы үш деп тахкик (анық, айқын, рас) біл.  
Ойлан дағы, үшеуін таратып бақ,  
Басты байла жолына, малың түгіл [3, 247-б.].

Абайдың отыз сегізінші қарасөзінің басында «Ықылас бірлән оқып, ұғып алыңыздар, аның үшін махаббатың толады. Махаббат – әуел адамның адамдығы, ғақыл, ғылым деген нәрселербірлән» [4, 136-б.] деп айтуында терең сыр бар. Бұл – Абайдың бұрынғы-соңғы ой-таным тарихындағы адамшылықты сүюмен сабақтастыратын таныммен таныстығын танытады әрі өзі де төл ізденісімен «адамшылықтың алды – махаббат, ғаделет сезім» [4, 164-б.] екенін тануға жеткен. Сөйтіп Абайдағы адамгершілік танымның биік шыңы (М.Мырзахметұлы) [7, 227-б., 230-231-б.] мен өзегі (М.Әліпхан) [17, 2-б., 23-б.] – сүю, яғни Алла мен адамзат және әділетті сүю, үш сүю, имани гүл. Абай ізденіп тұжырымдаған адамшылық та, ақиқат та осы. Ақын болсын, ғалым болсын, өз туындысында бір нәрсені қайта-қайта оралып келіп текке айта бермейді. Демек сол қайталаған ойында терең сыр бар я сол ойын әр қырынан танытып дамытқысы, тиянақтап бекіткісі келгені. Абайда да Толық адам іліміне бастау болған сөз, ой қолданыстары ертеректен ұшырай бастайды. Мысалы, «Сап-

сап, көңлім, сап, көңлім» өлеңін Абай бұрынырақ, М.Әуезовтің болжағанындай, жиырма-жиырма бес жас шамасында жазған. Міне осы өлеңінің өзінде-ақ Абай адам баласының екі жақты болмысына көңіл бөле бастаған. Жеңіл-желпі желігумен күні-түні қыз іздеп аңдыған өзі қатар жігіттерге ақын мынадай ақылын айтады:

Қыз іздесең, қалың бер,  
Мұным ақыл болмай ма?  
Көріп алсаң көріктіні,  
Тандап алсаң тектіні,  
Сонда көңіл толмай ма? [3, 17-б.]

Көрік пен келбет – тән көрінісі мен сұлулығы болса, тек – рухани болмыс пен адамшылық сапа. Адам болмысының мәні мен асылы – адамшылығы болса да, әсіресе жас адам, азаматтық өмірдің әзірге бастауында жүрген жастау жігіт өзі қызыққан қарсы жыныс өкілінің көркі мен келбетіне көңіл бөлмей тұра алмайды және бұл – айып та емес. Ақын ата-ананың ризашылығын алып, ата-баба дәстүрімен қалың мал беру салтын да назардан тыс қалдырмаған. Сөйтіп Толық адам танымына жанасымы бар алғашқы өлеңдегі «көріктіден» – қайратты, ал «тектіден» – ақыл мен жүректің ізгі қасиеттерін танимыз. Осы өлеңдегі мына жолдар да ақынның жас кезінен-ақ ақылды болғанын байқатады:

Дүние даяр өтерге,  
Ажал даяр жетерге.  
Хош, қыз алсын қойнына,  
Бейнет көрмей, дәулет жоқ [3, 17-б.].

Осындағы алғашқы екі жол жетіліп болмаған жас емес, көпті көрген дария-ақыл адамның ойынан туарға лайық ақиқат. Кейінгі екі тармақ та таптаурын, көпке мәлім емес, тың да тосын ойымен ерекшеленеді. Жеңіл ойлы өресіз жігіттердің көксегені – көбіне нәпсі қалауы, қыздың қойны. Ақынның мұнда айтып отырған «дәулеті» – адами баянды бақытты танытады. Ал «бейнет көрудің» астарында сүю жолындағы жан әрекеті жатыр. Тек мұнда лирикалық кейіпкер тән тілегі мен нәпсі қалауына шынайы

сүю, махаббатсыз «бейнет көрмей» жетуді орынсыз санайды. Тән тілегі нәпсіні терістеп, жан-жүректің қалауы мен «бейнеті» – сүюді артық көреді, адами шынайы бақыттың махаббат, сүюмен ғана келетінін ескертеді. «Қандай қызда ләззат бар жан татпаған» өлеңі де – ақынның ертеректе жазған шығармасы. Осындағы жігіттерді сынаған тұсында ақын оларды «ой таппаған», «мал таппаған» [3, 21-б.] деп кінәлайды. Ой табудан ақылдың ізденісі мен ішінара жүректің де қасиетін танысақ, ал мал табу – қайраттанып еңбек етумен келеді. Осылайша ақын адам болмысы мен әрекетінің бәрін қамтыған толықтығын танытып отырады. Біз ақын өлеңдерін М.Әуезовтің жүйелеген жылдары бойынша берілген ретімен қарап келеміз. Ендігі өлеңі – «Қартайдық, қайғы ойладық, ұйқы сергеу», мұнда да ақын толықтықты танытар үш қасиетті байқатып өтеді:

Адамзат тірілікті дәулет білмек,  
Ақыл таппақ, мал таппақ, адал жүрмек [3, 23-б.].

Адамзат арманы тірі болып өмір сүріп жүргенде ғана сәтіне қарай мүмкін болып орындалмақ. Осындай тіршілікте адам баласының өмірі оның ақылы, күш-қайраты және жүрегінің бірліктегі әрекетімен ғана толымды болып өтпек. Екінші тармақтан ақыл, қайрат, жүректің өзіндік әрекеттерін танимыз: жан қуатымен ақыл табу, күш-қайратпен еңбектеніп мал табу, жүректен шығар адалдықпен өмір сүру. «Адақанның алды – жөн, арты – сокпақ» өлеңіндегі мына әрекеттер де үш қасиеттің бәрін қамтыған толық адамның жарасымды тірлігін ойға оралтады:

Олардың жоқ ойында малын бақпақ,  
Адал еңбек, мал таппақ, жұртқа жақпақ [3, 32-б.].

«Жұртқа жақпақтың» мән-мазмұнынан ақыл мен жүректің әрекет нәтижесін болжауға болады. «Бір дәурен кемді күнге – бозбалалық» өлеңіндегі мына шумақтың да мазмұны адам болмысы мен әрекетінің толымдылығын танытады:

Демеңдер өнбес іске жұбаналық,  
Ақыл тапсақ, мал тапсақ қуаналық.

Қызды сүйсең, бірді-ақ сүй, таңдап тауып,  
Көрсө қызар, күнде асық – дуаналық [3, 33-б.].

Ақылды ақын, хакім Абай адам әрекеті жайлы қалай айтса да, әлімсақтан белгілі ақиқаттан ауытқымайды, қайта өз тарапынан сол ақиқатты өз танымы арқылы бекіте түседі. Әрі аз ғана аралықта туған санаулы өлеңдерінің бәрінде дерлік толық адамның қасиеттерін қайталай айтып отырады. Мұны кездейсоқтық деуге әсте болмайды. Адам баласы ақыл-есті, дені сау, ізгі ниетті болса, ол қалайда Абай айтатын ақыл, қайрат, жүректің бірліктегі әрекетімен өмір сүреді. Басқаша болуы мүмкін емес, себебі адамзат ойшылдары ерте кезден-ақ адам баласының жаратылысын тән мен жан және ақылдың бірлігі мен қосындысы ретінде танып келген. Абай сол аталы асыл ақиқатқа иек арта отырып, өз тарапынан жаңадан Толық адам ілімін тұжырымдаған. Және Абай ертедегі ойшылдардың адам жаратылысы туралы бұл танымын өзінің Толық адам атты адамгершілік іліміне айналдырып байыта түскен.

Мекемтас Мырзахметұлының пікірінше, Абайдың адамгершілік ілімі оның «Ғылым таппай мақтанба» өлеңінен басталады. Бұл өлеңнің мән-мазмұнына М.Әуезов те айрықша көңіл бөлген. Шынында да ақынның адамгершілік танымы оның осы өлеңі арқылы арнайы мақсат көздеумен мазмұнды баяндалған. Негізі, өлең ақынның адамгершілік танымын жырлауына қарамастан, тақырыбының «Ғылым таппай мақтанба» болып келуі тегін емес. Мүмкін бұл өлеңіне ақын арнайы тақырып қойғанда, онысы адамгершілікпен байланысты болар ма еді. Бірақ бәрібір өлең мазмұнында ғылым мен ғалым болуға қатысты әжептәуір ойлар берілген. Біздіңше, мұның орынды, қисынды себебі мен негізі бар. Адам баласы ақыл-санасының болуы себепті ең әуелі сол қасиетімен танып білуге тырысады. Адам болу ақынның отыз сегізінші қарасөзінде жазғанындай, ең әуелі тән саулық пен науас сәлимнен басталады. Тәннің саулығы түсінікті, танып білудің бер жағындағы қарапайым тірі болу мен тіршілік осы тәннің сау болуымен жалғасады. Одан әрі тәнде орналасқан көз, құлақ, мұрын, тіл, дене арқылы айнала әлеммен байланысып сезіну орын алады. Бұл әрекет енді ішкі түйсік, ес, болжау, қиялдау, ойлау арқылы танып білуге бет алады. Ар-

ұятты, әділетті, рақымды, ынсапты болып адамгершілік болмыс тиянақталғанға дейінгі адам болу барысы ең әуелі осылай танып білу арқылы басталады. Ал танып білу арқылы білім-ғылым қалыптасып, оның жүректен шығар ізгі қасиеттермен адамшылық негізі – қайырымдылық, ізгілікке қарай бет алуы орын алады. Біздіңше, Абай осы себепті де бұл өлеңінде ғылым табу мен ғалым болуды біршама мол мән беріп дәріптеген. Әйтсе де ақын өлеңіндегі басты мақсат – М.Мырзахметұлы түйіндегендей, «адам болам десеңіз» жолындағы адамгершілік насихаты мен ілімін жырлау. Ал өлеңнің нақты толық адам іліміне қатысына келер болсақ, ол әсіресе ақын дәріптеген «бес асыл іске» байланысты танылады:

Бес нәрседен қашық бол,  
Бес нәрсеге асық бол –  
Адам болам десеңіз.  
Тілеуін, өмірің алдында,  
Оған қайғы жесеңіз.  
Өсек, өтірік, мақтаншақ,  
Еріншек, бекер мал шашпақ –  
Бес дұшпаның, білсеңіз.  
Талап, еңбек, терең ой,  
Қанағат, рақым, ойлап қой –  
Бес асыл іс, көнсеңіз [3, 41-б].

М.Әуезов «Абайдың әсіресе көп ой қорытып айтқан мағыналы және програмдық бір өлеңі» деп бағалаған бұл өлеңде төркінінен тартып таратып айтар ойлар баршылық, әйтсе де біз оның толық адам іліміне қатысын ғана сөз етумен шектелеміз. Ақын бұл өлеңінде адамгершілік қалыпты жасайтын «бес асыл істі» атаса да, оларды жинақтап таныр болсақ, толық адам құрамындағы үш қасиетті аңғартады. Талап пен еңбек – көбіне адамның күш-қуаты, қайратымен пайда болатын әрекеттер, яғни бұл екеуі қайратты танытады. Терең ойды – ақыл деп қабылдауға болады. Ал қанағат пен рақым – жүректен туатын, жүрекпен байланысты ізгі қасиеттер. Сөйтіп ақын бұл өлеңінде толық адам болуға жеткізетін ақыл, қайрат, жүректі насихаттап отыр дейміз. Бұл өлеңге дейін де толықтықты танытар үш қасиетті сөз етіп келген ақын кейінгі өлеңдерінде де осы үшеуін әртүрлі сөз, ой қолданыстарымен қайта оралып білдіріп отырады:

Қызмет қылып мал таппай,  
Ғылым оқып ой таппай,  
Құр үйінде жатады [3, 55-б.].

Бойда қайрат, ойда көз  
Болмаған соң, айтпа сөз [3, 85-б.].

Қайратпен кіріп, жалынбай,  
Ақылмен тауып айлсын.  
«Мен қалайға» салынбай,  
Жылы сөзбен жайнасын [3, 131-б.].

Не ғылым жоқ немесе еңбек те жоқ,  
Ең болмаса кеттің ғой мал баға алмай [3, 172-б.].

Басыңа құдай беріпті  
Өлшеусіз қылып ақылын.  
Сабыр мен талап беріпті,  
Ақылың, рахымың қиын-ды [3, 191-б.].

Өзіңе сен, өзіңді алып шығар  
Еңбегің мен ақылың екі жақтап.  
...Жүрегіңе сүңгі де, түбін көзде,  
Сонан тапқан – шын асыл, тастай көрме [3, 214-б.].

Жол көрмек, жоба білмек, жиһан кезбек,  
Бой жеңбек, ер жігітке ғақыл таппақ.

...Ннетің түзу болса сенің аппақ,  
Екі елі аузыңа қойсаң қақпақ.  
Сыбыр, өсек дегенді сырттай жүріп,  
Ғылым, өнер, мал таппақ, жұртқа жақпақ [3, 258-б.].

Абай осылайша әр жылдары жазылған өлеңдерінде адамның жаратылысын құрайтын ақыл, тән, жаннан – адамгершілік болмысты жасайтын ақыл, қайрат, жүректі тудырып, ол үшеуін түрлі қолданыс, мазмұнда пайдалана отырып Толық адам ілімін насихаттай береді. Ақыл, қайрат, жүрек үшеуінің өзіндік ерекшеліктері бары анық, сөйтсе де ақынның Толық адам танымындағы бұл үшеуінің ортақ мақсаты – адамшылық қалыпты ұштай түсу, адамгершілікті жетілдіре беру. Ақынның он жетінші қарасөзінде айтылғандай, дүниеде еш нәрсе қайратсыз кәмелетке жетпейді. Тірілік пен тіршілік бастауы қимыл-

қозғалыс, күш-қуат, әрекеттен – ақыл тауып, қайырымдылық көрсетіп, иманды болуға қолқабыс пен қызмет ететін игілікті еңбекке дейінгінің бәрі де ақында тәннен бастау алатын қайратты танытады. Рухани болмыстан бөлек дүнияуи, тәни тіршіліктің де иесі саналатын адамзаттың жаратылысын тән мен одан шығар күш-қуат, қайратсыз елестету мүмкін емес. Осы орайда қайрат атынан ғылымға айтылған ойлар талассыз ақиқат: «әуел өзінді білуге, ерінбей, жалықпай үйрену керек, ол менің ісім, құдайға лайықты ғибадат қылып, ерінбей, жалықпай орнына келтірмек те – менің ісім. Дүниеге лайықты өнер, мал тауып, абұйыр, мансапты еңбексіз табуға болмайды. Орынсыз, болымсыз нәрсеге үйір қылмай, бойды таза сақтайтұғын, күнәкәрліктен, көрсеқызар жеңілдіктен, нәфсі шайтанның азғыруынан құтқаратұғын мен емес пе?» [4, 112-б.]. Расында адамзаттың ешбір ісі күш-қуат, қайратсыз бітпейді, өзгесін былай қойғанда, тіпті тамақ ішіп, ұйықтағанда тыныс алудың өзі де қайрат пен «еңбекті» керек етеді. Сөйтіп тіршілік пен тұрмыс, құлшылық пен кәсіп, танып білу мен адам болу, адамгершілік – бәрі де қайраттың көмегімен жүзеге асады. Жоғарыдағы өлең үзінділеріне ой жүгіртіп оқысақ, ақыл, жүрек қасиеттерімен бірге қайраттың да елеулі үлесі мен қолқабысын тануға болады. Танып білу мен адамшылық және құлшылық етуде қайраттың үлес-салмағы мен қолқабыс, көмек етуі осылай болғанда, ақыл мен жүректің адамгершілік қалып пен қасиетті жасаудағы қызметі тіпті зор. Байқау, білу, тануға қатысты адами асыл қасиеттердің бәрі де – ақылды танытады, оларды Аристотель мен әл-Фараби ойшылдық, интеллектуалдық қайырымдылықтар, қасиеттер деп атаған. Ал адамдардың өзара қарым-қатынасын қайырымды, ізгілікті, жылы, жайлы ететін ар-ұят, әділет, мейірім-рахым, қанағат-ынсап, сүю, махаббат сезім, қасиеттері жүректен туады әрі жүректі танытады.

Біз енді Абайдың толық адам туралы дәлдеп, туралап сөз етуі жайлы ой өрбітеміз. Негізі, Абайдың толық адам туралы айқын да ашық, тиянақты да толымды дерек беруі оның «Әуелде бір суық мұз – ақыл зерек» өлеңінде ұшырайды. Бұл өлеңнің мән-мазмұнын тереңдеп білу өте маңызды. Ақын қысқа ғана өлеңінде көп жайдың сырын танытқан. Ақыл-парасат туралы танымда оның үш түрі болатыны айтылады. Біріншісі – нышан күйіндегі потенциалды интеллект, ол – адам баласынан сау болып туған



сәбидің әлі танып білуге кірісе қоймаған, әйтсе де келешекте иесінің кәсіби ізденісімен толыса алатын мүмкіндігі бар ақыл. Абайдың «әуелде бір суық мұз» дегені ақылдың осы түрін ойға оралтады. Философтар тануындағы ақылдың екінші түрі – актуалды интеллект деп аталады. Бұл – адам баласының Аристотель, әл-Фарабилер негізін салған, Абай да айтатын жан құмары, жан қуаттарымен танып біліп толысқан ақылы. Ақын мұны «зерек ақыл» деп атаған. Адам атты жаратылыстағы нышан күйіндегі ақыл осындай таныған, толысқан актуалды интеллектіге айналуы арқылы иесін айуаннан айырып, адам болмысына жеткізеді, адам етеді. Өлеңіндегі бір ғана тармағымен Абай осындай терең де төркінді ойды жеткізіп отырғандай. Философтар түйіндеген интеллектінің үшінші түрі туралы Абай бұл өлеңінде айтпаса да, «Адамның кейбір кездері» атты өлеңінде ол туралы ой өрбітетіні бар. Интеллектінің үшінші түрі өзгешелеу, ол – адам ойына тыңнан, тылсым болмыстан, Жаратушыдан жететін жәрдемші, қосымша ақыл. Ақылдың мұндай түрін көбіне ақын-жазушы, композитор, ғалым кісілердің болмыс, әрекеттерінен байқауға болады. Олар ақыл-ойы айнала әлемнен бөлектеніп, биіктеп, шарықтап, шабыттанып кеткенде, өздері де күтпеген ақыл-ой туындыларын жасайды. Сабасына түсіп, өз-өзіне келген сәтте өз туындыларына өздері таң қалып жататыны да бар. Осы жайдың шындығын ақынның аталған өлеңінде суреттелген ақын болмысы мен әрекетінен байқауға болады. Өлеңдегі ақын болмысы қалыпты жағдайдағы пенде кейіпінен бөлектеніп биіктеп кеткен. Үзінді ретінде алуға ұзақтау болса да, осы өлеңді толық оқып көрейік:

Адамның кейбір кездері  
Көңілде алаң басылса,  
Тәңірінің берген өнері  
Кек бұлттан ашылса.

Сылдырап өңкей келісім  
Тас бұлақтың суындай,  
Кірлеген жүрек өз ішін  
Тұра алмас әсте жуынбай.

Тәңірінің күні жарқырап,  
Ұйқыдан көңіл ашар көз,

Қуатты ойдан бас құрап,  
Еркеленіп шығар сөз.

Сонда ақын белін буынып,  
Алды-артына қаранар.  
Дүние кірін жуынып,  
Көрініп ойға сөз салар.

Қыранша қарап қырымға,  
Мұң мен зарды қолға алар.  
Кектеніп надан зұлымға,  
Шиыршық атар, толғанар.

Әділет пен ақылға  
Сыналып көрген-білгенін,  
Білдірер алыс, жақынға  
Солардың сөйле дегенін.

Ызалы жүрек, долы қол,  
Улы сия, ащы тіл  
Не жазып кетсе, жайы сол,  
Жек көрсендер, өзің біл [3, 205-б.].

Абай ақындықты – адамның өзі тауып жасаған кәсібі деп білмейді, «тәңірінің берген өнері», сыйы деп санайды. Тәңірінің берген өнерінің адам білмес сыры да болары ақиқат, Иесінің сүйген құлы сол Тәңірі сыры мен күдіретін сабырмен күтуші ғана. Иесі мұндай сырын әр пендесіне аша бермейді, тек пендесі шын ықыластанып тұрғанда ғана оған Өз тарапынан көмегін, жәрдемін беріп, қосымша ақылын тылсымнан дарытып та жібереді-ау. Адам өзі де ақындық өнерге ынталанып кірісуі мүмкін, әйтсе де ақынның «Тәңірінің күні жарқырап» Иесінің жебеуімен өлең, өнер тудыруға ден қоюының жөні тіпті бөлек. Алла пендесіне ықыласы ауып оған ақыл жәрдемін берген шақта ол ақын дүние тірлігі мен ойынан биік тұрады. Пенделік пен ақаулықтан аулақ болып, тек қана хақ жолы – әділет пен ақылдың ақиқатын айтады, өлең етеді. Алла жәрдем беріп ақыл қосқанда, ақын пенделік пен кемшілікті тірлік ісімен санаспайды, тек қана кемелді ойларды төгіп-төгіп жеткізеді. Мұндай биікке пенде баласы жайшылықта жете алмайды. Бұл – бұрынғы философтар айтатын ақылдың үшінші түрі – эрекетшіл интеллектінің көмегімен мүмкін болған жағдай. Сөйтіп Абай ақиқатшыл

даналар тұжырымдаған асыл ойды өз тарапынан өлең өнерімен жеткізген. Абай айтқан «Тәңірінің күні» – әрекетшіл интеллектіні ойға оралтады.

Әуелгі өлеңге оралсақ, ақын кейінгі үш тармағында толық адамды құрайтын екінші, үшінші қасиеттер – жүрек пен қайратқа қысқа-нұсқа ғана сипаттама береді:

Әуелде бір суық мұз – ақыл зерек,  
Жылытқан тұла бойды ыстық жүрек.

Тоқтаулылық, талапты (қалыпты) шыдамдылық –  
Бұл – қайраттан шығады, білсең керек [3, 95-б.].

«Жылытқан тұла бойды ыстық жүрек» дегенді тек көркемдік қолданыс қана деп қабылдауға әсте болмайды. Абай – әр сөзге терең мағына, мол мазмұн артып жырлайтын ойлы ақын. Осындағы бес сөздің бәрі де тамыры тереңге барып бекіген аса салмақты сөздер. Ақын шығармаларын саралай қарасақ та, жүрек туралы таным төркініне ой жүгіртсек те, жүрек – тәни мүше ретінде де, рухани, діни-сопылық таным тұрғысынан да мән-мазмұны терең категория екені көрінеді. Жүрек тән мүшесі ретінде тұла бойды, барлық дене мүшелерін өзінен тараған қаны арқылы жылытады. Туфейль деген шығыс философы өзінің пәлсапалық туындысында [18, 368-б., 371-б.] Яқтың жануарларға ота жасай жүріп, жүректің бір жартысындағы титтей қуыстан ыстық лепті байқағанын баяндайды. Яқ тіршілікті беретін де, тауысатын да сол жүректегі ыстық лептің бар болып, кейіннен жоғалуына байланысты екенін ұққандай болады. Әлемдегі адам жасайтын игіліктердің бәрі де Алла жаратқан түпнұсқаны үлгі-өнеге етумен туатынын ескерсек, кәдімгі үй ішіндегі жылу жүйесі де адам тәніндегі жылылықтың тарауына ұқсастырылып жасалғандай көрінеді. Адамның тұла бойындағы қан жүрек арқылы жылып барлық мүшелерге тарайды, одан жүрекке қайта оралып, мүшелерге қайта тарап оларға үнемі тіршілік берумен болады. Абай айтқан «жылытқан тұла бойды ыстық жүрек» бір жағынан осындай табиғи тіршілік сырын ойға оралтады. Ыстық жүректің қызметі тұла бойды жылытумен бірге адамның адамшылық қалпы мен рухани болмысын да жылылыққа бөлеп, иесін ізгілікті, қайырымды, асыл етеді. Адамдар ақыл, ғылым,

білім арқылы ақыл-ойлы, танымды болса, жүректен шығатын ар-ұят, әділет, рахым-мейірім, қанағат-ынсап қасиеттері арқылы адам ретінде тіпті тартымды, өзгеше сүйкімді болып, өзара қарым-қатынастары жылы, жайлы, ыстық ықыласты бола түседі. Жүрек қасиеттері мен сезімі адам мен адамшылықты қасаңдықтан қайырымдылыққа тартып жағымдырақ етеді. Осы тұрғыдан келгенде жүректің рухани болмысқа жылылық, мейірім шуағын шашатын гуманистік қызметі де бар екені көрінеді. Сөйтіп Абай айтқандай, жүрек адамның тәни, рухани болмысын бірдей қамтыған тұла бойын түгел жылытады. Ал қайраттың қасиеті өлең тармақтарында айтылғандай, тоқтаулылық, қалыпты шыдамдылық, күш-қуаттық сипаттарымен танылады. Толық адам болмысы мен әрекетіндегі үш қасиетті осылайша қысқанұсқа, сөйте тұра тереңдей таныта сипаттап алған ақын енді олардың бөлінбес бірлігін айрықша бекітіп қояды:

Ақыл, қайрат, жүректі бірдей ұста,  
Сонда толық боласың елден бөлек.

Жеке-жеке біреуі жарытпайды,  
Жол да жоқ жарыместі «жақсы» демек [3, 95-б.].

Әрине адамдарға «ақыл, қайрат, жүректі бірдей ұстап» жүру, үшеуінің бірлігін жоғалтпай өмір сүру оңай болмайды. Бір кем дүние тіршіліктен, әсіресе адамның өз ақылы мен ар-ұят, әділетінің аздығынан, жақсы қалыпты ұстануда тұрақсыздығынан, тайғақтығы мен табансыздығынан кісілер қауымы адамшылығы жағынан ақсап жүреді. Ақиқатты мойындар болсақ, өмірде жақсылардан гөрі жамандар, ақылдылардан гөрі ақымақтар, толық адамнан гөрі жарымес жарым адамдар көп. Ақын арманы – «ақыл, қайрат, жүректі бірдей ұстаған» [3, 95-б.] «табанының топырағы көзге сүртерлік қасиетті адам» [4, 114-б.]. Абайдың Толық адам ілімі осындай адамгершілігі жоғары асыл болмысты адамдарды тәрбиелеуді көздейді. Жоғарыда Абайдың бұл өлеңінің мазмұн, танымы өте ауқымды екенін айтқан болатынбыз. Өлеңде толықтықты танытар үш қасиеттің сипаттамасы, бөлінбес бірлігінен бөлек жүрек культі де айрықша айтылады:

Ақыл да, ашу да жоқ, күлкі де жоқ,  
Тулап, қайнап бір жүрек қылады әлек [4, 95-б.].

Ашу мен күлгіден қайрат қасиетін танысақ, осы бірінші тармақтағы ақыл мен қайратқа қарағанда адам болу мен адамгершілікті қалыптастырып, сақтауда жүректің жауапкершілігі мен қызметі аса зор болатынын байқаймыз. Адамшылық қалып пен адамгершілік болмыс жүректен шығатын қасиеттермен тиянақталып, бекіп, шыңдалып, жетіле, кемелдене түседі. Қанша күш-қуатты, қайратты, ақылды, білімді болса да, жүректен шығар ар-ұят, әділет, рахым-мейірім, қанағат-ынсапсыз жан шын мәнінде абыройлы, қайырымды, толық адам бола алмайды. Ақын танымындағы жүрекке бүйрек бұра қараушылық әсіресе «Әсемпаз болма әрнеге», «Жүректе қайрат болмаса» өлеңдері мен он төртінші, он жетінші карасөздерінде айқынырақ танылады. Мысалы ақынның мына шумақтағы ойынан адам болу мен адамшылықтың басы – жүрек екені көрінеді:

Жүректе қайрат болмаса,  
Ұйықтаған ойды кім түртпек?  
Ақылға сәуле қонбаса,  
Хайуанша жүріп күнелтпек [3, 227-б.].

Адам да – жануар, Аристотель, әл-Фарабилер адамды қоғамдық, саяси, сөйлей алатын жануар деп атаған. Сократ жазғандай, Жаратушы жанды бәріне де беріп, ал ақылды тек адамға ғана бұйырған екен. Алла берген ақыл-ой, сананың арқасында ғана жануар тектес жаратылыс адам болмысына айналған. Өсімдік пен жануарда да бар жаннан адам жанының бөлек, биік, асыл болатыны оның адамда ғана бар ақылға ұмтылып әрі ақыл арқылы ойлай алатын күш, қуатқа ие болуымен байланысты. Ал өсімдік пен жануар жандары оларда ақыл, сана болмауына байланысты қоректену, өсу, көбею және бес сезім мүшесінің сезінуі сияқты күш-қуаттарға ғана ие. Абай да адам болуды танып білумен, жүректен шығатын ынта, ықылас, сүюмен байланыстырады. Адам баласы өзінде бар жан қуаттарымен танып біліп «ақылына сәуле қондырмаса», «хайуанша жүріп күнелтеді», айуанға айналады. Ал «ұйықтаған ойдың» оянып, қозғалып, танып білудің өзі өлең шумағында

айтылғандай, жүректен шығар ынта, сүюмен, білуге деген ықылас танытумен басталады. Бірінші тармақтағы «қайрат» әсте күш-қуатты танытпайды, ынта, ықылас, сүюді білдіреді. Толық адам құрамындағы әр қасиеттің өзіндік «қызметтері» бар, ақыл таниды, қайрат әрекет етеді, қалайды, ал жүрек сүйеді. «Ішем деп бейнет сусынын асау жүрек алқынар» [3, 119-б.] дегендегі жүректің ісі, бейнеті – сүю. Сөйтіп адамның «хайуанша жүріп күнелтпей», «ақылға сәуле қондырып» танып білуі ең әуелі «ұйықтаған ойды түртіп» оятатын – жүректен шығар ынта, ықылас, сүюге тәуелді екен. Жаратылыстың адам болуы жай ғана ақылмен танып білуге ғана емес, махаббат, сүю, ынтамен танып білуге байланысты екенін Абай қарасөзінде де айрықша қадап айтады: «Қашан бір бала ғылым, білімді махаббатпенен көксерлік болса, сонда ғана оның аты адам болады» [4, 136-б.]. Абайдағы әрі адамзат танымындағы ақиқат – жүрек культі дегеніміз осы.

Адам жаратылысы мен оның адамшылық болмысына қатыстының бәрі де бұрынғы философтарша ақыл, тән, жан, ал Абайша ақыл, қайрат, жүрексіз толыққанды қалыпта болмайды. Адам жаратылысы мен болмысы да бұл үшеуінің бірлігінен бүтін, толық болмайды. Табиғат, жаратылыс ғылымдарынан өзгенің бәрі де адам жаратылысы мен болмысын түрлі қырынан танудан туатын танымдар. Ал Абай айтып отырған ғылым – адамгершілік жайлы ілім болса керек:

Біреуінің күні жоқ біреуінсіз,  
Ғылым сол үшеуінің жөнін білмек [3, 95-б.].

Абайдың өзі де шығармаларының өн бойында ақыл, қайрат, жүректің өзіндік «жөнін біліп», әрбірінің орны мен сипатын ажырата танытумен адамгершілік жайлы ғылымға өз үлесін қосқан. Осы өлеңінің бастапқы төрт жолында-ақ жоғарыда жазғанымыздай, ақын үш қасиетке қысқа-нұсқа әрі астарын білгенге терең танымы да байқалып тұратын сипаттамасын берген. «Ғылым сол үшеуінің жөнін білмек» деген ақын ойы оның өзіне де қатысты, яғни ол өз шығармаларында ақыл, қайрат, жүректің адам жаратылысы мен оның адамгершілік болмысынан алар орны мен мәніне айрықша көңіл бөлген. Мысалы осы өлеңінде ақын қайраттың тәннен туатын және тәнге қатысты

сипат екенін танытады. Екі жақты қоспа жаратылыс – адамда ақыл мен жан-жүрегі бар тән бас қосып бірлік тапқан, ақыл – рухани, тән – материалдық болмыс, екеуінің ортасында тіршілік пен танымға бастайтын дәнекер – жан, жүрек бар. Адам жаратылысының ақыл мен тәнге, қайратқа қатысты ерекшелігін Абай отыз сегізінші қарасөзінде: «...пендесінде ақыл – хұкімші, қайрат, қуат – қызмет қылушы еді» [4, 140-б.] деп жазады. Ал болмысы бөлек, болмысы биік, ортағы, ұқсасы жоқ Алла тағалада бұлай емес, себебі Алла – бастауы мен соңы жоқ мәңгілік бақи, тәнсіз рухи болмыс. Алланың сипаттары – «ғылым (ақыл), құдірет (қайрат) біздің ұғуымызға ғана екі хисап болғанымен, [Аллада] бір-ақ ғылымды құдірет болуға тиіс» [4, 140-б.], «алла тағалада болған құдірет – ғылым һәм рақымет» [4, 141-б.] және керісінше Алла тағаладағы ғылым мен рақымет – құдірет деп ойлаймыз. Абай Алланың сегіз сипаты жайлы ой өрбіту нәтижесінде аса зор сыншылдық, жаңашылдық, реформаторлықпен Алланың – ғылымды, рақымды, ғадаләтті құдірет Иесі, бірбүтін болмыс екенін танытып бекіте түсуге талпынған. Ақынның талпынысы мен танымын – адамзат ақылы жетіп айта алар абсолютті ақиқат деп білеміз. Мұндай бүтіндік пен биіктік, толықтық пен озықтық, кемелділік Аллаға ғана тән. Ал адамзат – Алланың «махаббатпен сүйіп зор хикметімен жаратқан туындысы. Алла берген бар болмысымен әрі ақылымен де адам баласы Алланы бетке алып әрекеттенсе, ізденсе, өз болмысына сай зор жетістікке жетер мүмкіндігі бар. Адам баласы Алланы бетке алған адамгершілік, кісілік кемелділік биігіне дүниелік, тәндік, нәпсілік болмысын терістеп, олардан туар қарсылық пен кедергіні жеңумен жетеді. Алла берген ақылымен адам баласы тәні мен қайратын көмекші, қызметші етеді. Абай сипаттаған қайрат – ақыл мен жүрекке осындай көмекші, қызметші болуымен қадірлі. Сөйтіп адам баласындағы, пендесіндегі тән, қайраттың ақылдан аспайтын, ақылға қызметші болатын өз орны мен өзіндік қасиеті бар: «бір ғана құдірет пендеде болған қуат», Аллада болатын ғылымды, рақымды, ғадаләтті құдіреттің – ақылдан бөлек, ақылсыз бірыңғай күш-қуат, қайрат болуы – пендеге тән ерекшелік: «құдірет – ғылым, ақылдан басқа болатұғын еді» [4, 141-б.]. Адам жаратылысындағы ақыл мен тәннің (қайраттың) екі түрлі болмыс болуынан және осының

нәтижесінде адамның екі жақты қоспа болмыс болуы себепті оның тіршілігінде Алла берген ақылымен екеуінің біріне басымдық беріп таңдау еркі туады, адам болу мен адамшылықтың ауыр бейнеті осыдан пайда болады. Әйтпесе адам да бір жақты болмыс – періште, шайтан, жан-жануарлар секілді бір ғана құлшылық, аярлық, айуандық жолымен алаңсыз тіршілік етіп жүрер еді. Адамның қасиеті, адамшылығы жолындағы жанкешті әрекеті мен еңбегі – адал, себебі адам – періште, шайтан, жан-жануарлар секілді жаратылыстарына Алла сіңірген дайын болмыспен ғана өмір сүрмейді. Алла сүйген қалпы – адамшылығына өз еркімен таңдау жасап, сол жолда ұзақ жылдар еңбектеніп, бейнеттеніп, жетіле жүріп жеткендей болады. Сөйтіп адамдағы тән мен одан шығар қайраттың тіршілік пен адамшылыққа жасар көмегі, жәрдемі, қызметі бар, бірақ тән мен қайраттың ақыл мен жүректен асып, басым түсіп жатуы жақсы емес. Қайратты танытатын жан мен тән Абай жазғандай, малда да бар, ал адам – ақылымен, ар-ұят, әділет, рахым, маххаббат сезімдерімен асыл болмыс, яғни адам:

Малда да бар жан мен тән,  
Ақыл, сезім болмаса [3, 227-б.].

Он жетінші қарасөзде айтылғандай, қайратсыз адамның күні жоқ, тіршілік, құлшылық, танып білу, жаманнан қашып жақсыға ұмтылу – бәрі, де қайраттың көмегімен жасалады. Тек осы тән құмары, тән тіршілігімен шектеліп, күш-қуат, қайрат, нәпсінің деңгейінде қалып қалуға әсте болмайды:

Аспаса ақыл қайраттан,  
Тереңге бармас, үстірттер [3, 227-б.].

Абайда адам жаратылысы мен болмысы жайлы өте нәзік сұңғыла ойлар бар, ол мәселені ақындарша болған мен болуы мүмкін жағдайының арасындағы күйінде ғана жанамалап айтпай, дәлдеп, кеулеп, «қазымырланып», яғни хакімдерше өзегі мен себебіне үңіле түсіп танытады. Ахмет Йүгінеки адам назары дүниеге ауа бастаған сәттен адамшылығы да азатынын айтқан. Ал Абай мұны ақиқатқа қарай тарта түсіп, бұзылу басы – тәнде



екенін танытқан, себебі тәнді ақылдың ауыздықтап отыруы ауадай қажет. Абайда жүректің культі басым болғанымен, ақын ұғымындағы жүрек ақиқатты айқын танып білуде ақылға кіріптар, «жүректің ақыл суаты», яғни ақыл – жүрекке ақиқатты танытып, әр нәрсе туралы мәлімет-дерек, ақиқатпен «суаратын» суаты сияқты. Жүрек – қайырымшыл, рахымшыл, сүйгіш болмыс. Ар-ұят, мейірім, ынсап, әділет сияқты ізгі қасиеттер осы жүректен шығады. Сөйте тұра әділетті ақыл Абайда бас төреші іспетті. Ақыл әділетті болуы арқылы жүрекпен байланысады, ал жүрек ақ пен ақиқатты танып сезуде ақылдың көмегіне жүгінеді. Негізі, адамшылық пен адамгершілік – ақыл мен жүрек қасиеттері арқылы жасалады, мұны біз ақын насихаттаған жәуанмәртлік ілімінен байқаймыз. Жәуанмәртлік – ақыл мен жүректің бірлігі мен екеуінің ішіндегі ең өзекті қасиеттерінен тұратын адамгершілік негізі. Ақыл, рақым, әділет атты жәуанмәртлік сипаттарынан бастау алып асыл адамгершілік өсіп-өніп көркейеді әрі осы үшеуімен адамгершілік кемел болады. Ал қайрат – осы ақыл мен жүректің асыл әрекетіне қолқабыс жасап көмек етуімен ғана қадірлі. Қайрат адам жаратылысы мен болмысының бүтіндігі мен түгелдігін танытатын толық адам құрамында болса да, адамгершілік негізі саналатын жәуанмәртлік сипаттарының қатарында жоқ. Себебі «дүниеде еш нәрсе қайратсыз кәметке жетпейтұғыны» рас болса да, қайрат пен оның бастауы саналатын тәнде ақыл-ес жоқ, тек қана күш-қуат пен қалау ғана бар, Абай осыны нәзік танып шебер жеткізген:

Тән сүйгенін бермесе,  
Жан шыдамас жаны ашып.  
Бере берсен, бер десе,  
Үміт етер таласып [3, 227-б.].

Тән мен одан шығар қайраттың жайы осы. Тән мен оның мүшелеріне тіршілік пен тұрмыстың қажетіне орай Алла құдіретімен шебер әрекет етуінен өзге олардың таңдауды керек ететін барша қимыл-қозғалысына бақылау мен қадағалау қажет. Өзінен өзге қоршаған орта, айнала әлеммен байланыс жасап, тіршілік пен танымға жол ашатын сыртқы бес сезім мүшесі (Абайша хауаси хамса заһири) тікелей тәнде орналасқан. Тәннің

сүйген жайлы, мазалы, тәтті нәрселері осы бесеуінің сезінуінен басталады. Өзіне жайлы көрінгенді олар «тағы да бола берсе екен» деп қалай береді, тілей түседі. Өзіндік қуаттарға ие әрі ақылмен байланысы бар жан ә дегенде «жаны ашып», тәннің сүйген қалауына «рұқсат беріп» жағдай жасайды, алайда тән мұндай жан «жақсылығын» түсіне қойып, шегін біліп өзі тоқтай қоймайды, ақын айтқандай, тағы да «таласып үміт ете» береді. Шама мен шек, қанағат пен ынсап, обал-сауапты білу тән мен одан шығар қайратқа емес, ақылға, жүрекке тиесілі қасиеттер. Тән қалауы ретіндегі ішіп-жеу мен ұйықтау – тоқтық пен саулыққа, тынығу мен демалысқа, ал жыныстық қалау – тән саулығы мен көбеюге, жаңа ұрпаққа жеткізеді, демек тән қалауы – адам үшін пайдалы игілік екен. Ал Абай айтқандай, бұлар өлшемінен асып кетсе, қомағайлық пен ашқарақтық, нас басқандық пен зинақорлыққа айналып шыға келеді. Тән туындысы ретіндегі әрі тәннің ғана қалауымен кеткен қайраттың өзіне шектеусіз ерік берілер болса, оның тірлігі қауіпті әрі залалды болмақ, әйтсе де толық адам құрамындағы қайратсыз «дүниеде еш нәрсе кәмелетке жетпейді». Осы орайда «ғылым сол үшеуінің жөнін білмек» дегендегі Ғылым сөзі – ең орайлы шешім мен тура төрелік: «Қайрат, сенің қаруың көп, күшің мол, сенің де еркіңе жібермейді. Орынды іске күшінді аятпайды. Орынсыз жерге қолыңды босатпайды» [4, 113-б.]. Адам баласы тіршілік пен танымға жан арқылы кірісетін тән мен ақылдан тұратын жаратылыс болған соң, тірлігі мен болмысы да көбіне екі жақты болып келеді. Қайрат – құлшылық пен танып білуге де қолқабыс еткенімен, көбіне тән қуаты ретінде көрініп, заттық, материалдық игілікті жасауымен ерекшеленеді: «Әрнешік тән қуатыменен сырттан тауып, сыртта сақтайсыз, оның аты дәулет еді» [4, 162-б.]. Адамгершілік жайлы ғылымның міндеті Абай айтқандай, «үшеуінің жөнін білмек» болса, теңіздің дәмі тамшыдан дегендей, біз әзірге ақынның қайрат жайлы ойларын ғана саралап сөз еттік. Адамзат танымы тарихындағы адамгершілік жайлы ғылымның ақиқатын айқындауға Абай осылайша өз үлесін қосқан.

## **Толық адамды жасаушы ақыл қасиетінің сипаты**

Абайдың «Әуелде бір суық мұз – ақыл зерек» атты біз сөз етіп отырған өлеңіндегі «ғылым сол үшеуінің жөнін білмек» деген ойының ізімен енді ақын ұғымындағы ақыл жайлы ой өрбітеміз. Ең әуелі айтарымыз, ақын тыңдаушыларына өмірдегі ең санаулы, ең керекті, ең маңызды міндеттерді кеңес етіп ұсынғанда, ақыл табуды бірінші кезекте ауызға алады:

Адамзат тірілікті дәулет білмек,  
Ақыл таппақ, мал таппақ, адал жүрмек [3, 23-б.].

...Ақыл тапсақ, мал тапсақ, қуаналық [3, 33-б.].

...Талап, еңбек, терең ой (ақыл),  
Қанағат, рақым, ойлап қой –  
Бес асыл іс, көнсеңіз [3, 41б.].

...Ақылмен ойлап сөйлемек [3, 246-б.].

Жол көрмек, жоба білмек, жннан кезбек,  
Бой жеңбек, ер жігітке ақыл таппақ [3, 258-б.].

Ақын осылайша толық адамның бір сипаты – ақылды адам өмірінің мәні мен мақсаты ретінде үнемі айрықша атап отырады. Адам ақылымен ғана айуаннан биік асыл деңгейіне көтеріледі. Және ақыл табу – адам өмірінің мәні мен мақсаты болумен бірге адам баласының басты қасиеті де. Абайдағы ақылдың аса маңызды белгісі – шындық, растық, ақиқатты айқындауда өлшеуіш пен таразы болуы. Ақылдың бұл қасиеті «Ғылым таппай мақтанба» өлеңінде анық, айқын түйінделген:

Ақыл сенбей сенбеніз  
Бір іске кез келсеңіз.  
Ақсақал айтты, бай айтты,  
Кім болса, мейлі, сол айтты –  
Ақылменен жеңсеңіз.  
...Ақыл – мизан, өлшеу қыл [3, 42-б.].

Абай өзі түйіндеген ойларын бекіте түсу үшін оны қайта-қайта тиянақтап отыратыны бар. Мысалы «Қартайдық, қайғы ойладық, ұйқы сергек» өлеңіндегі ақынның «ақылды қара қылды қаққа бөлмек, әр нәрсеге өзіндей баға бермек» [3, 24-б.] деуі ақылдың ақиқатты танытар таразылығын бекіте түскенін танытады. «Ұлық арқаға қағып, шенді шекпен жапқанына» мақтан құмар, қызмет құмар болыстың жас баладай мәз болып қуанған көрінісіне де төрелікті ақын ақыл талқысына салып барып білдіреді: «еш нәрсе емес жұбанар ақыл көзбен баққанға» [3, 81-б.]. Абайың ерекшелігі – ақылды басты төреші етуінде. Ақын алғашқы жылдары «құмарсыз (білмекке құмарлық) құр мүлгуге тоя алмаймын» [3, 176-б.] деп, ақыл күшін тіпті Жаратушыны тануға да батылдықпен қолданып бағады. Абай – «шын ақылға зорлық жоқ» [4, 144-б.], «Пайда, залалды айыратұғын қуаттың аты ақыл еді ғой» [4, 163-б.] деп білген ақиқатшыл ақын. Ол ақылды өмірдің қай саласында да бірегей төреші, талассыз таразы етіп пайдаланады. Адам-пенденің өмірде өзгені алдаумен бірге өзін де алдап жүретіні бар. Ақын болумен қатар моральдық философиямен де айналысқан хакім Абай адамдардың аярлығын тануда да «ақыл анық байқаған қылығыңды, қу шыққансып қағасың босқа бұлдыр» [3, 202-б.] деп, мұнда да ақылды өлшеуіш етеді. Өзінің көңілі мен көкейіне әбден орныққан ақылдың таразылық ету сипатын осылайша қайталай қолданып үсті-үстіне бекіте түседі. Әйтсе де ақын танымындағы ақылдың таразылық, төрешілдік сипаты оның «Адамның кейбір кездері» өлеңіндегі мына ойынан айқын аңғарылып көрінеді:

Әділет пен ақылға  
Сынатып көрген-білгенін,  
Білдірер алыс, жақынға  
Солардың сөйле дегенін [3, 205-б.].

Ақылдың – жүрек пен одан туатын әділетпен байланысы – оның елеулі белгісі. Ақыл – ақиқаттың айқындаушысы, адам болудың алғышарты болса да, жүрек – Абай ұғымында кемелділік көрінісі кәмәлатғазамат Аллаға бірден-бір жол салатын қасиет, демек адамшылық пен адамгершіліктің де биік шыңы да осы жүрекпен байланысты болады. Ақылдың мақсаты – танып

білу, әсіресе түпкі ақиқатты тану болса, сол ақиқатты Абай жүрекпен байланыстырады, «тіл жүректің айтқанына көнсе, жалған шықпайды» [4, 110-б.] деп біледі. Мойындау әрекеті – қарсылық пен күмәннің жойылып, сенімнің салтанат құруы болса, және сол мойындау көбіне ақиқатты танумен байланысты болса, Абай мұны да әділетке жүгінген ақылдың үлесі санайды: «әділетті ақыл мойындаған нәрсеге қиын да болса, мойындау, әділетті ақыл мойындамаған нәрсеге оңай да болса, мойындамау – ерлік, батырлық осы» [4, 110-б.]. Ақылдан басым түсетіндей жүректің сезгіштігі мен қайырымдылығы Ғылым атынан айтылған ойдан байқалады: «Ақыл, сенің қырың көп, жүрек сенің ол көп қырыңа жүрмейді: жақсылық айтқаныңа жаны-діні құмар болады. Көнбек түгіл қуанады. Жаманшылық айтқаныңа ермейді. Ермек түгіл жиреніп, үйден қуып шығады» [4, 113-б.]. Ақыл өзі жақсы, жаман, пайдалы мен пайдасызды айыратын өлшеуіш, таразы болғанда, оның өзіне жүрек үстемдік етіп басқаратыны көрінеді. Абайдағы ақыл мен жүректің арасында нәзік талғам мен танымды керек ететін сырлар бар. Осылайша ақылға билік жүргізетін жүрек өзінің «махаббат қылса тәңірі үшін» деген қасиетті жолында ақылды – ақиқатты танып білуде өзіне азық етер суаты санайды: «жүректің ақыл суаты». Әйтсе де ақылдың өзіне мұқтаж болған жақсыға да, жаманға да талғаусыз қызмет етіп кететіні бар. Ал жүректе ондай екі жақтылық жоқ, сондықтан да жүрекке жүгінген, одан туар әділетке сүйенген ақыл – ең сапалы ақыл, нұрлы ақыл. Ал Шәкәрімнің Абай түйіндеген нұрлы ақылды – таза ақыл деп танытыны бар. Керісінше ақыл «амалдың тілін алса, жүрек ұмыт қалады», сөйтіп ақыл әділетті, нұрлы ақыл болудан қалады, суық ақылға айналады. Абайдың ел ішінен жақсы көріп қадірлейтін жан таппай, «әділет, ұят, нысапқа есті кісі елде жоқ. Қулық, сұмдық, арамдық, амалға елдің бәрі де есті» [4, 117-б.] деген адамдары – осындай суық ақыл иелері. Абайдың жүрекке деген айрықша құрметі оның Я.Полонскийден аударған өлеңінен де ерекше танылады:

Жүректе көп қазына бар, бәрі жақсы,  
Теңіздің түбіндей-ақ қарап бақшы.  
Сол жүректен жылылық, достықпенен  
Бұлақша ағып ғаламға тарамақшы.

...Суық ақыл жүрекке бұйрық жазып,  
Оны бір өзі өзгеше жолға салмақ [4, 84-б.].

Өлеңде жүректің ізгілігімен бірге ақылдың қиянатшыларға қызмет етіп кетіп сол жүректі қинап қоятыны да айтылады. Біздің білмек болғанымыз – ақылдың асыл сипаты – жүрекпен жарасым тапқанда арта түсіп, нұрлы атануы мен керісінше амал-айла, аярлыққа да көмек жасап, суық ақылға айналуы және жүрек сияқты жақсылыққа қызмет етуде айнамастай бір жақты болмай, «жақсының, жаманның – екеуінің де сүйенгені» болып, екеуінің де іздегенін тауып беріп жүретін» екі жақтылығы. Ақыл өзінің жалғыз ғана осы айыбын жүрекпен жарасым табу арқылы жояды және нұрлы ақылға айналып бұрынғыдан да асылдана түседі. Жүрекпен жарасым табу – ақылдың жүректен шығатын әсіресе әділетпен бірге болған бірлігінен туатын ізгілікті сипатын танытады. Ақыл арқылы танып біліп, ақыл арқылы адам болсақ та, ақылдың қасиеті танып білуінің үстіне ізгілік, жақсылыққа жақын болуымен де арта түседі: «Ақыл өссе, ол түпсіз терең жақсылық сүйемктікбірлән өсер» [4, 151-б.]. Адамгершілік танымдағы байқалған нәрсе – ақыл – асыл қасиет, сөйтсе де ізгіліктің ақыл, жүрек бәрінен де биік тұратыны. Ал әділет, ізгілік қасиет, ұғымдары – жүрекпен байланысты құбылыстар. Ақыл – көбіне адамдық пен адамгершіліктің бір құрамдас бөлігі ретінде қабылданады. Ақиқаты да солай. Мұнымен бірге Абайда адамды тек ақыл ретінде танып, оны бір ғана ақыл деп қабылдаушылық та ұшырайды. Ақылды бұлайша таныту тосындау болса да, адам – ақыл болатыны қисынды: «Бұл ғәделет, махаббат сезім кімде көбірек болса, ол кісі – ғалым, сол – ақыл» [4, 164-б.]. Жан-жануар, жәндік атаулыны – тән, анығы, жаны бар тән деп атау орынды болса, адамды – ақыл деп білу де дәл сондай қисынды. Әр нәрсе де тек мәнімен ғана өзіндік болмыс атанса, адам да – ақылы барда ғана адам. Абайда «мені» мен «менікі» деген күрделі ұғымдар бар, бұларды ақын «Өлсе өлер табиғат, адам өлмес» өлеңінде «мені» мен «менікінің» айрылғанын» деп қолданады, бірақ олардың анық мән-мазмұны дәл осы өлеңде ақын тарапынан айқындай айтылмайды. Содан да болар, ғалымдар бұл екеуінің мағынасын әр түрлі танытып жүреді. Осылай боларын болжағандай-ақ ақын бұл екеуінің өзі ойлағандай

мағынасын «Көк тұман – алдындағы келер заман» өлеңінде ашып айтып береді:

Ақыл мен жан – мен өзім, тән – менікі,  
«Мені» мен «менікінің» мағынасы – екі [3, 212-б.].

Осында аталған «жан» адам болмысында ойлау қуатымен бірге болған сипатымен ерекшеленсе де, жан атаулы айуан мен өсімдіктерде де бар, яғни жан – адам, жануар, өсімдік үшеуіне де ортақ құбылыс. Сол себепті адам баласы жаны бар болуымен ғана адам болмайды екен, жанды тән иесі жануардан жоғарылай түсіп ақылы болған соң ғана адам. Айуанды – жанды тән десек, адамды – ақылы бар жанды тән дейміз, жанды тән – адам мен айуанның екеуінде де бар, ал ақыл адамда ғана бар қасиет. Сол үшін де адамды – ақыл деп тану қисынды. Аристотель адамдар арасында орын алатын достық қатынастың «шаңырағын шайқалтпай» ұстап тұратын үш негізін атайды, олар ізгілік қасиет, пайда және рахат. Даналардың даналығы да мәселенің өзегін осылайша айқындап беруінде ғой. Шынында да адамдар бір-бірімен аталған үш негізге сүйеніп барып дос, жақын болып бірге жүреді. Нағыз достық ізгілік қасиетпен ғана болады әрі ондай достық баянды болып ұзағынан жалғасады. Ал пайда мен рахатқа «байланып» тұрған «достық» бұл екеуі (пайда мен рахат) болмай қалған жағдайда өзінен өзі жойылады. Айтпағымыз, адамдар байланысының ең бір қасиетті түрі – достық ізгілік қасиетпен қалыптасады, ал ізгілік қасиеттің бірегейі – ақыл. Сөйтіп Абайша адам да – ақыл, олардың арасындағы достық пен бірлік те – ақылмен екен: «бірлік – ақылға бірлік, малға (Аристотельше пайда) бірлік емес. Малыңды беріп отырсаң, атасы басқа, діні басқа, күні басқалар да жалданып бірлік қылады» [4, 102-б.]. Абайдағы адамгершілік танымы бойынша, адамшылықтың шыңы – әділет пен сүю, махаббат болса да, бұлар да ақылсыз танылмайды, өмірде жол етіп таңдалмайды да. Әділет пен сүю, махаббаттың бастауы болатын жүректің ақиқатты таныр құралы, суаты – ақыл екенінен бөлек алдамзаттың басты мақсат-мұраты – ғибадат, «махаббат қылса тәңірі үшін» құлшылық та Абай түйіндегендей, ақылдан бастау алады: «Әрбір ақылы бар кісіге иман парыз, әрбір иманы бар кісіге ғибадат парыз екен» [4, 126-

б.]. Адам баласының болмысы мен өзіндік әрекетін мынадай ретпен танысақ болады: жаны бар тән (бұл – айуанмен ортақ болмыс) – ақылы бар жанды тән (адам) – имандылық – ғибадат, құлшылық. Алғашқысын есепке алмағанда екіншісі ақылы бар жанды тән – адам, бұл болмысымен әрбір адам «қайрат пен ақылы жол тауып» білімді, ғылымды, ақылды болып, отбасы мен қоғамда және қызметте жап-жақсы-ақ абыройлы болып жүреді. Бірақ бұл адам болуда әлі жеткіліксіз жағдай. Адам баласы мұнымен шектеліп қалмай, «әділет, шапқат кімде бер, сол жарасар туғанға» дегендей жүректің ізгілікті қасиеттеріне талпынып келесі хал – имандылыққа ұмтылуы керек. Имандылық өз кезегінде Абай жүйесі бойынша адам болу мен адамгершіліктің биік шыңы – ғибадат, құлшылыққа жеткізеді. Абай ұғымындағы ғибадат пен құлшылық тек қана діни наным, әрекетпен шектелмейді, ол адамға тән абыройлы өмірді білдіреді. Адамзат үшін бұл биіктік пен абыройлы өмір – «махаббат қылса тәңірі үшін» деген мақсат-мұрат, ал мұның сыры ақынның мына екі жол ойынан айқын танылады:

Адамды сүй, алланың хикметін сез,  
Не қызық бар өмірде онан басқа [3, 233-б.?!]

Міне осы адамгершілік шыңына адам баласы ең әуелі ақылы арқылы қадам басады әрі өмір бойы ақылымен жүріп абыройын арттырады. Абайдағы адам – ақыл деген танымның сыры осы.

Абай өлеңдері мен қарасөздерінде ақыл жайлы ой түйгенде, оның (ақылдың) ішкі ділдік қасиет екеніне арнайы көңіл бөледі. Мұны білудің де мәні зор. Себебі кейбір білместер ақылдан өзге өздеріндегі бөтен барлықтарымен беделді, «абыройлы» боламын деп адасып жүреді: «Кейбіреулердің бар өнері, мақсаты, киімін түземек, жүріс-тұрысын түзетпек болады да, мұнысын өзінше бір дәулет біледі». [4, 151-б.]. Екі жақты қоспа адам баласы шын қасиеті сыртында емес, ішінде, діліндегі мән-мазмұнында екенін білуге тиіс. Өмір бастауында тұрған жастарға, жігіттерге айтқан ақыл-кеңесінде өзінің өрелі ойын ақынның «Жігіттер, ойын арзан, күлкі қымбат, екі түрлі нәрсе ғой сыр мен сымбат» деп бастауы тегін емес, осылай бастап барып адамның абыройы, қасиеті, сыры болар терең мазмұнды ойларын таратып айтып



береді. Осы адамның сыры мен сырты, сымбаты болар құбылыстардың қадір-қасиетін ақын өз шығармаларында аражігін ажырата түсіп танытады: «Әрнәшік тән қуатыменен сырттан тауып, сыртта сақтайсыз, оның аты дәулет еді... Соған ұқсаған іштегі жан қуатыменен жиған нәрсенің аты ақыл, ғылым еді ғой» [4, 162-б.]. Және адамның шын қасиеті ақылы, ғылымы, ішкі рухани қазынасында екенін де ғалымдарша тәптіштеп түсіндіреді: «Сыртқа қасиет бітпейді, алла тағала қарайтұғын қалыбыңа, боямасыз ықласыңа қасиет бітеді» [4, 151-б.]. Ақынның өзекті ойлары өлеңдері мен қарасөздерінде жиі қайталанып, әр қырынан танытыла түсіп, тұжырымды түйін түрінде бекітіліп отырады. Мысалы қарасөзіндегі аталған ойды ақын өлеңінде де қайталай айтып бекітіп қояды:

Ақыл бітпес дәулетке,  
Дәулет бітпес келбетке [3, 146-б.].

Адам баласының ақыл-ойы, талғам-түсінігі әртүрлі болуы себепті олардың өз-өздерін бағалы санау өлшемдері де әр қилы болады. Соның үшеуі жоғарғы екі-ақ тармақ үзіндіде тапқыр айтылған, олар – келбет, дәулет, ақыл. Ақын ойынша, келбет те, дәулет те адам үшін қосымша, жанама қажетті игілік болғанымен, негізгі қасиеті бола алмайды, адамның өзін танытар нағыз болмысы мен қасиеті – ақылында. Ақын мұны келбеті мен дәулетін бедел көріп сырбазданған кербезді көріп сынаған он сегізінші қарасөзінде былайша түйіндеп беріпті: «Тегінде адам баласы адам баласынан ақыл, ғылым, ар, мінез деген нәрселермен озбақ. Онан басқа нәрселерменен оздым ғой демектің бәрі де – ақымақтық» [4, 114-б.]. Сөйтіп келбет пен дәулет және ақыл – үшеуінің, әсіресе алдыңғы екеуінен ақылдың жөні мен орны тіпті бөлек, алабөтен биік. Келбет – адамға о баста Алла мен ата-анасы арқылы келген және тек табиғи-биологиялық тұрғыдан ғана өсе алатын әрі кейін келе тозатын, бірақ адами қасиет түрінде кемелденбейтін сыртқы тәни болмыс қана. Дәулет – осы тәни қуатымен енбектеніп, бейнеттеніп жүріп табатын және адамшылығы жолында пайдаланатын сыртқы игілігі. Ал ақыл – сырт келбетімен және сырттан табар игіліктерді пайдалануы жағынан айуанмен ұқсас жаратылысты адам атты бүтіндей жаңа

болмысқа айналдыратын айрықша қасиет. Сөйтіп келбет пен дәулет – адамшылық жолында ақыл тауып адам болуға көмекші, жәрдемші болатын баспалдақ қана.

Біз жоғарыда ақылдың жүрекпен және одан шығар әділетпен байланысып әділетті, нұрлы, ізгі ақыл болатынын сөз еттік. Себебі жүрек – ізгілік пен қайырымдылықтың, рахым-мейірім мен имандылықтың бастауы мен мекені. «Ғылым сол үшеуінің жөнін білмек» дегендей адамгершілік жайлы ғылым мен Абай танымында да жүректің алар орны мен ізгілікті сипаты аса зор. Адам болуда ақылдың үлесі өлшеусіз мол десек те, Абай жүректің артықшылығын әркез көңілге қонымды, ақылға сиымды етіп жеткізіп отырады. Мұның жайын ақылдан соң айтармыз, ал әзірге мына жолдармен шектелеміз:

...Жүрегіңмен тындамай,  
Құлағыңмен қармарсың [3, 118-б.].

...Жүрегі жұмсақ білген құл  
Шын дос таппай тыншымас [3, 119-б.].

...Жүректе оты жоқ  
Адамда ми болмас [3, 135-б.].

...Ақылмен ойлап білген сөз  
Бойыңа жұқпас, сырғанар.  
Ынталы жүрек сезген сөз  
Бар тамырды қуалар [3, 224-б.].

Абай – өте ақиқатшыл ақын. Ол жүрек жайлы «бүйрегі бұра» білдірген сөздерін осылайша айтып отырса да, ақылдың мән-мазмұны мен қадір-қасиетін жақсы біледі. Абай ақылды – Аллаға жол салар жүректің шындықты біліп, ақиқатты таныр суаты санайды. Себебі тағы да ақынның өзі жазғандай, адамзаттың басты мұраты – Құдай жолы – адамшылыққа бастайтын ғибадаты мен құлшылығы – ақылдан бастау алады: «Әрбір ақылы бар кісіге иман парыз, әрбір иманы бар кісіге ғибадат парыз екен [4, 126-б.]. Абайдың «ғылым сол үшеуінің жөнін білмектің» жолымен танып білген ақылдың кезекті қыры – оның жүрекке кеңесші, ақиқат азығы, шындық пен ақиқат «суын» ішер суаты болуы:

Жүректің ақыл суаты,  
Махаббат қылса тәңрі үшін [3, 215-б.].

Адамзаттың басты мақсат-мұраты – Құдай жолы – адамшылық екені ақиқат, Аллаға жетуде «ынталы жүрек, шын көңілдің» ғана жәрдемші, құрал, қол бола алатыны да рас. Алайда Түп Иесінің жақсылығы мен өлшеусіз қадір-қасиетін шамашарқынша ақылмен танып біліп, ақылы жетпегенді жүрегімен сезіп әрі ақыл-ойы, жан-жүрегімен жария түрде құлшылық ете алатын жалғыз жаратылыс – ол адам баласы. Абай жасаған таным бойынша, Алланы бетке алып адам болудың өзіндік ақиқат жолы мен жүйесі бар: тән саулық – хауас сәлим – жан қуаттары – ақыл – жүрек. Байқасақ, тән саулық пен хауас сәлим ішіндегі алғашқы жан қуаттары – бес сезім мүшесі хайуанда да бар, бірақ ойлаушы жан мен ақыл жоқ. Тіпті хайуанда тән мүшесі ретіндегі ми мен жүрек те бар, бірақ олардың адамдағыдай Алла берген рухани қызметі жоқ. Адамдағы жанның ойлай алатын артықша «ірі жаратылған» сипаты да ақылдың арқасында пайда болған. Мұны ақылы жоқ хайуанның жанында «көрсем, білсем, үйренсем деген» құмар мен қиялдау, әсіресе ойлау қуаттарының болмауынан болжаймыз. Әкеден бала озып, асып туса да, баланың тегі мен төркіні – әке болып қалатыны сияқты адам болу мен Құдай жолы – адамшылық жолында жетіле беруде жүрекке дейінгі ақылдың үлесі өлшеусіз зор. Ақылдың жүрекке суат болар сипатын ақынның он үшінші қарасөзінен де тануға болады. Ақын мұнда иман мен оның түрлері жайлы толғанады. Иман – Аллаға құлшылық ету мен мұсылмандықтың басты шарты және ол – діни мазмұн мен сипаттағы адамгершілік қалып. Ең бастысы, иман – жүректе бекітілген наным күйіндегі жоғары адамгершілік. Ақылмен танып біліп, мойындап тәртіпті, әдепті болуға әбден болады, алайда жүректен орын алған иман – адамгершіліктің шыңы. Міне осы жоғары адамгершілік сипатындағы иманның якини, шын түрін ақын ақылмен байланыстырады: «Әуелі не нәрсеге иман келтірсе, соның хақтығына ақылы бірлән дәлел жүргізерлік болып, ақылы дәлел испат (дәлелмен бекіту) қыларға жараса, мұны якини иман десек керек» [4, 109-б.]. Бұл да – ақылдың жүрекке, жүректен шығар иманға қажетті құрал, ақиқатты білгізер суат болуын танытады. Абай шығармаларын

қайта-қайта оқу аз, оның әрбір өзекті ойын бүкіл туындылары бойында салыстырып, саралап мұқият тану керек болады. Әйтпесе біз танып келе жатқандай ақыл қырларын дәлдеп тану қиын болады. Ақылдың ендігі қыры ретінде біз оның – адами асыл, ізгі қасиеттерге қарауыл, күзетші болатын сипатын айтамыз:

Достық, қастық, бар қызық – жүрек ісі,  
Ар, ұяттың бір ақыл – күзетшісі [3, 249-б.].

Адами асыл қасиеттердің бәрі де бұрынғы-соңғы ойшылдардың айтуы, түйіндеуі бойынша, ақыл мен жүректен бастау алады және осы екеуінен шығуына орай олар интеллектуалдық, этикалық қайырымдылық, қасиеттер болып екіге бөлінеді. Ақыл – барша объективті шындықтармен бірге адамгершілік қасиеттерін де танып білуші және оларды сақтап «күзетуші». Адам баласының адамгершілік қасиеттерді танып білуінен бөлек оларды қайырымдылық күйінде сақтап күзетіп жүруі де – үлкен ерлік. Мұны ақын адамшылық пен имандылық кепілі – ғибадат туралы он екінші қарасөзінде айтатыны бар. Еңбексіз, бейнетсіз, қадағалаусыз, күзетусіз еш нәрсе де адам ойлаған қалаулы қалпында болмайды. Мысалы, ең қайырымды, құдайшылық қасиет жомарттықтың өзі қадағалаусыз, күзетусіз орта тұсынан асып кету я жетпей қалу арқылы ысырапқорлық пен сарандыққа айналып кетеді. Сол сияқты иман мен адамгершілік те Абай жазғандай, қараусыз, ізгі ниетсіз өзінің асыл қалпында қала алмайды: «Күзетшісіз, ескерусіз иман тұрмайды, ықыласымен өзін-өзі аңдып, шын діни шыншылдап жаны ашып тұрмаса, салғырттың иманы бар деп болмайды» [4, 109-б.]. Адам болмысындағы ақыл мен жүректің өздеріне тән асыл міндеттері болса да, олар адам болудағы ортақ әрекетті бөлінбестей бірігіп жасайды. Осы орайда ақылдың – адамгершілікке күзетші болатын әрекетінде оның жүрекпен жарасқан, «байланған» күйде болуының маңызы өте зор: «Қазақ та адам баласы ғой, көбі ақылсыздығынан азбайды, ақылдының (осы «ақылдың» болар) сөзін ұғып аларлық жүректе жігер, қайрат, байлаулылықтың жоқтығынан азады» [4, 110-б.]. Осындағы «жүректе жігер, қайрат, байлаулылықтың жоқтығынан» дегеннен біз ынта,

ықылас, сүюдің жоқтығын ұғамыз. Абай ұғымында бәрі де ынта, ықылас, сүюмен басталып, сүю толысқан ең биік шыңына ұмтылады. Адам болудың басы – «білмекке құмар» болған талап пен ұғым болса, бұлардың да бастауы – сүю екен: «Талап, ұғым махаббаттан шығады» [4, 136-б.]. Және өзінің иман, адамшылық, толық адам туралы отыз сегізінші қарасөзін терең ұғып алған жағдайда «махаббатың толады» дейді: «Сіздерге адам ұғылының мінездері туғралы біраз сөз жазып ядқар қалдырайын. Ықылас бірлән оқып, ұғып алыңыздар, аның үшін махаббатың толады» [4, 136-б.]. М.Мырзахметұлы ағамыз айқындап танытқандай, ақындағы имани гүл – адамгершілік танымның шыңы болса, ол – үш сүю, махаббат. Демек ақынның «махаббатың толады» деуінен адамшылығың артады, адамгершілігің жетіледі дегенді ұғамыз. Қалай болғанда да адамдық пен адамгершіліктің бастауы – ақыл екені ақиқат. Жүрек – жетекші, бағыттаушы. Алайда жүрек адами танып білу әрекетінің құралы емес, танып білу – ақылдың міндеті. Осы орайда ақынның жүрек культін насихаттай отырып, ақиқаттан ауытқымай ақылды – адами асыл қасиеттердің күзетшісі санауы әбден орынды.

Абай – ақылы алғыр, танымы терең ойшыл ақын. Ол белгілі бір нәрсе я құбылыс туралы толғанғанда, оның түрлі-түрлі қырын түгел қамтып тануға тырысады және ол әрекеті жеміссіз де емес. Ақылдың жаманға да, жақсыға да қызмет етіп кемшілікті болуынан бөлек Абай ақылдың шексіз ақиқатты танып білуде қауқарсыздығы мен өлшеулілігін де кемеңгерлікпен мойындаған. Әдетте даналар адам ақылын өте жоғары бағалап, оның танып білу қабілеті мен мүмкіндігін шектемейді. Абай да алғашқыда ақылдың алмайтын асуы болмайды деп білген және Алланы да тануға ақыл қуатын жұмсап баққан. Ақынның ақылдылығы сонда, ол бір ғана «Лай суға май бітпес қой өткенге» өлеңінде адам ақылының «асаулығын да», қауқарсыздығын да, яғни екі түрлі болмысын да танытқан. Адам ақылының танып білу жолында асаулық, батылдық танытқаны жақсы-ақ, алайда ақиқатты мойындап қауқарсыздығын сезінуі де орынды. Адам ақылы неміс философы И.Кант мойындағандай, Жаратушыны және жан мен әлемді тануда антиномияға (қауқарсыздық) ұшырайды [19, 288-с.], яғни өз әлсіздігі мен қауқарсыздығын

танытады. Бұл үшеуін танып білуде адам ақылының жарамсыздығын Абай да айтқан. Алланы танып білуде ақылдың қауқарсыздығын Абай аталған өлеңінде алғаш рет мойындайды:

Өзгені ақыл ойға қондырады,  
Біле алмай бір тәңріні болдырады [3, 176-б.].

Алланы танудағы Абайдың танымдық секірісі осы өлеңінде-ақ жүзеге асып қойғанын байқаймыз. Ақын танымындағы бұл өзгеріс «Алла деген сөз жеңіл» өлеңінде тиянақталып беки түседі:

Ақылға сыймас ол алла,  
Тағрипқа тілім қысқа аһ.

...Ақылмен хауас (Жаратушы) барлығын  
Білмейдүр, жүрек сезедүр [3, 215-б.].

Ал қарасөздерінде бұл таным ақын үшін қалыпты ойға айналады. Адам ақылы Алланы тікелей тани алмайды, себебі Алла – адаммен қоса шексіз-шетсіз барша Барлықтың Жаратушысы мен Иесі. Адамзат даналары Алланы танымақ түгілі, ол жаратқан шексіз ғаламдағы көп жұлдыздың біреуі Күннің айналасы мен жүйесіндегі өзі мекен еткен Жерді де түгел танып бітпеген. Осы орайда Абайдың «Саниғын (жасаушыны) сұнатына (жасағанына) қарап білесіз» [4, 140-б.] деген түйіні өте орынды. Ақын Алланың сипаттары жайлы әңгімелегенде сол сипаттарының өзі біздің ақылымызға тірек, таяныш есебінде қажет болғанын, ал шындығында Алланың өзі ешбір сипатқа мұқтаж емесін айтады: «Ол – алла тағаланың заты ешбір сипатқа мұқтаж емес, біздің ғақылымыз мұқтаж, жоғары жазылмыш сипаттарбірлән тағрифлап танымаққа керек. Егер де ол сипаттар бірлән тағрифламасақ бізге мағрифатулла қиын болады. Біз алла тағаланы өзінің білінгені қадар ғана білеміз, болмаса түгел білмекке мүмкін емес. Заты түгел, хикметіне ешбір хақим ақыл ерістіре алмады. Алла тағала өлшеусіз, біздің ақылымыз – өлшеулі. Өлшеулі бірлән өлшеусізді білуге болмайды» [4, 139-б.]. Адам ақылының осындай қауқарсыздығы Алла жаратқан ғаламды тануда да көрінеді, ақын оны да әр-әр тұста айтып

отырады: «Бұл ғаламды көрдің, өлшеуіне ақылың жетпейді, келісті көркемдігіне һәм қандай лайықты жарастықты законімен жаратылып, оның ешбірінің бұзылмай тұғынын көресің. Бұлардың бәріне таңғажайып қаласың һәм ақылың жетпейді...» [4, 123-б.]. Алла мен Ол жаратқан ғаламнан кейін адам ақылы тани алмайтын үшінші құбылыс – жан, бұл да – Алланың тіршілік иелеріне уақытша берген аманаты. Бір нәрсені танып білу дегеніміз оны ғылым жолымен нақты дерекпен айқындау болса, жанның жайы бұлайша танылған емес. Абай «жан қуаты дейтұғын қуат – бек көп нәрсе» деп, оның сыры құпиялау екенін білдірсе де, артынша «бәрін мұнда жазарға уақыт сыйғызбайды» [4, 161-б.] дейтіні бар. Уақыты болған күнде де ақын жанның сырын түгелдеп танымас еді. Жан туралы ой толғаған Платон, Аристотель, Плотин, әл-Фараби, ибн-Синалардың жазуынша, жан өзі енген тәнге екі түрлі қуат береді, қозғалыс пен толғаныс, яғни тіршілік пен тану қабілет, мүмкіндігін дарытады. Бұл – қозғалып, қимылдап, өсіп тіршілік ету мен тану сырын жылдар бойы тәни-рухани жағынан болжап білудің ғана нәтижесі. Әйтпесе адам ақылы мен ғылымы өсімдік, жануар мен адамдағы қозғалыс, өсу, тану барысын өздері жасаған сағат пен машинаның құрылыс, жүрісіндей дәлдеп білмейді. Ал егер білген болса, онда өлген адамға жан бітіріп тірілтіп алар еді. Бұлай ету мүмкін болмаған соң, жанды тану да – адам ақылының мүмкіндігінен тыс нәрсе болып қала береді. Сөйтіп Абай – Э.Кант секілді адам ақылы Жаратушы және жан мен ғаламды танып білуде қауқарсыз екенін танытқан.

Ең бастысы, ақыл – Абай үшін адам жаратылысы мен болмысының бұлтартпас белгісі, адамды өзіндік болмыс ретінде танытатын қасиеті. Ақыл ғана адамды айуан жаратылысынан жырақтатып, жаңа асыл болмысқа айналдырады. Адам – ақылымен білуге ұмтылып ойлай алатын қабілетімен ғана қымбат, асыл болмыс: «...Білсек те, білмесек те білсек екен деген адамның баласы екенбіз. Енді осы күнде хайуаннан да жаманбыз. Хайуан білмейді, білемін деп таласпайды» [4, 104-б.]. Ақын сөзінен белгілі болғандай, адам мен айуан арасындағы айырмашылық – қайталап айтамыз, адамның ақылымен білуге ұмтылып ойлай алуында. Бұл тұжырымды ой ақынның өлеңінде де тиянақты түйінделген:

Малда да бар жан мен тән,  
Ақыл, сезім болмаса.  
Тіршіліктің несі сән,  
Тереңге бет қоймаса [3, 227-б.]?

Біз ақын ойын әр-әр тұста дәйек етіп айтарда бұл шумақты қайталап ұсынғандай көрінеміз, өйткені дәл осы төрт жолдағы ақын айтар ойдың мән-мазмұны аса зор. Абай осы ойымен ақын болудан асып, ғалым, тіпті хакім қалпына көшіп кеткендей болады. Мұнда адам болу мен адамшылықтың анық ақиқат сыры айтылған. Жан мен тән, яғни жаны бар тән айуанда, малда да бар, ақын айтқандай, ақыл мен ар-ұят, мейірім, махаббат сезімдерімен ғана жануар тектес, жануар тәндес жаратылыс – адам болмысына айналады. Шынында да адам өмірі мен тіршілігінің мәні мен сәні – «тереңге бет қойып» танып білу. Себебі жетінші қарасөзде жазылғандай, «ішсем, жесем, ұйықтасам» деген тән құмарымен бірге «көрсем, білсем, үйренсем» деген жан құмары [4, 103-б.] бірлікте тек адамда ғана бар. Ал айуан «ішсем, жесем, ұйықтасам» деген тән құмарының әрекетімен ғана тіршілік етеді. Сөйтіп «ғылым сол үшеуінің жөнін білмек» дегендегі тәннен, қайраттан кейінгі екінші қасиет ақылдың жайы ақын шығармаларында осындай қырларымен көрініс тапқан.

### **Адамшылықты қалыптастыруда жүректің алар орны**

Абайдың адамгершілік танымы – толық адам туралы ойталқы, тануымызды біз ақынның «Әуелде бір суық мұз – ақыл зерек» өлеңімен бастап, өлеңдегі «ғылым сол үшеуінің жөнін білмек» дегеннен тарта таратып, қайрат пен ақыл жайлы ақын танымын танығандай болдық. Енді толық адам танымының үшінші қасиеті – жүрек жайлы ақын ойларын саралауға ойысамыз. М.Мырзахметұлы ағамыз жазғандай, Абайда жүректің гуманистік мән-мазмұнмен қолданыс табуы басым келеді. Сөйтсе де ақын жүректің тән мүшесі ретіндегі сипатын назарынан тыс қалдырмаған. Мысалы, он жетінші қарасөздегі жүректің мына сөзінен осыны байқаймыз: «Мен – адам денесінің



патшасымын, қан менен тарайды, жан менде мекен қылады, менсіз тіршілік жоқ» [4, 113-б.]. Жанның жүректе мекен қылатыны да рас, себебі адамға өмір, тіршілік беретін жан тек жүрек тоқтағанда ғана кеудеден шықса керек. Денедегі біраз мүше сыр беріп, тіпті қызметін де атқара алмай қалғанда, адам баласы тіршілігін жалғай береді, тек жүрек соғуын тоқтатқанда ғана адам өмірі анық үзіледі. Осы тұрғыдан келгенде жүрек жайлы ақын ойы – талассыз ақиқат. Адам жүрегінің тек қана тәни кемістіктен мазаланып ауырмайтыны белгілі, дәрігерлік ғылым күндердің күнінде мүмкін жүректің көбіне-көп рухани себептермен мазаланатынын да айқын анықтар. Жүрек – көзбен көріп, қолмен ұстауға келетін тәни мүше, яғни ақын жазғандай, «ет жүрек»:

Ет жүрек өртенді,  
От боп жанып,  
Жалын шалып  
Ішіме [3, 98-б.].

Қуанғанда, мұнайғанда, құлай сүйіп жақсы көргенде, кейде ызаланып жек көргенде, ет жүректің осындай рухани хал-күймен сабақтасып, сәйкестеніп сыздайтыны бар. Содан да жүректің тән мен рухтың арасындағы, әсіресе жайы-күйі беймәлім жан мен рухқа қатысты құбылыс екенін болжауға болады. Тіпті ақылмен ойлап танымдық табысқа жеткен кезіңізде кеудеңіздің жайлы халмен кеңейіп, жүрегіңіздің еркін «тыныстап» қалатыны да бар. Ет жүрек адамның сезім халімен байланысып түрлі-түрлі тәни-рухани аралас күй кешетіні ақынның бірнеше өлеңінде тілге тиек етіледі:

Қызарып, сұрланып,  
Лүпілдеп жүрегі.  
...Аяндап ақырын,  
Жүрекпен алысып [3, 133].

Біздердей ғашық көп,  
Қайсысы саған дөп?  
Жөндеп те айтпадым,  
Жүрегім лүпілдеп [3, 137-б.].

Жүрегім суылдап,  
Сүйегім шымырлап,  
Алладан тілеймін  
Құпия сыбырлап [3, 164-б.].

Шырқап, қалқып, сорғалап, тамылжиды,  
Жүрек тербеп, оятар баста миды [3, 203-б.].

Көзіме жас бер, жылайын,

Шыдам бер, сабыр қылайын.  
Жаралы болған жүрекке  
Дауа бер, жамап сынайын [3, 231-б.].

Қан жүректі, қайғылы-ау,  
Қайрыла кет сен маған [3, 232-б.].

Ет жүрек иесінің түрлі рухани күйіне салғырт қарай алмай, қайта сол хал-күйлерге сезгіштік, ортақтық танытып сыздайтыны, мазасызданатыны, ауыратыны, кейде қуанғанда, бақыттан бас айналып сүйген кезде кеудеңізден шығып кетердей «асыр салып ойнап» кететіні де көрінеді. Ақын өлеңдеріне мазмұн болған жүректің мұндай халі оның жалғыз ғана тәни мүше емесін танытады. Сөйтіп М.Әуезовтің Абай шығармаларындағы жүректің сезгіштігі, М.Мырзахметұлының ақындағы жүрекке гуманистік мазмұн беріп айтқан ойлары тегін емес екен. Кейде адамның ақылы анық байқамағанды жүректің сезіп, «біліп» қоятыны бар. Абай мына өлеңі арқылы лирикалық кейіпкердің ақылымен ойлап асқанынан гөрі жүрекпен сезіп оза шапқанын тілге тиек етеді:

Жүрегім, нені сезесің,  
Сенен басқа жан жоқ па?  
...Сезгенінді сездіріп,  
Жете алмадың ортаққа [3, 238-б.].

Танып білу – ақылдың қызметі болса да, жүректің сезгіштікпен ақылдың алдына шығып кететіні бар. Шынайы танып білуге жүректің, ондағы ынта мен ықыластың бастамашы

болатыны – ақындағы әбден бекіген үйреншікті түйін. Мұнын айқын дерегін ақынның мына өлең шумағынан байқауға болады:

Жүректе қайрат болмаса,  
Ұйықтаған ойды кім түртпек?  
Ақылға сәуле қонбаса,  
Хайуанша жүріп күнелтпек [3, 227-б.].

Абайды бейнелеп айтушы ақын ғана деп қабылдамай, мәселенің мәнін, түпкі сырын білуге ұмтылатын ойшыл, хакім деп білсек, бұған дәлел осы өлең шумағы болмақ. Өлең сөзді қара сөзбен түсінуге тырысып баяндар болсақ, мұнда таң қаларлық төркінді таным бар. Ақын сөзінен ұғарымыз, хайуанда ақыл жоқ, соған сәйкес жан құмары да жоқ, ол «ішсем, жесем, ұйықтасам» деген тән құмарымен ғана тіршілік етумен күнелтеді. Егер адам да жан құмары, ақылымен танып біліп, «жан тамағымен» «ақылына сәуле қондырмаса», сөйтіп ақылын азықтандырмаса, ол да «хайуанша жүріп күнелтпек». «Ақылға сәуле қондыру» мақсатын көздеп білмекке ұмтылған құмарымен ғана жануар тектес жаратылыс – адам болмысына айнала бастайды. Міне осы зор әрекеттің басында Абайдың танытуынша, жүрек тұрады екен. Жүректегі қайрат, яғни жүрекке тән, тиесілі және жүректен ғана шығатын ынта, ықылас, сүю болмаса, ақылмен ойлап танып білу жемісті болып жүзеге аспайды екен. Яғни «ұйықтаған ойды түртіп» оятатын, сөйтіп табысты танып білу жолына салып жіберетін – жүректегі ынта, ықылас, сүю екен. Абай қашанғы қалпымен өзекті ойларын әр-әр тұста қайта оралып бекітіп отырады. Мысалы, ақылға жүректің басшылық, жетекшілік ететін ой ақынның он төртінші қарасөзінде былайша тұжырымдалады: «Қазақ та адам баласы ғой, көбі ақылсыздығынан азбайды, ақылдының сөзін ұғып аларлық жүректе жігер, қайрат, байлаулылықтың жоқтығынан азады» [4, 110-б.]. Ақын ойынша, қазақ ақылсыз емес, тек ақылдының, ақылдың сөзін ұғып аларлыққа бастамашы болатын жүректен шығар ынта, ықыластың жоқтығынан олардың тура, жақсы жолды ұстанып қалудағы әрекеттерінде байлаулылық пен тұрақтылықтың болмай тұрғанына қынжылады. Кісінің көңілі соқпаған нәрсеге қолы да бармайды. Танып білуге де, дене әрекетіне де бастау

болатын ынта мен ықылас керек. Абай осы тұрғыдан жүректі ақылға жетекші көреді: «...сонда билеуші, әмірші жүрек болса жарайды. Ақыл, сенің қырың көп, жүрек сенің ол көп қырыңа жүрмейді» [4, 113-б.]. Отыз сегізінші қарасөзінің басында ақын «талап, ұғым махаббаттан шығады» [4, 136-б.] десе, «Көзімнің қарасы» өлеңінде «жүректе оты жоқ адамда ми болмас» [3, 135-б.] деп түйіндейді. Екеуінің де айтар ойы ортақ, жүректен шығар ынта, ықылас, сүю, махаббат болмаса, танып білу де қызу басталып, ойдағыдай жалғаспайды.

Абай дүниетанымының өзегі – адамшылық, адамгершілік болса, адамгершілік танымының мәні – сүю. Адамдыққа бастайтын танып білуге жетекшілік ететін сүю – адамшылық, адамгершіліктің де биік шыңы саналады. Сөйтіп адамшылық сүюмен басталады әрі сүюмен түйінделеді. Ақын шығармаларындағы жүрек осы сүю мағынасымен көбірек танылады. Жүректің анық қызметі, басты бейнеті – сүю екені ақынның мына шумағынан көрінеді:

Кейде есер көңіл құрғырың  
Махаббат іздеп талпынар.  
Ішем деп бейнет сусынын  
Асау жүрек алқынар [3, 119-б.].

Адамзат қауымның тасқындап келген махаббаты көбіне қарсы жынысқа қатысты көрінеді. Бұл түрі – махаббат сезімінің биігі болмаса да, көпшіліктің таныған «түсінікті» махаббаты осы. Ақынның «махаббат іздеп талпынған көңілін құрғырың, есер» деп кінәлауы тегін емес. Адамзат осындай махаббаттан пайда болып, дүниеге келіп жатса да, мұндай алып ұшқан махаббат көбіне адам өмірінің жігіттік шағына жарасымды көрінеді. Кейінгі кездегі махаббат кісінің жігіт шағында таңдап тапқан қосағына, жарына, Абайша айтқанда, «қатының, балаң, досың бар», осыларға бағытталуы керек. Егде шақта өтіп кеткен жігіт шактың қызығын іздеп, жарыңнан өзге жанды «сүйем» деп талпыну – ақын жазғандай, есер көңілдің тірлігі. Бізге керегі бұлардан бөлек жай, ол – асау жүректің «ішем деп бейнет сусынын», яғни «сүйем» деп ұмтылып алқынуы. Жүректің қалауы мен өзіне тән тиесілі «бейнет сусыны» – сүю екен. Тәнге

– қалау, қайратқа – әрекет, ақылға – тану міндеті мен қызметі тән болса, жүректің жасайтын ісі – сүю. Жүректің бейнеті – сүю екенін ақын жігіт шағында жазған «Сап-сап, көңлім, сап, көңлім» өлеңінде-ақ байқатып қойған:

Хош, қыз алсын қойнына,  
Бейнет көрмей, дәулет жоқ [3, 16-б.].

Бұл өлеңінде ақын өз замандастарының қадірсіз, көріксіз жеңіл жүрісті өмірін хош көрмей, жөнсіз санап сынады. Оларды ата-баба жолымен көрікті, текті қызды таңдап, қалыңын беріп үйленуге шақырады. Ақын аз күндік қызық пен бір сәттік нәпсі қалауын дарақылық деп біледі. Өзі қатарлы жігіттерге айтары – хош, қыз қойнына енерсің, бірақ болашақ жарың болар қызды дәл тауып, ұнатып, жақсы көріп, «бейнет көріп» – сүйіп-күйіп қосылмай, дәулет жоқ, баянды бақыт болмас деген өрелі ой. Яғни сүю де – бейнет көру екен. Ал сүю, жоғарыдағы шумақта айтылғандай, жүректің «ішем деп бейнет сусынын» деген өзіндік төл әрекеті. Жүректің қасиеттерін танытқан он төртінші қарасөзінде ақын «асықтық та – жүрек ісі» [4, 110-б.] деп, жүрек пен сүю, махаббат, асықтықтың бөлінбес байланысын дәлдеп тұрып айтқан. «Жүрегім менің – қырық жамау» өлеңінде де ақын «Кімді сүйсе, бұл жүрек [3, 232-б.] деп, сүю – жүрек әрекеті екенін танытады. Сөйтіп сүю, махаббат – жүректің анық, айқын төл қызметі.

Абайда сүю мен сенімнің ара-жігін ажыратып мәнін танытқан мынадай өлең жолдары бар:

Сені жақсы көрмесе,  
Сенер ме еді сөзіне [3, 132-б.]?

Ақын сөзінен ұғарымыз, әуелі жақсы көру, сүю болып, бұған жалғас сенім орын алады екен. Жақсы көру, ұнату, әсіресе сүю – жүрек ісі екенін жоғарыда сөз еттік, осы сүйюмен жалғас сену, сенім де – жүрекпен байланысты құбылыс. Бұл түйініміз ақынның «Жүрегім, ойбай, соқпа енді» өлеңінен туады. Абай мұнда сену әрекетін жүрекке қарата, жүрекпен байланыстыра сөз етеді:

Жүрегім, ойбай, соқпа енді!  
 Бола берме тым күлкі.  
 Көрмейсің бе, тоқта енді,  
 Кімге сенсең, сол шикі.  
 ...Сенісерге жан таба алмай,  
 Сенделеді ет жүрек [3, 145-б.].

Адамгершілік қасиеттер мен хал-күйлердің мұндай нәзік пернелерін сөз ету – мораль философиясының мазмұны. Абай адамгершілікті жүйелі де желілі жырлау арқылы осы мораль философиясының білгірі болып танылады. Сену мен сенім – сүюдің ғана жалғасы болып қоймай, жүректің де ісі екен. Кісі ақылымен де сенер, алайда жүрегімен сенгені бекем, мықты болады. Адам ақылы, білімі арқылы біршама көп кісімен таныс-біліс, әріптес, дос-жора болса да, жүрегінің сүюі, сенуімен бірлі-жарым адамды ғана өмірлік жары етеді. Осыдан-ақ жүректен шыққан сенімнің мықтылығы танылады. Жүрек пен сенім байланысын ақынның тағы бір сөзімен тиянақтап түйіндемекпіз. Мазмұн-мәні мен төркін-тегі терең жетінші қарасөзінде ақын өз замандастарының адамшылық қалпына көңілі құлазып, олар турасында «Көкіректе сәуле жоқ, көңілде сенім жоқ» деп түңілетіні бар. Ақынның «ақылға сәуле қонбаса, хайуанша жүріп күнелтпек» деген ойын ескерсек, «көкіректе сәуле жоқ» деу арқылы ақын замандастарын білім-ғылымға құлықсыздығы, қараңғылығы себепті сынаған деп білеміз. Ал «көңілде сенім жоқ» деуінен олардың дін, шариғатқа деген шалалығын ұғамыз. Дін негізі – имандылық десек, иманның өзі – жүрек сүюі мен сенім, нанымның нәтижесі мен жемісі.

Иманның бірінші шарты – Алланың барлығы мен бірлігіне нану, сену. Абайдың отыз сегізінші қарасөзіндегі басты мақсаты да – иманның осы алғашқы шартын жан-жақты таныту. Өзінің өмірлік мұраты – толық адам танымын да ақын Алланың барлығы мен бірлігін танытар сипаттарын әңгімелеуден туындатып тұжырымдайды. Алланы – ең озық, ең кемел кәмәлатғазамат тұлғасында танытып, жәуанмәртлік сипаттарын баяндаған ойлары да ең әуелі ақынның иман жайын сөз еткен пайымдауынан бастау алады. Иман – ең әуелі Аллаға иман келтіру, сену, нану. Осы имандылық та, иман арқылы Аллаға бет алу да Абай ұғымында жүреппен тығыз байланысты наным мен әрекет.

Ақылды, иманды, ғибадат етуші адам баласының басты мақсат-мұраты – Абай ұғымынша, «махаббат қылса тәңрі үшін», «адамды сүю мен Алланың хикметін сезу». Адамзат үшін ең қасиетті ұғым мен игілік – шындық, растық, ақиқат болса, Абай-ша, Алла тағаланың өзі – хақиқат жолы. Адамның екі дүниесіне де абырой мен жеңілдік беретін – Алла. Темірқазығымыз – Алла. Осы Алла тағалаға бет алып жол салу – жүрек ісі:

Алла деген сөз жеңіл,  
Аллаға ауыз жол емес.  
Ынталы жүрек, шын көңіл,  
Өзгесі хаққа қол емес [3, 215-б.].

Алла жолын ұстанып, Аллаға бет алуда пендесі ауызымен, қайратымен, ақылымен әрекет етіп бағады, бірақ бұлардың бірі де Аллаға шынайы жол сала алмайды, ешқайсысы да Аллаға бет алып жақындауда жарамды жәрдемші, көмекші, құрал, қол бола алмайды. Абай танымынша, Аллаға жол салатын – тек қана ынталы жүрек пен шын көңіл. Бұл – көңілге қонымды, ақылға сыйымды қисын. Алланы ақылмен тану мүмкін емес, Алланы тек қана «жүрек сезедүр». Дін негізінің – иман, наным, сенім аталуы тегін емес, Алланың барлығы мен бірлігіне, періштелерге, пайғамбарларға, қасиетті кітаптарға, Алланың тағдырына, қияметке тек қана нану керек, сену керек. Бұларды ақылмен я ғылым жолымен танып білуге болмайды. Ақыл, ғылым ісі – тану, таным, дін ісі – иман келтіру, наным мен сенім. Абай осы ақиқатты анық танып, Аллаға жол салар – тек қана жүрек деп біледі.

Әлем мен адамның жаратылысы мен болмысындағы химет пен шеберліктің, жетілгендік пен кемелділіктің түп бастауы қалайда бір Аллаға барып тіреледі. Себебі бұрынғы-соңғы ойшылдар мен даналар ғылым дерегімен болмаса да, тылсым түйсік, жүрек сезгіштігімен бұл ақиқатты әлдеқашан мойындап қойған. Абай да асыл ақиқатты, хақиқатты, қол жетпес қазынаны жүрекпен байланыстырып сөз етеді. Адамзат ғылымы танып білуге қатысы бар ақылдың өзін толық танып болған жоқ, жүректің танып білуге қатысы мен гуманистік, рухани сыры тіпті

жұмбақ. Ақын «Сенбе жұртқа, тұрса да қанша мақтап» өлеңінде жүрек жайлы былай дейді:

Қайғы келсе қарсы тұр, құлай берме,  
Қызық келсе, қызықпа, оңғаққа ерме.  
Жүрегіңе сүңгі де, түбін көзде,  
Сонан тапқан – шын асыл, тастай көрме [3, 214-б.].

Соңғы екі жолдың айтар мазмұнын болжап білмесек, дәлдеп білуіміз қиын. Бұл өлеңінде Абай өзін мораль философиясының маманындай танытады. Өлең мазмұны басынан-ақ адам болмысының бұлыңғыр, күрделі екенін сездірумен басталады. Ақын «Әсемпаз болма әрнеге» өлеңінде «қайрат пен ақыл жол табар» дегеніндей, мұнда да «өзіңді алып шығар еңбегің (қайратың) мен ақылың екі жақтап» деп, адамның ақылы мен әрекетіне, қайратына көбірек үміт артады. Сөйтсе де «түпкі құтқарушың – жүрек» дегендей ишара, тұспалын да айтып, оқырманын аң-таң етіп қояды. Жүректе терең сыр барын ақын «Өлсем орным – қара жер сыз болмай ма» өлеңіндегі «Жүрегімнің түбіне терең бойла, мен бір жұмбақ адаммын, оны да ойла» [3, 214-б.] деген құпиялау ойымен де танытады. Жүрек жайы Абайда ғана емес, дін, сопылық ілім, мораль, философияда, тіпті ғылымда да жұмбақтау күйінде қалып келеді. Біз бір ғана нәрсені болжай аламыз, ең берісі Аристотель «Этикасынан» бастау алатын адамгершілік ілімінде жүректен шығатын ізгі қасиеттер адамшылық болмыс пен қалыпты тиянақтап бекіте түседі. Абайдың өзі де махаббат пен әділетті – адамшылықтың алды [4, 164-б.] деп біледі. Бұл екеуі – жүректен шығатын, жүрекке қатысты этикалық қасиеттер. Адам баласы үшін ақыл арқылы танып білу әрекеті – өте тамаша қасиет, ал жүректен шығатын әділет, ар-ұят, рахым-мейірім, сүюмен адамдардың өзара қайырымды, ізгілікті болуы тіпті ғажап жағдай. Шын асыл, қазына мен қызық-қуаныштың жүректе екенін Абай «Ерекше естен кетпес қызық қайда» өлеңімен танытқандай болады:

Бұл өмірдің қызығы махаббатпен,  
Көрге кірсең үлгілі жақсы атақпен.  
Арттағыға сөзің мен ісің қалса,  
Өлсең де, өлмегенмен боласың тең.



Жүректен ізі кетпес қызық көрсек,  
Жақсылықты аянбай жұртқа бөлсек.  
Жақынның да, жардың да, асықтың да  
Бәрінің де қызығын көріп білсек [3, 221-б.].

Осы екі шумақта айтылған «махаббат», «үлгілі жақсы атақ», «өлмегенмен боласың тең», «жақсылықты аянбай жұртқа бөлсек», жақын-туыс, жар, асықтарымызбен сыйласып, сүйісіп тату жүрсек – бұлардың бәрі де «жүректен ізі кетпес қызықтар». Ақыл мен жүрек – адами ізгі, асыл қасиеттердің бастауы болса да, екеуінен тарайтын жақсы қасиеттердің адам абыройын арттыруда өзіндік ерекшеліктері бар. Ақыл арқылы танып біліп адам баласы өресінің жеткен жеріне шейін білімді, ғылымды, ойлы, зерек, есті, ғұлама, дана, данышпан, кемеңгер болады. Адамзаттың бұл дәрежелері иесін сөзсіз абыройлы әрі абзал етеді. Әйтсе де бұрынғы-соңғы даналардың айтуынша, адамшылық, адамгершілік, өзара қайырым танытушылық адамдардың жалғыз-жарым жүрмей бірігіп, қауымдасып, қоғамдасуынан басталады. Былайша айтқанда, қауымдасу мен қоғамдасу – адам болу мен адамгершіліктің алғышарты. Ақылмен танып білу ұстаздық-шәкірттік қарым-қатынастан бөлек көбіне оңашада оқшауланып, ойлануға оңтайлы тыныштықта отырып ізденумен жүзеге асады. Мұндай әрекеттен жоғарыда аталған ақылға қатысты ойшылдық, интеллектуалдық қайырымдылық-қасиеттер пайда болады. Ал әділет бастаған ар-ұят, рахым-мейірім, қанағатынсап, сүю, махаббат, имандылық қасиеттері – жүректен шығатын әрі жүрекке қатысты этикалық қайырымдылықтыр. Және осы қасиеттер адамдардың қауымдасып өмір сүруіне бастайды әрі сол қауым, қоғам, қаланың қайырымды болуына жеткізеді. Бұдан шығатын түйін – адамдардың бәрі бірдей оқымысты, ғалым, дана, кемеңгер болмайды, алайда бәрі бірдей «жақынның да, жардың да, асықтың да – бәрінің де қызығын көріп білсек» деумен қауымдасып, қоғамдасып қайырымдылықпен өмір сүруді арман етеді. Ал бұған жеткізетін – көбіне жүректен шығатын асыл да ізгі қасиеттер. Адам баласының адамшылығы мен адамгершілігі қайратынан ақылға қарай, ақылдан жүрекке қарай биіктеп, абзалданып жетіле, кемелдене береді. Бір ерекшелігі, Абай жүрекке қатысты ойын көбіне

астарлап я бейнелеп айтады. Адамда кейде өзі сезіп тұрған, өзіне мәлім нәрсені ақылмен, ауызбен айқындап айтып бере алмаушылық болады. Сірә, мұндай жағдай сезген ақиқатына ақыл «құрығының» оңайшылықпен жете алмауынан болар. Адам ақылы тани алмайтын Жаратушы, жан, ғалам сырына шама-шарқынша осы жүрек сезгіштігі жол салар. Ал біздіңше, Абайдағы жүрек сыры көбіне адамшылық, ізгілікпен байланысты болып келеді:

Жүрек – теңіз, қызықтың бәрі – асыл тас,  
Сол қызықсыз өмірде жүрек қалмас.  
Жүректен қызу-қызба кете қалса,  
Өзге тәннен еш қызық іс табылмас.

Достық, қастық, бар қызық – жүрек ісі,  
Ар, ұяттың бір ақыл – күзетшісі [3, 249-б.].

«Теңіз» бен ондағы «асыл тас» – сопылық ілімде жиі ұшырайтын ұғымдар. Жүректің артықшылығы мен асылдығы да осы ұғымдармен байланысты болатыны бар. Сопының мақсаты – Алламен бірігу, хаққа, хақиқатқа жету. Сол хақиқат теңіз түбіндегі асыл тасқа баланады. Сопы осы хақиқатқа жету үшін ең әуелі жаяулап я арбамен теңізге баруы керек, содан соң атын я арбасын тастап қайыққа ауысып отырады, одан әрі тағы да теңіз түбіне сүңгуі қажет болады. Бұл әрекеттердің бәрі де теңіз түбіндегі асыл тас үшін жасалады, ал асыл тастың – сопы армандаған хақиқат екенін жоғарыда айттық. Теңіз түбіндегі асыл тасқа жету үшін құрал етілетін жаяу жүріс, арба мен ат – ақылды, ал теңіздегі кеме мен кейінгі теңіз түбіне сүңгу әрекеті – жүректі ишаралап білдіреді. Осыдан да ақиқатты түгелдеп тануда ақылдың мүмкіндігі шектеулі, ал жүректің сезгіштігі үміт сәулесін оятып «дертке дауа» болатыны болжанады. Біздіңше, ақын өлеңінде жүрек – ізгі қасиеттердің бастауы мен мекені болатыны айтылғандай. Жүрек – әділет, ар-ұят бастаған барша ізгі қасиеттердің анасы іспетті. Жүрек – діл, діл – адамгершілік қасиеттердің жиынтығы. Діл – теңіз, адами ізгі қасиеттер – асыл тас. Адамның өзіне тән болмысы – адамгершілігі де, өзгелермен қарым-қатынасы да, жалпы өмірі де – бәрі-бәрі жүректен шығатын ізгі қасиеттермен кемел, көрікті, тамаша болмақ. Жүрек

– ізгілік бастауы екені ақын аударған Я.Полонскийдің өлеңінен де көрінеді:

Жүректе көп қазына бар, бәрі жақсы,  
Теңіздің түбіндей-ақ қарап бақшы.  
Сол жүректен жылылық, достықпенен  
Бұлақша ағып ғаламға тарамашы [4, 84-б.].

Ақынның өз өлеңі мен аудармасы ортақ ойды жырлаған. Әдетте адамдар қайрат пен ақылын жұмсаумен қоңыр төбел күй кешіп жүреді. Мұндай жандарда жүректен шығар ар-ұят, рахым-мейірімнен гөрі амал мен айла, қулық пен сұмдық басым келеді. Адамгершілік пен жүректің азып, кеміп кірлеуі – ізгілік пен жақсылықты көздемеген ақыл мен қайраттан болады. Абай ұғымынша, жүрек қасиеттері толыспай я болмай, ақыл мен қайраттың ғана иесі болумен тірлігін дөңгелетіп жүргендер – толық адам емес, жарым адамдар. Ақынның «Әуелде бір суық мұз – ақыл зерек» атты қысқа-нұсқа, әйтсе де өте өрелі өлеңінде:

Ақыл, қайрат, жүректі бірдей ұста,  
Сонда толық боласың елден бөлек.  
Жеке-жеке біреуі жарытпайды,  
Жол да жоқ жарыместі «жақсы» демек [3, 95-б.] –

деп ой толғауы бізді осындай түйін жасауға бейімдейді. Байыптап байқасақ, адамдар үш қасиеттің тек соңғысын ғана ескермей, назарға алмай жүруі мүмкін, ал алдыңғы екеуінсіз қадам баса алмайды. Денсаулығы (қайраты) дімкәс, ақыл-есі, білім-білігі кем кісі адамшылығын сақтамақ түгілі, қоғам ісіне араласып кәсіп ете алмайды. Сондықтан да Абай «ақыл мен қайрат жол табар қашқанға да қуғанға», «өзіңді алып шығар еңбегің (қайратың) мен ақылың екі жақтап» деп, адам тіршілігі мен өмірі үшін әсіресе ақыл мен қайраттың аса қажетті екенін жиі айтады. Пенделік пен келтелікке, тіпті қиянатқа да жол беріп қоятын ақыл мен қайраттың тірлігіне жүрек қасиеттері қосылғанда ғана адам болмысы мен өмірі жақсы болуға бет алады, толық адам бола бастайды. Ақын айтқандай, адам баласы өз өмірінің барысында қайраты мен ақылы арқылы қашқанға да қуғанға жол табумен амалдап жүре береді. Алайда мұндай адам

мен оның өмірі әркез абыройлы, қиянатсыз, қулықсыз бола бермейді. Сол үшін де Абай көбіне жүрекке үміт артып, жүрекке жүгініп, анық жақсылық пен ізгілік – жүректе екенін жиі айтады:

Ақыл да, ашу да жоқ, күлкі де (қайрат) жоқ,  
Тулап, қайнап бір жүрек қылады әлек [3, 95-б.].

Қайрат пен ақыл жол табар,  
Қашқанға да қуғанға.  
Әділет, шапқат (жүрек) кімде бер,  
Сол жарасар туғанға [3, 162-б.].

Қайғы келсе қарсы тұр, құлай берме,  
Қызық келсе, қызықпа, оңғаққа ерме.  
Жүрегіне сүңгі де, түбін көзде,  
Сонан тапқан – шын асыл, тастай көрме [3, 214-б.].

Соңғы шумақтағы алдыңғы екі жолдан ақыл мен қайраттың әрекетін ұғамыз, ақылы бар, күш-қайраты, жігері жеткілікті адам ғана қайғымен күйзеліп, қызық-қуанышпен мастанып кетпейді. «Жүрегіне сүңгі» дегенді енді біршама ұққандаймыз, ақын «жүрегіне жүгін, жүрегіне тиесілі ар-ұят, әділет қасиеттеріңе үміт арт, төрелікті жүректен күт» деп ақыл айтып тұрғандай. Аударма өлеңі арқылы «жүректе көп қазына, бәрі жақсы» дегені де – ар-ұят, рахым-мейірім, әділет, қанағат-ынсап, обал-сауапты білушілік сияқты жүректен шығатын ізгі, асыл қасиеттер, Аристотель, әл-Фарабилерше айтқанда, жүрекке қатысты этикалық қайырымдылықтар. Адам үшін басты қасиет – ақылмен танып білу десек те, мұның өзі ізгілікті мұрат етумен бағалы, қасиетті, асыл, ақын жазғандай, «ақыл өссе, ол түпсіз терең жақсылық сүйемктікбірлән өсер» [4, 151-б.]. Ақын туындылары негізінде жүректі – қазына, асыл қасиеттердің «қоймасы», адамшылықтың жауһары деп түйген ойымызды оның он төртінші, он жетінші қарасөздеріндегі жүрек жайлы толғанысымен қорытамыз: «Рақымдылық, мейірбандылық, уа әрбір түрлі адам баласын өз бауырым деп, өзіне ойлағандай ойды оларға да болса игі еді демек, бұлар – жүрек ісі, асықтық та – жүрек ісі» [4, 110-б.], «Жұмсақ төсекте, жылы үйде тамағы тоқ жатқан кісіге төсексіз кедейдің, тоңып жүрген киімсіздің, тамақсыз аштың күй-жәйі қандай болып жатыр екен деп ойлатып, жанын ашытып, ұйқысын

ашылтып, төсегінде дөңбекшітетұғын – мен. Үлкеннен ұят сақтап, кішіге рақым қылдыратын – мен, бірақ мені таза сақтай алмайды, ақырында қор болады. Мен таза болсам, адам баласын алаламаймын: жақсылыққа елжіреп, еритұғын – мен, жаманшылықтан жиреніп, тулап кететұғын – мен, әділет, нысап, ұят, рақым, мейірбаншылық дейтұғын нәрселердің бәрі менен шығады» [4, 113-б.]. Ақыл, қайрат, жүрек үшеуінің ішінде жүректің ғана кемшілігі мен міні жоқ. Жүрек таза сақталмай кірленер болса, ол да – ақыл-ессіз қайрат пен суық ақылдың кесірінен амалсыз болатын жүрек қаламаған жағдай. Жүректі таза сақтамай кірлететін – «әділет, ұят, нысапқа есті (ақылды) емес, қулық, сұмдық, арамдық, амалға есті (ақылды)» [4, 117-б.] болатын ел мінезі. Суық ақылдың жүрекке жасайтын қиянат әрекетін Абай – Я.Полонскийден аударған өлеңімен де жеткізген:

Суық ақыл жүрекке бұйрық жазып,  
Оны бір өзі өзгеше жолға салмақ.

Жүрегін пайдасы үшін жұрт ұсатпақ,  
Кірмен өлшеп базарға ұстап сатпақ.

...Жұрт айтқан сол ант мезгіл келсең керек...  
Мен де – бенде, амалсыз көнсем керек.  
Қызығы зор қайран дос, қайран тату,  
Сендер өлдің, мен-дағы өлсем керек [4, 84-б.].

Адам баласының бүгежектемей, қысылмай, анық адам болып ұялмай еңсе көтеріп жүруі – жүректен, қазақ мақалында айтылғандай, абыройлы адам болып, мәнді өмір сүру – жүректен шығатын ардан: «малым – жанымның садағасы, жаным – арымның садағасы». Адамдарда жүрек қасиеттері кеми бастаса, адамшылық пен мәнді өмірдің де ауылы алыстай береді. Ақынның аударма өлеңіндегі, әсіресе оның соңғы шумағындағы ой оның төл туындысында да айтылады, содан-ақ бұл түйіннің ақын санасында әбден бекігені байқалады:

Жүрек – теңіз, қызықтың бәрі – асыл тас,  
Сол қызықсыз өмірде жүрек қалмас.  
Жүректен қызу-қызба кете қалса,  
Өзге тәннен еш қызық іс табылмас [3, 249-б.].

Ізгіліксіз, жақсылықсыз – жүрек жоқ, асыл, ізгі қасиеттерге толы жүрексіз – ақыл мен қайраттың тірлігі «алдың – жалын, артың – мұз» дегендей шала, жарым-жарты. Мұндай қайғылы, абыройсыз жағдайды болдырмаудың амалы – жүректі кірлетпей таза сақтау. Сөйтіп ақын шығармаларына сүйеніп **жүрек** – қазына дегенде, біз жүректің – әділет, ар-ұят, рахым-мейірім, қанағатынсап, ізгілік пен қайырым, жақсылық пен жарасым екенін ойда ұстадық.

Абай отыз сегізінші қарасөзінде «Алла тағала өзі – хақиқат жолы» [4, 137-б.] деп жазады, бұл – өте тапқыр, ақылды айтылған ақиқат. Осы хақиқат, ақиқатқа білмек болып ұмтылу – ақыл ісі болса да, Абайдың ақиқатты, шындықты жүрекпен байланыстыратыны бар. Ақынның әртүрлі өлеңдері мен қарасөздерінде айтылған жүрек жайлы ойларын байыптап байқасақ, шынайылықтың жүректен шығатыны сезіліп тұрады. Ақын жүрек пен шындықтың бөлінбес бірлігін әсіресе он төртінші қарасөзінде айқындап айтады: «Тіл жүректің айтқанына көнсе, жалған шықпайды. Амалдың тілін алса, жүрек ұмыт қалады» [4, 110-б.]. «Әбдірахманға Кәкітай атынан хат» өлеңінде де жүрек сөзі – шындық екені ашық, анық айтылады: «Жүректің сөзін сөйле, тіл, жалғаны жоқ бояма» [3, 168-б.].

## Абай өлеңдеріндегі толық адам бейнесі

Абайтанушы ғалым М.Мырзахметұлының пікірі бойынша, ақынның толық адам туралы ойлары оның «Ғылым таппай мақтанба» өлеңінен бастау алады. Ал оның анық анықтамалық сипаттамасы «Өуелде бір суық мұз – ақыл зерек» өлеңінде орын алған. Толық адам танымын түсініп білуде бұл өлеңнің берері мол, сол үшін көлемі онша ауқымды емес өлеңінің мәтінін түгел бергенді жөн көреміз:

Өуелде бір суық мұз – ақыл зерек,  
Жылытқан тұла бойды ыстық жүрек.

Тоқтаулылық, қалыпты шыдамдылық –  
Бұл – қайраттан шығады, білсең керек.

Ақыл, қайрат, жүректі бірдей ұста,  
Сонда толық боласың елден бөлек.

Жеке-жеке біреуі жарытпайды,  
Жол да жоқ жарыместі «жақсы» демек.

Ақыл да, ашу да жоқ, күлкі де жоқ,  
Тулап, қайнап бір жүрек қылады әлек.

Біреуінің күні жоқ біреуінсіз,  
Ғылым сол үшеуінің жөнін білмек [3, 95-б.].

Абай өзінің толық адам жайлы ойын осы өлеңінде жинақтап, тұжырымдап берген сыңайлы. Адамның «толық болуы» жайлы ой да осында айтылады. Мақсаты адамдарды толық адам болуға насихаттау, үгіттеу екенін де байқатады. Алдыңғы төрт жолда өзі насихаттап, адамдардың болмысына сіңірмек болған үш қасиетке қысқа-нұсқа сипаттама, анықтама беретіндей көрінеді. Содан соң ғана сол үш қасиеттің өзі армандаған бірлігін түйіндеп жеткізеді. Бұл үш қасиетті бойында бірдей ұстамай жүретіндер де көп, бірақ ондайлардан ақын армандаған толық адамның айырмашылығы – «елден бөлектігі». Мұндай «елден бөлек» адам болу оңай емес, оңай болса, сол мәртебелі дәреже мен қалыпқа әркім де жетіп алар еді. Оның үстіне ақын осы үш қасиетті бірдей ұстай алмай жүретін адамды «жарымес» деп санайды, аты айтып тұрғандай ақыл-есі толық, түгел емес адамды «жақсы» деп атауға болмайды. Яғни ондай адамдар ақын қалағандай «елден бөлек» толық адам емес. Қайраттың дене, тәннен бастау алатын күш, қайрат, төзімділік, шыдамдылық екенін байқаймыз. Ақыл – зерек болуды мұрат ететін қасиет екенін көреміз. Ал жүректің «жылылықпен» байланысты ерекше қасиет екенін болжаймыз. Жүректің болмысы бөлектеу қасиет екені ақынның «тулап, қайнап бір жүрек қылады әлек» деген сөзінен де білініп қалады. Не де болса жүректің «елден бөлек» жақсы адам болуда бір өзі айрықша үлес қосатыны сезіліп тұрады. Соңғы екі жолдан байқайтынымыз, адам болмысында түгел, толық болуға тиіс үш қасиет жеке-жеке жүріп иесін абыройлы, «елден бөлек» ете алмайды. Шынында да ақыл қасиетінің адамда болмауын елестетсек, ондай жанды адам деп атау да қиын, себебі адам ақыл-ой, санасымен ғана адам ғой, әйтпесе ол айуан болып кетер

еді. Ақын айтқандай, жанға қонақ үй болатын тән болмаса, адам болмысын елестету тіпті мүмкін емес. Ал жүректі өзге қырынан бөлек әзірге жан деп ұқсақ, жанмен келетін тіршіліксіз ақыл да, тән де өз міндеттерін атқара алмайды. Сол үшін де ақын «біреуінің күні жоқ біреуінсіз» деп түйіндеген болар. Аталған үш қасиеттің тиісінше орнын біліп, үшеуінің қадір-қасиетін адам болу жолында дұрыс пайдалана алу – шынында да өнер, ғылым болса керек. Байқағанымыз, «үш қасиетті бірдей ұстау» «жарымес» болмай, «жақсы» болуға жеткізеді. Сонда осы өлеңнің негізінде Абайдағы адам болу талабын толық адам танымы деп таныған М.Мырзахметұлының зерттеуі бойынша, үш қасиеттің бірлігі адамды абыройлы етеді. Ал абыройлы болудың бастауы – адамгершілік екені айқын. Сөйтіп толық адам жайлы танымды меңгеру барысында оның адам бола білу ғылымы екенін ұғамыз.

Енді ақынның «Ғылым таппай мақтанба» өлеңіне қайта оралар болсақ, онда адам болуға бастайтын ақыл-кеңестер аса мол. Біздіңше, Абай жақсыға жақын болып, жаманнан аулақ болуды әсіресе қадап айтады. Мұны ең әуелі ақынның:

Бес нәрседен қашық бол,  
Бес нәрсеге асық бол,  
Адам болам десеңіз [3, 41-б.] –

деген талабынан байқауға болады. Өлең мазмұнын мұқият танып оқыр болсақ, басты сарын осы бағытта өріс алады. Ойлап көрсек, адам болудың өзі жаман дегеннен арылып, жақсы дегендерге үйір болумен келетіндей. Адам болудағы мұндай қағидалы әрекетті ақынның мына сөзінен де байқауға болады:

Жамандық көрсен нәфрәтлі  
Суытып көңіл тыйсаңыз.  
Жақсылық көрсен гһбрәтлі  
Оны ойға жисаңыз [3, 41-б.].

Осы ойына орай ақын өзі орынды деп тапқан жақсы нәрселерге бізді тарта түсіп, керісінше жаман дегендерден бізді үркітіп, қашырып отырады. Мысалы, «бес дұшпаның, білсеңіз», «суытып көңіл тыйсаңыз», «ондай болмақ қайда деп айтпа,



ғылым сүйсеңіз», «надандарға бой берме», «ондай түпсіз сөзге ерме», «кісіге қарап сөз алма», «тез үйреніп, тез жойма» деуменен жамандықтан бездірсе, «бес асыл іс, көнсеңіз», «оны ойға жисаңыз», «балалықты қисаңыз», «ғылымға көңіл берсеңіз», «махаббатпен ерсеңіз», «ақылменен жеңсеңіз», «шын сөзбенен өлсеңіз», «сөз мәнісін білсеңіз», «сөзіне қарай кісіні ал», «сөзін оқы және ойла» деген сықылды жақсы кеңестерге құлақ салуын айтып жақсы жолға бағыттайды. Байқасақ, адам болу шарты, жаманнан қашып, жақсыға ұмтылу екен. Әсіресе адамға қажет барша байлық пен дүниенің бастауы – ғылым екенін айту арқылы ақын өзінің озық ойын ұсынады: «дүние де өзі, мал да өзі, ғылымға көңіл берсеңіз». Ақынның ғылым мен ақыл жайын баса айтуы тегін болмаса керек, себебі адам болудың басы – ақыл-естен екені аян. Білім жолына түсу арқылы адам өзіне тән ең басты міндетін орындауға көшеді. Адамдар қауымында Абай айтқандай, ақымақ көп, ақылды аз. Ақын сол ақылдылар қатары көбейсе екен деп, өзі танып білген, әрі Ғұламаһи Дауанидан үйренген сөздерін мол қамтып айтады. Мұның бәрі де ақын армандаған адам болудың, толық адам дәрежесіне жетудің қамы мен харекеті.

Ақынның «Интернатта оқып жүр» деп аталатын өлеңі де адам болуға пайдалы ақыл-кеңестерге толы. Абай бұл өлеңінде өз заманындағы білім беру, оқу жүйесін сынайды. Сонда ақынның интернатта оқып жүрген балалардың «шарифатқа шаласын» айтып қынжылуы бекер болмаса керек. Шарифат обал-сауапты ажыратып, тура жолда жүруді кеңес етсе, интернатта оқып жүрген балалар ар ойламай, пайданы ойлап «шарифатқа шала» болып жүргені ақын ойын алаңдатады. Абайдың бұл өлеңінде айтатын ақылы – «пайда ойлама, ар ойла», «адал жүріп, адал тұр» «кореннойға» кіру», «занимайся прямотой», яғни адам болудың қамын жеу. Адам болудың жайын айтқан барлық кеңесті біз толық адам танымымен байланыстыруға бейімбіз, себебі толық адам танымының түпкі мақсаты – адамгершілікке үгіттеу. Осы орайда ақынның «Ғашықтық, құмарлық пен – ол екі жол» өлеңі де толық адам танымымен қабысады. Абай өзінің жетінші қарасөзінде «жас баланың анадан туғанда екі түрлі менезбен туатынын» [4, 103-б.] жазған. Ол «ішсем, жесем, ұйықтасам» деуді тән құмары, «білсем, көрсем, үйренсем» дегенді жан

құмары санайды. Біреуі тәнді тойдырса, екіншісі жанды, ақылойды жетілдіреді. Енді осы екеуінің әрекетінен Абайдың қалауы – «тәннен жан артық еді, тәнді жанға бас ұрғызса керек еді» [4, 103-104-бб.] дегендей, жан қалауы. Әрбір адам тән құмарынан жан құмарын жоғары қойып абыройын арттырады, адам бола түседі. Біздіңше, ақын «Ғашықтық, құмарлықпен – ол екі жол» өлеңінде осы жан мен тәннің құмары жайлы айтып отырғандай көрінеді. Яғни өлеңде айтылатын «ғашықтық – сенен артық жан жоқ деп ғашық болдым, мен не болсам болайын, сен аман бол» деген жан құмары да, «құмарлық – бір нәпсі үшін болады сол» деп алып ұшатынымыз – тән құмары. Абай бұл өлеңінде тән құмарын төмен әрі теріс көріп, адам болуға жеткізетін жан құмары – ғашықтық жайын ықыластана жырлаған. Сөйтіп бұл өлең де осылайша толық адам танымымен байланысады. Өзінен гөрі сүйгенінің жайын көбірек ойлатып қайырымдылық танытатын ғашықтық халін ақын өзге де өлеңдерінде жырлаған. Мысалы, «Сен мені не етесің?» атты өлеңінде: «мен өлейін, сен сау-ақ бол» [3, 99-б.] десе, «Жарқ етпес қара көңлім не қылса да» өлеңінде сүйгені жолында бәріне де көнген, төзген халін былайша танытады:

Жарқ етпес қара көңлім не қылса да,  
Аспанда ай менен күн шағылса да.  
Дүниеде, сірә, сендей маған жар жоқ,  
Саған жар менен артық табылса да.

Сорлы асық сарғайса да, сағынса да,  
Жар тайып, жақсы сөзден жаңылса да,  
Шыдайды риза болып жар ісіне,  
Қорлық пен мазағына таңылса да [3, 108-б.].

Өзгенің жайын ойлап қамқор болу – қайырымдылық – адамдық, адамгершілік жолы. Осы орайда ақын отыз сегізінші қарасөзінде былай деп жазады: «Не түрлі болса да, я дүниеңнен, я ақылыңнан, я малыңнан ғадаләт, шапағат секілді біреулерге жақсылық тигізбек мақсатың болса, ол жол – құданың жолы» [4, 151-б.]. Осы ойын ақын он төртінші қарасөзінде де қайырымдылық, ғашықтық (асықтық) жөнімен байланыстырып айтқан: «Рақымдылық, мейірбандылық, уа әрбір түрлі адам баласын өз

бауырым деп, өзіне ойлағандай ойды оларға да болса игі еді демек, бұлар – жүрек ісі, асықтық та жүрек ісі» [4, 110-б.]. Әр адам осылайша өзіне ойлаған жақсылық пен жайлылықты өзгеге де шын көңілмен болсын дей алса, ол – қайырымды, жағымды да жақсы, толық адам.

Абайда «Жұмбақ» деп аталатын бірнеше өлең бар, соның бірі мынау бір ғана шумақ:

Сыналар, ей, жігіттер, келді жерің,  
Сәулең болса, бермен кел талапты ерің.  
Жан құмары дүниеде немене екен –  
Соны білсең, әрнені білгендерің.

Шешуі: білмекке құмарлық [3, 142-б.].

Ғалым М.Мырзахметұлының зерттеуіндегі таным бойынша, бұл өлеңнің адам болмысы мен адамгершілігін танып білуде мәні аса зор. Адам баласы тән құмары және жан құмарымен туатынын жоғарыда айттық, әрі жан құмарын тән құмарынан жоғары қойып өмір сүру кісінің адамгершілігін арттырады. Әйтпесе бір ғана «ішсем, жесем, ұйықтасам» деген тән құмарымен өмір сүрер болсақ, дәл солай ішіп-жеп, ұйықтаумен ғана тіршілік ететін айуаннан айырмамыз болмас еді. Сол үшін де Абайдың «соны білсең, бәрін де білгендерің» деп, жан құмары – білмекке құмарлықты жұмбақтап жеткізуі өте орынды. Білсем деген құмарлықсыз адам атану мүмкін емес, мұны Абай отыз сегізінші қарасөзінде былайша білдіреді: «Қашан бір бала ғылым, білімді махаббатпенен көксерлік болса, сонда ғана оның аты адам болады» [4, 136-б.]. Сөйтіп бала білмекке құмарлану арқылы адам болуға бет алады екен, яғни толық адам болудың жолына түседі.

Енді осы қатарда «Әсемпаз болма әрнеге» өлеңі жайлы өз ой-пайымдауымызды ортаға салмақпыз. Бұл өлеңнің толық адам танымына қатысын абайтанушы ғалым М.Мырзахметұлы ең алғаш өз тарапынан негіздеп жазған. Толық адам жайлы баяндауымызда бұл өлеңге соқпай өту жөн болмайды. Абай осы өлеңінде толық адам жайлы танытумен бірге толық адам болуға септігін тигізетін пайдалы ақыл-кеңестерін де ұсынған. Ең әуелі оның толық адам танымына қатысы жайлы сөз етер болсақ, ақын

мұнда толық адам жайлы ойын таратып, дамытып танытқанын көруге болады. Ақынның толық адам жайлы ойы мына екі шумақта көрініс тапқан:

Қайрат пен ақыл жол табар,  
Қашқанға да қуғанға.  
Әділет, шапқат кімде бар,  
Сол жарасар туғанға.

Бастапқы екеу соңғысыз  
Біге қалса қазаққа,  
Алдың – жалын, артың – мұз,  
Барар едің қай жаққа [3, 162-б.]?

Өлеңде толық адамды қалыптастыратын үш қасиеттің екеуі, яғни ақыл мен қайрат өз аттарымен анық аталып тұр да, жүректі – әділет, шапқат арқылы танимыз. Сөйтіп өлеңнің толық адамға қатысы талас тудырмайды. Ақын осы үш қасиеттің адам бойында бірдей болғанын қалайды. Ақынның жол астарынан байқатып айтпақ болғаны да бар, онысы – жүрекке басшылық, жетекшілікті беруді жөн санайтын ойы. Шынында да адамзат өз өмірі мен түрлі әрекетінде қайраты мен ақылын жұмсаумен жүріп түрлі нәтижеге жетеді. Әдетте адам өмірдегі әрқилы келеңсіз, кемшілікті нәрселерден қашып, жақсы болудың жолында жүріп сол жақсыны «қуады», осындай ой ізденісі мен тән әрекетінде адамды «қуғанға да, қашқанға да» жеткізетін – қайраты мен ақылы. Сөйтсе де осы екеуінің қабатында жүректен шығар «әділет пен шапқат» та жүрер болса, қай «туғанға да жарасар» тірлік сол болар еді. Абайдың айтайын дегені де осы болса керек. Осы үшеуін бірлікте бірдей ұстап адамзат мақсат-мұратына жетіп, толық адам болады. Сөйтсе де жүректен шығар қасиеттерсіз тек қайрат пен ақыл арқылы жүзеге асар адам ісінің шала боларын ақын үзіндідегі екінші шумақ арқылы айқын танытады. Мұндағы «бастапқысы» – қайрат пен ақыл, ал «соңғысы» – әділет пен шапқат. Жүректен шығар осы әділет пен шапқат болмаса, тек қайрат пен ақылына сүйенген адамның барар жері, тап болар жағдайы – «алды – жалын, арты – мұз» тұңғыық тығырық болмақ. Абай адамдарды осындай жайсыз жағдай мен сан соқтырар өкініштен сақтандырады. Ақын қалауы – ақыл,

қайрат, жүрек үшеуінің бірлігі мен үшеуі ішінен жүректің жетекшілік етіп иелерін толық адам болуға жекізу. Біздіңше, ақын айтпақ болған басты ой осы болмақ. Бұдан өзге ақын осы өлеңінде толық адам болуға пайдасын тигізер ақыл-кеңестерін де айтып өтеді. Алты шумақтан тұратын өлеңнің екі шумағы жоғарыдағы болса, өзге төрт шумағы мынау:

Әсемпаз болма әрнеге,  
Өнерпаз болсаң, арқалан.  
Сен де бір кірпіш дүниеге,  
Кетігін тап та, бар, қалан!

...Пайданы көрсең бас ұрып,  
Мақтанды іздеп, қайғы алма.  
Мінінді ұрлап жасырып,  
Майданға түспей бәйге алма.

Өзінде бармен көзге ұрып,  
Артылам деме өзгеден.  
Күндестігін қоздырып,  
Азапқа қалма езбеден.

Ақырын жүріп, анық бас,  
Еңбегің кетпес далаға.  
Ұстаздық қылған жалықпас  
Үйретуден балаға [3, 162-б.].

Осындағы айтылғандардың бәрі дерлік ақылды, жағымды, толық адам болуға ықпалы болатын ақыл-кеңестер. Шынында да жақсы, абыройлы адам боламын деген кісі әсіре қызылға әуес болмайды, қай өнерді де тиянақты, нәтижелі меңгеруге тырысып бағады. Өмірде өзінің қабілет, білім-білігіне орай өзі лайық, сай келетін орнын дәл тауып, сол арқылы өзіне де, еліне де пайда келтіреді. Әйтпесе өмірде өзінің білім, қабілетіне, мінез, болмысына сай келмейтін салада жүріп, өзінің де қадірін кетіріп, жұртқа да зиян жасап жүргендер баршылық, ақын сондай сан соқтырар жайсыз жағдайдан сақтандырады. Кейінгі шумақтардың да айтар кеңесі ерекше елеулі. Пайда – адамды қызықтырып азғыратын кесел. Сондай оңай олжа, сәті келіп қалған пайдаға тап болған адам өзін дер кезінде тоқтатып тыймай, қайта тап болған

пайдасына қызығып, «тағы да бола берсе екен» деп, пайда соңынан бас ұрып, еңбексіз келген оңай олжа, мол пайдадан мақтангершілігі артып, асып-тасып, күндердің күнінде қылмысы әшкереленіп, ақын айтқандай қайғыға тап болады. Ақынның «қайғы алма» дегені осындай жайсыз жайды танытса керек. Адамдардың көбісі өз-өздерін танымай, кемшілік, міндерін білмей, білсе де жасырып я мойындамай жүруі мүмкін, ақын сондайларды мезеп отырғандай. Бар қасиет, қабілетінді еңбегіңмен, әрекет, ізденіспен таныт дегендей. Ақынның 38-қарасөзінде «Һәм өзі өзгеше боламын демектің түбі – мақтан. Әрбір мақтан біреуден асамын деген күншілікті бітіреді де, күншілік күншілікті қозғайды» [4, 152-б.] деп жазғанындай, бұл өлеңінде «өзінде бармен көзге ұрып, өзгеден артылам» деушіліктің кесір, кеселін сөз етеді. Ең жақсысы, жақсы, толық адам боламын деген талаптанушының қулық-сұмдық, қиянат жасамай, «ақырын жүріп, анық басуы». Абай сонда ғана еңбегін зая кетпей, жақсы қалпында қалатынынды ескертеді. Өлең, қарасөздерінің бәрін қамтығанда ақынның көздегені – ұстаздық етіп елін түзеу, замандасы мен келер ұрпақты да тура жолға салу. Ақын айтқан ақыл-кеңестер орындалар болса, толық адам болудың да ауылы алыс емес.

Абайтанушы ғалым М.Мырзахметұлы толық адамды танытатын үш қасиеттің ақын атаған анықтамалары жайында олардың төркінінен хабар берерліктей жаңалықты ойларын танытқан [7, 240-241-б.]. Ақынның «ыстық қайрат, нұрлы ақыл, жылы жүрек» жайлы ойлары оның «Малға достың мұны жоқ малдан басқа» өлеңінде айтылған. Бұл өлеңінде ақын «малға дос» дүниеқоңыз, нас байдың жиіркенішті бейнесін жасаған. Ақша, пайда, дүние, мал – басты құндылық саналған заманда ар-ұят пен ақылдың бағаланбайтынын ақын ашына отырып айтқан:

Ақылды деп, арлы деп, ақ бейіл деп,  
Мақтамайды ешкімді бұл күнде көп.  
Осы күнде мал қайда – боқ ішінде,  
Алтын алсаң, береді боғынан жеп [3, 198-б.].

Міне Абай бейнелеген «малға дос» нас байдың заманындағы жағдай осындай болған. Абай адамгершілікке жат жиіркенішті

жайды айтып отырып та, толық адамға қатысты ой білдіреді деп ойлаймыз. Себебі жақсы адам болу ең әуелі ақын айтқандай, жаман саналатын «бес нәрседен қашық болумен» жүзеге асады. Оқырман өлеңдегі ақын сипаттаған дүниеқоңыз байдың бейнесінен жирене отырып, жақсы адам болуға талаптанады. Мұндай байдың барша әрекеті мен ойы жиренішті. Қазақ «малым – жанымның садағасы, жаным – арымның садағасы» деген мақалын текке шығармаған. Мал адамның игілігіне жұмсалуды тиіс. Ал Абай бейнелеген бай тіпті басқаша ойлайды, оның ойы мен қалпы мынадай:

Малға достың мұңы жоқ малдан басқа,  
Аларында шара жоқ алдамасқа.  
Табысына табынып, қалтаң қағып,  
Тойғанынан қалғанын берсе алашқа.

Мал жияды мақтанып білдірмекке,  
Көзге шұқып, малменен күйдірмекке.  
Өзі шошқа, өзгені ит деп ойлар,  
Сорпа-сүмен, сүйекпен сүйдірмекке [3, 198-б.].

Байқасақ, Абай бай болмысын өте шебер әрі дәл танытқан. Ақынның өлеңі мен қарасөздеріндегі ойлар бір-бірімен сабақтасып жатады. Мысалы, ақынның сегізінші қарасөзіндегі мына ойы өлеңіндегі айтайын дегенін айқындап аша түскендей: «Байлар, олар өздері де бір күн болса да, дәулет қонып, дүниенің жарымы басында тұр. Өзінде жоқты малыменен сатып алады. Көңілдері көкте, көздері аспанда, адалдық, адамдық, ақыл, ғылым, білім – еш нәрсе малдан қымбат демейді. Мал болса, құдай тағаланы да паралап алса болады дейді. Оның діні, құдайы, халқы, жұрты, білімі, ұяты, ары, жақыны, бәрі – мал» [4, 104-105-бб.]. Бай болмысын бұдан асып толымды таныту мүмкін болмас. Осындай жиренішті жағдай мен жағымсыз болмыстағы бай бейнесін айта келіп, ақын солар тектес жандарға және барша қауымға мынадай мықты, келелі кеңесін ұсынады:

Осыны оқып, ойлай бер, болсаң зерек,  
Енбекті сат, ар сатып неге керек?  
Үш-ақ нәрсе – адамның қасиеті:  
Ыстық қайрат, нұрлы ақыл, жылы жүрек [3, 198-б.].

Ақын «Әуелде бір суық мұз – ақыл зерек» өлеңінде «ақыл, қайрат, жүректі бірдей ұста» деп, олардың өздерін ғана атап өтсе, мына өлеңінде оларды өзіндік болмыстарын танытар айқындауыш анықтамаларымен бірге танытып береді. Ал ол анықтамалардың өзіндік сырлары мен мән-мазмұнын жоғарыда жазғанымыздай, ғалым М.Мырзахметұлы өз кітабында таратып танытқан. Ақын айтқандай, адам қасиеті ақша, пайда, мал, дүниеде емес, толық адамға жеткізер «ыстық қайрат, нұрлы ақыл, жылы жүректі» болуда екен. Ақын осылайша үш қасиетті үнемі әр қырынан танытып, әркез амалын тауып оқырман санасына сіңіре беруді көздейді.

Толық адамды танытар үш қасиет жайлы ақын «Сенбе жұртқа, тұрса да қанша мақтап» өлеңінде де дамыта танытады. «Әсемпаз болма әрнеге» өлеңінде айтылғандай, «қашқанға да қуғанға қайрат пен ақыл жол табары» рас. Мына өлеңінде де ақын сол ойын қайталап бекіте түседі:

Сенбе жұртқа, тұрса да қанша мақтап,  
 Әуре етеді ішіне қулық сақтап.  
 Өзіне сен, өзінді алып шығар  
 Еңбегің мен ақылың екі жақтап.

Өзінді сенгіштікпен әуре етпе,  
 Құмарпаз бол мақтанды қуып кетпе.  
 Жұртпен бірге өзінді қоса алдасып,  
 Салпылдап сағым қуған бойыңа еп пе? [3, 214-б.].

Ақынның «еңбегің» дегенінен «қайратты» ұғамыз, сонда адамды әр істе де нәтижеге жеткізетін – оның қайраты мен ақылы. Мұнда екеуінің қатарында жүрек қасиеті аталмайды, сөйтсе де жүрек қайрат пен ақылдың бағытын түзеп, екеуінің бұра тартқан жері болса, тура жолға салушы ретінде танылады. Себебі қайрат пен ақылды бағыттап отыратын әділет, рақым, мейірім, қанағат, ынсап, ар-ұят, махаббат – жүректен шығады. Қауым мен қоғамда әдетте адамдар ақыл, қайратымен әрекет етіп, тірлік жасаумен жүріп, жүректен шығар қасиеттерін, өкінішке орай, көбіне ескере бермейді. Жүрек қасиетінің артықша сыры барын ақын соңғы шумағында танытады:



Қайғы келсе қарсы тұр, құлай берме,  
Қызық келсе, қызықпа, оңғаққа ерме.  
Жүрегіне сүңгі де, түбін көзде,  
Сонан тапқан – шын асыл, тастай көрме [3, 214-б.].

Ақын «өзіңе сен, өзінді алып шығар еңбегің мен ақылың екі жақтап» деп қадай айтса да, артынша «өзінді сенгіштікпен әуре етпе», «...мақтанды қуып кетпе», «...сағым қуған бойыңа еп пе», «қайғы мен қызық келсе, құлай берме, оңғаққа ерме» дегендей аулақ болатын, қашық жүретін жағымсыз жайларды біршама мол айтады. Демек аталған кеселді жайлардан қайрат пен ақыл толық құтқара алмайтындай көрінеді. Сондай жағдайда «жүрекке сүңгіп», жүректен шығар әділет, рақым, мейірім, қанағат, ынсап, ар-ұят, махаббаттай «шын асылды» бойға қасиет етіп алу қажет-ау деп ойлаймыз. Нәтижесінде, осыларды ескеріп, адамдығына күзетші болған кісі толық адам биігіне жетуге бет алады.

Біздіңше, ақынның «Қуаты оттай бұрқырап» өлеңі де толық адам танымымен қабысатындай көрінеді. Мұнда ақын өзінің өлең қаруы, өнер құралымен әлеуметтік күреске белсене кіріскендей болады. Мақсаты айқын, ол – елін қалың ұйқыдан оятып, тура жолға салу. Осы қасиетті жолдағы ақын әрекеті атақты үш қасиеттің көмегімен жүзеге асатындай. Әрине ақылы мен жүрегінің адамшылықты жасаудағы қызметі көптеу көрінеді, сөйтсе де «тәуекел мен батыр ой» «сайысып-ақ бақты ғой» деген жолдардан қайраттың да әрекеті байқалып қалады. Әйтеуір адам әрекеті мен өмірі ақыл, қайрат, жүрексіз жасалмайтыны анық. Осы орайда ақынның елін түзеймін, адамдарды тура жолға саламын деген ниеті бұларсыз жүзеге аса қоймайды:

Тәуекел мен батыр ой  
Өткір тілді найза етіп,  
Сайысып-ақ бақты ғой,  
Неше түрлі айла етіп.

Оянбай, қайран жұрт,  
Ұялмай қал жым-жырт!

Ақылмен ойлап білген сөз  
Бойыңа жұқпас, сырғанар.  
Ынталы жүрек сезген сөз  
Бар тамырды қуалар.

Ән салар, жатқа алар,  
Түбінде құр қалар [3, 224-б.].

Ақынның елін түземек болған әрекетінде ақыл мен ынталы жүрекке иек артатыны айқын, оны ашық айтады. Бұлардың қабатында қайраттың да жүретіні талас тудырмайды. Ақынның «Әсемпаз болма әрнеге» өлеңінде «қайрат пен ақыл жол табар қашқанға да қуғанға» деп жазатынын білеміз. Он жетінші қарасөзінде де қайратсыз еш нәрсе де бітпейтінін ақын Қайраттың өзіне айтқызатын: «Ей, ғылым, өзің білесің ғой, дүниеде еш нәрсе менсіз кәмелетке жетпейтұғынын; әуел өзінді білуге, ерінбей, жалықпай үйрену керек, ол менің ісім, құдайға лайықты ғибадат қылып, ерінбей, жалықпай орнына келтірмек те – менің ісім. Дүниеге лайықты өнер, мал тауып, абұйыр, мансапты еңбексіз табуға болмайды. Орынсыз, болымсыз нәрсеге үйір қылмай, бойды таза сақтайтұғын, күнәкәрліктен, көрсеқызар жеңілдіктен, нәфсі шайтанның азғыруынан құтқаратұғын, адасқан жолға бара жатқан бойды қайта жыйғызып алатұғын мен емес пе?» [4, 112-б.]. Қайраттың өзінің болмысы жайлы айтқан ерекшелігін Ғылым да: «Ей, Қайрат, сенің айтқаныңның бәрі де рас» деп қолдайды да. Демек ақынның жоғарыдағы өлеңіндегі елін түзеу әрекетіне қайраттың да қосар үлесі қомақты болса керек. Қайраттың көмегі мен үлесі нақты, ол – ақыл мен жүректің әмірін орындау. «Жас келсе іске» дегендей, қайрат орындаушы, нақты әрекеттің иесі. Бұл жайында ақын отыз сегізінші қарасөзінде былай деп жазады: «...пендесінде ақыл – хұкімші, қайрат, қуат – қызмет қылушы еді» [4, 140-б.]. Тағы бір ескерерлік жай, ақын бұл өлеңінде де жүректің жетекшілік қызметін танытып өтеді, яғни «ақыл сөзі бойға жұқпай, сырғанай» берсе, «ынталы жүрек сезген сөз бар тамырды қуалап» бойға тарайды екен. Өкінішке орай, ақын қанша әрекеттенсе де, елі бәрібір түзелген сыңай танытпайды, мұны ақынның «ән салар, жатқа алар, түбінде құр қалар» деген сөзінен байқаймыз. Қандай болғанда да ақынның шығармашылық әрекетінде толық адамға жеткізер үш қасиеттің бірлігі үнемі айтылып, әр қырынан танылып отырады.

Біз ақынның «Адам бір – боқ көтерген боқтың қабы» өлеңінің айтар ғибратын да аса маңызды көреміз. Екі-ақ шумақтан

тұратын бұл өлеңнің танытар ақиқаты біздіңше, тым тереңде жатыр:

Адам бір – боқ көтерген боқтың қабы,  
Боқтан сасық боласың өлсең дағы.  
Менімен сен тең бе деп мақтанасың,  
Білімсіздік белгісі – ол баяғы.

Кеше бала ең, келдің ғой талай жасқа,  
Көз жетті бірқалыпта тұра алмасқа.  
Адамды сүй, алланың хикметін сез,  
Не қызық бар өмірде онан басқа?! [3, 233-б.].

Ақын «адамды – боқ көтерген боқтың қабы» дегенде, біздіңше, адамдық қасиетін жоғалтып, тек қана ішіп-жеумен хайуанша күй кешіп жүргендер жайлы айтқан. Ол «Жүректе қайрат болмаса» атты өлеңінде былай деп жазған:

Малда да бар жан мен тән,  
Ақыл, сезім болмаса.  
Тіршіліктің несі сән,  
Тереңге бет қоймаса? [3, 227-б.].

Расында да ақыл-ой, жан-жүрегімен танып біліп, адами асыл қасиетін танытып жүрмесе, ондай кісіні адам деуге келмес. Өзін өзгеден жоғары санап көкірек керудің надандық екенін ақын әркез еске салып отырады. Ақылды адам ешқашан өзін өзгеден артық көріп асып-таспайды. Адам өзіне лайық ақыл, білім, қайырымдылық қасиеттерімен ғана ерекшеленуі мүмкін, бірақ ондай ақылы асық, білімі мол, қайырымы көп адам керісінше кішілейіл бола түседі. Осы орайда Абай он сегізінші қарасөзінде былай деп жазады: «...Ләкин өз дәулетінен артық киінбек, не киімі артық болмаса да, көңіліне қуат тұтып, тым айналдырмақ – кербездің ісі... Мұның бәрі – масқаралық, ақымақтық. Мұны адам бір ойламасын, егер де бір ойласа, қайта адам болмағы – қиын іс. Кербез дегенді осындай кер, кердең немеден безіндер деген сөзге ұқсатамын. Тегінде адам баласы адам баласынан ақыл, ғылым, ар, мінез деген нәрселермен озбақ. Онан басқа нәселерменен оздым ғой демектің бәрі де – ақымақтық» [4, 114-б.]. Демек ақынның өлеңінде айтқаны ақиқат, яғни «менімен сен тең бе деп

мақтану – білімсіздік». Өмір мен ондағы өзіңнің де үнемі бірқалыпта тұрмай өзгеріп отыратынынды ұмыту да – ақылсыздық. Осындайда Абай өте мәнді ақиқатты айтады, ол – өмірде ең қызық, ең артық, ең асыл әрекет – адамды сүю мен алланың хикметін сезу екен. Ақын он төртінші қарасөзінде «асықтық та – жүрек ісі» [4, 110-б.] деп жазады, асықтық сүю ғой. Ал «хикмет» – Алланың ақылы, даналығы мен ғылымы екенін жиырма жетінші қарасөзінде жазған ақын ойынан болжауға болады: «Сонда Аристодим тахқиқ ойлап тексергенде адамды жаратушы артық хикмет иесі екендігіне һәм махаббаты бірлән жаратқандығына шүбәсі қалмады» [4, 123-б.]. Сонда өлеңде айтылған өзекті ақиқат – Алланың хикметін сезу – Оның даналық, ғылымымен жаратылғандарды танып білу, ал бұл – ақыл арқылы жүзеге асатын адами әрекет. Сөйтіп бұл өлеңінде ақын адамдарды жүрекпен сүйіп, Алланың хикметпен жаратқандарын ақылмен танып білу жайлы айтып отыр. Ал бұлар – толық адамға жеткізер ақыл мен жүрек қасиеттері. Өз тарапынан қайраттың да мұндай әрекеттерге өз әлінше үлес қоса алатынын ақынның он жетінші қарасөзіндегі жазғанынан білеміз. Осылайша ақынның «Адам бір – боқ көтерген боқтың қабы» өлеңі де толық адам танымымен қабысатынын байқадық.

Абайдың «Тоты құс түсті көбелек» өлеңі 1902 жылы жазылған. Ақынның өлеңді нағыз өнер ете бастаған уақыты – 1886 жыл болса, бұл жылы ақын өлеңінің сирек жазылып, өз өмірінің де соңғы шегіне таяп қалған кезі болатын. Біздіңше, ақын өзінің толық адам танымын өмірі мен ақындығының соңына таман жазған осы өлеңіне дейін алып келеді. Өлең үш-ақ шумақтан тұрады, үшеуінде үш түрлі іргелі, келелі мәселені сөз еткен. Ақын алғашқы шумақта көбелек пен бәйшешектің тіршілігі жайлы айта отырып, «көз жетті бірқалыпта тұра алмасқа» дегендей, тіршілік пен өмірдің өтпелілігін түйіндеген. Екінші шумақта ақын өзіне «адамзатқа не керек» деп сұрақ қояды да, оған өзі жауап береді:

Адамзатқа не керек:  
Сүймек, сезбек, кейімек,  
Харекет қылмақ, жүгірмек,  
Ақылмен ойлап сөйлемек [3, 246-б.].

Біз ақын өлеңіндегі осы шумақтан толық адам бейнесін танығандай боламыз. Толық адам – ақыл, қайрат, жүрек қасиеттерінен тұрар болса, екінші жолдан жүрек әрекетін сезгендейміз, себебі сүю, сезу, кею – жүрек ісі. «Харекет қылмақ, жүгірмек» – қайраттан шығатын әрекеттер. «Ақылмен ойлап сөйлеу» де – өзі айтып тұрғандай, ақылдан шығатын қасиет. Сөйтіп ақын жазғандай, адамзаттың өмірі мен тіршілігі ақыл, қайрат, жүректің әрекетімен шектеліп, әрі осы үшеуінің әрекетімен толық болады екен. Осы шумақтағы ақын ойын кездейсоқ айтыла салған дей алмаймыз, керісінше, М.Мырзахметұлы жазғандай, ақындағы адами жетілуді көздеген «түбірлі танымды» танытады.

Біз пайдаланған ақын жинағындағы (1986) соңғы өлең – «Жол көрмек, жоба білмек, жиһан кезбек» екен. Осы өлеңмен ақынның лирикалық шығармалары түйінделеді. Абай бұл өлеңінде де толық адамға қатысты ойын білдіріп өткенге ұқсайды. Өлең екі-ақ шумақтан тұрады, сондықтан оны түгел келтіргеніміз жөн болар:

Жол көрмек, жоба білмек, жиһан кезбек,  
Бой жеңбек ер жігітке ғақыл таппақ.  
Тағдырын... хақтан біліп,  
Көшелі өнер несін жүрсе жақтап.

Ниетің түзу болса сенің аппақ,  
Екі елі аузына қойсаң қаппақ.  
Сыбыр, өсек дегенді сырттай жүріп,  
Ғылым, өнер, мал таппақ, жұртқа жаппақ [3, 258-б.].

Осы уақытқа дейін дағдыланған қалпымызбен өлең жолдарынан атақты үш қасиеттің көрінісін іздер болсақ, көп қинала қоймаймыз. Мысалы, «жол көрмек», «жоба білмек», «ғақыл таппақ», «сыбыр, өсекті сырттай жүру», «ғылым, өнер таппақ» сөз қолданыстарынан ақыл қасиетінің сипаттары оңай байқалып тұр. Ақыл-ойсыз бұл әрекеттер жүзеге аспақ емес. «Жол көрмек» ақыл табуға жеткізеді, «жоба білмек» ақылдылықтан туады. «Жиһан кезбек», «бойды жеңбек», «мал таппақ» – тән қуаты, қайрат-күшпен жүзеге асатын әрекеттер. Ал сабыр сақтап «тағдырын... хақтан білу», «ниеті түзу аппақ болу»,

«жұртқа жақпақ» – жүректен шығуға икемі бар қасиет, әрекеттер. Осылайша толық адамды қалыптастыратын үш қасиетті әр-әр тұста ақын бұрынғы өлеңдерінде де айтып, дәріптеп, насихаттап келгенін айттық. Ақын өлеңдерін басынан бастап қайта сүзіп шығар болсақ, бұл ойымызға талай дерек пен дәлел табатын секілдіміз. Мысалы, 1984-85 жылдары жазылған «Қандай қызда ләззат бар жан татпаған» өлеңінде ақын былай деп жырлаған:

...Жігітті жұрт мақтаған қыз жақтаған.  
Кей жігіт мақтан үшін қылық қылмай,  
Бойына майдалықпен сыр сақтаған.  
Кей жігіт арсыздықпен, ұятсынбай,  
Қолы жетпес нәрсеге тыртақтаған.  
Орынды іске жүріп, ой таппаған,  
Не болмаса жұмыс қып, мал бақтаған.  
Қасиетті болмайды ондай жігіт  
Әншейін құр бекерге бұлғақтаған [3, 21-6.].

Өлеңдегі «ой таппаған», «мал бақтаған» сөз қолданыстарынан ақыл мен қайратты танымыз. «Жігітті жұрт мақтаған қыз жақтаған» деген жолдағы қыз халінен «жақсы көру», «сүйюді» ұғамыз, ал жақсы көру мен сүйю – жүректен бастау алатын сезімдер. Жігіттің «бойына майдалықпен сыр сақтауынан» да оның қыз сүйюіне лайық жүректен шығар жағымды қасиеттерін танығандай боламыз. Сөйтіп мұнда да толық адамды құрайтын үш қасиеттің бірлігін көреміз. Үш қасиетті байқатар сөз қолданыстарын ақынның өзге де өлеңдерінен ұшыратамыз. Мысалы, 1986 жылы жазылған «Қартайдық, қайғы ойладық, ұйқы сергек» өлеңінде ақын былайша толғанады:

Адамзат тірілікті дәулет білмек,  
Ақыл таппақ, мал таппақ, адал жүрмек.  
Екеуінің бірі жоқ ауыл кезіп,  
Не қорлық құр қылжаңмен күн өткізбек? [3, 23-6.].

Ақын «екеуінің бірі жоқ» дегенде, ақыл таппақ пен мал таппақты айтқан, әрі біздіңше, «адал жүрмектен» жүректің қасиетін танысақ болады. Сонда ақын бұл өлеңінде де толық адамды құрайтын үш қасиетті насихаттап отыр. «Мал таппақ» – тән қуаты, дене еңбегімен мүмкін болатын дәулет басы,

сондықтан оны қайрат қасиетінің әрекеті деп қабылдаймыз. Осы жылы жазылған «Адасқанның алды – жөн, арты – соқпақ» өлеңінде ақын былайша жырлайды:

...Олардың жоқ ойында малын бакпақ,  
Адал еңбек, мал таппақ, жұртқа жақпақ [3, 32-б.].

Мұнда да үш қасиеттің жұбын жазбай бірлікте келгенін көреміз. Мұны да кездейсоқ құбылыс деуге әсте болмайды. Адам өмірі қалайық-қаламайық осы үшеуінің жәрдем, көмегімен мән-мағынаға ие болып жалғасады. «Бір дәурен кемді күнге – бозбалалық» өлеңіндегі мына шумақтың мазмұны да толық адам танымына жанасады:

Демеңдер өнбес іске жұбаналық,  
Ақыл таппақ, мал таппақ қуаналық.  
Қызды сүйсең, бірді-ақ сүй, таңдап тауып,  
Көрсө қызар, күнде асық – дуаналық [3, 33-б.].

Ақынның қаншама өлеңінде «ақыл таппақ, мал таппақ» сөз, ұғымдарын қолданғанын байқадық. Бұл кездейсоқ немесе жол-жөнекей әншейін айтыла салған нәрсе емес, мақсатты, қағидалы қолданыс. Өйткені жақсы адам, толық адам осы әрекеттер арқылы қалыптасады. Ақын мақсаты – толық адамды тәрбиелеп, қалыптастыру. Сол үшін де ол осы әрекет, қасиеттерді жиі айтып насихаттайды. Жоғарыдағы шумақтан ақыл мен қайрат қасиеті айқын аңғарылып тұрса, «көрсө қызар, күнде асық» болмай, «таңдап тауып бір-ақ қызды сүю» – шынайы, тұрақты, опалы махаббатты танытады. Ал махаббат «асықтық та – жүрек ісі» дегендей, жүректен шығатын әрі жүректі танытатын қасиетті де киелі сезім. 1887 жылы жазылған «Сабырсыз, арсыз, еріншек» атты сатиралық өлеңінде де ақын кеселді қасиеттерді ащы түрде әшкерелей келіп, арасында мынадай ренішін білдіреді:

Қызмет қылып мал таппай,  
Ғылым оқып ой таппай,  
Құр үйінде жатады [3, 55-б.].

Жағымсыз жайды айтып отырса да, ақын мұнда қайратпен мал табу мен ой тауып ақылды болуды еске алып отыр. Әрі әр кезде ақын шығармаларында «мал таппақ, ақыл таппақ, ой табу, адал болу, бірді-ақ сүйеу» сөз қолданыстары жиі айтылады, бұлардың астарынан ақыл, қайрат, жүрек қасиеттерінің мән-мағынасы аңғарылып тұрады. Ақынның «мал таппақ» қолданысы дүниеқоңыз малқұмарлықты емес, еңбек етіп бала-шағаның несібесін табуды танытады. Кейде ақын толық адам болуға жеткізетін үш қасиетті танытар жеке қасиеттерді атап насихаттайтыны да бар:

Ынсап, ұят, ар-намыс, сабыр, талап,  
Бұларды керек қылмас ешкім қалап.  
Терең ой, терең ғылым іздемейді,  
Өтірік пен өсекті жүндей сабап [3, 64-б.].

Аталған жақсы қасиеттерді үш топқа таратып айтар болсақ, «ынсап, ұят, ар-намыс» – жүректі, «сабыр, талап» – қайратты, «терең ой мен терең ғылым» – ақылды танытады. Үшеуі бірігіп өз иесін толық адам болуға жеткізеді. Кейде ақынның өзі армандаған, тәрбиелеп қалыптастырмақ болған жақсы адамын әртүрлі жағдайда атап танытатыны да бар. Соның бірі – «Өлең – сөздің патшасы, сөз сарасы» өлеңіндегі мына бір «мыңнан тұлпар шығар» адам:

Мақтан қуған, мал құмар нені ұға алсын,  
Шықпаса мыңнан біреу талғап-талғап [3, 64-б.].

Ақынның осы «біреуі» сірә өзі армандаған толық адам болса керек. Өмірде ұшырай қоюы өте қиын осындай жанды ақын «Сәулең болса кеудеңде» өлеңінде де аңсай отырып еске алады:

...Көп шуылдақ не табар,  
Билемесе бір кемел?  
...Единица – жақсысы,  
Ерген елі бейне нөл.  
Единица нөлсіз-ақ  
Өз басындық болар сол [3, 91-б.].



Осындағы «бір кемел», «единицалар» – біздіңше, толық адамға жанасатын ерекше тұлғалар. Ақынның «Бай сейілді» өлеңіндегі «танымадық, жарымадық, жақсыға бір іргелі» [3, 111-б.] деген кісісі де осы қатардағы жағымды, аңсаулы, толық адам.

Сөйтіп ақыл, қайрат, жүрекпен қамтылатын қасиет, әрекеттер арқылы адамзат өзінің өмірдегі адами жаратылысы мен адамгершілік болмысын танытады. Бұл үшеуінсіз адамның өмір, тіршілігі де, болмыс, жаратылысы да түгел, толық бола алмайды. Байқағанымыздай, Абай толық адам жайлы ойларын желілі түрде әрі жүйелі қалыпта жырлаған, тіпті ойшылдық болмысымен ғалымдарша, хакімдерше төркін-тегін таныта, түрлі байланыс, қилы қатынастарын қамтып танытқан.

### **Толық адам сипатындағы Әбдірахман бейнесі**

Біз енді ақынның ұлы Әбдірахман туралы өлеңдерін толық адам танымы тұрғысынан саралауға көшеміз. Абайдың ұлы жайлы, яғни Әбдірахманның науқасы мен өліміне қатысты он шақты өлеңі бар. Солардың алғашқысы – «Я, құдай, бере көр» деп басталатын «Әбдірахман науқастанып жатқанда» атты өлеңі. Ақын осы тұста Алланың құдіретіне көбірек ден қойып құлшылығы мен тілегін ұлғайта түседі. Осы орайда М.Әуезов былай деп жазған болатын: «Абай осы өлеңдерінің алғашқы үлгілерінде өзінің дінге нанған адам екенін де жиі аңғартады. ...қай кезде болса да Абай дінсіз емес, қайта дін тұтынушы, иланушы адам болады. Сонда ол өзінің елі тұтынып отырған мұсылманшылық дінінде. Сол діннің алласын және басқа да бірталай қағидасын ақын өзінің нанымы етеді» [2, 162-б.]. Әбдірахман науқастанып жатқанда, жалпы Әбдірахманға қатысты өлеңдерінің алғашқысы былай басталады:

Я, құдай, бере көр,  
Тілеген тілекті.  
Қорқытпай орнықтыр  
Шошыған жүректі [3, 164-б.].

Адамзат қанша «ақылдымын», «мықтымын» дегенімен, өлім алдында бәрібір қауқарсыз. Ал науқас сол өлімнің хабаршысындай көрінеді. Абайды қатты қайғыға салған осы жай, содан да ол Алладан ұлының амандығын тілеумен, Аллаға жалбарынумен болады:

Шын жүрек елжіреп,  
Алладан тілеймін.  
Шын қалқам осы күн  
Болып тұр керекті.  
Жүрегім суылдап,  
Сүйегім шымырлап,  
Алладан тілеймін  
Құпия сыбырлап.  
Зар етсе бендесі,  
Бермей ме алласы  
Тән саулық қалқама,  
Қабыл боп көз жасы [3, 164-б.].

Ақын өзіне ғана емес, еліне де ардақты жақсы адам, абзал жан Әбдірахманның амандығын Алладан жалбарына тілейді. Бұл өлең көбіне Әбдірахман науқасына алаңдаған әкенің Аллаға тілек еткен көңілін жыр етумен ерекшеленеді. Өлең соңындағы «Жазылып келсеңіз, гүлденер өміріміз» деген жолдардан Әбдірахманның жақын-туыстары мен ауыл-аймаққа соншалық қымбат, қадірлі жан екені көрінеді. Ал мұндай жақсы жан ақын армандаған толық адаммен анық қабысады.

Ақынның ұлы Әбдірахман науқасына байланысты шығарған екінші өлеңі «Әбдірахманға» деп аталады. Өмірдегі ең қимас, ең аяулы адамы ауырып жатқанда кісінің қаншалық қауқарсыз халде болатыны белгілі. Абай да ұлының науқасына қатты алаңдап, қайғырып, Алладан ұлының амандығын тынымсыз тілеумен болады. Бұл өлеңнің біз үшін маңызды болатын себебі, мұнда ақын Әбдірахманға қатысты «Рәушан сипатын тез көрсет бендеге» деп Алладан тілек етеді. «Рәушан сипат» – әркімде бола бермейтін асыл болмыс, Әбдірахман – сондай асыл болмысты жан. Адамзат армандаған арман сипатты жақсы адамның бәрі де толық адаммен байланысады, себебі толық адам танымының көздеген мақсаты да – жақсы адамды қалыптастыру. Әбдірахман науқасына байланысты келесі өлеңін ақын «Әбдірахманға

Кәкітай атынан хат» түрінде жазған. Өлеңіндегі ойларын ақын «бояма жалғаны жоқ жүрек сөзімен» айтады. Кәкітай орнындағы ақын Әбдірахманға қатысты асыл арманын жырлаған, бар арманы – Әбдірахманның аман болуы. Өлім хабаршысындай болған ауру үстінде әркім де аяулы, қимас жандай көрінеді, сөйтсе де Әбдірахмандай асыл адамның орны бөлек. Кәкітай сондай асыл ағаны сағынып, оның амандығын тілеп өлең арнайды. Абай немере інісі, жақсы шәкірті Кәкітайдың атынан Әбдірахман науқасына арнап екі өлең жазған, соның екіншісінде Әбдірахмандай асыл адам былайша суреттеледі:

Көзімнің нұрысыз,  
Сізсіз жоқ қуаныш.  
Өмірдің гүлісіз,  
Көңліме жұбаныш [3, 170-б.].

Біз Абайдың жақсы адам бейнесіне байланысты айтқан ойларының бәрін де толық адаммен сабақтастыруға бейімбіз. Себебі жиі айтатынымыздай, жақын-туыс, дос-жаран, жалпы көпшілікке ұнамды адамның бәрі де толық адам талабына сай келеді. Өйткені ондай жағымды, жақсы адамдарда ақыл, қайрат, жүрек тобындағы асыл қасиеттер мол ұшырасады. Өлеңде жазылғандай, Әбдірахман жақындарының ғана емес, жалпы елдің үміт еткен, болмысы биік жан. Кәкітайдың Әбдірахмандай ағасына деген шын ықыласты көңілінен анық асыл адамның сипаты танылады. Осы аталған, сараланған төрт өлеңде Әбдірахманның ауырып, науқастанып жатқандағы жағдайы мен жақын туыстарының орны бөлек ұл мен ағаны өлімге қимай, Алладан оның амандығын тілеген халін көреміз.

Абайдың Әбдірахман өліміне байланысты алғашқы туындысы – «Арғы атасы қажы еді» деп басталатын «Әбдірахман өлгенде» атты өлеңі. Негізі, бұл өлеңде Құнанбай жайлы сөз болады. Толық адам танымының мақсаты мен мазмұны – жақсы адамды қалыптастыру болса, бұл өлең де жақсы адамның бейнесін сомдау арқылы толық адамға қатысын танытады. Бұрындары Құнанбай жайлы білгенімізде оны көбіне нашар сипатта танып, ақындағы осы өлеңнің мазмұнын ескермей келгенбіз. Абайдың айтуында әкесі Құнанбай орны бөлек,

болмысы биік адам болыпты. Ең әуелі Құнанбай қажы делініп дәріптеледі. Қажы болу – мұсылмандықтың екінің бірі орындай бермейтін бірегей парызы, Құнанбай сол қасиетті парызын өтеген адам. Абай өлеңі бойынша, Құнанбайдың үлгі тұтар, өнеге етер жақсы қасиеттері қандай дегенде, көз алдымызға толық адамның бейнесі келеді. Құнанбай жасынан адалдық пен ақылдың иесі болыпты. Мал, дүниеге ғана емес, ақыл-ой, жан-жүрегінен шығар қайырымдылықтарға да мырза болыпты. Ақынның өзі «Көк тұман – алдындағы келер заман» өлеңінде:

Мазлұмға жаның ашып, ішің күйсін,  
Харекет қыл, пайдасы көпке тисін.  
Көптің камын әуелден тәңрі ойлаған,  
Мен сүйгенді сүйді деп иең сүйсін [3, 213-б.] –

деп жырлағанындай, әкесі Құнанбай да мұңлы, шерлі, жоқ-жітікке қамқор, жайлы жан болыпты. Олардың мұқтажына алалықсыз таза көңілмен қарап, барлық қажетін өтеп жүріпті. Әділ, мырза, ер болған жақсы атағы елінен асып әлемге тарапты. Шүкірі мен тәубесінен жаңылмаған иманды жан болыпты. Адамдар хақ жолында Алланың жүзін көрмекке ұмтылса, Шыңғыстау төңірегінің иман іздеген адамдары Құнанбайдың жүзін көрмекке асығыпты. Адам өмірі хақ жолы мен дүние жолының арасында өтсе, Құнанбай соның дүниелігіне көңіл бөлмей, Алла жолын ұстанумен өтіпті. Түйіндеп айтқанда, өзіндей ұқсасы жоқ айрықша бөлек жан болыпты:

Ол сыпатты қазақтан  
Дүниеге ешкім келмепті [3, 179-б.].

Байқасақ, Құнанбай өмірден жақсы адам болып өтіпті. Болмысы, бітімі толық адамға лайықты жақсы, ізгі қасиеттерге толы болыпты. Әбдірахман өліміне қатысты өлеңдерінің алғашқысы арқылы ақын Құнанбайдай жақсы адамның бейнесін жасауымен осылайша толық адам танымын өмірлі етеді.

Ақынның кейінгі өлеңдерінің бәрі де Әбдірахманның өліміне байланысты жазылған. Олар көбіне Әбдірахман өліміне күйінген, тірідегі арманды болмысын аңсаған, оған айтылған жоқтау мазмұнында келеді. Олардың жалпы саны Құнанбай қажы

туралы өлеңді қосқанда он шақты. Әбдірахман өліміне байланысты шығарылған өлеңдерде оның жақсы, көпке өнегелі бейнесі сомдалған. Енді осы өлеңдердегі Әбдірахман сипатын тануға тырысайық. Ол қандай адам еді, соны білейік. Ең әуелі ол «елден бір асқан ерек» адам болыпты. Мына жыр жолдарынан Әбдірахманның толық адамға қатысты сипаты танылады:

Жүрегі жылы, бойы құрыш,  
Туысы жаннан бөлек-ті.  
Өнері оның жұрт асқан,  
Ғылымға көңілі зерек-ті [3, 180-б.].

Жинақталып берілген осы мінездеуден Әбдірахманның толық адам сипатында болғаны көрінеді. «Жүрегі жылы» Әбдірахманның мейірімді, рақымды, қайырымды жан екені байқалады. «Бойы құрыш» сипаттауынан оның қайратты, айбатты, тән жағынан мықты болғанын танытады. Ал соңғы екі жолдан Әбдірахманның ақылға қатысты қасиеттері көрініс тапқан, өнер, ғылым – ақылдан туатын құндылықтар.

Сонда Әбдірахманның «ақыл, қайрат, жүректі бірдей ұстаған елден бөлек» толық адам екені көрініп тұр. Бұл өлең Әбдірахманның толық адамға лайық бейнесін жасауға айрықша үлес қосқан. Қысқа ғана өлеңді оқып отырып, «ақыл, қайрат, жүрекпен» байланысты қасиетерге ие болған Әбдірахман бейнесі көз алдымызға келеді. Әсіресе Абай аса жоғары бағалаған жүрекке қатысты қасиеттер көбірек екені байқалады:

Аямаған ғаріптен  
Қолдан келген көмекті.  
...Біреудің қылған қарызын  
Айтқызбай артық төлепті.  
Боямасыз ақ көңіл,  
Кірлетпей кетті жүректі [3.180].

Рақым, мейірім, өзгенің қамын ойлаушылық көбіне жүректен бастау алатынын Абай он төртінші қарасөзінде жазған: «Рақымдылық, мейірбандылық, уа әрбір түрлі адам баласын өз бауырым деп, өзіне ойлағандай ойды оларға да болса игі еді демек, бұлар – жүрек ісі, асықтық та – жүрек ісі» [4, 110-б.]. Жоғарыдағы өлең

мазмұнынан байқағанымыздай, Әбдірахман осындай ізгі, қайырымды қасиеттерге ие болғанын көреміз. «Кірлетпей кетті жүректі» дегеннің мазмұны адамдық болмысын бұзбай өтті дегенге келеді. Ал адамдық болмысты сақтау, адамгершілікті болу – толық адамның сипаты. Әбдірахман өліміне байланысты келесі өлеңі де «Әбдірахман өлгенде» деп аталады. Мұның көлемі тіпті шағын, сөйтсе де жақсы адамның абзал бейнесін жасауда үлесі аса мол. Біз бұл өлеңді түгел келтіргенді жөн көреміз:

Тұл-бойың ұят, ар едің,  
Ескеріп істеп, ойлаған.  
Тәуекелге нар едің,  
Талаппен терең бойлаған.  
Ерлікке де бар едің,  
Үйренуге тоймаған.  
Жасқа жас, ойға кәрі едің,  
Атаңның атын жоймаған.  
Замана, неткен тар едің,  
Сол қалқамды қоймаған [3, 181-б.]?

Толық адам ақыл, қайрат, жүрек үшеуінің бірлігінен болса, осындағы кейіпкер бейнесінен оның үшеуі де табылады. «Тұл-бойың ұят, ар едің» дегеннен Әбдірахманның жүректен шығар қасиеттерге ие болғанын көреміз. «Тәуекелге нар едің, ерлікке де бар едің» оның өзіне сенген күш-қайраты мен қуатын танытады. Өзге айтылғандар көбіне лирикалық кейіпкердің ақылға қатысты қабілет, қасиеттерінен хабар береді. Нәтижесінде өлеңде суреттеліп сипатталған адамның ақын армандаған толық адаммен қабысатынын байқаймыз. «Әбдірахман өліміне» деп аталатын кейінгі өлеңі біршама көлемді болып туған. Мұнда Әбдірахман өмірі мен болмысына көбірек көңіл бөлу бар. Жиырма жеті-ақ жасында көз жұмған Әбдірахманды ақын «ондай сынды» жан болмаған деп сипаттайды. Өлеңді оқи отырып, жақсы адамның кемеліне келген абзал болмысын танып таң қаласыз әрі жақсы болмысты танып жаныңыз жайлы күй кешіп «тамақтанады», «азықтанады». Шіркін, осындай жандар мол болса ғой деген ойға беріліп кетесіз. Ақын өлеңдеріндегі жақсы адам жайлы ойлардың бәрінен де толық адамды танимыз,

сөйтсе де ақын насихаттайтын үш қасиеттің анық, айқын көрінісін тануға талаптанамыз. Әділет, рақым, ар-ұят, мейірім, шапағат, махаббат қасиеттерімен танылатын жүрек сипаты мына жолдарда көрініс тапқан, біз оларды өлең мазмұнынан іріктеп алдық:

Дүниелікке көңлі тоқ,  
Ағайынға бауырмал.  
Тәкаппар, жалған онда жоқ,  
Айнымас жүрек, күлкің – бал.  
...Бөтен көзде көрсе жас,  
Ойнаймын деп күлдіріп.  
...Ата-ананың қызметін,  
Алған жардың қарызын,  
Өтемей кеткен бейнетін,  
Қағазға жазған арызын.  
Бізге уайым жегені –  
Арманда боп қалды деп [3, 182-183-66.]

Өлең жолдарынан байқағанымыздай, Әбдірахман қанағатшыл, рақым-мейірімді, опалы, бір сөзді, өзгеге қамқор, қайырымды, обал-сауапты білетін, өзінен гөрі өзгенің қамын көбірек ойлаған адам болғаны байқалады. Бұл қасиеттердің бәрі де – толық адамның бойынан табылар сипаттар. Әбдірахман бойында ақылға қатысты қасиеттер де жеткілікті. Абайтанушы М.Мырзахметұлы зерттеулерінен танығанымыздай, білу, тану, оқу, ойлауға байланысты қасиеттердің бәрі де толық адамды құрайтын үш қасиеттің ішіндегі ақылды танытады. Енді өлеңдегі Әбдірахманның ақылдылығын танытар қасиеттер қандай еді десек, олар мыналар:

Ғылым оқып білгенше  
Тыным, тыныштық таппаған.  
Дүниені кезіп көргенше  
Рахат іздеп жатпаған.  
...Аз өмірін ұзайтқан,  
Ғылымға бойы толған соң.  
Көрген жерін молайтқан,  
Оқып, біліп болған соң.  
...Көргені мен білгені  
Жүзге келген шалдан көп [3, 182-183-66.].

Жыр жолдарынан байқайтынымыздай, Әбдірахман оқу, білу, ізденуден тынбаған, дүниені танып білгенше тыныштық таппаған, сөйтіп аз жасында көпті көріп толысқан көнекөз кәрі, дана данышпандай адам болып танылады. Толық адамды қалыптастыруға үлес қосатын қайрат та Әбдірахман бойынан мол табылады. Ақын өлеңдеріндегі қайрат қасиеті күш, қуат, тән әрекетімен байланысып өз болмысын танытумен бірге, кейде талап, ізденіс, ыждахаттылықпен мағыналас келіп, ақылмен қатарласып көрінетіні де бар. Мысалы мына жолдардан қайрат пен ақыл егіз түрде танылатыны:

Петербургда-ақ кідірмей,  
Біліпті дерттің барлығын.  
Тәуекел қып білдірмей,  
Күтіпті тәңрі жарлығын.  
...Тәуекел зор, ақыл мол,  
Қорықпай тосқан тағдырын.  
Қиынсынбай өлімді ол,  
Білдірмеген еш сырын [3, 182-183-66.].

Бұл жолдардан өлең арналған иесінің әрі ақылды, әрі қайратты екені көрінеді. Дертінің бар екенін білу, өлетінін сезу, сезе тұра сабыр сақтап қалпын бұзбау ақылдылық болса, ауру мен ақылмен күткен өліміне төзім танытып шыдау, төзу – қайраттылық. Толық адам болуға жеткізер ақыл, қайрат, жүректі өз бойында түгел сақтай білген Әбдірахманның «сәулең болса басыңда, кімді көрдің бұл сынды» дегендей орны бөлек сипатын да ақын әр-әр тұста танытып отырады:

Құйрықты жұлдыз секілді  
Туды да, көп тұрмады,  
Көрген, білген өкінді,  
Мін тағар жан болмады.  
...Жаңа жылдың басшысы – ол,  
Мен ескінің арты едім [3, 183-б.].

Толық адам тіршілікте адамдардың ілуде біреу-екеуі ғана жете алатын аса сирек дәрежесі. Әбдірахман – өз болмысымен сондай оқшау болмысты танытқан жан. Ақын жазғандай, Әбдірахман «құйрықты жұлдыз секілді» сирек құбылыс. Өз



ортасынан ол биікке жеткен жан жоқ, «жаңа жылдың басшысы» болып, ондай тұғырға Әбдірахман ғана көтерілген. Толық адам да – «жүзден жүйрік, мыңнан тұлпар» ғана шыға алатын адамгершілік биіктік. Осындай асыл жан өмірден өткендегі жағдай да жеңіл болмайды, оны ақын былайша суреттейді:

Арман деген ашы сол,  
Сүйекке тиді, қарт едім.  
Қайғы болды күйгендей,  
Ол қуатым еді рас.  
Көзге қамшы тигендей  
Шыр айналды артқы жас [3, 183-б.].

Сөйтіп ақынның бұл өлеңінде Әбдірахманның толық адамға лайықты болмысы жан-жақты бейнеленген.

Ақынның «Талаптың мініп тұлпарын» деп басталатын өлеңі де «Әбдірахман өліміне» тақырыбымен берілген. Қай өлеңінде де ақын ұлының кісі қызығарлықтай өнегелі бейнесі сомдалады. Аталған өлеңінде көбіне Әбдірахманның ақылдылыққа алып баратын талабы мен ғылымға деген құштарлығы жырланады. «Талаптың мініп тұлпарын, тас қияға өрледің» дегенде, «Бір ғылым еді іңкәрің» дегендей, Әбдірахманның оқу-білім жолындағы ыждағатты әрекеті дәріптеледі. Ғылым жолында өзгеден бөлек ізденімпаз болғаны байқалады, онысы «бірге оқыған құрбыға бас бәйгені бермедің» деген сөзінен көрінеді. Әбдірахманның бұл қасиеттері оның ақылға қатысты қырын танытады. Әдетте адамның әртүрлі артылықшылықтарына сеніп, өзін өзгеден биік қойып асып-тасып кететіні болады. Әбдірахман ондай кеселді қасиеттерден аман екен. Ол өзінің адами таза, абыройлы болмысынан айнымаған жақсы жан:

Бала болдың, жас болдың –  
Жалғандыққа ермедің.  
Төре болдың, бас болдың –  
Көкірегінді кермедің [3, 184-б.].

Мұндай абзал, жақсы қалпын сақтап қалу әркімнің қолынан келе бермейді. Кісілік қалыбы мен адами болмысын бұзбай, бұрмаламай, асыл сипатында сақтап қалу – адамгершіліктің

белгісі. Ал адамгершілік – толық адамның басты сипаты мен арман-мұраты. Әбдірахман өзі өнегелі жан болумен бірге, өзгені де жақсы жолға сала алатын адам еді. Ақын осыны да ойлап аң ұрады. Ақын өзі де өмір бойы елін, халқын түзеймін деп келді, сол жолда оған Әбдірахман өзіне жәрдемші, қолдаушы болар жан еді. Әбдірахман әке көңілін толық қанағаттандырған ұл болатын. Мұны ақын мына сөзімен танытады:

Іздеп табар жалғаннан  
Бала берген бенде едім [3, 184-б.].

Абай осылайша қайғылы күй кеше отырып, ұлының жақсы, жайсаң болмысын еске алып жұбанғандай болады. Болған іске бекем болып, адам төзбес ауыр қайғыға да көндіккенін байқатады: «Бенде өлмейді арманнан, мінеки, мен де өлмедім».

Ақынның Әбдірахман өліміне байланысты шығарған арнаулы өлеңдерінің соңғысы – «Әбдірахманға» деп аталады. Кейінгі өлеңдері Әбдірахманды жоқтау түрінде жазылған. Өлеңді ақын төгіп-төгіп бір деммен жазғаны байқалып тұрады. Өлең басынан аяғына дейін Әбдірахманның қандай екенін айтуды, сипаттауды жазылған. «Орынсызды айтпаған, түзу жолдан шықпаған» деп басталатын өлең жақсы адам бейнесінің толымды нұсқасын танытқан. Әбдірахман жақсылық жасауға жаны жақын, төмен ортаның ықпалына көнбеген, ғылым іздеуден жалықпаған, көкірек керіп көрмеген, махаббатын сатпаған, хақ сөзі мен тура жолды сақтаған, турашыл, тапқыр, мейірім, рақымға бай, бауырмал, сабырлы да сыпайы, туғанын қашан да мақтаған жақсы, абзал болмысымен сипатталған. Осыншалық жақсы, абзал қасиеттерді бір басына жинап сақтай алған Әбдірахман – шынында да ақын армандаған толық адам. Әбдірахман «көрген, білген өкінді, мін тағар жан болмады» дегендей, ардақты да абзал адам болғанын көреміз. Әрі ақын армандап, шығармалары арқылы негіздеп өзі жасаған толық адам танымының өмірдегі көрінісі.

Абайдың Әбдірахманға арналған кейінгі төрт өлеңінің екеуі жұбату, екеуі жоқтау түрінде жазылған. Жұбату өлеңінің бірі өзіне, екіншісі келіні Мағышқа бағытталады. Өзіне айтылған жұбатуында ақын неше түрлі жайсаң, жақсы жандарды жырына

қосып, солардың бәрі де өмірден өткенін еске алып, өз-өзін сабырға шақырады. Адамның қауқарсыз пенде екені, ажал жетсе, әркімнің де амалсыз екенін мойындайды. Алла бұйрығы жеткенде адам еркі түк те емес. Ақын «өмірін берген құдайым ажалын да беріпті» дегендей іргелі, қағидалы ақиқаттарын түйіндеп жеткізеді. Өзгемен қоса өзіне де осы ақиқатты мойындайық дегендей жұбату айтады. Өзіне дейінгі талай тарихи тұлғаларды ауызға алады. Солардың қатарында Апплатон, Сократ, қаһарман Ғали, Ескендір, Темір, Шыңғыс есімдері аталады. Өз әкесі Құнанбай мен інісі Оспанды да өзіне қайтарған Алла, осындайда өзіне «сабыр қылсақ керек-ті» деп жұбату, тоқтау айтады. Аталған тарихи тұлғалар жәй аталып қана қоймай, олардың жақсы сипаттары да еске алынады. Апплатон мен Сократтың ақылдылығы және Ғалидің білекті батырлығы өнеге етіледі. Ақынның жоғарыда біз атап талдаған бір өлеңінде Құнанбай қажының жақсы болмысы дәріптелген болатын. Мына өлеңінде де ақынның өз әкесі Құнанбайды еске алып оның жақсы сипаттарын үлгі ететінін көреміз:

Мұқым қазақ баласы  
Тегіс ақыл сұрапты.  
Тобықтыны ел қылып,  
Басын жиып құрапты.  
Меккеде уақып үй салып,  
Пәтер қып, жаққан шырақты.  
Бір құдайдың жолына  
Малды аямай бұлапты [3, 187-6.].

Әкесі жайлы айтқандарының бәрі де адамгершілік сипаттарын құрайды, адамдық абыройды танытады. Ақын тарихи тұлғалар мен Құнанбай, Оспан болмыстары және олардың өлімін еске алу арқылы өзіне әрі өзгеге жұбату айтады.

Әбдірахманның өлімі әкесі Абай мен ана, бауырларынан бөлек әсіресе оның жастай қалған әйелі Мағышқа өте ауыр соғады. Абай өзіне айтқан жұбатуынан өзге Мағышқа да арнап сондай өлең тудырады. Ақын өзі жазған жұбату өлеңінде Мағышқа сүйеу, қуат боларлық сөздерін соншалық нанымды жеткізеді. Қалай болғанда да өлең мазмұны ақиқатты, жақсы сипаттарды айтуымен толық адам танымын насихаттауға үлес

қосады. Қайғыра-қайғыра ақынның өзі де адамзатқа ортақ ақиқатты мойындап айтуға жетеді:

Һәммә жанды аулымен  
Патша құдай сынайды.  
Бір сен емес, жылатқан  
Сыңарын алып талайды.  
Бәрімізді аясаң,  
Тоқтау қылсаң ұнайды.  
Ұмытқаның жарамас  
Жаратушы құдайды.  
Халық билеген патшалар  
Уақыты жетсе, құлайды.  
Дәл уақыты жеткенде,  
Талайдың гүлі қурайды [3, 188-б.].

Түпкі ақиқат осы, бірақ адам-пенде алғашында мұны есі шығып ескере алмай жүреді. Олай болатын жөні де бар, жақын-туыстан, әсіресе Әбдірахмандай жақсы жаннан айрылу оңай емес. Пайғамбарлардың соңы Рәсулді алған бұл ажал – адамзаттың бәріне де ортақ ақырғы ауыр хал. Абай келінін жұбата отырып, қимастық танытқан өз халін де Әбдірахманның асыл болмысын айтумен еске алып өтеді:

Мен білемін, қайтейін,  
Мұндай асыл тумайды [3, 188-б.].

Абай өз ұлы Әбдірахманды «мұндай асыл» деп еске алуы тегін емес, оның сырын бұған дейін талданған өлеңдердегі Әбдірахман сипатынан байқаймыз. Осы жұбатуының тағы бір тұсында Әбдірахманды «бір шешеден туғанда бәрінен кетті тәуірім», «кетті ортадан асылым», «тиянағым, тұрлауым» деп еске алады. Абай бағалауындағы «асыл, тәуір» деп сипатталған Әбдірахманды толық адам деп қабылдасақ болады. Абай қайғысы Мағыштікінен титтей де кем емес, тек ақын ақылға салып сабыр танытады. Ал айтар болса, ақын халі мен қайғысы мынадай:

Ойламадым туғанды,  
Бір өзіңе бас ұрдым.  
Жалғыз сенен айрылып,

Артыңа қарап аһ ұрдым.  
...Шыны сорлы – мен дағы,  
Мағыш байқап қараса [3, 189-б.]

Ақиқатты өзі ғана мойындап қоймай, келіні Мағышты да жұбатып жыр жазған ақын асылынан айрылған қайғысын айтпай тұра алмайды, әйтеуір амалын тауып жүректен шыққан сөзін сыртқа жеткізіп қояды. Өйткені Әбдірахман шынында да орны бөлек асыл адам.

Адамның ең аяулы жаны – шын сүйген жары. Әбдірахманды жоқтап қатты қайғырған жанның бірегейі – Мағыш. Абай осы Мағышқа арнап жоқтау өлеңін жазып береді, ол «Әбдірахманның әйелі Мағышқа шығарып берген жоқтау» деп аталады. Ақын осы жоқтау өлеңінде Мағыш атынан, Мағыш болмысымен қайғырып жоқтайды. Келіні Мағыштың халін ақын өте шынайы да нанымды жеткізген. Мағыш бағалауында да Әбдірахман орны бөлек адам ретінде сипатталады:

Айырып, от қып өртедің,  
Әбіш сынды асылдан.  
...Өзгеше болып жаралған,  
Таныған жан қалпынан [3, 190-б.]

Мағыш өз өмірінен өткен өзге де қайғылы сәттерді еске алып өтіп, бәрінен де ауыры жарының қазасы болғанын айтып аһ ұрады. Бес жасында шешесінен айрылады, сүйіп қосылған жарымен де мауқын басып үлгермей көз жазып қалады. Өзі тауып айтқандай, Әбішпен болған өмірі – қызық пен қуаныш, береке мен бақыттың ұшар шыңы болса, жарынан айрылған халі – қайғы мен қорлықтың шыңырау тереңіне құлағандай болады:

Сағынсам да алыстан,  
Жүруші ем күнше жылынып.  
Қызықтың заңғар басынан  
Қорлыққа кеттім жығылып.  
Құдай қосқан қосақтан  
Жалғанда қалдым жырылып [3, 192-б.]

Осыншалық сағыныш пен махаббат арналып бағытталған Әбдірахман өмірде абыройлы, жағымды жан болғанын

байқаймыз. Оның асыл болмысы оған арналған өлеңдерде жан-жақты көрініс тапқан. Біздің Әбдірахман бейнесінен толық адамның сипатын танымақ болған талабымыз тегін емес. Әбдірахман ақыл, қайрат, жүректен шығар барша жақсы қасиеттерді бойына жинап сақтай білген, әрі өлгенінше оларды жоғалтпай баянды еткен асыл адам. Мағыштың жоқтауында оның асыл болмысы былайша сомдалады:

Қылығыңа жете алман,  
Қаншалық тілмен айтқанмен.  
Басыңа құдай беріпті  
Өлшеусіз қылып ақылын.  
Сабыр мен талап беріпті,  
Ақылың, рақымың қиын-ды [3, 191-б.].

Өлеңде айтылғандай, Әбдірахман бойынан ақыл, қайрат, жүректен тарайтын қасиеттердің бәрі де табылады. Өлең көбіне Мағыштың адам төзуі қиын қайғысын суреттеуге құрылған. Арасында тебіреніп өмір серігі болған Әбдірахманның жақсы қасиеттерін толғанып сөз етеді. Мағыш та Абай секілді Әбдірахманның өзгеше болмысты жан болғанын еске алады: «Өзгеше болып жаралған, айрылдым қалқам жарымнан... Қылығың, қалқам, кетер ме жалғанда менің ойымнан». Өлеңде Мағыштың өткен өмірінен деректер айтылып отырады. Әбішпен бірге болған өмірі оның бақытқа жолыққан сәтіндей көрінеді. Оны өзі де «шықтым ба деп ем, құдай-ау, қызықты күннің шетіне» деп еске алады. Адам пенделік өмірінде басына түскен қиындық, қайғының бәріне де көніп, көтереді, сөйтсе де Мағышқа Әбдірахман қазасы кісі төзгісіздей көрінеді:

Сабыр, тағат қылуға  
Қоймады күйік бойыма ес.  
Әбіш сынды жарымнан,  
Айрылған соң барымнан,  
Жалғанда болмас жұбаныш [3, 193-б.].!

Абайдың Әбдірахманға арнап шығарған ең соңғы өлеңі – «Баласы өлген анаға шығарып берген жоқтауы». Абай ананың, жардың, інінің де аузына олардың өз күйлеріне лайық, сай келер сөздерін салады. Ана – баланың ең жақын адамы. Бала ананың

бауыр еті ғана емес, өз болмысынан бөлініп шыққан жан-жүрегінің бөлшегі. Бұл өлең – сол ананың айтқан жоқтауы. Ана сөзіне қарағанда, Әбдірахман адамға ғана жағымды болып қоймай, Алланың да сүйікті құлы болғанға ұқсайды:

Көз жұмғанша дүниеден  
Иманын айтып кеткені-ай!  
«Бейсенбі ме бүгін» деп,  
Жұмаға қарсы өткені-ай!

Аптаның бейсенбі, жұма күндері мұсылмандық әлемде аса қадірлі саналады. Бейсенбі күні әруақтарға бағыштап құран оқытылады, жұма күні адамдар қауымдасып мешітте намазын оқиды. Иман – бұл дүниелік адамның абыройы мен мәртебесі, о дүниедегі жолдасы. Тіпті табиғат пен жамиғат та сол қаза күні шуағы мен ықыласын мол танытқандай:

Жер күңіреніп, жұрт шулап,  
Ағайын түгел жеткені-ай!  
Жамиғат тоңбай, күн жылып,  
Тәңрім рахым еткені-ай!  
Ием қабыл алды-ақ деп,  
Көңліме қуат біткені-ай [3, 195-б.]

Жан, рухтың иесі Алла мен тәнінің де барар жері табиғат екеуі де Әбдірахманды қадір, қасиет, құрметімен қабыл алғандай. Адам баласы әуелі Алланың беруі, онан соң әке-шешесінің болмысынан жаралады ғой. Баланың қабілет, мінез, болмысы әке-шешесінің қан, тегінен негіз алып пайда болады. Бұл жағынан келгенде Әбдірахманның әке жағы да, ана жағы да осал емес. Әбдірахман «Орта жүздің ұлығы, өзен судың тұнығы» болған әке мен шешеден туған. Ана жоқтауында айтылғандай, Әбдірахман «екі асылдан қосылған сом алтынның сынығы». Ана да баласының болмысы өзгеше болғанын алдыңғы әкесіндей, жарындай тебірене толғанып айтып өтеді: «өлгенше естен қалмайды өзгеше біткен қылығы». Ана баласының қазасы соншалық ауыр болғанын ой-қайғысы аралас төгіп-төгіп жеткізеді. Әбдірахман өлімін ана «дерт алды, өрт алды, келте алды, ерте алды, көк орған, тез орған, жас өлім, қас өлім, тас

өлім» деп нар көтере алмас қайғыдан көкірегі қарс айрылып жоқтайды. Және жоқтауының соңын Әбдірахман болмысын танытар мынадай ой айтумен бітіреді:

Орамды тілді ауыздым,  
Ақылға жүйрік маңыздым,  
Көп жасамай тез кетіп,  
Көзімнің жасын ағыздың [3, 196-б.].

Әбдірахман науқасы мен өліміне қатысты Абай өлеңдерінде оның асыл болмысы осылайша түйінделеді. Ақыл-ділде бар толғанысты ойды тіл айтады, тілмен айтылғанның бастауы ақылда жатады, Әбдірахманның ақыл мен тілде бірдей «ауызды, маңызды» болғанын көреміз. Әбдірахман бейнесі арқылы толық адам сипатын айна-қатесіз тануға болады. Әбдірахман – жоғарыда жиі жазып, айтқанымыздай, ақын қиялындағы толық адамның өмірдегі көрінісі.

#### Пайдаланылған әдебиеттер тізімі

1. Құнанбаев К.Ы. Абай (Ибраһим) Құнанбайұғлының өмірі. 38-49-б. – Абайды оқы, таңырқа... (Құрастырған, алғы сөзі мен түсініктемелерін жазған – М.Мырзахметов, филология ғылымының докторы). – Алматы: Ана тілі, 1993. – 160 б.
2. Әуезов М. Жиырма томдық шығармалар жинағы. XX том. Монография, мақалалар. – Алматы: Жазушы, 1985. – 496 б.
3. Абай (Ибраһим Құнанбаев). Екі томдық шығармалар жинағы. I том. – Алматы: Жазушы, 1986. – 304 б.
4. Абай (Ибраһим Құнанбаев). Екі томдық шығармалар жинағы. II том. – Алматы: Жазушы, 1986. – 200 б.
5. Әл-Фараби. Әлеуметтік-этикалық трактаттар. – Алматы: Ғылым, 1975. – 455 б.
6. Әл-Фараби. Философиялық трактаттар. – Алматы: Ғылым, 1973. – 448б.
7. Мырзахметов М. Мұхтар Әуезов және абайтану проблемалары. – Алматы: Ғылым, 1982. – 296 б.
8. Мырзахметұлы М. Абайдың «Толық адам» ілімі. – Алматы: Қазығұрт. 2020. – 240 б.
9. Ахметов З. Абайдың ақындық әлемі. – Алматы: Ана тілі. 1995. -272-б.
10. Аристотель. Никомахова этика. Перевод: (С) Нина Брагинская (satis@qlasnet. ru) Философы Греции ЗАО «Издательство «ЭКСМО-Пресс», Москва, 1997. – 191 с.



11. Аристотель. Үлкен Этика. 249-312-б. – Әлемдік философиялық мұра. Жиырма томдық. 3-том. Аристотель философиясы. Алматы: Жазушы. 2005. – 568 б.
12. Плотин. Эннеады. К.: «УЦИММ-ПРЕСС», 1995-1996; К.: PSYLIB, 2003. От редактора HTML – версии. – 310 с.
13. Бейсембиев К. Мировоззрение Абая Кунанбаева. – Алма-Ата: Издательство Академии наук Казахской ССР. 1956. – 172 стр.
14. Мырзахметов М. Абайдың адамгершілік мұраттары. – Алматы: Рауан. 1993. 279 б.
15. Мырзахметұлы М. Абай және Шығыс. – Алматы: Қазақстан. 1994. – 208 б.
16. Құдайбердиев Ш. Шығармалары. – Алматы: Жазушы, 1988. – 560-б.
17. Әліпхан М. Адамгершілік ілімі және Хакім Абай. Алматы: Қазақ кітабы, 2020. – 480 б.
18. Ибн-Туфейл. Хай Якзанұлы туралы роман. 345-420-б. – Әлемдік философиялық мұра. Жиырма томдық. 5-том. Ортағасырлық діни философия. Алматы: Жазушы. 2005. – 560 б.
19. Философский энциклопедический словарь. – Москва: Сов. Энциклопедия. 1983. – 840 с.

---

## ҚОРЫТЫНДЫ

Абай – ойшылдық терең танымның шыңына жеткен хакім ақын. Оқулығымызға азық әрі мазмұн болған Абайдың Толық адам ілімі – адамгершілік танымы аясындағы аса зор ақыл-ой табысы. Ақын шығармаларында адамгершілік жайы айрықша жырланатыны оның немере інісі Кәкітай Ысқақұлы мен абайтану ғылымының негізін салушы М.Әуезов және өзге де көзіқарақты кісілер тарапынан айтылып, жазылып жүретін. Әйтсе де осы адам болу мен адамгершілік жайын Абай белгілі бір қалыпқа салып, оның өзіндік жүйесін тауып, әрі өз тарапынан төл таным мен ілімге айналдыра жырлағанын абайтанушы ғалым М.Мырзахметұлы өткен ғасырдың сексенінші жылдарынан бері айқындай, тереңдей танытып келеді. Абай жайлы зерттеулерінде М.Әуезов ақындағы басты мәселені «Нравственная личность» деп атап, басын бастап, төбесін көрсетіп кеткен іргелі танымды М.Мырзахметұлы Абайдың өзі қолданған «толық адам» атауымен тарата, тереңдей танытып, абайтану ғылымында елеулі табысқа жетті.

Толық адам ілімі – жай ғана «ақылды бол», «арлы бол», «адам бол» деген жалаң ғана насихат емес, төркін-тегі терең, дәстүрлі дамуы мен жүйелі де қалыпты мән-мазмұны бар іргелі таным. Абайдың бұл ілімі қазақтың, түркілердің ғана емес, барша адамзаттың моральдық кодексі болуға лайық. Ақын болудың үстіне хакім де атанған Абай осындай іргелі танымды жасауда өз тарапынан елеулі үлес қосқан. Әсіресе ақша мен пайда, дүние мен байлық «құндылықтары» арсыздана алға шыққан нарық заманда ақыл-ой мен ар-ұят, имандылықты насихаттайтын бұл ілім бағыт-бағдарымызды дұрыстап, адами асыл қалпымызды жоғалтпай сақтап қалмақ. Бүгінде бай мен кедейдің арасы тым ашыла түсіп алыстап бара жатса да, тұрмыс, тіршілігіміз тәуба дейтіндей

жағдайда, бірақ аса мақтанып, марқаятын халде емеспіз. Қарын тояды, киім бүтінделеді, тұрмыс та бірте-бірте жақсарады, әйтеуір адамдар аш қалмау мен жалаңаш жүрмеудің амалын жасайды, тән мен тұрмыстың әл-ауқаты мен деңгейін көтерудің амалы солайша табылады, бірақ сөйтіп жүріп рухымыз жүдеп, діліміз дерттеніп, адамдық, адамшылық болмысымыз жетілмей қалса, қоғам мен мемлекетіміздің шын мәніндегі қайырымды қалыпқа көшуі кешеуілдеп қиындай түспек. Біздіңше, бала бақшадан демей-ақ қояйық, мектептен бастап жоғары оқу орнына дейін жас ұрпаққа тек қана білім, ғылым мәліметін берумен шектелмей, олардың ойы мен бойында ең әуелі «адам» деген ардақты да асыл болмысты тәрбиелеуді басты назарда ұстау қажет болады, өйткені бүгінгі бала мен шәкірт, тіпті ертеңгі азамат пен кәсіби маман да – бәрі де мәлімет пен нұсқаудың орындаушысы, қабілет пен дағдының ғана иесі болып қалмай, өзіндік ой-көзқарасы мен арлы ұстанымы, дүниетанымы мен адамшылық болмысы бар зор саналы азамат та болмағы керек. Абай қалыптастырған Толық адам ілімімен қаруланған әрбір ар-ұятты, әділетті, иманды адам ғана өз кәсібі мен қызметі арқылы ел игілігін арттырар ақылды да білімді, мықты маман бола алады. Сонда ғана қоғамдағы түрлі әділетсіздік пен арсыздық, күллі жамандық атаулы азайып, әлсіреп, нәтижесінде жойылуға бет алады. Бұл – мемлекет мүддесі мен қоғам игілігін ойлаудан туған асыл арман.

Адам баласы тәні ауырып мазасызданса, дереу барып дәрігерге көрінеді, ал жаны, ділі дерттеніп, ақыл-ойы, жан-жүрегі күншілдік, арсыздық, қиянатшылдықпен кірленіп, кеселденіп жатса, ол өзін әсте дерттімін, науқаспын деп ойлай бермейді. Тәні кеселденіп ауырған адам көбіне өз басымен қиналып әбіржісе, пейіл, ниеті қарауланып қасаңданған, ділі дерттенген адам өзімен қоса, отбасы мен ортасы, қоғамы мен мемлекетіне де зор залалды, кеселді болмақ. Тән жарасы осылайша кісінің өзіне ғана азапты, залалды болса, тексіздік пен тәрбиесіздіктен туатын жан ауруы, яғни көргенсіздік пен қасиетсіздік иесі мен жан-жағына, күллі қоғамға да кеселді кесірін тигізеді. Адамзат қауымы мен қоғамының соңғы кемелділік биігіне жете қоюы қиындау. Себебі адамзат – Жаратушыдан жеткен қасиетті де киелі рухымен қоса, топырақ тектес жексұрын, жиренішті нәпсінің де иесі. Сөйтсе де

қол қусырып қарап отыруға әсте болмайды. Қоғам мен мемлекетке тән емшісі дәрігерлікпен бірге жан мен рухтың шипасы болар азығы – толық адам ілімі де құдды тыныс алар ауасындай қажет. Қоғамды құрап жасаушы әрі мемлекеттің қуаты мен құтын арттырып өркениетке жеткізуші – түрлі саланың мамандары болса, сол кәсіп иелерінің ішкі тіні мен ділін, діні мен рухын, қасиетті адамгершілігін жетілдіріп асыл ететін – Абайдың толық адам ілімі болмақ. Қоғам мен мемлекет үшін өз кәсібін жетік білетін білімді де білікті мамандар ғана емес, сонымен бірге ақылды, ар-ұятты, әділетті адам тәрбиелеп дайындау – аса мәртебелі міндет. Адам баласы тек тән-тұрмысы, күш-қуатымен ғана асыл болмыс атанбайды, аталған бұлар адам болуда жай жәрдемші, қосымша көмекші ғана. Адам баласы ең әуелі ақыл-ой, адамгершілік қасиеттерімен ардақты да асыл болмысқа айналмақ. Абайдың толық адам ілімі бекзат болмысымыз бен асыл адамдығымызды сақтап қалудың кепілі. Әл-Фараби армандаған қайырымды қала мен Елбасымыз мұрат еткен мәңгілік ел қауымы ең әуелі ауыз толтырып айтарлықтай АДАМ болып алмағы зор парыз. Абай ілімі арқылы қазақ қауымы рухани сау ұлт, асыл елге айналмақ.

Толық адам ілімі – ұлттық қоғамымыз бен ондағы барша оқушы, тыңдаушы, студент шәкірттерге, сондай-ақ өмірін мәнді, болмысын асыл етуді қалаған күллі қауымға адамгершілік оқулығындай пайдалы, шипалы, игілікті болмақ.

---

# Мазмұны

|                                                                                                 |            |
|-------------------------------------------------------------------------------------------------|------------|
| <b>КІРІСПЕ</b> .....                                                                            | <b>3</b>   |
| <b>I тарау. М.ӘУЕЗОВТІҢ ТОЛЫҚ АДАМ ТАНЫМЫНА БАСТАУ<br/>БОЛҒАН ІЗДЕНІСІ</b> .....                | <b>6</b>   |
| Ақын «Өмірбаянында» баяндалған адамгершілік ой, қалыптар .....                                  | 6          |
| Өлеңдері арқылы түйінделген адамгершілік ойлар .....                                            | 10         |
| Абайдың адамгершілік жайлы ойларын қарасөздері арқылы<br>пайымдау .....                         | 42         |
| Пайдаланылған әдебиеттер тізімі .....                                                           | 75         |
| <b>II тарау. АБАЙДАҒЫ ТОЛЫҚ АДАМ ТАНЫМЫ –<br/>М.МЫРЗАХМЕТҰЛЫНЫҢ ҒЫЛЫМДАҒЫ ЗОР ЖАҒАЛЫҒЫ</b> ---- | <b>76</b>  |
| «Нравственная личность» тұлғасынан – «Толық адам» танымына<br>қарай жалғасқан ізденіс .....     | 76         |
| Адамзатқа ортақ ілімге Абайдың қатынасы .....                                                   | 95         |
| Өркениетті елге айналудың алғышарты – Толық адам танымы .....                                   | 101        |
| Абай айқындаған іргелі, асыл ақиқат .....                                                       | 110        |
| Пайдаланылған әдебиеттер тізімі .....                                                           | 117        |
| <b>III тарау. АБАЙДЫҢ АДАМШЫЛЫҚ, АДАМГЕРШІЛІК ТУРАЛЫ<br/>ТАНЫМЫ</b> .....                       | <b>119</b> |
| Адамзат – қоспа болмыс .....                                                                    | 119        |
| «Адамшылықтың алды – махаббат, ғаделет сезім» .....                                             | 123        |
| Ақылға сәуле қонбаса, хайуанша жүріп күнелтпек .....                                            | 135        |
| Қайырымдылық – жан халі, адамдық негізі .....                                                   | 145        |
| Құдай жолы – адамшылық, адамгершілік .....                                                      | 160        |
| Адам болу мен адамгершіліктің міндетті екі белесі .....                                         | 169        |
| «Түзетпек едім заманды» .....                                                                   | 177        |
| Адамгершілік – ахиреттің де азығы .....                                                         | 184        |
| Толық адам – адамгершілік ілімінің құбылысы .....                                               | 192        |
| Толық адамды жасаушы ақыл қасиетінің сипаты .....                                               | 218        |
| Адамшылықты қалыптастыруда жүректің алар орны .....                                             | 231        |
| Абай өлеңдеріндегі толық адам бейнесі .....                                                     | 245        |
| Толық адам сипатындағы Әбдірахман бейнесі .....                                                 | 264        |
| Пайдаланылған әдебиеттер тізімі .....                                                           | 279        |
| <b>ҚОРЫТЫНДЫ</b> .....                                                                          | <b>281</b> |

*Оқу басылымы*

**Мақсат ӘЛПХАН**

**АБАЙТАНУДЫҢ  
ӨЗЕКТІ  
МӘСЕЛЕЛЕРІ**

*Оқулық*

Басылуға 17.09.2022 қол қойылды.

Пішімі 60х84/16. Көлемі 17,8 б.т.

Таралымы 500 дана

"Дарын баспасы" ЖШС

Алматы қ., Жамбыл к-сі, 114/85,

Бизнес-Сити БО, Литер Д, 510 каб.

e-mail: darynbaspa2022@mail.ru, +7 747 150 11 77